

## TNÚHU NÍ CHÍDÓ TNÙNÍ TÉ LÛCÁ

*Nàcuáa ní ngódó tnùní tnúhu Yá Ndiöxí*

<sup>1</sup> Te vâi ñáyiú chido tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu. <sup>2</sup> Te ñi-u-ni nchaa tnúhu chido tnuní-yu-á<sup>n</sup> cúú-xí tnúhu ní cáhá<sup>n</sup> nchaa cue téé ní xiní ndáá nàcuáa ní cuu ndéé díhna, cue téé ní cáhá<sup>n</sup> tnúhu Yá Ndiöxí. <sup>3</sup> Te yúhú sa ní cuu nduu quide cuendá-í nchaa nàcuáa ní cuu, núu xíá<sup>n</sup> ní sani iní-í tee váha-í nchaa tnúhu-a núú tütú sá cúú-xí yòhó té Těofilú chí ío váha cùu iní-í sá cúú-xí-n, <sup>4</sup> te tē-í cuendá cutnùní iní-n sã sã ndáá cúú-xí nchaa sã ñí dánèhé ñàhá-güedé xii-n.

*Ï<sup>n</sup> espíritú xínú cuèchi núú Yã Ndiöxí càhí-xi sá cá cúú ñ<sup>n</sup> téé cunani Juáá*

<sup>5</sup> Te cútnàhá ní xíndaha té Hèrodés ñáyiú dis-tritú Jùdeá dàvá-á<sup>n</sup> ñí xíndecu ñ<sup>n</sup> dútú ñí xínani-dě Zacàriá, te ní cundihi-dé cue dútú Àbiás. Te ñadìhí-dé ní xínani-a<sup>n</sup> Èlisabét, te ñaha-á<sup>n</sup> ñí cuu-a<sup>n</sup> ñani tnàhá ndi Àrón. <sup>6</sup> Te ndi ndúu-yu ío ní quide ndáá-yu núú Dütú Ndiöxí, chí ní tñí-yu nchaa tnúhu ní cáhá<sup>n</sup>-gá. <sup>7</sup> Te ñá túú ñí ñ<sup>n</sup> dēhe-yu, chí duca<sup>n</sup> tãhú tã Elisabét sá vã cóó dēhe-a<sup>n</sup>, te duca<sup>n</sup> ndi ndúu-yu ío ní sahnú-yu.

<sup>8</sup> Te ñ<sup>n</sup> nduu xínu cuechi tucu té Zacàriá ndihi nchaa cue téé cundihi-dé núú Yã Ndiöxí xiti veñúhu. <sup>9</sup> Te dàvá-á<sup>n</sup> ñí xito ndeé-güedé cuendá

cutnùní iní-güedé nùu ndëdacàa-güedé quíhu núú nàá xítí veñúhu-á<sup>n</sup> cahmi-güedé sá sàhá<sup>n</sup> tnámí, te ní cutnùní sá tē Zacàriá quíhu-dé. Te duca<sup>n</sup> nǐ quide-güedé, chi duca<sup>n</sup> tnàhí ní xóo cada nchaá cue dútú ðavá-á<sup>n</sup>. <sup>10</sup> Te nǐni sàhmi té Zacàriá sá sàhá<sup>n</sup> tnámí núú nàá, te vài vihi ñáyiú xíndecu quehé veñúhu-á<sup>n</sup> càhá<sup>n</sup> ndihí-yu Yá Ndiöxí. <sup>11</sup> Te ní xiní té Zacàriá ì<sup>n</sup> espíritú xínú cuèchi núú Yá Ndiöxí núnǐ-xi xio cùha núú nàá núú càyú sá sàhá<sup>n</sup> tnámí-á<sup>n</sup>. <sup>12</sup> Te òré ní xiní té Zacàriá espíritú-á<sup>n</sup> te ñá ní cùnùnǐ iní-dé nása cada-dé chi ío ní yùhú-dé. <sup>13</sup> Te espíritú-á<sup>n</sup> nǐ xáha<sup>n</sup>-xi:

—Zacàriá, vá yùhú-n chi Yá Ndiöxí ní tedóho-gá tnúhu ní cáhá<sup>n</sup>-n, te vitna coo ì<sup>n</sup> déhe ñadìhí-n tǎ Elisàbét te danàni-n-dé Juàá. <sup>14</sup> Te ío cudíí iní-n, te duca<sup>n</sup> ío vài ñáyiú cudíí iní-yu na càcu-dé. <sup>15</sup> Te ío cudíu-dé núú Yá Ndiöxí, te ni vǎ cóhó-dě ndidí te ni vǎ cóhó-dě ndudí sá nǐ natíu, te sa cundecu ndihí-dé Espíritú Yá Ndiöxí òré cacu-dé. <sup>16</sup> Te ðiu-dé cada te ío vài ñáyiú isràél natuhá-yu ichi Dútú Ndiöxí Yaá cúú Ndiöxí-ó. <sup>17</sup> Te té Juàá-á<sup>n</sup> codonùu-dé núú-gǎ, te cundecu ndihí-dé Espíritú-gá, te taxi tnùnǐ-dé ðàtná ní quide té Èliás. Te nacanu ichi-dé cue tée cùu sacuéhé cuendá cada-güedé sá váha sá cúú-xí cuè tée cuechi, te cuèi cue tée ío sàá iní-xi, te ðiu-dé cada te tnǐ-güedé tnúhu váha, tnúhu càhá<sup>n</sup> ñáyiú quide ndáá. Te duca<sup>n</sup> càda-dé cada túha-dé ñáyiú cuendá cunu cuèchí-yu núú Dútú Ndiöxí —càchí-xi xáha<sup>n</sup>-xi xii-dé.

<sup>18</sup> Te té Zacàriá ní ndúcú tnùhu-dé núú espíritú-á<sup>n</sup>, te xáha<sup>n</sup>-dē:

—¿Te nása cutnùní ndáá iní-í tnúhu càhá<sup>n</sup>-n-í?

Chi yúhú ío ní sahnu-í ndihí ñadìhí-í —càchí-dé xǎha<sup>n</sup>-dě xii-xi.

<sup>19</sup> Te espíritú-á<sup>n</sup> ñí xáha<sup>n</sup>-xi:

—Yúhú cúù-í espíritú nání Gábriél, te xìnu cuechi-í núú Yǎ Ndiǒxí, te mee-gǎ ní táúchíú<sup>n</sup>-gǎ náhà-í tnúhu-gǎ véxi cuèndá cutnùní iní-n nàcuáa cada ñaha-gǎ xii-ndo. <sup>20</sup> Te vitna cuu ñihí-n te vá càhá<sup>n</sup>-gá-n ndèé ná sàá nduu càcu déhe ñadìhí-n, chi ñǎ túú ní sàndáá-ni iní-n tnúhu ní cáhá<sup>n</sup>-í. Te dacuití sǎá nduu càda-xi nacuáa ní cáhá<sup>n</sup>-í-a —càchí espíritú-á<sup>n</sup> xǎha<sup>n</sup>-xi xii-dé.

<sup>21</sup> Te nchaa ñáyiú xǐndecu quehé ndétǔ-yu té Zacàriá, te xǐcuñúhu-yu sá ío cùyaa-dé xití veñúhu.

<sup>22</sup> Te òré ní ndee té Zacàriá, te ñá ní cùu-gǎ cáhá<sup>n</sup> ndihí ñaha-dě xii-yu, te òré-á<sup>n</sup> ñí cutnùní iní-yu sá ñí xiní-dé ì<sup>n</sup> espíritú xínú cuèchi núú Yǎ Ndiǒxí xití veñúhu. Te mee-nǎ ndaha-dé ní quide-dé núu-yu chi ñá ní cùu-gǎ cáhá<sup>n</sup>-dé.

<sup>23</sup> Te ní xìnu nduu ñí xìnu cuechi tè Zacàriá núú Yǎ Ndiǒxí xití veñúhu, te cuánuhú-dé vehe-dé. <sup>24</sup> Te sátá dúcá<sup>n</sup> ñí cuu te ñadìhí-dé tá Elisàbét ní ngúhu<sup>n</sup> déhe-a<sup>n</sup>, te úhú<sup>n</sup> yóó ñà túú tnàhí-gǎ ní quèe-a<sup>n</sup> caca cuu-a<sup>n</sup>, te ní cachí-a<sup>n</sup>: <sup>25</sup> “Mee Dütú Ndiǒxí duha ní cundàhú iní ñáhá-gǎ sá cóó ì<sup>n</sup> déhe-í cuèndá sá vǎ cúú yíchí iní ñáhá ñáyiú xii-í”, duha ní cachí-a<sup>n</sup>.

*Ì<sup>n</sup> espíritú xínú cuèchi núú Yǎ Ndiǒxí càchí-xi sá cácu Jèsús*

<sup>26-27</sup> Te núú ìhú yóó sǎ ñí ngúhu<sup>n</sup> déhe tá Elisàbét, te ní tendaha tùcu Yá Ndiǒxí espíritú nání Gábriél cuáhá<sup>n</sup>-xi ì<sup>n</sup> ñuú nání Nàzarét cuáhá<sup>n</sup> ngoto-xi ì<sup>n</sup> xíchí cuéchí nàni Mariá. Te ñuú-á<sup>n</sup> yíndèhu-xi dis-tritú Galileá. Te xíchí-ǎ<sup>n</sup> sa ní cundáá tnúhu sá

tnăndaha-xi ndihî ï<sup>n</sup> tée nàni Cheé ñanî tnáhá ndïi Dàvií. <sup>28</sup> Te espíritú-á<sup>n</sup> ñi quíhu-xi ndéé xití vehe núú ndécú tă Màriá, te ní xáha<sup>n</sup>-xi:

—¡Cóvãha-n-a<sup>n</sup>! Dútú Ndiöxí ío cùu iní ñáhá-gă xii-n te ndècu ndihî ñaha-gá, te ío-gá xitó ñàha-gá xii-n dácúxí dáva-gá ñáyiu dîhî —càchí espíritú-á<sup>n</sup> xáha<sup>n</sup>-xi.

<sup>29</sup> Dico òré ní xiní tá Màriá espíritú-á<sup>n</sup>, te ní quiyùhú iní-xi sá dúcá<sup>n</sup> ñi cáhá<sup>n</sup> espíritú-á<sup>n</sup>. Te ní sani iní-xi: “¿Ná cuendá duha cáhá<sup>n</sup>-tu espíritú-a-i?”, duha ní sani iní-xi. <sup>30</sup> Te espíritú-á<sup>n</sup> ñi xáha<sup>n</sup>-xi:

—Màriá, vá yùhú-n chi duca<sup>n</sup> ñi nduu táhú-n nõu Yá Ndiöxí. <sup>31</sup> Te vitna ngúhu<sup>n</sup> déhe-n, te na càcu-dé te danàni-n-dé Jèsús. <sup>32</sup> Te ío cunuu-dě, chi Dútú Ndiöxí Yaá ío cunuu cachí-gá sá Dêhe-gá cúú-dě, te dïu-gá cada te cuu-dé ï<sup>n</sup> tée cunuu núú ñáyiu isràél dàtná ní quide-gá ndïi Dàvií. <sup>33</sup> Te taxi tnùnî-dé ñáyiu isràél, te duca<sup>n</sup>-ni cunuu-dé ñi caa ñi quíhî<sup>n</sup> —càchî-xi xáha<sup>n</sup>-xi.

<sup>34</sup> Te tá Màriá ní xáha<sup>n</sup>-xi xîi espíritú-á<sup>n</sup>:

—¿Te nása cuu tnúhu cáhá<sup>n</sup>-n te ñá túú yîi-í-i? —càchî-xi xáha<sup>n</sup>-xi.

<sup>35</sup> Te ní xáha<sup>n</sup> espíritú-á<sup>n</sup>:

—Espíritú Yă Ndiöxí quixi cundecu ndihî-n, te duca<sup>n</sup> Yă Ndiöxí cada-gá ï<sup>n</sup> sá vãha sá cúú-xí-n ná càcu déhe-n. Te Yá Ndiöxí cächî-gá sá ïo cundecu yîñùhu-dé núú-gă, chi Dêhe-gá cúú-dě. <sup>36</sup> Te tnáhá didî-n tă Elisàbét ñúhú dēhe-a<sup>n</sup> cuèi ío ní sahnu-a<sup>n</sup>, te dïu-a<sup>n</sup> cächî-yu sá vă cóó dēhe-a<sup>n</sup> ñi cùu, te vitna sa ní cuu ínú yóó ñúhú dēhe-a<sup>n</sup>. <sup>37</sup> Chi Yá Ndiöxí ndácú-gă quidé-gă nchaa sá vă yôo tnàhî ndàcu cada —cachî-xi xáha<sup>n</sup>-xi.

38 Te tá Màriá ní xáha<sup>n</sup>-xi:

—Yúhú ná cúnú cuèchi-í núú Dütú Ndiöxí, te mee-gă ná cádá ñàha-gá xii-í nàcuáa ní cachí-n — cächí-xi xăha<sup>n</sup>-xi xii espíritú-á<sup>n</sup>.

Te sátá dúcá<sup>n</sup> te espíritú-á<sup>n</sup> ñi xica-xi cuáhá<sup>n</sup>-xi.

*Tá Màriá cuáhá<sup>n</sup> ngoto-xi tá Elisàbét*

39 Te tá Màriá ío ndíhi cuáhá<sup>n</sup>-xi ñ<sup>n</sup> ñuú cáá xiti yucu distrítú Júdeá. 40 Te ní sáá-xi vehe té Zacàriá, te cuánguihu-xi ní dándácõ váha-xi tá Elisàbét.

41 Te òré ní tecú dóho tá Elisàbét ní cáhá<sup>n</sup> tá Màriá, te ní candá déhe-a<sup>n</sup> xiti-a<sup>n</sup>, te òré-á<sup>n</sup> ñi ngúndecu ndíhi-a<sup>n</sup> Espíritú Yă Ndiöxí. 42 Te níhi ní cáhá<sup>n</sup>-a<sup>n</sup>, te xăha<sup>n</sup>-a<sup>n</sup> xii tá Màriá:

—Yá Ndiöxí ío xito ñaha-gá xii-n dácúúxí dáva-gá tnàha díhí-ó, te duca<sup>n</sup>-ni xito-gá cuèi déhe-n. 43 ¿Te ná cúú yúhú ñú véxi coto ñaha yòhó ñáná Yaá cúú Xitohó-í-í? 44 Chi òré-ñi ní tecú dóho-í ní cáhá<sup>n</sup>-n te ní candá-ni déhe-í xiti-í sá cùdíí ìní-dé. 45 Te váha táhú yòhó sá ni sándáá ìní-n, chi dacuitíí sá cádá Dütú Ndiöxí nàcuáa ní cáhá<sup>n</sup> espíritú ní tendaha-gă ní quixi ní cachí tnúhu xii-n nàcuáa cada-gá — cächí-a<sup>n</sup> xăha<sup>n</sup>-a<sup>n</sup> xii tá Màriá.

46 Te ní xáha<sup>n</sup> tă Màriá:

Ío càhnu cuu Dütú Ndiöxí,

47 ío cùdíí ìní-í chi diu-gá taunihnu ñaha-gă xii-í núú ùhú núú ndàhú.

48 Chi ní ndacu ìní ñáhá-gă xii yúhú, te dícó ñ<sup>n</sup> xíchí xínú cuèchi núú-gă cúú-í, te vitna te nchaandi túhú ñáyiú cachí-yu sá ío váha táhù-í.

49 Te Yá Ndiöxí cándòo caa nine ìní-gá, te ío càhnu ñ<sup>n</sup> sá vâha ní quide-gá sá cúú-xi-í.

50 Te cùndahú iní-gá nchaa ñáyiú nèhe sá yíñùhu nùú-gă.

Te duca<sup>n</sup>-ní cuëi ñáyiú sa ndècu ñuyíú-a ndihi ñáyiú vitna véxi.

51 Chi ta quide-gá nchaa sá vă yõo tnàhí ndàcu cada véxi,

te ta dândóo canúú-gă cue ñáyiú quide cahnu mee-xi.

52 Te cue ñáyiú tàxi tnuní ñá túú-gă dáñá-gă taxi tnùnì-yu,

te cue ñáyiú ndàhú ní quide nínu ñaha-gă xií-yu.

53 Te cue ñáyiú ndècu ndihi tnúndòho tnúhu ndàhú ní quide váha ñaha-gă xií-yu,

te cue ñáyiú cuica ñà túú nă ní ñhí-gă-yu cundecu ndihí-yu.

54 Te chindee-gá ñáyiú isràél, ñáyiú xìnu cuechi nùú-gă, te ñá túú dàña nihnu ñaha-gá xií-yu, chi cùndahú iní ñáhá-gă.

55 Chi duca<sup>n</sup> ñí xáha<sup>n</sup>-gă xii ndíi Àbrahám, ndihi cue ñaní tnáhá ndíi.

Duha ní xáha<sup>n</sup> tă Màriá xii tá Elisàbét.

56 Te ní xíndecu tá Màriá dàtná únì yóó ndihi tá Elisàbét te dàtnùnì cuánuhú-xi vehe-xi.

*Ní cacu té Juàá tée dacuàndute ñaha xii ñáyiú*

57 Te ní sáá nduu ñí cacu ñí<sup>n</sup> déhe tée tá Elisàbét.

58 Te nchaa ñáyiú ndècu yatni ndihi-a<sup>n</sup>, ndihi nchaa ñaní tnáhá-á<sup>n</sup> ñí níhí-yu tnúhu nàcuáa ní chindee ñaha Yá Ndiõxí xii-a<sup>n</sup>. Te ío ní cudíi iní-yu cuendá-a<sup>n</sup>. 59 Te núú ùná nduu sá ñí cacu déhe-a<sup>n</sup>, te ní sáhá<sup>n</sup> ñáyiú núú ndécú-á<sup>n</sup> cuendá cuáhă-yu sèñá ñí<sup>i</sup> déhe-a<sup>n</sup>. Te cuìní-yu cunani dèhe-á<sup>n</sup> Zacàriá dàtná nánì tătă ní cùu. 60 Te ní xáha<sup>n</sup> năná dèhe-á<sup>n</sup>:

—Ñáhá, chi Juáá cunani-dě —càchí-a<sup>n</sup> xǎha<sup>n</sup>-a<sup>n</sup> xíi-yu.

<sup>61</sup> Te ní xáhǎ<sup>n</sup>-yu:

—¿Te ná cuendá te ñá túú nì ì<sup>n</sup> ñaní tnáhá-ndó dùca<sup>n</sup> nani-i? —cachí-yu xǎhǎ<sup>n</sup>-yu.

<sup>62</sup> Te ní quidé-yu ndàhá-yu núú tǎtá dēhe-á<sup>n</sup> cuendá cuíní-yu núu nása cuíní méé-dě cunani dēhe-dé. <sup>63</sup> Te ní xícá<sup>n</sup>-dé ì<sup>n</sup> tutú ní chídó tnùní-dé nàcuáa cunani dēhe-dé, te duha ní chídó tnùní-dé: “Juáá cunani-dě”, càchí-xi núú tütú ní tee-dé-á<sup>n</sup>. Te nchaa ñáyiú xǐndecu-á<sup>n</sup> nǐ cuñúhu-yu nàcuáa ní cuu.

<sup>64</sup> Te òré-á<sup>n</sup> nǐ nacáhá<sup>n</sup> té Zacàriá sá nǐ cuu ñìhí-dé ní cùu, te ní ngúíta-dé ní cachí-dé sá ìo càhnu cuu Yá Ndiöxí. <sup>65</sup> Te nchaa ñáyiú xǐndecu yatni ndìhi-dé ní cuñúhu-yu, te nchaa ñáyiú xǐndecu ñìhí xítí yucu distrítú Jùdeá ní níhǐ-yu tnúhu nàcuáa ní cuu. <sup>66</sup> Te nchaa ñáyiú-á<sup>n</sup> ìo vài ní sani iní-yu, te ní xítñàhá-yu:

—¿Ná cúú sǎ cádá tēe-ǎ<sup>n</sup> ndéé idá-gá ná cuèhnu-dé? —càchí-yu xítñàhá-yu.

Te duca<sup>n</sup> nǐ xítñàhá-yu chi Dútú Ndiöxí ndécú ndìhi ñaha-gá xii-dé.

*Té Zacàriá càchí-dé sá ìo càhnu cuu Yá Ndiöxí*

<sup>67</sup> Te té Zacàriá tǎtá tē lihli-á<sup>n</sup> nǐ ngúndecu ndìhi-dé Espiritú Yǎ Ndiöxí te ní cáhá<sup>n</sup>-dé nchaa tnúhu sá nǐ dánèhé ñáhá-gǎ, te ní cachí-dé:

<sup>68</sup> Ío càhnu cuu Dútú Ndiöxí nchoo ñáyiú isràél, chi ní quixi coto ñaha-gǎ xii-o, te cùu-o ñáyiú cùu cuendá-gá, chi dàcácu nihnu ñaha-gǎ xii-o vìtna.

<sup>69</sup> Chi ní tendaha-gǎ ì<sup>n</sup> tēe véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñàní tnáhá ndïi Dàvíí téé ní xinu cuechi nùú-gã ndéé sanaha.

70 Te ñi-ni tnúhu ní cáhá<sup>n</sup> Yã Ndiöxí ní cáhá<sup>n</sup> cue téé ní quide ndáá ní xindecu nùú-gã ñuyíú-a ndéé sanaha.

71 Te ní cachí-güedé sá táúnihnu ñaha-gá xii-o nùú nchàa ñáyiú cùu úhú iní ñáhá, ndihí nùú nchàa ñáyiú ñá túú cùu quiní ndee ñáhá.

72 Te ní xáha<sup>n</sup>-gã sá cündàhú iní ñáhá-gã xii-o, te duca<sup>n</sup> càda-gá chi vá nácuànaa-gá tnúhu ní cáhá<sup>n</sup>-gã ndihí-güedé.

73 Te ñi duca<sup>n</sup> ndùu tnúhu ní xáha<sup>n</sup>-gã xii ndíi Àbrahám sá

74 táúnihnu ñaha-gá xii-o nùú nchàa ñáyiú cùu úhú iní ñáhá, cuendá sá vã yùhú-ó cùnu cuechi-o nùú-gã.

75 Te cada ndáá-ó, te cundecu yíñùhu-o nùú-gã ndi nchàa nduu cundecu-o ñuyíú-a.

Duha ní cachí té Zacàriá.

76 Te xáha<sup>n</sup>-dë xii té líhli-á<sup>n</sup>:

Te yòhó té líhli, cáhá<sup>n</sup> ñáyiú cuendá-n sã cúú-n ñ<sup>n</sup> téé càhá<sup>n</sup> tnúhu Dútú Ndiöxí Yáá ío cùnuu, chi quíhí<sup>n</sup>-n còdonuu-n nùú Yáá cúú Xítohó-ó dátúha-n ñáyiú cuendá cundecu túha-yu òré quexìo-gá.

77 Te cúñaha-n xii ñáyiú isràél sá cuíní-gá cada càhnu iní-gá nchaa cuéchi-yu, te naníhí tàhú-yu.

78 Te duca<sup>n</sup> càda-gá chi ío cùu iní ñáhá-gã xii-o, chi ndéé andiú ñí tendaha-gã ñ<sup>n</sup> téé véxi cuu<sup>n</sup>-dé dandixi túu-dé iní-ó cuendá cutnùní iní-ó nácuáa ndùu cuendá Yã Ndiöxí.



79 Te duca<sup>n</sup> dàndixi túu-dé iní nchaa ñáyi ndècu ichi cuehé ichi duha ta xíta nihnu cuáhá<sup>n</sup> cuèndá nucúnu ichí-yu ì<sup>n</sup> ichi váha.

Duha ní xáha<sup>n</sup> tẽ Zacàriá xii déhe-dé.

80 Te té lĩhli-á<sup>n</sup> tá sàhnu-dé, te ta chĩndee chitúu ñaha Yã Ndiõxí xii-dé cuáhá<sup>n</sup>, te ní xĩndecu-dé xití yucu ndéé ní sáá nduu ñĩ ngũita-dé ní cáhá<sup>n</sup>-dé núu cuè ñáyi isràél tnúhu Yá Ndiõxí.

## 2

### *Ní cacu Jèsús (Mt. 1:18-25)*

1 Te dàvá-á<sup>n</sup> ñĩ táúchíú<sup>n</sup> tẽ Àugustú Cèsár nucódó tnùnĩ nchaa ñáyi nació<sup>n</sup> yĩndàha-dé. 2 Te xéhé sã dĩhnanuu ñĩ nucódó tnùnĩ ñáyi, te dũ-ni dàvá-á<sup>n</sup> ñĩ cunuu té Cìreniú distritú Siríá. 3 Te nchaa ñáyi ní nataká-yu ñúú núú ñĩ cacú-yu cuèndá nucódó tnùnĩ-yu. 4 Núu xĩá<sup>n</sup> ní quee té Chèè ñúú Nazàrèt ì<sup>n</sup> ñúú yĩndèhu distritú Galileá, te cuáhá<sup>n</sup>-dé ñúú Bèlén ì<sup>n</sup> ñúú yĩndèhu distritú Jùdeá, chi xíá<sup>n</sup> ñĩ cuu ñúú ndíi Dàvíí, te dũ-ni ñanĩ tnáhá tẽ Chèè-á<sup>n</sup> ñĩ cuu ndíi. 5 Núu xĩá<sup>n</sup> cuáhá<sup>n</sup>-dé ndéé ñúú Bèlén nucódó tnùnĩ-dé, te tnáhá tá Màriá xíchí ñĩ cundáá tnúhu sá tnãndaha ndih-dé cuáhá<sup>n</sup> ndih ñaha-dẽ, te sa ñùhu déhe-xi. 6 Te ñini cùyaá-yu ñúú Bèlén-á<sup>n</sup> ñĩ sáá òré cacu déhe-xi. 7 Te ní cacu déhe díhna-xi, te ní chidúcú<sup>n</sup>nuu-xi dóó, te ní sacá<sup>n</sup> ñáhá-xí ì<sup>n</sup> vehe núu cúú vèhe qui<sup>t</sup>i, chi ñá túú ní ñĩhí-yu vehe coó-yu.

*Cue espíritú xínú cuèchi núú Yã Ndiõxí ndih cue toli.*

8 Te yatni ñuú-á<sup>n</sup> xĩndecu ñ<sup>n</sup> ũú toli ndéé-güedé mbéé-güedé ndécú-güedé majadá niú-á<sup>n</sup>. 9 Te uu<sup>n</sup>ni ní quexìo ñ<sup>n</sup> espíritú xínú cuèchi núú Yá Ndiõxí, te Yá Ndiõxí ní quide-gá ní dáyèhé-xi ní càndéé núú xĩndecu-güedé, te ní yùhú víhí-güedé. 10 Te ní xáha<sup>n</sup> espíritú-á<sup>n</sup>:

—Vá yùhú-ndó, chi nàha-í ñ<sup>n</sup> tnúhu váha véxi sá cúú-xí-ndó, te ío cudíí ìní-ndó ndìhi nchaa ñáyiu. 11 Chi vitna ní cacu ñ<sup>n</sup> téé dàcácu nihnu ñaha xìi-ndo núú ùhú núú ndàhú ñuú ndíi Dàvíí, te téé-á<sup>n</sup> cúú-dé Xítóhó Jesucrístú. 12 Te dàtná ñ<sup>n</sup> señá te naníhí-ndó tē lĩhli-á<sup>n</sup> yídúcú<sup>n</sup> nuu-dé dóó cáá-dé ñ<sup>n</sup> vehe quiti —càchí-xi xáha<sup>n</sup>-xi xìi-güedé.

13 Te òré-á<sup>n</sup> ñí quexìo cuéhé víhí espíritú véxi cuu<sup>n</sup> andi<sup>u</sup> ñí naníhí tnáhá-xí ndìhi espíritú-á<sup>n</sup>, te ní ngüíta-xi ní chiñuhu-xi Yá Ndiõxí, te càchí-xi:

14 ¡Ío càhnu cuu Yá Ndiõxí Yaá ndécú àndi<sup>u</sup>, te na cùndecu váha-ni nchaa ñáyiu cùu ìní méé-gá! Duha càchí cue espíritú-á<sup>n</sup>.

15 Te òré cuánda<sup>a</sup> cue espíritú-á<sup>n</sup> andi<sup>u</sup>, te ní ngüíta cue toli-á<sup>n</sup> xĩtnàha-güedé:

—Na quihí<sup>n</sup>-ó ñùú Bèlén quini-ó nàcuáa ní cuu, chi Dútú Ndiõxí sa ní cachí tnúhu-gá —càchí-güedé xĩtnàha-güedé.

16 Te ní tñi-güedé ichi súní ndìhi cuáhá<sup>n</sup>-güedé, te ní naníhí-güedé tá Màriá ndìhi té Chéé, ndìhi té lĩhli-á<sup>n</sup> cáá-dé xití ñ<sup>n</sup> vehe quiti. 17 Te òré ní xiní ñáhá-güedé te ní xáha<sup>n</sup>-güedé xií-yu nàcuáa ní xáha<sup>n</sup> espíritú-á<sup>n</sup> xii-güedé cuèndá té lĩhli-á<sup>n</sup>. 18 Te nchaa ñáyiu ní tecú dóho-xi ní cuñúhu-yu nàcuáa ní cáhá<sup>n</sup>-güedé. 19 Dico tá Màriá chi ñùhu nahi-ni ìní-xi, te dícó-ni sàni ìní-xi cuèndá nchaa

tnúhu-án. <sup>20</sup> Te cue toli-ǎ<sup>n</sup> nǐ natn<sup>ii</sup>-güedé ichi, te ta xǐtnàha-güedé cuánuhú sá ïo càhnu cuu Yá Ndiöxí cuëndá nchaa tnúhu ní xíndedóho-güedé, ndihí cuëndá nchaa sá nǐ xiní-güedé, chi cuëndá sá ndàá ní cuu nchaa nàcuáa ní tecú tnúhu-güedé.

*Ndècá-yu Jèsús cuáhá<sup>n</sup> veñúhu*

<sup>21</sup> Te núú ùná nduu sá nǐ cacu té lǐhli-án, te ní sáha-güedé señá ñii-dé, te ní dánání ñàha-güedé Jèsús xii-dé, ñu-ni nàcuáa ní xáha<sup>n</sup> espíritú xínú cuèchi núú Yá Ndiöxí xii tá Màriá ndéé cútnàhá vátá ngǔhu<sup>n</sup>-gá-dé xití-xi.

<sup>22</sup> Te sátá nǐ tnahá nduu, ndùu ïi-yu nàcuáa càhá<sup>n</sup> nchaa tnúhu ní chídó tnùní ndíi Moisés, te ndècá-yu té lǐhli-án cuáhá<sup>n</sup> ñuú Jerusàlén cuëndá quee túu-dé núú Dütú Ndiöxí. <sup>23</sup> Te duca<sup>n</sup> nǐ quidé-yu, chi duca<sup>n</sup> càhá<sup>n</sup>-xi núú tütú Yá Ndiöxí sá ncháá làndú té na càcu díhna quetúu-güexi núú-gǎ cuëndá cundecu-ná-güexi cuëndá-gá. <sup>24</sup> Te ní quidé-yu nàcuáa càhá<sup>n</sup> Yá Ndiöxí núú tütú-gá núú càchí-xi: “Canehe-ndo úú lõmá àdi úú cǔcu quíhí<sup>n</sup> nduu táhú ñáhá Yá Ndiöxí”, duha càhá<sup>n</sup>-gá núú tütú-gá.

<sup>25</sup> Te dàvá-á<sup>n</sup> ndécú ñ<sup>n</sup> té nàni Mió ñuú Jerusàlén. Te ío váha iní-dé, te chiñuhu-dé Yá Ndiöxí, te ndètu-dé sáá nduu chindee ñaha Yá Ndiöxí xii ñáyiu isràél. Te ndècu ndihí té Mió-á<sup>n</sup> Espíritú Yá Ndiöxí. <sup>26</sup> Te sa ní xáha<sup>n</sup>-xi xii-dé sá vǎ cùu-ni-dé, chi dacuítí quíní-dé Crístú Yaá tendaha Yá Ndiöxí quixi ñuyíu-a. <sup>27</sup> Te té-á<sup>n</sup> ndécá ñàha Espíritú Yá Ndiöxí xii-dé cuáhá<sup>n</sup> veñúhu càhnu sá ïo cùnuu. Te cuáhá<sup>n</sup>-yu ndihí Jèsús veñúhu-á<sup>n</sup> cuëndá cadá-yu ndihí-gá nàcuáa càhá<sup>n</sup> tnúhu ní chídó tnùní ndíi

Moisés. <sup>28</sup> Te òré ní sáá-yu, te té Mió-á<sup>n</sup> nǐ nguídèhé-dé Jèsús, te ní cáhá<sup>n</sup>-dé sá ïo càhnu cuu Yá Ndiöxí, te ní xáha<sup>n</sup>-dě xii-gá:

<sup>29</sup> Yòhó Dútú Ndiöxí sa ní cuu dañà-n cùú-í vitna, chi sa ní quide-n nàcuáa ní cachí-n xii yúhú téé xìnu cuechi núú-n.

<sup>30</sup> Chi sa ní xiní núù-í Yaá dàcácu nihnu ñaha xii ñáyiu núú ùhú núú ndàhú vitna.

<sup>31</sup> Te Yaá ní tendaha-n vëxi núú ndécú nchàa ñáyiu ñuyíú-a.

<sup>32</sup> Te cùu-gá dàtná ì<sup>n</sup> ñuhú, chi dandìxi túu-gá iní ñáyiu cuendá cutnùní iní-yu cuendá Yá Ndiöxí cuèi ñá díú ñáyiu isràél cúũ-yu.

Te ñu-gá cada, te canehe ñáyiu dava-gá ñuú sá yíñuhu núú ñáyiu isràél chi ñu ñáyiu isràél cúũ-yu ñáyiu cùu cuendá-n.

Duha ní xáha<sup>n</sup> tē Mió xii Yá Ndiöxí.

<sup>33</sup> Te té Chèé ndìhi nǎná Jèsús ní cuñúhu-yu tnúhu ní cáhá<sup>n</sup> té Mió cuendá-gá. <sup>34</sup> Te dǎtnùní té Mió ní xicá<sup>n</sup> táhú-dě núú Yá Ndiöxí cuendá-yu, te xáha<sup>n</sup>-dě xii tá Màriá nǎná Jèsús:

—Cundedóho tnúhu na càhá<sup>n</sup>-í-a, té lǐhli-a ní nduu táhú-dě nacanu ichi-dé dava ñáyiu isràél ichi Yá Ndiöxí, te davá-yu vá tnǐ<sup>n</sup>-yu tnúhu cáhá<sup>n</sup>-dé, te ñáyiu-á<sup>n</sup> cuíta nihnú-yu, te cada-dé nàcuáa cutnùní iní ñáyiu sá Yá Ndiöxí ní tendaha ñaha-gá xii-dé, dico vá quindáá iní-yu, chi daquèe tíhú ñáhã-yu xii-dé. <sup>35</sup> Te duca<sup>n</sup> te cutnùní nàcuáa sàni iní ì<sup>n</sup> ì<sup>n</sup> ñáyiu. Dico sá cúú-xí yòhó chi ío cada ndàhú-xi iní-n, chi sùúni dàtná sá nǐ nícuèhé iní-n càda-xi — cachí-dé xáha<sup>n</sup>-dě xii tá Màriá.

<sup>36</sup> Te xiá<sup>n</sup> ndécú tnàhá ì<sup>n</sup> ñaha càhá<sup>n</sup> tnúhu Yá Ndiöxí nání-á<sup>n</sup> Àná, te tǎtá-a<sup>n</sup> ní xínani-dě Fànuél

ñaní tnáhá ndïi Àsér. Te ñaha-á<sup>n</sup> sa ní sahnu vïhi-a<sup>n</sup>, te cuechi-ni-a<sup>n</sup> ñí tnándaha-a<sup>n</sup> te úsá-ni cuíá ñí xíndecu-a<sup>n</sup> ndïhi yïi-a<sup>n</sup>, <sup>37</sup> te ní quendóo queé-a<sup>n</sup>, te sa ñùhu-a<sup>n</sup> cúmídícó cùmí cuíá-a<sup>n</sup>. Te ñá túú ní xóo quee-a<sup>n</sup> veñúhu càhnu sá ïo cùnuu, chi nduu niú ní xóo chiñuhu-a<sup>n</sup> Dútú Ndiöxí, te áma ñá túú tnàhí ná ní xóo caxi-a<sup>n</sup> ní xóo cáhá<sup>n</sup> ndïhi-a<sup>n</sup> Yá Ndiöxí. <sup>38</sup> Te ðiu-ni òré ndécü-yu ndïhi Jèsús ní quexìo-a<sup>n</sup> núü-yu, te ní ndacá<sup>n</sup> táhú-á<sup>n</sup> núü Yá Ndiöxí cuendá sá ñí xiní-a<sup>n</sup> Jèsús, te dàtnùnì ní ngüíta-a<sup>n</sup> cáhá<sup>n</sup> váha-a<sup>n</sup> cuendá-gá núú nchàa ñáyiü, ñáyiü ndètu quiní sáá nduu dàcácu Yá Ndiöxí ñáyiü Jerusalén núú tnündòho tnúhu ndàhú.

### *Cuánuhú-yu ñuú Nazàrét*

<sup>39</sup> Te sáta ñí quidé-yu nchaa nàcuáa cáhá<sup>n</sup> tnúhu Yá Ndiöxí, te cuánuhú-yu ñuú Nazàrét núú ndécú tnàhí-yu, te ñuú-á<sup>n</sup> yíndèhu-xi distritú Galileá. <sup>40</sup> Te té líhli nàni Jesús-á<sup>n</sup> tá sàhnu-dé, te ta nihí ndéé-dé cuáhá<sup>n</sup>, te duca<sup>n</sup> ïo váha ta sáá sá xiní tnùnì-dé cuáhá<sup>n</sup>, chi Yá Ndiöxí ndécú ndïhi ñaha-gá xii-dé.

### *Jèsús ndécú-gã veñúhu*

<sup>41</sup> Te ndi tnahá cuíá ñí xóo quíhí<sup>n</sup> té Chèé ndïhi năná Jèsús vico pàscuá ñuú Jerusalén. <sup>42</sup> Te cútnàhá ní chítú Jèsús úxúú cuíá-gã, te cuáhá<sup>n</sup>-yu ndïhi-gá ñuú Jerusalén vico pàscuá, chi duca<sup>n</sup> tnàhí quidé-yu. <sup>43</sup> Te òré ní yáha vico, te ní natnïí-yu ichi cuánuhú-yu, te ní quendóo-gá ñuú Jerusalén, te ni năná-gã, te ni té Chèé ñá túú ní xiní ní quendóo-gá. <sup>44</sup> Chi ní sani iní-yu sá ñútnàhá-gá tnuú nchaa ñáyiü ní sáhá<sup>n</sup> vico cuánuhú. Te ní xúhu<sup>n</sup>-yu ï<sup>n</sup> nduu ichi ta ndücu tnúhu-yu-gá núú nchàa ñaní tnáhã-yu, ndïhi núú nchàa ñáyiü xiní

tnáhá ndìhí-yu, <sup>45</sup> te ñá túú ní nàníhí ñáhă-yu xii-gá. Núu ní nacuìcò-yu cuánuhú tucú-yu ñúú Jerusàlén cuèndá yàcá<sup>n</sup> nanducu ñàhá-yu xii-gá.

<sup>46</sup> Te núú ùní nduu sá ñí dana núú ñáhă-yu xii-gá, te ní naníhí ñáhă-yu nùcòo-gá xití veñúhu càhnu sá ïo cùnuu tnuú cue téé dàcuaha ñaha xii-yu nchaa tnúhu ní chídó tnùní ndíi Moisés, te ndèdóho ñaha-gă xii-güedé, te nándi sá ndúcú tnúhu-gá núú-güedé. <sup>47</sup> Te nchaa cue téé xîndedóho ñaha xii-gá xîcunúhu-güedé sá ïo váha sàá sá xîní tnùní-gá, te ïo váha ñihí-gá tnúhu nàdanchocáva-gá. <sup>48</sup> Te òré ní xîní ñáhá tĕ Chèé ndihî năná-gă xii-gá, te ïo ní cuñúhu-yu, te ní xáha<sup>n</sup> năná-gă xii-gá:

—Yòhó déhe-í, ¿ná cuèndá duca<sup>n</sup> ñí quide ñaha-n xii-ndí? Te tătá-n ndihî yúhú ndihú iní-ndí xícá nànducu ñaha-ndí xii-n —càchí-xi xăha<sup>n</sup>-xi xii-gá.

<sup>49</sup> Te ní xáha<sup>n</sup> Jèsús xií-yu:

—¿Ná cuèndá nánducu ñaha-ndo? ¿Náa ñá túú xîní-ndó să núú chíú<sup>n</sup> Tătà-í tàú-í caca cuu-í-ă<sup>n</sup>? —càchí-gá xăha<sup>n</sup>-gă xií-yu.

<sup>50</sup> Dico mèe-yu ñá túú ní tècú tnùní-yu nàcuáa ní xáha<sup>n</sup>-gă.

<sup>51</sup> Te sátá dúcá<sup>n</sup> te cuánuhú ndihî ñàhá-yu xii-gá ñúú Nazàrét, te ïo ní sándáá iní ñáhă-gă xií-yu. Te nchaa sá ñí quide-gá-á<sup>n</sup> ñí xúhu<sup>n</sup> nahi-ni iní năná-gă. <sup>52</sup> Te Jèsús duca<sup>n</sup>-ni ta sàhnu-gá cuáhá<sup>n</sup>, te ta sàá-gá sá xîní tnùní-gá cuáhá<sup>n</sup>, te duca<sup>n</sup> cùdiu-gá núú Yă Ndiõxí, ndihî núú nchàa ñáyiú.

### 3

*Té Juàá téé dàcuandute ñaha xii ñáyiú càhá<sup>n</sup>-dé*

*tnúhu Yá Ndiõxí xití yucu*

(Mt. 3:1-12; Mr. 1:1-8; Jn. 1:19-28)

<sup>1</sup> Te ní cuu sáhú<sup>n</sup> cuiá sã yíndàha té Tìberiu cuéhé nació<sup>n</sup>, te dàvá-á<sup>n</sup> ní cunuu té Pilatú distritú Jùdeá, te té Hèrodés ní cunuu-dě distritú Galileá, te ñaní-dé té Lìpé ní cunuu-dě distritú Itùreá ndihì ingá distritú nání Tràconité, te té Lisàniás ní cunuu-dě distritú Abiliniá. <sup>2</sup> Te té Ànás ndihì té Caifás ní cuu-güedé dútú cùnùu. Te dàvá-á<sup>n</sup> ní cáhá<sup>n</sup> ndihì ñaha Yã Ndiõxí xii té Juàá déhe té Zacàriá xití yucu sá quihí<sup>n</sup>-dé cáhá<sup>n</sup>-dé tnúhu-gá núú ñáyiu. <sup>3</sup> Te té Juàá ní yáha-dé nchaa ñuú cáá yàtni yúte Jòrdán, te xáha<sup>n</sup>-dě xii nchaa ñáyiu:

—Chí dándìxi túu iní sá ñà túú quide váha-ndo, te dañà-ndo nchaa ichi cuehé ichi duha ndècu-ndo, te cuandute-ndo, te duca<sup>n</sup> te cada càhnu iní Yã Ndiõxí nchaa yíca cuèchi-ndo —duha ní xáha<sup>n</sup>-dě xií-yu.

<sup>4</sup> Te duca<sup>n</sup> ní quide-dé chi ní quee ndáá-xi nàcuáa ní chídó tnùnì ndí Chàjá téé ní xóo cáhá<sup>n</sup> tnúhu Yá Ndiõxí ndéé sanaha núú tütú ndí núú càchí-xi:

Tècú càhá<sup>n</sup> níhi ì<sup>n</sup> téé yìhi xití yucu, te xáha<sup>n</sup>-dě xii ñáyiu:

“Chí dáñá nchaa ichi cuehé ichi duha ndècu-ndo, te tnì<sup>n</sup>-ndo ìchi váha,

te duca<sup>n</sup> càda-ndo cuendá cundecu túha-ndo, chi véxi Yaá ío cùnùu.

<sup>5</sup> Te nchaa núú cùnú nachítú,

te nchaa tìndúú ndihì nchaa yucu ngoyo nihnu cuendá nduu ndáá,

te nchaa ichi ñá túú cuáhá<sup>n</sup> ndáá nduu ndáá,

te nchaa ichi ñá túú càváha nduu váha.

**6** Te nchaa ñáyiú ñuyíú-a níhĩ-yu tnúhu sá Yă Ndiõxí véxi-gá dàcácu nihnu ñaha-gă xií-yu núú ùhú núú ndàhú.”

Duha ní chídó tnùní ndíi Chàiaá núú tùtú ndíi.

**7** Te òré ní xica ñáyiú cuáhá<sup>n</sup>-yu cuèndá dacuàndute ñaha té Juàá xií-yu, te ní xáha<sup>n</sup>-dě:

—¡Nchaa nchòhó cúú-ndó dàtná ì<sup>n</sup> cóo děé<sup>n</sup> chi ío cuihna ìní-ndó! ¿Te nása ní cuu núú tnàhá nchòhó ndúcú-ndó nàcuáa cācu nihnu-ndo núú tnùndòho cahnu vihi sá tá cūyatni ñaha xii-ndo véxi-i? **8** Te chí cādá vǎha vitna cuèndá duca<sup>n</sup> cùtnuní sá ñí dáñá-ndó nchàa ichi cuehé ichi duha ndècu-ndo. Te vá cāchí-ndó sǎ ìo cāhnu cuu-ndo cuendá sá cúú-ndó ñàní tnáhá ndíi Àbrahám, chi cuèi ndéé yúú te ndacu Yá Ndiõxí ndada-gá ñáyiú te cuú-yu ñaní tnáhá ndíi Àbrahám. **9** Te caá chi ndècu túha-xi sá quèhndé-xi nchaa yutnu sá ñà túú cāváha sávídí-xi, chi nchaa yutnu-á<sup>n</sup> tèhndé-xi te cuánguee-xi núú ñùhú càyú-xi. Te duha sǎtnahá-xi ndoho nchaa ñáyiú ñá túú quide váha, chi nchaa ñáyiú duca<sup>n</sup> ñà túú quide váha cūú-yu dàtná nchaa yutnu sá ñà túú cāváha sávídí-xi. —cāchí-dé xǎha<sup>n</sup>-dě xií-yu.

**10** Te ní xícá<sup>n</sup> tnúhu-yu núú-dě, te xǎhǎ<sup>n</sup>-yu:

—¿Te nása cada-ndí vái<sup>n</sup>? —cāchí-yu xǎhǎ<sup>n</sup>-yu xii-dé.

**11** Te xǎha<sup>n</sup>-dě:

—Te núú ndědacàa-ndo ndecu ndihí-ndo úú dóó te cuáñaha-ndo ì<sup>n</sup> xii ñáyiú ñá túú ndècu ndihí, àdi núú ndècu ndihí-ndo sá nchító-ó te cuáha-ndǒ-yu na cāxí-yu —cāchí-dé xǎha<sup>n</sup>-dě xií-yu.

**12** Te ní quexìo ì<sup>n</sup> úú cue tée cuihna ìní-xi quide cobrá ñáhá xii ñáyiú cuèndá impuèstú cuèndá



cuàndute-güedé, te ní xícá<sup>n</sup> tnúhu-güedé núú tē Juáá, te xáha<sup>n</sup>-güedě:

—Mèstrú, ¿te nása cada-ndí cuendá cuu váha iní Yă Ndiöxí-i? —càchí-güedé xáha<sup>n</sup>-güedě xii-dé.

<sup>13</sup> Te té Juáá ní xáha<sup>n</sup>-dě:

—Vá cuídó-ndó càda cobrá-ndó ñăyiu —càchí-dé xáha<sup>n</sup>-dě xii-güedé.

<sup>14</sup> Te tnàhá ñ<sup>n</sup> úú cue tée cùu sandadú xĩndecu-á<sup>n</sup> ñí xícá<sup>n</sup> tnúhú-güedé núú tē Juáá, te xáha<sup>n</sup>-güedě:

—Te nchúhú ¿nása cada-ndí cuendá cuu váha iní Yă Ndiöxí-i? —càchí-güedé xáha<sup>n</sup>-güedě xii-dé.

Te ní xáha<sup>n</sup> tē Juáá:

—Vá quéndé-ndó sã néhé tnàha ñăyiu-ndo, te ni vă dácàa díquí-ndö-yu ñ<sup>n</sup> sá ñà túú ñă quídé-yu, te nduu vétú iní-ndó nàcuáa ñùhu yáhu-ndo —càchí-dé xáha<sup>n</sup>-dě xii-güedé.

<sup>15</sup> Te nchaa ñăyiu xĩndetu sá quíxí Crìstú sàni ñ<sup>n</sup> sani úú iní-yu núu sá díú Crìstú Yaá tendaha Yă Ndiöxí quixí ñuyíú-a cùu te Juáá àdi ñáhá. <sup>16</sup> Dico té Juáá ní cáhá<sup>n</sup> ndodo-dé núú-yu ncháá-yu, te xáha<sup>n</sup>-dě:

—Na càchí tnúhu ndáá-í xii-ndo sã yùhú véxi-í sá cuendá-ñi dacuàndute ñaha-í xii-ndo dàtná ní cachí Yă Ndiöxí, dico nchìcú<sup>n</sup> ingá tée véxi, te tée-á<sup>n</sup> taxi-dé Espiritú Yă Ndiöxí cundecu ndihi-ndo, te cùu-xi datná ñ<sup>n</sup> ñuhú, chi ndada ndoo ndada nine-xi iní-ndó. Te tée-á<sup>n</sup> ño-gá cúnùu-dé dàcúúxí yùhú, chi yùhú cùu-í ñ<sup>n</sup> tée duu<sup>n</sup> duu<sup>n</sup> ñá túú tàu-í nandaxi-ĩ cuèdicó ñ<sup>n</sup> chàu-dé dico quide-í chiu<sup>n</sup>-dé.

<sup>17</sup> Te tée-á<sup>n</sup> sa véxi túha-dé sá cádá dè<sup>n</sup> ñaha-dé xii-o dàtná quídé ñăyiu ndàda ndoo triú, chi ñăyiu-á<sup>n</sup> sa nèhe túha-ná-yu yaxí<sup>n</sup>-yu òré náñani cuendá ndada ndoo-yu, te òré ndádá ndòó-yu triú-á<sup>n</sup> te

dàquee ðí<sup>n</sup>-yu mihi-xi, te tàxúha-yu mee-nă triú-á<sup>n</sup>, te mihi-xi-á<sup>n</sup> sáhmi-yu. Te dàtná quidě-yu mihi triú-á<sup>n</sup> duca<sup>n</sup> sãtnahá-xi cada ñaha tée-á<sup>n</sup> xii nchaa ñáyiu ñá túú quide váha, chi daquihí<sup>n</sup> ñáhá-dě xii-yu núú ñùhú núú càyú, te ñuhú-á<sup>n</sup> ñà túú tnàhí ndàhvá —càchí-dé xãha<sup>n</sup>-dě xii-yu.

<sup>18</sup> Te titní víhí-gă tnúhu váha ní xáha<sup>n</sup> tẽ Juàá xii-yu òré ní dásàhú ñáhá-dě. <sup>19</sup> Te ní cáhá<sup>n</sup>-dé dóho té Hèrodés cuendá sá ndécá-dě ì<sup>n</sup> ñaha nàni Herodiás ñaha ní cãndeca ñani-dé té Lìpé, te ní xáha<sup>n</sup>-dě cuendá nchaa dava-gá sá cuèhé sá dúhá quide-dé. <sup>20</sup> Dico té Hèrodés ñá túú ní quide cuendá-dé tnúhu ní cáhá<sup>n</sup> té Juàá, chi nèhé-gá tucu ní quide-dé, chi da vecaá ní chihi-dé té Juàá.

### *Sàndute Jesús*

*(Mt. 3:13-17; Mr. 1:9-11)*

<sup>21</sup> Te òré dácúandute té Juàá nchaa ñáyiu, te tnàhá Jèsús ní dácúandute ñaha-dé xii-gá. Te nini càhá<sup>n</sup> ndihí-gá Dútú Ndiõxí ní nacaá<sup>n</sup> andiu, <sup>22</sup> te ní quee Espíritú Yă Ndiõxí véxi cuu<sup>n</sup> túu-xi, te càa-xi datná cáá ì<sup>n</sup> lómá, te òré-á<sup>n</sup> ñí tecú ní cáhá<sup>n</sup> Yă Ndiõxí ndéé andiu, te xãha<sup>n</sup>-gă xii Jèsús:

—Yòhó cúú-n Dèhe-í téé ío cùu iní-í, te ío cùdí iní ñáhà-í xii-n —càchí-gá xãha<sup>n</sup>-gă xii Jèsús.

### *Cue téé ní xíndecu dǐhna-gá ñuyíú-a dàcúúxí Xĩtohó Jesucristú*

*(Mt. 1:1-17)*

<sup>23</sup> Te ndècu Jesús dàtná ócó úxí cuíá-gă cútnàhá ní chisaha-gă chiú<sup>n</sup> ní táhú Tãtá-gă Dútú Ndiõxí cada-gá. Te ní cuu-gá déhe té Chèè chi duca<sup>n</sup> sàni iní ñáyiu ñuyíú-a. Te té Chèè-á<sup>n</sup> ñí cuu-dé déhe té Èlí, <sup>24</sup> te téé-á<sup>n</sup> ñí cuu-dé déhe té Mátát. Te té

Màtát-án nǐ cuu-dé déhe té Lèví, te té-án nǐ cuu-dé déhe té Mèlquí. Te té Mèlquí-án nǐ cuu-dé déhe té Jàná, te té-án nǐ cuu-dé déhe té Chèé. <sup>25</sup> Te té Chèé-án nǐ cuu-dé déhe té Matàtiás, te té-án nǐ cuu-dé déhe té Àmós. Te té Àmós-án nǐ cuu-dé déhe té Nàhúm, te té-án nǐ cuu-dé déhe té Èslí. Te té Èslí-án nǐ cuu-dé déhe té Nagàí, <sup>26</sup> te té-án nǐ cuu-dé déhe té Màát. Te té Màát-án nǐ cuu-dé déhe té Matàtiás, te té-án nǐ cuu-dé déhe té Semèí. Te té Semèí-án nǐ cuu-dé déhe té Chèé, te té-án nǐ cuu-dé déhe té Jùdá. <sup>27</sup> Te té Jùdá-án nǐ cuu-dé déhe té Jòaná, té té-án nǐ cuu-dé déhe té Rèsá. Te té Rèsá-án nǐ cuu-dé déhe té Zorobàbél, te té-án nǐ cuu-dé déhe té Salàtiél. Te té Salàtiél-án nǐ cuu-dé déhe té Nèrí, <sup>28</sup> te té-án nǐ cuu-dé déhe té Mèlquí. Te té Mèlquí-án nǐ cuu-dé déhe té Àdí, te té-án nǐ cuu-dé déhe té Còsám. Te té Còsám-án nǐ cuu-dé déhe té Elmòdám, te té-án nǐ cuu-dé déhe té Ęr. <sup>29</sup> Te té Ęr-án nǐ cuu-dé déhe té Jòsué, te té-án nǐ cuu-dé déhe té Elièzér. Te té Elièzér-án nǐ cuu-dé déhe té Jòrím, te té-án nǐ cuu-dé déhe té Màtát. <sup>30</sup> Te té Màtát-án nǐ cuu-dé déhe té Lèví, te té-án nǐ cuu-dé déhe té Mió. Te té Mió-án nǐ cuu-dé déhe té Jùdá, te té-án nǐ cuu-dé déhe té Chèé. Te té Chèé-án nǐ cuu-dé déhe té Jònán, te té-án nǐ cuu-dé déhe té Eliàquím. <sup>31</sup> Te té Eliàquím-án nǐ cuu-dé déhe té Mèleá, te té-án nǐ cuu-dé déhe té Mainán. Te té Mainán-án nǐ cuu-dé déhe té Màtatá, te té-án nǐ cuu-dé déhe té Nàtán. <sup>32</sup> Te té Nàtán-án nǐ cuu-dé déhe té Dàvíí, te té-án nǐ cuu-dé déhe té Isàí. Te té Isàí-án nǐ cuu-dé déhe té Òbéd, te té-án nǐ cuu-dé déhe té Bòóz. Te té Bòóz-án nǐ cuu-dé déhe té Sàlmón, te té-án nǐ cuu-dé déhe té Naàson. <sup>33</sup> Te té Naàson-án nǐ cuu-dé déhe té Aminàdáb, te té-án nǐ cuu-dé déhe té Àrám. Te

té Àrám-án nĩ cuu-dé déhe té Èsróm, te té-án nĩ cuu-dé déhe té Fàrés. Te té Fàrés-án nĩ cuu-dé déhe té Jùdá, <sup>34</sup> te té-án nĩ cuu-dé déhe té Jàcób. Te té Jàcób-án nĩ cuu-dé déhe té Isàác, te té-án nĩ cuu-dé déhe té Àbrahám. Te té Àbrahám-án nĩ cuu-dé déhe té Tàré, te té-án nĩ cuu-dé déhe té Nàcór. <sup>35</sup> Te té Nàcór-án nĩ cuu-dé déhe té Sèrúg, te té-án nĩ cuu-dé déhe té Ragàú. Te té Ragàú-án nĩ cuu-dé déhe té Pèlég, te té-án nĩ cuu-dé déhe té Hèbér. Te té Hèbér-án nĩ cuu-dé déhe té Sàlá, <sup>36</sup> te té-án nĩ cuu-dé déhe té Cainán. Te té Cainán-án nĩ cuu-dé déhe té Arfàxád, te té-án nĩ cuu-dé déhe té Sëm. Te té Sëm-án nĩ cuu-dé déhe té Nöé, te té-án nĩ cuu-dé déhe té Làméc. <sup>37</sup> Te té Làméc-án nĩ cuu-dé déhe té Matusalén, te té-án nĩ cuu-dé déhe té Ènóc. Te té Ènóc-án nĩ cuu-dé déhe té Jàréd, te té-án nĩ cuu-dé déhe té Mahalàleél. Te té Mahalàleél-án nĩ cuu-dé déhe té Cainán, <sup>38</sup> te té-án nĩ cuu-dé déhe té Ènós. Te té Ènós-án nĩ cuu-dé déhe té Sèt, te té-án nĩ cuu-dé déhe té Àdán. Te té Àdán-án chi mee Yă Ndiöxí ní cadúha ndaha ñàha-gá xii-dé.

## 4

*Sácuíhná quidé yica-xi cada Jesús sá ñà túú tàú-gá cada-gá ní cùu*

*(Mt. 4:1-11; Mr. 1:12-13)*

<sup>1</sup> Te Jèsús ní naquehe<sup>n</sup>-gá ichi yuhu yúte Jòrdán cuánuhú-gá. Te sa ndècu ndihi-gá Espíritú Yă Ndiöxí, te Espíritú-án ndécá ñàha-xi xii-gá cuáhán ì<sup>n</sup> xití yucu. <sup>2</sup> Te yàcán ní xíndecu-gá údico nduu, te sácuíhná nĩ cuiní-xi coto ndeé ñáhá-xí xii-gá te núu ndisa sá vă cádá-gă ì<sup>n</sup> sá ñà túú tàú-gá cada-gá. Te ñá túú tnàhí ná ní xèxi-gá ndi ùdico nduu-án, te sátá

dúcá<sup>n</sup> te ní xícá<sup>n</sup> iní-gá caxi-gá. <sup>3</sup> Te sácúíhná-ǎ<sup>n</sup> ñí xáha<sup>n</sup>-xi xì-gá:

—Te núu ndisa sá cúú-n Dēhe Yá Ndiǒxí, te cúñaha xì yúú-a na ndùu-xi paá —càchí-xi xǎha<sup>n</sup>-xi xì-gá.

<sup>4</sup> Te Jèsús ní xáha<sup>n</sup>-gǎ xii-xi:

—Núú tütú Yǎ Ndiǒxí càchí-xi: “Ñá díú mēe-ni paá candeca-xi iní ñáyíu, chí tnàhá nchaa tnúhu càhá<sup>n</sup> Yǎ Ndiǒxí candeca-xi iní-yu”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

<sup>5</sup> Te dǎtnùní sácúíhná ndécá ñàha-xi xii-gá cuáhá<sup>n</sup> ï<sup>n</sup> núú tìndúú dùcú<sup>n</sup>, te uu<sup>n</sup>ni ní dánèhé núú ñáhá-xí xì-gá nchaandi túhú nàció<sup>n</sup> cáá ñùyíú. <sup>6</sup> Te ní xáha<sup>n</sup>-xi xì-gá:

—Yúhú cada-í, te taxi tnùnín-n nchàa-ndi túhú nàció<sup>n</sup>-a ndihi nchaa sá vǎha íó diu-ni nchaa nàció<sup>n</sup>-a, te cachí ñáyíu sá ío cùnuu-n, chí yúhú cúú cuendá-í nchaa sá íó nchaa nàció<sup>n</sup>-a, te ndédani càa ñáyíu cùu iní-í te cúñaha-í xii-yu taxi tnùní-yu.

<sup>7</sup> Te núu ni yùhu ni iní-n chiñuhu ñaha-n xii-í ñá, te nchaa taxi-í cuu cuendá-n —càchí-xi xǎha<sup>n</sup>-xi xì-gá.

<sup>8</sup> Te Jèsús ní xáha<sup>n</sup>-gǎ xii-xi:

—Xocuñí yòhó sácúíhná núú ndécù-í-a, chí vá cúú càda-í nàcuáa càchí-n chí núú tütú Yǎ Ndiǒxí càchí-xi: “Chiñuhu-ndo Dütú Ndiǒxí Yaá cúú Ndiǒxí-ndó, te ï<sup>n</sup>dìi díí-ni-gǎ cada-ndo nchàa nacuáa càhá<sup>n</sup>-gá”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

<sup>9</sup> Te sácúíhná ndécá ñàha tucu-xi xii-gá cuáhá<sup>n</sup> ñúú Jerusàlén, te ní xáha<sup>n</sup>-xi xì-gá cuásaá-gá díquí veñúhu càhnu sá ío cùnuu, te ní xáha<sup>n</sup> tùcu-xi:

—Te núu ndisa cùu-n Déhe Yá Ndiöxí te cuandèe ndava ndéé núú ñúhú <sup>10</sup> cuendá quee ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi: Yá Ndiöxí tendaha-gă cue espíritú xínú cuèchi núú-gă quixi-xi coto ñaha-xi xii-n.

<sup>11</sup> Te núú ndáhá-xí càundodo-n cuendá sá vă dánċuèhé yúú sähá-n, duha càchí-xi núú tütú-gá —càchí sácuíhná xăha<sup>n</sup>-xi xii-gá.

<sup>12</sup> Te Jèsús ní xáha<sup>n</sup>-gă xii-xi:

—Te càchí tucu-xi núú tütú Yá Ndiöxí: “Vá cání ìní-n còto ndeé-n Dütú Ndiöxí Yaá cúú Ndiöxí-n núu ndisa sá dácăcu nihnu ñaha-gă xii-n cuendá ĩ<sup>n</sup> sá sání ìní-n càda-n sá cúú-xí mēe-n”, duha càchí-xi núú tütú-gá —càchí-gă xăha<sup>n</sup>-gă xii-xi.

<sup>13</sup> Te sátá dúcá<sup>n</sup> te sácuíhná ñà túú-gă ní cùtnuní ìní-xi nása cada-xi Jèsús, núu xiá<sup>n</sup> ní xica-xi cuáhá<sup>n</sup>-xi ní sanaa tnaa-xi.

*Distritú Galileá ní chisaha Jèsús chiú<sup>n</sup> ní táhú Tătá-gă Dütú Ndiöxí cada-gá*

*(Mt. 4:12-17; Mr. 1:14-15)*

<sup>14</sup> Te Jèsús cuáhá<sup>n</sup> tucu-gá distritú Galileá, dico sa ndècu ndihí-gá Espíritú Yá Ndiöxí, te ñi càa xico xiá<sup>n</sup> ñi níhĭ-yu tnúhu nchaa nàcuáa quide-gá.

<sup>15</sup> Te ndi tnahá ñuú cuáhá<sup>n</sup>-gá duca<sup>n</sup> cuănguĭhu-gá veñúhu-yu dānehé ñáhá-gá xií-yu, te ncháá-yu càchí-yu sá ĩo cāhnu cuu-gá.

*Jèsús ndécú-gă ñuú Nazàrét*

*(Mt. 13:53-58; Mr. 6:1-6)*

<sup>16</sup> Te Jèsús ní sáhá<sup>n</sup>-gá ñuú Nazàrét ñuú núú ñi sahnu-gá. Te nduu ndètatú ñáyiú ní quĭhu-gá veñúhu, chi duca<sup>n</sup> tnàhí quide-gá, te ní ngúnutnĭí-gá dăcuàha-gá tutú ndèé tnúhu Yá Ndiöxí. <sup>17</sup> Te

ní sáñaha-güedě xii-gá tutú ndèé tnúhu ní cáhá<sup>n</sup> ndíi Chàìá téé ní xóo cáhá<sup>n</sup> tnúhu Yá Ndiöxí ndéé sanaha, te òré ní nandicá-gá núú tütú-á<sup>n</sup> te ní naníhí-gă núú càchí-xi:

18 Espíritú Yă Ndiöxí ndécú ndìhi ñaha-xi xii-í, chi ní cachí-gá sá càhá<sup>n</sup>-í tnúhu-gá sá cúú-xí ñáyiú ndàhú, ñáyiú vátá cündedóho tnàhí-gá.

Te véxi-í cuendá vá ndìhú-gá iní ñáyiú ñá túú ndècu váha iní-xi, te cue ñáyiú sa nèhe váha ñaha-nă yucu ñăvâha dâcâcu nihnu-í-yu.

Te cue ñáyiú cuâá nacaá<sup>n</sup>-í núú-yu, te ñáyiú ndòho dandoho ñaha tnaha ñáyiú-xi tauni-hnu-í-yu.

19 Te cúñaha-í xii ñáyiú sá sàá nduu càda Yá Ndiöxí ì<sup>n</sup> sá vâha sá cúú-xí-yu.

Duha càchí-xi núú tütú dâcuâha-gá.

20 Te Jèsús ní nacadí-gá núú tütú-á<sup>n</sup>, te ní nacuâha-gá ì<sup>n</sup> téé xìnu cuechi veñúhu-á<sup>n</sup>, te ní ngóo-gá. Te nchaa ñáyiú yìhi veñúhu ñá núú núú-yu ndèhe ñahá-yu xii-gá. 21 Te xâha<sup>n</sup>-gă xií-yu:

—Mei vitna ní quee ndáá-xi nâcuâa càhá<sup>n</sup>-xi núú tütú Yă Ndiöxí —càchí-gá xâha<sup>n</sup>-gă xií-yu.

22 Te ncháá-yu ní cáhá<sup>n</sup> váha-yu cuendá-gá, te ní cuñúhu-yu tnúhu váha càhá<sup>n</sup>-gá, te xìtnàhá-yu:

—¿Te náa ñá díú tēe-a cùu-dé déhe té Chèé-ă<sup>n</sup>? —càchí-yu xìtnàhá-yu.

23 Te Jèsús ní xáha<sup>n</sup>-gă:

—Na càchí tnúhu ndáá-í xii-ndo să ñúhú iní-ndó cūñaha-ndo xii-í ì<sup>n</sup> tnúhu cùtexínu sá càhá<sup>n</sup> méé-ndó, te quesaha-ndo: “Ñátátná cada tátna

mee-n”, duha quesaha-ndo. Te cúñaha tùcu-ndo xii-í: “Sa ní níhí-ndí tnúhu nàcuáa ní quide-n ñúú Capèrnaúm, te cada-n tnàhá ñúú núú ní sahnú-n”, duha quesaha-ndo —càchí-gá xăha<sup>n</sup>-gă xií-yu.

<sup>24</sup> Te ní xáha<sup>n</sup> tùcu-gá:

—Na càchí tnúhu ndáá-í xii-ndo să nì ñ<sup>n</sup> tée càhá<sup>n</sup> tnúhu Yá Ndiǒxí ñá túú tnàhá ínì ñáhá ñăyiu ñúú-dé. <sup>25</sup> Te ña càchí tnúhu ndáá tucu-í xii-ndo să ïo vâi ñáyiu ðíhí ñáyiu quèé ní xíndecu nàció<sup>n</sup> Isràél cútnàhá ní xíndecu té Èliás cútnàhá ñá túú ní cùu<sup>n</sup> dáú ùní cuiá dava, te dàvá-á<sup>n</sup> ïo ní ndoho ñáyiu docó nitùhú nàció<sup>n</sup>. <sup>26</sup> Dico Yá Ndiǒxí ñá túú ní tëndaha-gá té Èliás quíhí<sup>n</sup>-dé vehe ndédani càa ñáyiu ðíhí-á<sup>n</sup>, chi vehe ñ<sup>n</sup> ñaha ñúú Sàreptá ní xáha<sup>n</sup>-gă ní sáhá<sup>n</sup>-dé, te ñúú-á<sup>n</sup> cáa yàtni-xi ñúú Sìdón. <sup>27</sup> Te ní xíndecu tucu ingá tée ní xóo càhá<sup>n</sup> tnúhu Yá Ndiǒxí ndéé sanaha, te tée-á<sup>n</sup> ñí xínani-dě Eliseú, te ðiu-ni dàvá-á<sup>n</sup> ñí xíndecu tucu vâi ñáyiu cùhú nàció<sup>n</sup> Isràél, ñáyiu ní tnàhá cuéhé să dátèhyú nihnu-xi yiqui cùñú-yu dico ñá túú ní ndũha-yu, chi ñ<sup>n</sup> ði-ni té Nàamán tée ðistrítú Sìriá ní ndúha-dé —càchí-gá xăha<sup>n</sup>-gă xií-yu.

<sup>28</sup> Te sá dúcá<sup>n</sup> ñí càhá<sup>n</sup>-gá te xíă<sup>n</sup> ní cudéé<sup>n</sup> víhí nchàa ñáyiu yìhí veñúhu-ă<sup>n</sup> núú-gă. <sup>29</sup> Te ní queñuhú-yu Jèsús yuhu dèhvá tìndúú núú cáa ñúú-yu-á<sup>n</sup> cuèndá yàcá<sup>n</sup> dàquée-yu-gá dèhvá ní cùu. <sup>30</sup> Dico Jèsús vii-ni ní quee-gá tnuú-yu cuáhá<sup>n</sup>-gá.

*Ñ<sup>n</sup> tée yìhí ñaha espíritú cùndìhí yucu ñávăha*  
(Mr. 1:21-28)

<sup>31</sup> Te Jèsús cuáhá<sup>n</sup>-gá ñúú Capèrnaúm, te ñúú-á<sup>n</sup> yíndèhu-xi ðistrítú Galileá. Te yàcá<sup>n</sup> ndécú-gă ní tnàhá nduu ndètátú ñáyiu, te ní ngúíta-gá



dácuàha-gá ñáyiu. <sup>32</sup> Te x̣icuñúhu-yu nchaa nàcuáa dànehé ñáhá-gă xií-yu, chi càhá<sup>n</sup>-gá dàtná càhá<sup>n</sup> ì<sup>n</sup> téé cùnūu, te cùnūu ndisa-gá.

<sup>33</sup> Te xití veñúhu yìhi ì<sup>n</sup> téé yìhi ñaha ì<sup>n</sup> espíritú cúndìhi yucu ñávãha, te espíritú-á<sup>n</sup> nĩ quide-xi níhi ní càhá<sup>n</sup> téé-á<sup>n</sup>, te xãha<sup>n</sup>-dě xii Jèsús:

<sup>34</sup> —¿Te ná cuìni yòhó Jèsús téé ñuú Nazàrét cada ñaha-n xii-ndí nūu véxi-n nūú ndécú-ndĩ-i? ¿Á<sup>n</sup> vëxi-n dànaa ñaha-n xii-ndí? Chi yúhú xini ñáhà-í xii-n sã cúú-n ì<sup>n</sup> téé ñá túú tnhí cuéchi-xi chi núú Yã Ndiõxí ní quee-n vëxi-n ñüyíú-a —càchí-dé xãha<sup>n</sup>-dě xii-gá.

<sup>35</sup> Te Jèsús ní tenàá-gá espíritú cúndìhi yucu ñávãha-á<sup>n</sup>, te xãha<sup>n</sup>-gă:

—¡Cadí yuhu-n, te taquèe yiqui cuñú téé-á<sup>n</sup>! —  
càchí-gá xãha<sup>n</sup>-gă.

Te espíritú cúndìhi yucu ñávãha-á<sup>n</sup> nĩ dándùá-xi téé-á<sup>n</sup> ndèé ñuhu tnuú ñáyiu x̣indecu-á<sup>n</sup>, te ñá túú-gă ná ní quide ñaha-xi, te ní quee ñaha-xi xii-dé.

<sup>36</sup> Te nchaa ñáyiu x̣indecu-á<sup>n</sup> nĩ cuñúhu-yu, te ní xitnàhá-yu:

—¿Te nása ndūu-tu tñúhu càhá<sup>n</sup> téé-ã<sup>n</sup> ñá? ¡Te càhá<sup>n</sup>-dé dàtná càhá<sup>n</sup> ì<sup>n</sup> téé tàxi tñuní víhí, chi càhá<sup>n</sup>-ni-dé te nchaa espíritú cúndìhi yucu ñávãha quèe-ni-xi yiqui cuñú-yu! —càchí-yu x̣itnàhá-yu.

<sup>37</sup> Te nchaa xichi ní níhí-yu tñúhu nàcuáa quide Jèsús.

*Jèsús quidé tãtna-gá nãná ñadìhí té Xímú  
(Mt. 8:14-15; Mr. 1:29-31)*

<sup>38</sup> Te Jèsús ní ndee-gá xití veñúhu, te cuáhá<sup>n</sup>-gá vehe té Xímú. Te nãná ñadìhí té Xímú-á<sup>n</sup> cùhú-a<sup>n</sup>

ñùhu vihi-a<sup>n</sup> cahni, te ní cáhá<sup>n</sup> ndàhú-yu núú Jèsús cuendá-a<sup>n</sup>. <sup>39</sup> Te Jèsús ní sáhá<sup>n</sup>-gá núú ndécú-á<sup>n</sup>, te ní ngúnundeyi-gá te ní xáha<sup>n</sup>-gá xii cahni-á<sup>n</sup> sá ná xòcuíñí-xi, te ní xócuíñí-ni-xi, te òré-ni-á<sup>n</sup> nǐ ndúha ñaha cùhú-á<sup>n</sup> te ní ndacóo-a<sup>n</sup> ní xinu cuechi-a<sup>n</sup> nùú-güedě ndihi-gá.

*Jèsús quidé tǎtna-gá vǎi ñáyiu cùhú*

*(Mt. 8:16-17; Mr. 1:32-34)*

<sup>40</sup> Te òré ní ngódó tnùú nchícanhii, te nchaa ñáyiu xǐndecu ndihi ñáyiu cùhú vehe-xi ndèca ñahá-yu cuáhá<sup>n</sup> núú Jèsús. Te Jèsús ní sacá<sup>n</sup> ndodo-gá ndaha-gá díquí ì<sup>n</sup> ì<sup>n</sup> ñáyiu cùhú-á<sup>n</sup>, te duca<sup>n</sup> nǐ quide-gá te ní ndúha-yu. Te ndi díí<sup>n</sup> nùú cuèhé tnàhá-yu ì<sup>n</sup> í<sup>n</sup>-yu ni cùu. <sup>41</sup> Te tnàhá dava ñáyiu cùhú-á<sup>n</sup> yíhí ñàha espíritú cúndìhi yucu ñávǎha xií-yu ni cùu, te òré ní quee ñaha-xi xíí-yu, te xíǎ<sup>n</sup> ní quide-xi níhi ní cáhá<sup>n</sup>-yu, te xǎhǎ<sup>n</sup>-yu xii Jèsús:

—Yòhó cúu-n Dèhe Dútú Ndiöxí —càchí-yu xǎhǎ<sup>n</sup>-yu xii-gá.

Dico Jèsús níhi ní cáhá<sup>n</sup>-gá ní tenàá-gá nchaa espíritú cúndìhi yucu ñávǎha-á<sup>n</sup>, te xǎha<sup>n</sup>-gá sá vǎ dúcá<sup>n</sup>-gǎ cada-xi, chi sa xíní-xi sá díú-gǎ cúu-gǎ Crístú Yáá ní tendaha Yǎ Ndiöxí véxi ñuyíú-a.

*Jèsús dánèhé-gá ñáyiu distritú Galileá*

*(Mr. 1:35-39)*

<sup>42</sup> Te ì<sup>n</sup> nduu ní túndaá-ni ní quee Jèsús ñúú núú ndécú-gǎ-á<sup>n</sup> cuáhá<sup>n</sup>-gá ì<sup>n</sup> xichi núú ñǎ túú ñáyiu ndècu. Te cue ñáyiu ní ngúíta-yu nànducu ñahá-yu xii-gá te ní naníhí ñáhǎ-yu, te cuíní-yu

ngani ñàhá-yu xii-gá cuèndá sá ñà túú-gă ndèé quíhí<sup>n</sup>-gá ní cùu. <sup>43</sup> Dico ní xáha<sup>n</sup>-gă xii-yu:

—Dacuitíí quíhí<sup>n</sup>-í cúñaha-ĩ xii nchaa ñáyiu dava-gá ñuú tnúhu sá càhá<sup>n</sup> nàcuáa ndíhu ndaha ñàha Yá Ndiǒxí xii-yu, chi chiù<sup>n</sup> tnahí-ǎ<sup>n</sup> vëxi-í —càchí-gá xăha<sup>n</sup>-gă xii-yu.

<sup>44</sup> Te ní xica cuu Jèsús ní dánèhé-gá ñáyiu tnúhu-gá nchaa xití veñúhu ndăa distritú Galileá.

## 5

*Jèsús ní quide-gá ní ñíhí-güedě chácá*  
(Mt. 4:18-22; Mr. 1:16-20)

<sup>1</sup> Te ì<sup>n</sup> xito ndècu Jèsús yuhu làgúná Genesàrét, te ío cuéhé ñáyiu ní sáá, te ta dàdehnde ñaha-ná-yu xii-gá cuáhá<sup>n</sup> sá cuìní-yu cundedóho-yu nchaa tnúhu càhá<sup>n</sup>-gá. <sup>2</sup> Te Jèsús ní xiní-gá úú bàrcú cue téé tñì chácá xĩnutnì<sup>n</sup>-xi yatni yuhu làgúná-á<sup>n</sup>, te sa ní quene cue téé ñùhu xití-xi-á<sup>n</sup> xĩnaquete-güedé ñunu-güedé. <sup>3</sup> Te Jèsús cuásaá-gá núú ì<sup>n</sup> bàrcú-á<sup>n</sup>, te bàrcú-á<sup>n</sup> cúú-xí bàrcú té Xímú, te ní xáha<sup>n</sup>-gă xii té Xímú-á<sup>n</sup> să dánũdehe-dé-xi luha-gá xití ndute. Te dătnùní ní ngóo-gá núú bàrcú-á<sup>n</sup>, te xía<sup>n</sup> núcǒo-gá ní ngúíta-gá dánèhé-gá ñáyiu. <sup>4</sup> Te òré ní túhú ní dánèhé ñàhá-gă xii-yu, te ní xáha<sup>n</sup>-gă xii té Xímú:

—Daquìhí<sup>n</sup> bàrcú-a xití làgúná mei nùú cùnú-gá, te dàquée-ndo ñunu-ndo tñì-ndo chácá —càchí-gá xăha<sup>n</sup>-gă xii-dé.

<sup>5</sup> Te té Xímú ní xáha<sup>n</sup>-dë:

—Mèstrú, ni niú ní quide chiù<sup>n</sup>-ndí te ni ì<sup>n</sup> chácá ñà túú ní ñíhí-ndí, dico vitna cuèndá-ni sá yòhó

táuchìu<sup>n</sup>-n te na dàquée-ndí ñunu-ndí vá<sup>n</sup> —càchí-dé xăha<sup>n</sup>-dě xii-gá.

6 Te òré ní dáquēe-güedé ñunu-güedé te súúní vâi chácá nǐ níhí-güedé, te ta ndátá-nă ñunu-güedé cuáhá<sup>n</sup> ní cùu. 7 Núu ní quide-güedé ndaha-güedé núú dâva-gá cue tée cùndihí-güedé xǐxúhu<sup>n</sup> ingá bàrcú cuendá quíhí<sup>n</sup>-güedé chindee ñàha-güedé. Te cue tée-á<sup>n</sup> nǐ sáhá<sup>n</sup>-güedé ní chindee tnàha-güedé ní dáchitú-güedé ndí ndúú bàrcú mee-ni chácá, te súúní nǐ cuu vée núu cuìní-na-xi quée naa-güedé ndihí bàrcú ní cùu. 8 Te sá dúcá<sup>n</sup> cuìní-xi quée naa bàrcú ní cùu, núu té Xímú, àdi Pelú chi úú diu-dé, ní ngúíñí xítí-dě núú Jèsús, te xăha<sup>n</sup>-dě:

—Xocuñí yòhó Jèsús núú ndécù-í-a, chi yúhú cúu-í ñ<sup>n</sup> tée ío ndècu cuéchi-xi —càchí-dé xăha<sup>n</sup>-dě xii-gá.

9 Te duca<sup>n</sup> nǐ cáhá<sup>n</sup>-dé chi ní yùhú-dé, te ní cuñúhu-dé ndihí nchaa cue tée ndihí-dé-á<sup>n</sup> cuendá sá ío vâi chácá nǐ níhí-güedé. 10 Te tnàhá té Jàcobó ndihí té Juàá cue déhe té Zebèdeú ío ní cuñúhu-güedé, te diu-ni cue tée cùndihí té Xímú-á<sup>n</sup> cúú-güedé tnàhá-güedé. Te Jèsús ní xáha<sup>n</sup>-gă xii té Xímú:

—Vá yùhú-n, chi není vitna quíhí<sup>n</sup>-n dàcahá<sup>n</sup>-n ñăyiu cuendá tuha ñàhá-yu xii-í —càchí-gá xăha<sup>n</sup>-gă xii-dé.

11 Te ní quene-güedé ndihí bàrcú ndée ñuhu yìchí yuhu làgúná-á<sup>n</sup>. Te òré-á<sup>n</sup> nǐ dándõo-güedé nchaandi túhú sá ndécú ndihí-güedé, te ní tuha-güedé Jèsús.

*Jèsús quidé tătna-gá ì<sup>n</sup> téé tnàhá cuéhé sǎ dátèhyú nihnu-xi yiqui cùñú-ó*

*(Mt. 8:1-4; Mr. 1:40-45)*

<sup>12</sup> Te òré ní quexìo Jèsús ì<sup>n</sup> ñuú, te ní quexìo ì<sup>n</sup> téé cùhú tnàhá-dé cuéhé sǎ dátèhyú nihnu-xi yiqui cùñú-ó, te òré ní xiní-dé Jèsús te ní sáhá<sup>n</sup>-dé núú ndécú-gǎ, te ní ngüñí xítí-dě núú-gǎ te ní nuu núú-dě ndàa núú ñúhú te càhá<sup>n</sup> ndàhú-dé, te xǎha<sup>n</sup>-dě xii-gá:

—Mèstrú, véxi-í càhá<sup>n</sup> ndàhú-í núú-n nǔu vá cùndèe iní-n càda tătna ñaha-n xii-í, chì cùtnuní iní-í sǎ ndácú-n —càchí-dé xǎha<sup>n</sup>-dě xii-gá.

<sup>13</sup> Te Jèsús ní dácàá-gá ndaha-gá ní tendaha ñaha-gá xii-dé, te xǎha<sup>n</sup>-gǎ:

—Cuu cada tătna ñaha-í xii-n, te vitna te ndúha-n —càchí-gá xǎha<sup>n</sup>-gǎ xii-dé.

Te òré-ni ní xócuñí cuéhé tnàhá-dé. <sup>14</sup> Te dǎtnùní ní xáha<sup>n</sup> tùcu Jèsús xii-dé:

—Vá yǒo ì<sup>n</sup> cúñaha-n sǎ ñí quide tătna ñaha-í xii-n, núú dǔtú-ni cuàhá<sup>n</sup> cuèndá sǎ ná quini ñáhá-dě xii-n sǎ ñí ndúha-n te cuáha-n-dě sǎ ndúú tǎhú Yǎ Ndiǒxí dǎtná ní cachí ndíi Moisés cuèndá ná quini ñáyiu sǎ ndàá ní ndúha-n —càchí-gá xǎha<sup>n</sup>-gǎ xii-dé.

<sup>15</sup> Te duca<sup>n</sup> ta xíté nuu-gá tnúhu nchaa nàcuáa quide Jèsús, te ío cuéhé ñáyiu ní xóo tacá nchaa núú ñí xíndecu-gá cuèndá sǎ cuini-yu cundedóho-yu tnúhu càhá<sup>n</sup>-gá, ndihi cuèndá sǎ cuini-yu cada tătna ñaha-gǎ xií-yu. <sup>16</sup> Dico Jèsús ní xóo quee nihni-gá tnuú-yu ní xóo quíhí<sup>n</sup>-gá núú ñà túú ñáyiu ndècu ní xóo cáhá<sup>n</sup> ndihi-gá Yǎ Ndiǒxí.

*Jèsús quidé tătna-gá ì<sup>n</sup> té cùhú ñá cúú-gă candá nihnu*

*(Mt. 9:1-8; Mr. 2:1-12)*

17 Te ì<sup>n</sup> nduu dānehé-gá ñáyiū, te xīnucóo ì<sup>n</sup> ũú cue té cùu fariséú, ndihī cue té dācuaha ñaha xii ñáyiū nchaa tnúhu ní chídó tnùnī ndíi Moisés. Te cue té-á<sup>n</sup> ñi quee-güedé nchaa ñuú yíndèhu distritú Galileá, ndihī distritú Júdeá, ndihī ñuú Jerusalén, te nchaa ñuú-á<sup>n</sup> ñi quee-güedé cuáhá<sup>n</sup>-güedé núú ndécú-gă. Te Yá Ndiöxí chindèe ñaha-gá quidé tătna-gá ñáyiū cùhú. 18 Te ì<sup>n</sup> ũú cue té nchido-güedé ì<sup>n</sup> té cùhú ñá cúú-gă candá nihnu ñuhu-dé xító ní quexìo ndihī ñaha-güedé, te cuinī-güedé quíhu ndihī ñaha-güedě ndéé xití vehe, sáá-güedé ndéé núú Jèsús ndihī té cùhú-á<sup>n</sup>. 19 Dico ñá túú ní ñihí-güedě ndéé ichi quíhu-güedé, chi cuendá ío cuéhé ñáyiū ndècu, núú xíá<sup>n</sup> ní sáá-güedé díquí véhé-á<sup>n</sup> ñi caá<sup>n</sup>-güedé te ndàa díquí véhé-á<sup>n</sup> ñi dáquēe-güedé té cùhú-á<sup>n</sup>, te ñuhu-ni-dé xító ní dáquēe ñaha-güedě tnuú ñáyiū ní sáá ndéé núú Jèsús. 20 Te Jèsús ní cutnùnī iní-gá sá ñi yuhu ñi iní-güedé sàndáá iní ñáhá-güedé xii-gá, núú ní xáha<sup>n</sup>-gă xii té cùhú-á<sup>n</sup>:

—Yòhó té cùhú, sa ní quide càhnu iní-í nchaa cuéchi-n —càchí-gá xăha<sup>n</sup>-gă xii-dé.

21 Te cue té dācuaha ñaha xii-yu nchaa tnúhu ní chídó tnùnī ndíi Moisés ndihī cue té cùu fariséú ní sani iní-güedé: “¿Ná cúú té-a núú càhá<sup>n</sup> cuéhé-dé cuendá Yá Ndiöxí-í? Te vá yōo ì<sup>n</sup> ndàcu cada cahnu iní nchaa yíca cuéchi ñáyiū, chi ì<sup>n</sup>dii díi-ni Yá Ndiöxí quidé càhnu iní-gá”, duha ní sani iní-güedé.

22 Dico Jèsús sa ní cutnùní iní-gá nàcuáa sàni iní-güedé nũu ní xáha<sup>n</sup>-gã xii-güedé:

—¿Te ná cuendá duca<sup>n</sup> sàni iní-ndó-í? 23 Te sá dúhá nĩ xáha<sup>n</sup>-ĩ xii tée cùhú-a sá cádá càhnu iní-í nchaa yíca cuèchi-dé, te xiá<sup>n</sup> nchòhó ñá túú cùtnuní iní-ndó nũu ndáá càhá<sup>n</sup>-í àdi ñá ndáá. Dico núu cúu-í-dé sá ndácòo-dé, te caca-dé te cutnùní ndáá iní-ndó nũu ndáá càhá<sup>n</sup>-í àdi ñá ndáá, chi cundehe nũu-ndó nàcuáa cada-í. 24 Te vitna na càda-í nàcuáa cutnùní iní-ndó nchàa-ndo sá yùhú Tée cúu ñani tnàhá-ndó nchàa-ndo ndecu ndihi-í tnúhu ndee iní sá cádá càhnu iní-í nchaa cuèchi ñáyiu ñuyíú-a —càchí-gá xáha<sup>n</sup>-gã xii-güedé.

Te sátá dúcá<sup>n</sup> te ní xáha<sup>n</sup>-gã xii tée cùhú-á<sup>n</sup>:

—Ndacóo, te ndocani-n xíto ñùhu-n véxi-á<sup>n</sup>, te núhú-n vèhe-n —cachí-gá xáha<sup>n</sup>-gã xii-dé.

25 Te òré-ni-á<sup>n</sup> nĩ ndúha tée cùhú-á<sup>n</sup> te ní ndacóo-dé, te ní ndocani-dé xíto ñùhu-dé ní quexiò-á<sup>n</sup>, te ní natni-dé ichi ta càhá<sup>n</sup>-dé cuánuhú sá ïo càhnu cuu Yá Ndiöxí. 26 Te nchaa ñáyiu xĩndecu-á<sup>n</sup> nĩ cuñúhu-yu, te tnàhá-yu ní cachí-yu sá ïo càhnu cuu Yá Ndiöxí, te duca<sup>n</sup> ïo ní yùhú-yu, te ní xítnàhá-yu:

—Vitna ní xiní-ó ì<sup>n</sup> sá ñà túú tnàhí xìní-ó ní cùu —cachí-yu xítnàhá-yu.

*Jèsús cána-gã té Leví*

*(Mt. 9:9-13; Mr. 2:13-17)*

27 Te sátá dúcá<sup>n</sup> nĩ cuu te ní quee Jèsús xiá<sup>n</sup>, te ní xiní-gá ì<sup>n</sup> tée nàni Leví núcòo-dé ì<sup>n</sup> xichi quide cobrá-dé ñáyiu cuendá impuèstú, chi cobràdór cúu-dé, te ní xáha<sup>n</sup>-gã xii-dé:

—Néhe chìtnahá ñáhá-n xii-í —càchí-gá xáha<sup>n</sup>-gã xii-dé.

28 Te té Lèví-á<sup>n</sup> nǐ ndàcúíñí-dé te ní dándõo-dé nchaa sá ndécú ndìhi-dé núú núcõo-dé-á<sup>n</sup>, te ní tuha-dé Jèsús.

29 Te sátá dúcá<sup>n</sup> te té Lèví-á<sup>n</sup> nǐ quide-dé ì<sup>n</sup> vico càhnu vehe-dé sá cúú-xí Jèsús, te ní tacá vài cue téé quide chiu<sup>n</sup> quide-dé, te nchaa-güedé cuánguihu-güedé mèsá ní ngóo-güedé ndìhi dava-gá ñáyiu ní quexìo cuendá caxi-güedé ndìhí-yu. 30 Dico cue téé cùu fariséú ndìhi cue téé dàcuaha ñaha xií-yu nchaa tnúhu ní chídó tnùnì ndíi Moisés ní ngúita-güedé x̄cuèhé-güedé cue téé x̄ica cuu ndìhi-gá, te x̄aha<sup>n</sup>-güedé:

—¿Ná cuendá xéxí-ndó x̄ìhi-ndo ndìhi cue téé cuihna ìní-xì quide cobrá ñáhá x̄ì ñáyiu cuendá impuèstú, ndìhi nchaa dava-gá cue téé ndècu ichi cuehé ichi duha-i? —càchí-güedé x̄aha<sup>n</sup>-güedé.

31 Te Jèsús ní x̄aha<sup>n</sup>-gá xii-güedé:

—Nchaa ñáyiu ñá túú cùhú chi ñá túú x̄ìni ñuhú-yu ñátátná, dico nchaa ñáyiu cùhú chi x̄ìni ñuhu ñahá-yu. 32 Te yúhú véxi-í càhá<sup>n</sup>-í ñáyiu cùtnunì ìní-xì sá ndécú cuèchi-xì cuendá dàñá-yu nchaa sá cuèhé sá dúhá quidé-yu, te ñá túú vèxi-í càhá<sup>n</sup>-í ñáyiu càchí sá ñà túú ndècu cuèchi-xì —càchí-gá x̄aha<sup>n</sup>-gá xii-güedé.

*Cue téé ndùcu tnúhu núú Jèsús cuendá ñáyiu ñá túú tnàhí ná xéxí ãma càhá<sup>n</sup> ndìhí-yu Yá Ndiõxí*

*(Mt. 9:14-17; Mr. 2:18-22)*

33 Te ní x̄aha<sup>n</sup>-güedé xii Jèsús:

—Te áma ñá túú tnàhí ná xéxí cuè téé x̄ica cuu ndìhi té Juáá càhá<sup>n</sup> ndìhi-güedé Yá Ndiõxí, te d̄iu-ni duca<sup>n</sup> quide cue téé x̄ica cuu ndìhi nchúhú cue téé cùu fariséú. ¿Te ná cuendá cue téé x̄ica cuu



ndihi-n ñá túú dùca<sup>n</sup> quide-güedé nũ nchaa-ni nduu xèxi-güedé xìhi-güedé quidé-güedě-i? — cachí-güedé xãha<sup>n</sup>-güedé xii-gá.

<sup>34</sup> Te Jèsús ní xáha<sup>n</sup>-gã xii-güedé:

—Nchòhó xìní-ndó sã vã cúú cũñaha-o xìi cue ñáyiu ñùhu vico tnándaha sá vã cúú càxí-yu ñini ndècu ndihi ñaha téé tnándaha-án xií-yu. <sup>35</sup> Dico sáá nduu te vá cùndècu ndihi ñaha-gá téé tnándaha-án xií-yu, te dàvá-án te cahni iní-yu vá cáxí-yu sá ndìhú iní-yu —càchí-gá xãha<sup>n</sup>-gã xii-güedé.

<sup>36</sup> Te ní cani-gá ì<sup>n</sup> cuèndú núú ñáyiu nàcuáa tecú tnùní-yu tnúhu-gá, te xãha<sup>n</sup>-gã:

—Vá yõo ì<sup>n</sup> dándée luha dóó sáá ì<sup>n</sup> dóó sa ní cuu tùhú víhí, chi núu yoo duca<sup>n</sup> na càda, te dóó sáá-ã<sup>n</sup> nàndiyi-xi te uu<sup>n</sup>-gá ndata-xi dõó sã ñí cuu tùhú-án, te luha dóó sáá-ã<sup>n</sup> ñà túú nàtaú-xi ndée dóó sã ñí cuu tùhú-án. <sup>37</sup> Te ñí vá yõo ì<sup>n</sup> chìhi ndidí sáá xití ì<sup>n</sup> lamba sa ní cuu tùhú víhí, chi núu yoo duca<sup>n</sup> na càda, te ndava lamba sa ní cuu tùhú-án chi ío ñíhi yócó ndidí-án, te cuíta-ni ndidí-án te cuíta-ni lamba-án. <sup>38</sup> Núu xíã<sup>n</sup> xíní ñùhu-xi quée ndidí sáá-ã<sup>n</sup> xití ì<sup>n</sup> lamba saa cuèndá duca<sup>n</sup> ñà túú ñã cuu cováha-xi. <sup>39</sup> Te ñí ì<sup>n</sup> ñáyiu ñá túú tnàhá iní-yu cohó-yu ndidí sáá, te núu díhna-gá ná cohó-yu ndidí sá ñí quene díhna-gá, chi càchí-yu sá xíhí vãha-gá ndidí sá ñí quene díhna-gá-án dàcúúxí ndidí sáá —càchí-gá xãha<sup>n</sup>-gã xií-yu.

## 6

*Cue téé xica cuu ndihi Jèsús sàhnú-güedé yoco triú nduu ndètatú ñáyiu*

*(Mt. 12:1-8; Mr. 2:23-28)*

1 Te ñ<sup>n</sup> nduu cùu-xi nduu ndetatú ñáyiú ñùhu Jesús ichi ndìhi cue téé xìca cuu ndìhi-gá, te ta yáha-gá ndìhi-güedé ñ<sup>n</sup> xichi núú cáá triú, te ní ngüíta-güedé sàhnú-güedé yoco triú-á<sup>n</sup> te ndìhi ndaha-güedé quí<sup>n</sup>-güedě quéé triú tá xèxi-güedé cuáhá<sup>n</sup>. 2 Te ñ<sup>n</sup> úú cue téé cùu fariséú ní xáha<sup>n</sup>-güedě xii cue téé xìca cuu ndìhi-gá:

—¿Te ná cuendá duca<sup>n</sup> quide nchohó ñ<sup>n</sup> sá ñà túú tàú-ó càda-o vitna cuu-xi nduu ndetatú-ó-í? —càchí-güedé xáha<sup>n</sup>-güedě.

3 Te Jèsús ní xáha<sup>n</sup>-gă xii-güedé:

—¿Te náa ñá túú dàcuaha-ndo núú tùtú Yă Ndiöxí núú càhá<sup>n</sup>-xi nàcuáa ní quide ndíi Dàvíí cútñahá ní xíhí ndíi docó ndìhi cue téé ní xica cuu ndìhi ndíi-ă<sup>n</sup>? 4 Chi ní quíhu ndíi vehe Yá Ndiöxí, te ní quehe<sup>n</sup> ndíi pàá ní cuu íí ndécú-ă<sup>n</sup> nǐ dácăhñu ndíi cue téé xìca cuu ndìhi ndíi ní xexi ndíi ndìhi-güedé, te ñá túú tàú ndíi sá dúcá<sup>n</sup> càda ndíi nǐ cùu, chi mee-nǐ cuè dútú tàú-güedé caxi-güedé pàá-ă<sup>n</sup> ní cùu —cachí-gá xáha<sup>n</sup>-gă xii-güedé.

5 Te ní xáha<sup>n</sup> tùcu-gá:

—Te yúhú Téé cùu ñanǐ tnáhá-ndó nchàa-ndo, tnáhá-í ndécú ndìhi-í tnúhu ndee ìní sá cùu-í nchaa ñáyiú nàcuáa cadá-yu nduu ndetatú-ó-á —càchí-gá xáha<sup>n</sup>-gă xii-güedé.

*Ñ<sup>n</sup> téé ní yíchí ñ<sup>n</sup> xio ndaha-xi*

*(Mt. 12:9-14; Mr. 3:1-6)*

6 Te ñngá nduu ñi-ni nduu ndetatú ñáyiú cuánguñhu Jèsús xití veñúhu dànehé-gá ñáyiú. Te xía<sup>n</sup> ndécú ñ<sup>n</sup> téé cùhú ní yíchí nihnu ñ<sup>n</sup> xio ndaha cùha-dé. 7 Te cue téé dàcuaha ñaha xii ñáyiú nchaa tnúhu ní chídó tnùnǐ ndíi Moisés, ndìhi cue

tée cùu fariséú ndéhé-güedě nõu cada tátna ñaha Jèsús xii tée cùhú-á<sup>n</sup> nduu ndètatú-güedé-á<sup>n</sup> cuendá níhí-güedě nàcuáa cada-güedé cacá<sup>n</sup> cuéchi-güedé cuendá-gá. <sup>8</sup> Dico Jèsús sa ní cutnùní iní-gá nàcuáa sàni iní-güedé, te ní xáha<sup>n</sup>-gã xii tée cùhú ndaha-xi-á<sup>n</sup>:

—Ndàcuíñí te ngúnutnîi-n cuădava tnuú-ndí-a — cächí-gá xăha<sup>n</sup>-gã xii-dé.

Te tée-á<sup>n</sup> ñí ndacuíñí-dé te ní ngúnutnîi-dé cuădava tnuú-güedé ndihí-gá. <sup>9</sup> Te dătnùní Jèsús ní xícá<sup>n</sup> tnúhu-gã núú cué ñăyiu xĩndecu-á<sup>n</sup>, te xăha<sup>n</sup>-gã xií-yu:

—Cuìní-í cachí tnúhu-ndo nă cúú sã văha cada-o ndùu ndetatú-ó. ¿H<sup>n</sup> chiù<sup>n</sup> váha àdi h<sup>n</sup> chiu<sup>n</sup> cuehé, sá cádá tátna-o ñăyiu cùhú àdi sá cáhni-ó-yu? — cächí-gá xăha<sup>n</sup>-gã xií-yu.

<sup>10</sup> Te dătnùní ní ndacoto-gá núu-yu nchaá-yu, te ní xáha<sup>n</sup>-gã xii tée cùhú ndaha-xi-á<sup>n</sup>:

—Ndocani ndaha-n —cächí-gá xăha<sup>n</sup>-gã xii-dé.

Te ní ndocani-dé ndaha-dé, te òré-ni ní ndúha. <sup>11</sup> Te cue tée xĩndecu-á<sup>n</sup> sũúní ñí cudéé<sup>n</sup>-güedě sá dúcá<sup>n</sup> ñí quide tátna Jèsús tée cùhú-á<sup>n</sup>, te ní ngũíta-güedé ndátnũhu-güedé nõu nása cada ñaha-güedě xii-gá.

*Jèsús căxi-gá úxúú tnàhá cue tée dacuàha ñaha xii ñăyiu tnúhu-gá*

*(Mt. 10:1-4; Mr. 3:13-19)*

<sup>12</sup> Te sátá dúcá<sup>n</sup> ñí cuu te ní xica Jèsús cuáhá<sup>n</sup>-gá xití yucu cuendá yàcá<sup>n</sup> cáhá<sup>n</sup> ndihí-gá Tátá-gã Dútú Ndiõxí, te ñí niú ní cáhá<sup>n</sup> ndihí ñaha-gã. <sup>13</sup> Te sátá ñí túndaá, te ní cana-gá nchaa cue tée xica cuu ndihí-gá, te ní cáxi-gá úxúú tnàhá-güedé, te

cue téé-á<sup>n</sup> ñĩ xáha<sup>n</sup>-gã sá díú-güedě cuu-güedé cue téé quií<sup>n</sup> cáhá<sup>n</sup> tnúhu-gá núú ñáyiú. <sup>14</sup> Te duha xĩnani ndi ùxúú cue téé-á<sup>n</sup>. Té Xĩmú, àdi Pelú chi úú dìu-dé, ndihĩ ñaní-dé té Ndrĩxí, ndihĩ té Jàcobó, ndihĩ té Juàá, ndihĩ té Lìpé, ndihĩ té Bartolòmé, <sup>15</sup> ndihĩ té Màteú, ndihĩ té Măxí, ndihĩ té Jàcobó déhe té Àlfeú, ndihĩ ingá té Xĩmú téé ní cundihĩ cue téé canànistá, <sup>16</sup> ndihĩ té Jùdás ñaní té Jàcobó, ndihĩ té Jùdás Iscarioté téé ní sáá nduu ñĩ sáha cuendá ñáhá xii Jesús núú cuè téé cùu úhú iní ñáhá xii-gá, duha xĩnani cuè téé ní cáxi Jèsús ní xica cuu ndihĩ-gá.

*Jèsús dánèhé-gá cuéhé vĩhĩ ñáyiú  
(Mt. 4:23-25)*

<sup>17</sup> Te Jèsús cuánuu-gá yucu núú ñĩ sáá-gá-á<sup>n</sup>, te ní ngava-gá ì<sup>n</sup> núú ndàá ndihĩ cue téé xica cuu ndihĩ-gá, te xía<sup>n</sup> ñĩ ngúnutnĩ-gá. Te xía<sup>n</sup> ndécú dàva-gá cue téé xica cuu ndihĩ-gá ndihĩ vài ñáyiú ndètu ñahá-yu xii-gá, te ñáyiú-á<sup>n</sup> vëxi-yu nchaa ñuú cáá dìstrítú Jùdeá, ndihĩ ñuú Jerusalén, te ndècu ñáyiú véxi ndàa yuhu lamár yatni ñuú Tìrú, ndihĩ ñuú Sidón. Te nchaa ñáyiú-á<sup>n</sup> ñĩ quexió-yu cuìní-yu cundedóho-yu nchaa tnúhu càhá<sup>n</sup> Jèsús, ndihĩ cuendá sá cuìní-yu ndúha-yu nchaa cuéhé tnàhá-yu. <sup>18</sup> Te tnàhá ñáyiú yihĩ ñaha espíritú cundihĩ yucu ñávãha. <sup>19</sup> Te nchaá-yu cuìní-yu dacáá-yu ndahá-yu tendàhá-yu Jèsús ní cùu cuendá sá ñĩ níhĩ-yu tnúhu sá ndècu ndihĩ-gá tnúhu ndee iní quidé tátna-gá nchaa ñáyiú cùhú.

*Cuendá ñáyiú ío váha táhú-xi  
(Mt. 5:1-12)*

20 Te Jèsús ní ndacoto-gá núú cuè téé xica cuu ndihí-gá, te ní xáha<sup>n</sup>-gă:

—Váha táhú nchaa nchòhó cue ñáyiú ndàhú, chí nduu táhú-ndó cùndecu-ndo núú táxí tnùní Yá Ndiòxí.

21 'Váha táhú nchaa nchòhó ñáyiú ío cuení cund-edóho tnúhu Yá Ndiòxí chí ío vii ío váha cuu iní-ndó.

'Váha táhú nchaa nchòhó ñáyiú ndàhyú sá ndihú iní-ndó, chí sáá nduu te cudíí iní-ndó ñì caa ñi quíhí<sup>n</sup>.

22 'Váha táhú nchaa nchòhó ñáyiú na cùu úhú iní ñáhá tnàha ñáyiú-xi, chí sáá nduu te vá dáñá-gă-yu quíhu-ndo vèñúhu, te cúcuèhé ñáhă-yu xii-ndo, te cachí-yu sá ñà díú ñáyiú váha cùu-ndo, te duca<sup>n</sup> càda ñahá-yu xii-ndo sã cuendá yúhú Téé cùu ñaní tnáhá-ndó nchàa-ndo. 23 Te òré duca<sup>n</sup> na càda ñahá-yu xii-ndo te cudíí víhí-ní iní-ndó cùndecu-ndo, chí sáá nduu ndùu táhú-ndó sã ío váha càa ndecu andíu cundecu ndihí-ndo nduu na nasaá-ndó yàcá<sup>n</sup> cundecu-ndo, chí ñi-ndu duca<sup>n</sup> ñì xóo cada ñaha cuè ñaní tnáhă-yu xii cue téé ní xóo cáhá<sup>n</sup> tnúhu Yá Ndiòxí ní xíndecu ndéé sanaha.

24 'Te ndàhú ní cuu nchaa ñáyiú cuica ñà túú sàndáá iní ñáhá xii Yá Ndiòxí, chí vitna ío váha ndècú-yu, dico sáá nduu te nduu ndàhú-yu.

25 'Te ndàhú ní cuu tucu nchaa ñáyiú ñá túú tnàhí ná cúmăní xii-xi vitna, chí sáá nduu quíní-yu tnúndòho tnúhu ndàhú.

'Te ndàhú ní cuu nchaa ñáyiú cùdíí iní-xi ndècu ichi cuehé ichi duha vitna, chí sáá nduu te ndàhyú-yu sá ndihú iní-yu.

26 'Te ndàhú ní cuu nchaa ñáyiú na càhá<sup>n</sup> váha dava-gá ñáyiú cuendá-xi, chí duca<sup>n</sup> ñì xóo cáhá<sup>n</sup>

váha-yu cuèndá nchaa cue téé ní xóo dandàhú ñáhá xii ñáyiú ndéé sanaha, chi ní cachí-güedé sá càhá<sup>n</sup>-güedé tnúhu Yá Ndiöxí te ñá ndàá —càchí-gá xáha<sup>n</sup>-gã xii-güedé.

*Cuu iní-ó nchàa ñáyiú cùu úhú iní ñáhá xii-o*  
(Mt. 5:38-48; 7:12)

<sup>27</sup> Te Jèsús ní xáha<sup>n</sup>-gã xii nchaa ñáyiú xĩndecu-á<sup>n</sup>: —Nchaa nchòhó ñáyiú xĩndedóho ñaha càchí tnúhu-í xii-ndo sã cúú iní-ndó ñáyiú cùu úhú iní ñáhá xii-ndo, te cada-ndo sã vâha sá cúú-xĩ-yu cuèi nándi sá ná cáda ñàhá-yu xii-ndo. <sup>28</sup> Te cáca<sup>n</sup> táhú-ndó núú Yá Ndiöxí cuèndá ñáyiú càhá<sup>n</sup> úhú ñáhá xii-ndo, ndihí cuèndá ñáyiú tèe ñaha cuéchi neñùú xii-ndo. <sup>29</sup> Te núu ní canihá-yu xii-ndo ì<sup>n</sup> xito te cuení tucú-yu canihá-yu, te dañá-ndo na cànihá-yu, àdi núu na quèndeé-yu dóó ndíxí ndòdo-ndo, ndihí dúhnú-ndó, te dañá-ndo na cànehé-yu quíhí<sup>n</sup>. <sup>30</sup> Te núu xicá<sup>n</sup>-yu ì<sup>n</sup> sá nándihí-yu núú-ndó te cuáñaha-ndo, àdi quèndeé-yu ì<sup>n</sup> ndachìu<sup>n</sup>-ndo, te vá nándàcá<sup>n</sup>-ndó núú-yu. <sup>31</sup> Te nchaa sá vâha cuení-ndó càda tnaha ñáyiú-ndo, te cada-ndo tnàhá-ndó ndihí-yu.

<sup>32</sup> 'Chi núu nchòhó ná cùu iní-ndó mèe-ni ñáyiú cùu iní ñáhá xii-ndo, te vá càchí-ndó sã ïo vâha quide-ndo, chi tnàhá nchaa ñáyiú ndècu ichi cuehé ichi duha duca<sup>n</sup> xĩquidé-yu. <sup>33</sup> Àdi mee-ni ñáyiú quide ñaha sá vâha xii-ndo quide váha-ndö-yu, te vá càchí-ndó sã ïo vâha quide-ndo, chi tnàhá nchaa ñáyiú ndècu ichi cuehé ichi duha duca<sup>n</sup> xĩquidé-yu. <sup>34</sup> Àdi mee-ni ñáyiú sàni iní-ndó nàcoto ñaha xii-ndo cuáñaha-ndo ì<sup>n</sup> sá xicá<sup>n</sup>-yu núú-ndó, te vá cání

iní-ndó sã ïo quide váha-ndo, chi tnàhá ñáyiú ndècu ichi cuehé ichi duha dàsa<sup>n</sup> nuú-yu ì<sup>n</sup> sá néhé vãha-yu, te ndètu cahnu-ná-yu nacoto ñaha ñáyiú ní sãha nuú-yu-á<sup>n</sup>. <sup>35</sup> Dico nchòhó xíní ñùhu-xí cuu iní-ndó ñáyiú cùu úhú iní ñáhá xii-ndo, te cada-ndo sã vãha sá cúu-xí-yu, te cuãñaha nuu-ndo ì<sup>n</sup> sá ná ndìhi-yu te núu xicá<sup>n</sup>-yu núu-ndó, te vá cundètu-ndo nacoto ñahá-yu xii-ndo. Te duca<sup>n</sup> te ío-gá cuehé ñihí-ndó cundecu ndìhi-ndo, te cuu ndisa-ndo dèhe Dútú Ndiöxí, chi ío càhnu iní-gá sá cúu-xí nchaa ñáyiú ñá túú ndàcá<sup>n</sup> táhú nùú-gã cuendá nchaa sá vãha quide-gá, ndìhi sá cúu-xí nchaa ñáyiú ndècu ichi cuehé ichi duha. <sup>36</sup> Te cunduú càhnu iní nchòhó tucu dàtná càhnu iní Tátá-ó Dútú Ndiöxí.

*Vá càhá<sup>n</sup> cuehé-ó cuendá tnàha ñáyiú-o  
(Mt. 7:1-5)*

<sup>37</sup> Te vá càhá<sup>n</sup> cuehé-ndó cuendá sá quidé tnàha ñáyiú-ndo, te duca<sup>n</sup> te Yá Ndiöxí ñá túú nà tnúhu cúñaha-gã xii-ndo. Te vá cùñaha-ndo xii ñáyiú sá quìhí<sup>n</sup>-yu ì<sup>n</sup> xichi núú ùhú núú ndàhú ndohó-yu cuendá nchaa sá ñá túú vãha quidé-yu, te duca<sup>n</sup> te Yá Ndiöxí vá cùñaha-gã xii-ndo sã tnàhá-ndó quìhí<sup>n</sup>-ndó ì<sup>n</sup> xichi núú ùhú núú ndàhú ndohó-ndo. Te chí cádá càhnu iní nchaa sá quidé-yu, te duca<sup>n</sup> te Yá Ndiöxí cada càhnu iní ñáhá-gã xii-ndo tucu. <sup>38</sup> Te chí cuãñaha xii ñáyiú núu ná cúu sã xíní ñùhú-yu, te dàtná chitu ì<sup>n</sup> yicá súúní xidó coyo-ná, duca<sup>n</sup> tàxi Yá Ndiöxí xii-ndo. Te nánicuáa na càda-ndo cada váha-ndo sã cúu-xí tnàha ñáyiú-ndo, te ñiu-ni duca<sup>n</sup> càda ñaha Yá Ndiöxí xii-ndo —càhí Jèsús xãha<sup>n</sup>-gã xií-yu.

39 Te dǎtnùní ní cani-gá ìᵐ cuèndú núŭ-yu nàcuáa tecú tnùní-yu tnúhu-gá, te xǎha<sup>n</sup>-gǎ:

— Ìᵐ tée cuàá chi ñá ndácú-dě cuita nehe-dé ìngá tée cuáá, chi núu duca<sup>n</sup> na càda-güedé te ndi ndùú-güedé ngaunihnu-güedé déhvá. 40 Te ni ìᵐ landú yíhí scuèlá ñá túú cùnūu-gá-güexi dàcúúxí mèstrú-güexi, te ndéé núu na cùtúha váha-güexi, te dǎtnùní nútahá-güexi tée dǎnehé ñáhá xì-güexi.

41 'Te na càchí tnúhu-í xii-ndo sǎ nchàa cuéchi quide ñáyiú cùu-xi datná ìᵐ mihi líhli. ¿Te ná cuèndá ndéhé-ndó ìᵐ sá ñà túú vǎha quide tnaha ñáyiú-ndo, te mee-ndo vìhi-gá quidé-ndó-í? Te sá dúcá<sup>n</sup> quide-ndo te cada iní-ndó sǎ ndéhé-ndó dàtná ìᵐ mihi líhli ñùhu núú tnàha ñáyiú-ndo, te mee-ndo ñùhu ìᵐ mihi cahnu-gá núú-ndó. 42 Te núu na nàcanu ichi-ndo tnaha ñáyiú-ndo cuèndá sá ñà túú quide váha-yu ndècú-yu te mee-ndo vìhi-gá quidé-ndó ñá, te cada iní-ndó sǎ xǎha<sup>n</sup>-ndo xì-yu sá nátàva-ndo mihi líhli ñùhu núŭ-yu, te mihi càhnu ñùhu núú méé-ndó ñà túú quide cuendá-ndó. ¿Te sá dúcá<sup>n</sup> quide-ndo te ío dǎndahú-ndó mèe-ndo sá quidé ndǎá-ndó te ñá ndǎá sá quidé ndǎá-ndó! Te xìni ñùhu-xi díhna-gá dañà-ndo nchàa sá ñà túú vǎha quide-ndo, te dǎtnùní duca<sup>n</sup> te cutnùní váha iní-ndó nàcuáa nacanu ichi-ndo tnàha ñáyiú-ndo.

*Ndi dǎᵐ núú yutnu xìní-ó nǎ yutnu cùu-xi cuendá sá sǎvidí-xi*

*(Mt. 7:17-20; 12:34-35)*

43 'Te ñá túú nì ìᵐ yutnu váha te quiní-ó cùu<sup>n</sup> sávidí sá ñà túú vǎha, te ni ìᵐ yutnu sá ñà túú vǎha, te quiní-ó cùu<sup>n</sup> sávidí váha, chi mee-ni sávidí sá ñà túú vǎha cùu<sup>n</sup>. 44 Te ndi dǎᵐ núú yutnu xìní-ó nǎ



yutnu cùu-xi cuendá sá sǎvidí-xi, chi ñá túú xìní-ó cùu<sup>n</sup> ngúxí ñ<sup>n</sup> tnu ìñu, te ni ñà túú xìní-ó cùu<sup>n</sup> ndéhé yoho yàha stilé díquí ñ<sup>n</sup> yoho yàha cutexínu. <sup>45</sup> Te nchaa ñáyu váha ìní-xi càhá<sup>n</sup>-yu tnúhu váha, chi ñu-ni tnúhu váha tnàhí-á<sup>n</sup> ñúhú ìní-yu, te nchaa ñáyu ñá túú vǎha ìní-xi càhá<sup>n</sup> cuèhé-yu, chi ñu-ni tnúhu cuèhé tnàhí-á<sup>n</sup> ñúhú ìní-yu, chi nchaa sá ñúhú ìní-yu te xǎ<sup>n</sup> càhá<sup>n</sup>-yu.

*Í<sup>n</sup> vehe ndècu cimientú-xi ndíhi ñ<sup>n</sup> vehe ñá túú cimientú-xi*  
(Mt. 7:24-27)

<sup>46</sup> ¿Te ná cuendá càchí-ndó sǎ yǔhú cúú-í Yaá cúú Xítohó-ndó te ñá túú quide-ndo nchaa nacuaá càhá<sup>n</sup>-í-í? <sup>47</sup> Te na càchí tnúhu-í xii-ndo cuendá ñáyu tǔha ñaha xii-í, chí ñáyu-á<sup>n</sup> sácúndedóho-yu nchaa tnúhu càhá<sup>n</sup>-í te tnǎ<sup>n</sup>-yu. <sup>48</sup> Te ñáyu-á<sup>n</sup> cúu-yu dàtná ñ<sup>n</sup> téé ní dácáá ñ<sup>n</sup> vehe, chí téé-á<sup>n</sup> dǎhna-gá ní xete-dé ndéé ní tnahá-dé yúú cáxí<sup>n</sup> te dàtnú ní tava-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vèhe-á<sup>n</sup>, dico ñá túú ní ndàcu-xi cuido-xi, te duca<sup>n</sup> chí téé ní dácáá vèhe-á<sup>n</sup> ñ<sup>n</sup> tava-dé cimientú-xi núú yúú cáxí<sup>n</sup>. Duha sǎtnahá-xi cùu nchaa ñáyu sácúndedóho tnúhu càhá<sup>n</sup>-í te tnǎ<sup>n</sup>-yu. <sup>49</sup> Te ñáyu sácúndedóho tnúhu càhá<sup>n</sup>-í te ñá túú tnǎ<sup>n</sup>-yu, ñáyu-á<sup>n</sup> cúu-yu dàtná ñ<sup>n</sup> téé ní dácáá ñ<sup>n</sup> vehe, te ñá túú ní tava-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vèhe-á<sup>n</sup>, te í-í ní xido-xi vehe-á<sup>n</sup> cuendá sá ñà túú ní quène cimientú-xi. Duha sǎtnahá-xi cùu nchaa ñáyu sácúndedóho tnúhu-í te ñá túú cuìní-yu tnǎ<sup>n</sup>-yu —càchí-gá xǎha<sup>n</sup>-gǎ xíí-yu.

## 7

*Jèsús quidé tătna-gá ì<sup>n</sup> téé xìnu cuechi núú ì<sup>n</sup> téé cùu capitá<sup>n</sup>*

*(Mt. 8:5-13)*

<sup>1</sup> Te sátá nǐ yáha ní cáhá<sup>n</sup> Jèsús ndìhi ñáyiu, te cuáhá<sup>n</sup>-gá ñúú Capèrnaúm. <sup>2</sup> Te yàcá<sup>n</sup> ndécú ì<sup>n</sup> téé cùu capitá<sup>n</sup>, te cùhú ì<sup>n</sup> téé xìnu cuechi núú-dě téé ío-gá cúú ìní-dé, te sa ndècu-ná-dé sá cùú-dé. <sup>3</sup> Te òré ní níhí tée cùu capitá<sup>n</sup>-á<sup>n</sup> tnǔhu cuendá Jèsús, te ní tendaha-dě ì<sup>n</sup> ǔú cue téé cùu sacuéhé núú ñáyiu isràél cuáhá<sup>n</sup>-güedé cáhá<sup>n</sup> ndàhú-güedé núú-gǎ nǔú vá cündèe ìní-gá quíhí<sup>n</sup>-gá cada tătna-gá téé xìnu cuechi núú-dě-á<sup>n</sup>. <sup>4</sup> Te ní quexìo-güedé núú ndécú Jèsús, te ní ngüita-güedé càhá<sup>n</sup> ndàhú víhí-güedě núú-gǎ, te xǎha<sup>n</sup>-güedě:

—Tée cùu capitá<sup>n</sup> ní cachí-dé véxi-ndí nǔú vá cündèe ìní-n quíhí<sup>n</sup>-n càda tătna-n ì<sup>n</sup> téé xìnu cuechi núú-dě chí cùhú-dé, te tàú ndisa-n càda-n nacuaá càhá<sup>n</sup> capitá<sup>n</sup>-á<sup>n</sup>, <sup>5</sup> chí téé-ǎ<sup>n</sup> ío cùu ìní ñáhá-dě xii nchaa nchúhú ñáyiu isràél te ðiu-dé ní táuchíú<sup>n</sup>-dě ní sáá veñúhu-ndí —càchí-güedé xǎha<sup>n</sup>-güedě xii-gá.

<sup>6</sup> Te sátá dúcá<sup>n</sup> te Jèsús ní xica-gá cuáhá<sup>n</sup>-gá ndìhi-güedé, te òré tá cùyatni-gá vehe núú ndécú téé cùhú-á<sup>n</sup> cuáhá<sup>n</sup>, te téé cùu capitá<sup>n</sup>-á<sup>n</sup> nǐ xáha<sup>n</sup>-dě xii ì<sup>n</sup> ǔú cue téé càhá<sup>n</sup> ndìhi-dé:

—Quíhí<sup>n</sup>-ndó cǔñaha-ndo xii Yaá cúú Mèstrú sá càchí-í sá ñà túú nǎ cani ìní-gá, chí ñá túú tàú-í sá quíhu-gá ndéé xití vehe-í, <sup>7</sup> chí nì sá cùnú ndúcú mèe-í-gá ñá túú ní cùyí-í. Núú xǎ<sup>n</sup> cúñaha-ndo xii-gá sá ná càhá<sup>n</sup>-ni-gá sá ndǔha téé xìnu cuechi

nùù-í-a te ndúha-dé. <sup>8</sup> Chi yúhú ndécú cuè téé tàxi tnuní ñáhá xii-í, te duca<sup>n</sup> yúhú tucu ndècu cue sandadú táxi tnuní-í. Te òré xǎha<sup>n</sup>-í xii ì<sup>n</sup>-dé quíhí<sup>n</sup>-dé ì<sup>n</sup> chùu<sup>n</sup> te cuáhá<sup>n</sup>-dé, te òré xǎha<sup>n</sup>-í xii ìngá-dé quixi-dé te véxi-dé, te òré xǎha<sup>n</sup>-í xii téé xìnu cuechi núù-í cada-dé ì<sup>n</sup> chùu<sup>n</sup> te quìde-dé. Duha càchí-í cúñaha-ndo xii-gá —càchí-dé xǎha<sup>n</sup>-dè xii cue téé càhá<sup>n</sup> ndihí-dé-á<sup>n</sup>.

<sup>9</sup> Te sátá dúcá<sup>n</sup> ñí xáha<sup>n</sup>-güedě xii Jèsús, te ní cuñúhu-gá nchaa tnúhu ní cáhá<sup>n</sup> téé cùu capitá<sup>n</sup>-á<sup>n</sup>, te ní nchócótó-gǎ núú nchàa ñáyiú nchìcú<sup>n</sup> ñáhá xii-gá cuáhá<sup>n</sup>, te ní xáha<sup>n</sup>-gǎ:

—Na càchí tnúhu ndáá-í xii-ndo sǎ vǎtá quìní-gá-í ñí ì<sup>n</sup> ñáyiú isràél, ñáyiú ío váha sàndáá ìní-xi Yá Ndiǒxí dàtná sàndáá ìní ñáhá tǎe-ǎ<sup>n</sup> xii-gá —càchí-gá xǎha<sup>n</sup>-gǎ xii-yu.

<sup>10</sup> Te òré ní ndexìo cue téé nèhe tnúhu-á<sup>n</sup> ñí sáhá<sup>n</sup> núú Jèsús, te sa ní ndúha téé cùhú-á<sup>n</sup>.

### *Jèsús dándòto-gá déhe ì<sup>n</sup> ñaha quèé*

<sup>11</sup> Te sátá dúcá<sup>n</sup> ñí cuu te ní xica Jèsús cuáhá<sup>n</sup>-gá ì<sup>n</sup> ñuú nání Nàín, ndihí cue téé xica cuu ndihí-gá, ndihí vǎi ñáyiú. <sup>12</sup> Te òré ní sáá-gá yuhu ñuú-á<sup>n</sup>, te ní xiní-gá nchídó-güedě ì<sup>n</sup> ndíyi cuáhá<sup>n</sup> chindúxi ñaha-güedě, te ndíyi-á<sup>n</sup> cúú dǎhe ì<sup>n</sup> ñaha quèé, te ì<sup>n</sup> ddi duca<sup>n</sup>-ni déhe-a<sup>n</sup> ndècu ñí cuu te ní xíhí-dé. Te ío cuéhé ñáyiú cuáhá<sup>n</sup> chindúxi ñaha. <sup>13</sup> Te òré ní xiní ñáhá Jèsús xii-a<sup>n</sup> ndàhyú-a<sup>n</sup> te ní cundàhú ìní ñáhá-gǎ, te ní xáha<sup>n</sup>-gǎ:

—Vá ndàhyú-n —càchí-gá xǎha<sup>n</sup>-gǎ xii-a<sup>n</sup>.

<sup>14</sup> Te ní dáyátní-gǎ càjá ñúhú ndíyi-á<sup>n</sup> te ní dácàá-gá ndaha-gá te ní tendaha-gǎ càjá-á<sup>n</sup>, te ní

ngüñí cue tée nchìdo ñaha-án. Te ní xáha<sup>n</sup>-gã xii ndíyi-án:

—Tée cuechi, yúhú cächí-í sá ndácõo-n — cächí-gá xãha<sup>n</sup>-gã xii ndíyi-án.

<sup>15</sup> Te tée ní xíhí-án ñí nucúnucóo-dé te ní ngüíta-dé cãhá<sup>n</sup>-dé, te Jèsús ní nacuáha cuendá ñãhá-gã xii-dé ndaha ñaná-dě. <sup>16</sup> Te sá dúcán ñí quide Jèsús ní xiní-yu te ío ní yùhú-yu, te ní xítñàhá-yu:

—Ío cãhnu cuu Yá Ndiõxí chi ñ<sup>n</sup> tée cãhá<sup>n</sup> tnúhu-gá ní quexio núú ndécú-ó —cächí-yu xítñàhá-yu.

Te ní xítñàha tucú-yu:

—Yá Ndiõxí véxi-gá chindee ñàha-gá xii nchaa nchoo ñãyiu cùu cuendá-gá —cächí-yu xítñàhá-yu.

<sup>17</sup> Te nchaa ñúú distritú Jùdeá, ndíhi dava-gá ñúú ní níhí-yu tnúhu nàcuáa ní quide Jèsús.

*Cue tée ní tendaha té Juàá cuáhá<sup>n</sup> núú ndécú Jèsús (Mt. 11:2-19)*

<sup>18</sup> Te cue tée xìca cuu ndíhi té Juàá ní xáha<sup>n</sup>-güedě xii-dé nchaa sá ñí quide-gá, núu ní cana-dé úú tñàhá-güedé <sup>19</sup> cuendá cúñaha-dě quíhí<sup>n</sup>-güedé nducu tnúhu-güedé núú Jèsús, te núu sá díú-gã cúú-gã Crístú Yaá ní tendaha Yã Ndiõxí véxi ñuyíú-a àdi sá cündetu nahi-ni-güedé mei Yàá-án. <sup>20</sup> Te òré ní quexio cue tée ní tendaha tẽ Juàá núú ndécú Jèsús, te xãha<sup>n</sup>-güedě xii-gá:

—Té Juàá tée dàcuandute ñaha xii ñãyiu ní tendaha ñàha-dé xii-ndí véxi-ndí cãcá<sup>n</sup> tnúhú-ndí núú-n, núu sá díú-n cùu Crístú Yaá quixi

ñuyíú-a, àdi sá cùndètu-ndí mei Crìstú càchí-dé —càchí-güedé xăha<sup>n</sup>-güedě xii-gá.

<sup>21</sup> Te mei òré ní quexìo-güedé-á<sup>n</sup> nǐ quide tátna Jèsús vài ñáyiu cùhú, te davá-yu càhú víhí tnàhá-yu, te ndi díí<sup>n</sup> ndi díí<sup>n</sup> núú cuèhé tnàhá-yu ìí<sup>n</sup> íí<sup>n</sup>-yu, te cue ñáyiu yìhí ñaha espíritú cùndìhí yucu ñávăha ní queñuhu-gá espíritú-á<sup>n</sup> yiqui cùñú-yu, te ío vài ñáyiu cuáá ní nacaá<sup>n</sup>-gá núú-yu. <sup>22</sup> Te Jèsús ní xăha<sup>n</sup>-gă xii-güedé:

—Chí cuánùhú te cani-ndo cuendú núú tě Juàá nchaa sá nǐ xiní-ndó quide-í, ndihí nchaa nàcuáa ndùu tnúhu ní cáhá<sup>n</sup>-í ní xíndedóho-ndo. Te cúñaha-ndo xii-dé sá quidé tátna-í núú cue ñáyiu cuáá, te quide tátna-í cue ñáyiu yacua, ndihí cue ñáyiu tnàhá cuéhé să dátèhyú nihnu-xi yiqui cùñú-yu, ndihí cue ñáyiu doho, nchaa ñáyiu-á<sup>n</sup> quide tátna-í te ndŭha-yu, te ndéé cue ñáyiu sa ní xíhí dándòto-í cúñaha-ndo xii-dé, te cúñaha tùcu-ndo xii-dé sá nděcuu-í dánèhé-í nchaa ñáyiu ndàhú tnúhu sá sánú ìchi ñaha xií-yu nàcuáa naníhí tàhú-yu. <sup>23</sup> Te cúñaha tùcu-ndo xii-dé sá ìo váha táhú nchaa ñáyiu ñá túú quide sáá iní nchaa tnúhu càhá<sup>n</sup>-í, duha cúñaha-ndo xii-dé —càchí-gá xăha<sup>n</sup>-gă xii-güedé.

<sup>24</sup> Te sátá nǐ yáha-güedé cuánuhú-güedé, te ní ngúíta Jèsús ní cáhá<sup>n</sup>-gá núú ñáyiu cuendá té Juàá, te xăha<sup>n</sup>-gă xií-yu:

—Nchòhó ní sándéhé-ndó ìí<sup>n</sup> tée ndècu xítí yucu, te tée-á<sup>n</sup> ñà túú sàni ìí<sup>n</sup> sani úú iní-dé, chi ñá túú quide-dé dàtná quidé nchaa ité náhnú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné tăchí. <sup>25</sup> Te ni ñà túú ní sándéhé-ndó ìí<sup>n</sup> tée nihnu dóó văha dóó

vii càa. Te nchòhó xìní-ndó sã ñãyiu sàcuíhnu dóo vãha dóo vii càa ñá túú nã cúmãní xií-yu, te nchaa ñãyiu-á<sup>n</sup> ndécũ-yu vehe cue tée cùnũu yĩndaha ñaha xii ñãyiu. <sup>26</sup> Dico nchòhó chi ní sándéhé-ndó ì<sup>n</sup> tée càhá<sup>n</sup> tnúhu Yá Ndiõxí. Te ndáá sá dıú tẽe càhá<sup>n</sup> tnúhu-gá cúú-dẽ dico cùnũu-gá-dé dácúúxí dáva-gá cue tée càhá<sup>n</sup> tnúhu-gá. <sup>27</sup> Te dıu cuendá té Juáá-á<sup>n</sup> càhá<sup>n</sup>-xi núú tütú Yã Ndiõxí nàcuáa ní xáha<sup>n</sup>-gã xii Crìstú, te duha ní xáha<sup>n</sup>-gã:

Tendaha-ı ì<sup>n</sup> tée càhá<sup>n</sup> tnúhu-ı codonũu-dé núú-n cuendá dätúha-dé ñãyiu cuendá quĩndáá inı-yu tnúhu-n.

Duha ní xáha<sup>n</sup>-gã, te duca<sup>n</sup> ñĩ ngódó tnùní núú tütú-gá. <sup>28</sup> Te na càchı tnúhu-ı xii-ndo sã ñı ì<sup>n</sup> cue tée ñuyıú-a ñá túú cùnũu-güedé dätná cùnũu té Juáá tée dăcuandute ñaha xii ñãyiu. Te nchaa ñãyiu sa ta ndıhu ndaha ñaha Yá Ndiõxí vitna cuáhá<sup>n</sup> cùnũu-gá-ni tucú-yu dácúúxí tẽ Juáá cuẽi cùú-yu ñãyiu ñá túú cùnũu dácúúxí dáva-gá ñãyiu yĩndaha-gá —càchı Jèsús xãha<sup>n</sup>-gã xiı-yu.

<sup>29</sup> Te sá dúcá<sup>n</sup> ñĩ càhá<sup>n</sup> Jèsús, núu nchaa ñãyiu ní dăcuándute té Juáá ní cachı-yu sá ıo vãha quıde Yá Ndiõxí, te dıu-ni duca<sup>n</sup> ñĩ càhá<sup>n</sup> cue tée cuihna inı-xi quıde cobrá ñáhá xii ñãyiu cuendá impuèstú, cue tée ní dăcuándute-dé. <sup>30</sup> Dico cue tée cùu fariséu, ndıhı cue tée dăcuaha ñaha xii ñãyiu nchaa tnúhu ní chıdó tnùní ndıı Moısés, cue tée ñá túú ní dăcuandute té Juáá ñá túú ní tnãhá inı-güedé cada-güedé nchaa sá vãha cuını Yã Ndiõxí. <sup>31</sup> Te Xıtóhó Jesucrìstú ní xáha<sup>n</sup>-gã xiı-yu:

—Na càchı tnúhu-ı xii-ndo nàcuáa sãtnahá-xi cùu ñãyiu ndècu vitna. <sup>32</sup> Chi ñãyiu-á<sup>n</sup> cúũ-yu dätná cue landú sácõo núú yãhu dădıqui-güexi te níhi

càhá<sup>n</sup>-güexi, te xĩtnàha-güexi: “Ní tiú-ndí yaá ndihì vĩlu te ñá túú ní cuini-ndó càta-ndo. Te ío yica ìní ní xita yuhu-ndĩ te ñá túú ní ndǎhyú-ndó”, càchí-güexi xĩtnàha-güexi. Te duca<sup>n</sup> sǎtnahá-xi cùu ñáyiú ndècu vitna. <sup>33</sup> Te té Juàá téé ní xóo dacuàndute ñaha xii ñáyiú ío ndàhú ní xóo caxi-dé, te ní ñà túú ní xóo coho-dé ndudí ndéhé yoho yàha stilé sá sà ní nduu-xi ndidí, te ní cachí-ndó sǎ ñĩ xĩndecu ndihì-dé espíritú cúndihì yucu ñávǎha. <sup>34</sup> Te sátá ñĩ quexìo yúhú Téé cùu ñaní tnahá-ndó nchàa-ndo, te xèxi-í xihì-í ndécù-í te càchí-ndó sǎ cùu-í téé xèxi vihi te xihì vihi-í. Te càchí tucu-ndo sǎ cùu-í téé xica cuu ndihì cue téé cuihna ìní-xi quide cobra ñáhá xii ñáyiú cuendá impuèstú, ndihì nchaa dava-gá cue téé ndècu ichi cuehé ichi duha, duha càchí-ndó. <sup>35</sup> Te ñáyiú ní tnahá tnúhu ndihì Yá Ndiòxí, ñáyiú-á<sup>n</sup> quidě-yu nàcuáa cutnùní sá mée-gǎ ío ndècu ndihì-gá sá xini tnùní-gá — càchí-gá xǎha<sup>n</sup>-gǎ xií-yu.

*Jèsús ndécú-gǎ vehe ì<sup>n</sup> téé cùu fariséú téé nàni Xímú*

<sup>36</sup> Te ì<sup>n</sup> téé cùu fariséú ní cáhá<sup>n</sup>-dé Jèsús vehe-dé caxi-gá, te òré ní quexìo-gá te cuànguihu-gá mèsá. <sup>37</sup> Te xía<sup>n</sup> núcõo-gá ní sáá ì<sup>n</sup> ñadìhì te ði-u-ni ñaha ñúú-á<sup>n</sup> cúú-á<sup>n</sup>, te ndècu-a<sup>n</sup> ichi díí ìní, te sá ñĩ níhì-a<sup>n</sup> tnúhu sá cuǎngaxi Jèsús vehe téé cùu fariséú-á<sup>n</sup>, núu nèhe-a<sup>n</sup> ì<sup>n</sup> yoó chitu àcití sáhá<sup>n</sup> tnámí. <sup>38</sup> Te ní ngóo-a<sup>n</sup> ì<sup>n</sup> xio dǎñi Jesús, te ní ngúíta-a<sup>n</sup> ndǎhyú-a<sup>n</sup> te ndihì ndute núú-a<sup>n</sup> ní naquete-a<sup>n</sup> sáhá-gǎ. Te dǎtnùní ní nadayìchì-a<sup>n</sup> ndihì idi díquí-a<sup>n</sup>, te ní teyuhu-a<sup>n</sup> sáhá-gǎ, te ní chihi ñaha-a<sup>n</sup> àcití sáhá<sup>n</sup> tnámí-ǎ<sup>n</sup>. <sup>39</sup> Te sá dúcá<sup>n</sup> ñĩ quide-a<sup>n</sup> ní xini téé

cùu fariséú tée ní cáhá<sup>n</sup> ñáhá xì-gá-á<sup>n</sup> nùu ní sani iní-dé: “Te núu dìcò ndisa tée càhá<sup>n</sup> tnúhu Yá Ndiòxí cùú tēe-a ña, te sa cutnùnì iní-dé yoo cùu ñaha tnándeé ñáhá xì-dé, àdi ná ñáyìu cùu-a<sup>n</sup>, te dìcò ìì<sup>n</sup> ñaha ndècu ichi dǐì iní cùú-á<sup>n</sup>”, duha ní sani iní-dé.  
 40 Te Jèsús ní xáha<sup>n</sup>-gǎ xii-dé:

—Xǐmú, ndècu ìì<sup>n</sup> tnúhu cachí tnúhu-í xii-n — càchí-gá xǎha<sup>n</sup>-gǎ xii-dé.

Te tée cùu fariséú-á<sup>n</sup> xǎha<sup>n</sup>-dě xii-gá:

—Cachí tnúhu, Mèstrú —càchí-dé xǎha<sup>n</sup>-dě xii-gá.

41 Te Jèsús ní xáha<sup>n</sup>-gǎ:

—Ní xíndecu ìì<sup>n</sup> tée ní xóo dasa<sup>n</sup> nùu díhú<sup>n</sup>, te ní xítaú úú tnàhá-güedé núú-dě. Te ìì<sup>n</sup>-dé ní sáha-dé úhú<sup>n</sup> cièndú díhú<sup>n</sup> denàriú, te ìngá-dé ní sáha-dé údico úxí. 42 Te ñá ní ñíhí-güedé nacháhu-güedé núú-dě, te tée ní sánùu ñaha-á<sup>n</sup> ní quide càhnu iní-dé ndi ndúú-güedé. Te vitna cachí-ò tucu te núu nděda càa-güedé cùú ìní ñáhá-gǎ-güedé xii-dé —càchí-gá xáha<sup>n</sup>-gǎ xii-dé.

43 Te ní xáha<sup>n</sup> tē Xǐmú-á<sup>n</sup>:

—Sànuu sá tēe tàú vài-gá díhú<sup>n</sup> ìo-gá cùú ìní-dé tée ní sánùu ñaha díhú<sup>n</sup>-ǎ<sup>n</sup> —càchí-dé xǎha<sup>n</sup>-dě xii-gá.

Te ní xáha<sup>n</sup> Jèsús:

—Sá ndàá càhá<sup>n</sup>-n —càchí-gá xáha<sup>n</sup>-gǎ xii-dé.

44-46 Te Jèsús ní ndacoto-gá núú ñadihí-á<sup>n</sup>, te ní xáha<sup>n</sup>-gǎ xii té Xǐmú-á<sup>n</sup>:

—¿Ndèhe-n nacuaa quide ñadihí-a ñă? Chi cuánguìhu-í vehe-n, dico ñá túú ní tàxi-n ndute ndoo sáhà-í, te ni ñà túú ní tèyuhu ñaha-n, te ni ñà túú ní chìhi-n acití díquè-í, dico ñadihí-a ní



naquete-a<sup>n</sup> ndihi ndute núú-a<sup>n</sup> sähà-í, te ní na-dayìchí-a<sup>n</sup> ndihi idi díquí-a<sup>n</sup>, te nuu núu teyuhu-a<sup>n</sup> sähà-í, te ní chihi-a<sup>n</sup> acití sähá<sup>n</sup> tnámí sähà-í. <sup>47</sup> Te na càchí tnúhu-í xii-n sǎ ïo cùu iní ñáhá-á<sup>n</sup> xii-í, te núu xǎ<sup>n</sup> cútnùní iní-ó sǎ cuèi ïo vǎi sá cuèhé sá dúhá ñǎ quide-a<sup>n</sup>, dico Yá Ndiöxí sa ní quide càhnu iní ñáhá-gǎ xii-a<sup>n</sup>. Chi Yá Ndiöxí quidé càhnu iní-gá ñáyiú cuèi vǎi àdi sacú cuéchi-yu, te núu sacú cuéchi-yu te sacú cúú ìní ñáhǎ-yu xii-í —càchí-gá xáha<sup>n</sup>-gǎ xii-dé.

<sup>48</sup> Te ní xáha<sup>n</sup>-gǎ xii ñadìhí-á<sup>n</sup>:

—Sa ní quide càhnu iní-í nchaa cuéchi-n —càchí-gá xáha<sup>n</sup>-gǎ xii-a<sup>n</sup>.

<sup>49</sup> Te cue téé xǎnucóo ndihi-gá xǐtnàha-güedé:

—¿Ná téé cùu téé-a núu nándi sá quidé-dě, te ndéé nchaa yíca cuéchi ñáyiú quide cahnu iní-dé-i? —càchí-güedé xǐtnàha-güedé.

<sup>50</sup> Te Jèsús ní xáha<sup>n</sup> tùcu-gá xii ñadìhí-á<sup>n</sup>:

—Sa ní cácu nihnu-n núú ùhú núú ndàhú vitna chi ní sándáá iní ñáhá-n xii-í, te vitna cuanùhú te ñá túú-gǎ ná cani iní-n —càchí-gá xáha<sup>n</sup>-gǎ xii-a<sup>n</sup>.

## 8

### *Ñáyiú dìhí ní chindee ñàha xii Jèsús*

<sup>1</sup> Te sátá dúcá<sup>n</sup> ñǎ cuu te Jèsús ní xica-gá cuáhá<sup>n</sup>-gá titní víhí ñùú náhnú, ndihi ñuú líhli dànehé-gá ñáyiú nàcuáa ndíhu ndaha ñàha Yá Ndiöxí xii-yu. Te cuáhá<sup>n</sup> ndihi-gá ndi ùxúú tnàhá cue téé xica cuu ndihi-gá, <sup>2</sup> ndihi ì<sup>n</sup> úú ñáyiú dìhí ní quide tátna-gá ní xíhi ñàha espíritú cúndihi yucu ñávàha, ndihi ñáyiú tnàhá dava-gá cuéhé ùhú ní

cùu. Te xíá<sup>n</sup> tnàhá tucu ì<sup>n</sup> ñaha nàni Mariá Magdalèná, te ñaha-á<sup>n</sup> nǐ xíhi ñaha ùsá espíritú cúndìhi yucu ñávãha xii-a<sup>n</sup> ni cùu, te ní quee ñaha-xi. <sup>3</sup> Te tnàhá ì<sup>n</sup> ñaha nàni Juáná ñadìhí ì<sup>n</sup> téè nàni Chúza téè ní cunuu nǐ xinu cuechi vèhe té Hèrodés, ndihì ingá ñaha nàni Susaná nchaa ñáyiu-á<sup>n</sup> nǐ chindee ñàhá-yu xii-gá ndihì nchaa sá ndécú ndihí-yu, te ñiu-ni duca<sup>n</sup> nǐ quide vài-gá tucu ñáyiu nchìcú<sup>n</sup> ñàhá xì-gá cuáhá<sup>n</sup>.

*Nàcuáa quìde téè cuángacá<sup>n</sup> triú  
(Mt. 13:1-9; Mr. 4:1-9)*

<sup>4</sup> Te ío vài ñáyiu ndaa ñuú ní tacá-yu núú ndécú Jèsús, te ní ngúíta-gá ní cani-gá ì<sup>n</sup> cuèndú núŷ-yu cuèndá tecu tnùnì-yu tnúhu-gá, te xáha<sup>n</sup>-gã xií-yu:

<sup>5</sup> —Ì<sup>n</sup> téè cuángacá<sup>n</sup>-dé triú. Te òré ní ngúíta-dé dǎngoyo-dé triú-á<sup>n</sup> te dava ní quene ndava ní ngava ndéé ichi, te ní xénihnu ñáyiu, te ní xiní tílaá te ní nadatàcá-güedi. <sup>6</sup> Te dava ní ngava ñuhu yadi núú yíhí vèhi yúú, te ní xínu-xi dico núú sàcú-ni nduu te ní yíchí-xi, chi ñá túú cǒhyo yìhi. <sup>7</sup> Te dava ní ngava núú yúcú ndǐquí<sup>n</sup> tnu ìñu, te ì<sup>n</sup>nuu-ni nǐ xínu-xi ndihì tnu ìñu-á<sup>n</sup>, te tnu ìñu-á<sup>n</sup> nǐ dánáá-xí nchàa triú sá nǐ xínu-á<sup>n</sup>. <sup>8</sup> Dico dava triú-á<sup>n</sup> nǐ ngava-xi núú ndécú ñùhu coco<sup>n</sup>, te xíá<sup>n</sup> ní xínu-xi te ní sahnú-xi, te ío váha ní cuu, chi núú ì<sup>n</sup>-ní triú te ní nguíhi yoco-xi ì<sup>n</sup> cièndú triú-xi —càchí-gá xáha<sup>n</sup>-gã xií-yu.

Te níhi ní cáhá<sup>n</sup>-gá ní xáha<sup>n</sup> tùcu-gá xií-yu:

—Nchaa nchòhó ñáyiu ní xíndedóho tnúhu ní cáhá<sup>n</sup>-í-a, te ío váha chí cuãha cuèndá —càchí-gá xáha<sup>n</sup>-gã xií-yu.

*Nàcuáa quèe-xi tnúhu ní cáhá<sup>n</sup> Jèsús  
(Mt. 13:10-17; Mr. 4:10-12)*

<sup>9</sup> Te cue téé xica cuu ndihi Jesús ní xicá<sup>n</sup> tnúhú-güedé núú-gă nũu nása quèe-xi cuendú ní cani-gá núú ñăyiu. <sup>10</sup> Te ní xáha<sup>n</sup>-gă xii-güedé:

—Nchòhó chi sa càchí tnúhu Yá Ndiõxí xii-ndo ñ<sup>n</sup> sá vătă quìní-gá-ndó, chi càchí tnúhu-gá nàcuáa cada-gá ndihu ndaha-gă ñáyiu, dico dava-gă ñáyiu càni-í mee-ni cuendú núũ-yu, chi cuéi na quìní-yu nchaa nàcuáa cuu dico nì vá cùnùnì iní-yu ná cuendá duca<sup>n</sup> cùu, àdi cuéi na cùndedóho-yu dico nì vá tècú tnùnì-yu —càchí-gă xáha<sup>n</sup>-gă xii-güedé.

*Jèsús càhá<sup>n</sup>-gá nàcuáa quèe-xi tnúhu cuendá téé  
cuángacá<sup>n</sup> triú*

*(Mt. 13:18-23; Mr. 4:13-20)*

<sup>11</sup> Te xăha<sup>n</sup> tùcu-gă xii-güedé:

—Duha quèe-xi cuendú ní cani-í núú-ndó, chi triú ní sacá<sup>n</sup> téé-á<sup>n</sup> cúú-xí dàtná tnúhu Yá Ndiõxí. <sup>12</sup> Te triú sá ñí quene ndava ní ngava ndéé ichi-á<sup>n</sup>, xíá<sup>n</sup> cúú-xí dàtná ñáyiu ní quée iní-xi tnúhu Yá Ndiõxí, dico sácuihná cuăhá<sup>n</sup>-xi xòcani-xi tnúhu-gă iní-yu cuendá sá vă quìndáá iní-yu, te vá nánihí tãhú-yu. <sup>13</sup> Te triú sá ñí ngava ñuhu yadi núú yíhí vîhi yúú, xíá<sup>n</sup> cúú-xí dàtná ñáyiu ní xíndedóho tnúhu Yá Ndiõxí te díí iní ní tnií-yu tnúhu-gă, dico òré ná dàcahá<sup>n</sup> ñáhá yùcu ñávãha xií-yu nándi cadá-yu, te dàña nihnú-yu tnúhu-gă chi ñá nihí ndéë-yu can-chicú<sup>n</sup> nihnú-yu nàcuáa càhá<sup>n</sup> tnúhu-gă. <sup>14</sup> Te triú sá ñí ngava núú yúcu ndĩquí<sup>n</sup> tnu iñu-á<sup>n</sup>, xíá<sup>n</sup> cúú-xí dàtná ñáyiu ní tecú dóho-xi tnúhu Yá Ndiõxí, dico cuéé cuéé ní nacuanaá-yu tnúhu-gă, chi cuendá mee-ni sã cúú-xí mèé-yu ñùhu iní-yu, ndihi cuendá

sá ïo sàni iní-yu cuu cuicá-yu, ndihì cuendá sá ïo cùdíí iní-yu nchaa sá ío ñuyíú-a núu xíá<sup>n</sup> àú<sup>n</sup> nã cuu ní xíndedóho-yu tnúhu-gá. <sup>15</sup> Dico triú sá ñí ngava núú ndécú ñùhu coco<sup>n</sup>, xíá<sup>n</sup> cúú-xí dàtná ñáyiu váha iní-xi ní xíndedóho tnúhu Yá Ndiõxí chi ñá túú dàña nihnú-yu, te ni yùhu ni iní-yu quidé-yu nchaa nàcuáa càhá<sup>n</sup> tnúhu-gá.

*Nàcuáa quidé-yu iti*  
(Mr. 4:21-25)

<sup>16</sup> Te ñá túú ni ñ<sup>n</sup> ñáyiu tènùhu-yu ñ<sup>n</sup> iti te dàdáhu-yu, àdi chiváha-yu ñ<sup>n</sup> caha càamá, chi tàxi ndecú-yu núú ñínu cuendá cutnùnì núú nchaa ñáyiu ndècu vehe. <sup>17</sup> Te ni ñ<sup>n</sup> tnúhu sá ñã tècú tnùnì ñáyiu vitna vá càchí-ó sã vã tècú tnùnì-yu chi dacuèi sá tècú tnùnì-yu, te ni ñ<sup>n</sup> tnúhu sá càchí-ó cùu yuhu vitna vá cúú yùhu chi dacuítíí sã quée túu-xi núú ñáyiu.

<sup>18</sup> Te chí cùndedóho váha tnúhu na càhá<sup>n</sup>-í-a. Nchaa ñáyiu sàndáá iní ñáhá xìi Yá Ndiõxí ío-gá cuita quíndáá-gá iní ñáhã-yu xii-gá quíhí<sup>n</sup>, te nchaa ñáyiu ñá túú sàndáá iní ñáhá xìi-gá uu<sup>n</sup>-gá cuita cuu sàá-gá iní-yu núú-gã quíhí<sup>n</sup> —càchí-gá xáha<sup>n</sup>-gã xii-güedé.

*Cue ñaní Jèsús ndihì nãná-gã*  
(Mt. 12:46-50; Mr. 3:31-35)

<sup>19</sup> Te ní quexìo náná Jèsús ndihì cue ñaní-gá vehe núú ndécú-gã, te ñá ndácü-yu cáhá<sup>n</sup> ndihì ñáhã-yu xii-gá chi ío cuéhé ñáyiu ndècu núú ndécú-gã. <sup>20</sup> Te ñ<sup>n</sup> ñáyiu xíndecu-á<sup>n</sup> ñí dáýãha-yu tnúhu núú-gã, te xáhã<sup>n</sup>-yu:

—Ní quexìo náná-n ndìhi cue ñaní-n xñutnñi-yu quehé, te cuíní-yu cáhá<sup>n</sup> ndìhi ñàhá-yu xii-n — càchí-yu xähä<sup>n</sup>-yu xii-gá.

<sup>21</sup> Te ní xáha<sup>n</sup>-gã:

—Nchaa ñáyiú sàcúndedóho tnúhu Yá Ndiöxí te quidé-yu nchaa nàcuáa càhá<sup>n</sup> tnúhu-gá, ñáyiú-á<sup>n</sup> cúü-yu dàtná nänà-í ndìhi dàtná cue ñaní-í — càchí-gá xáha<sup>n</sup>-gã xii ñáyiú ní dáyäha tnúhu núú-gã-á<sup>n</sup>.

*Jèsús ngání-gã táchí ndìhi ndute làgúná*  
(Mt. 8:23-27; Mr. 4:35-41)

<sup>22</sup> Te ñ<sup>n</sup> nduu ní quée Jèsús bàrcú ndìhi cue téé xica cuu ndìhi-gá, te ní xáha<sup>n</sup>-gã:

—Chí ná quíhí<sup>n</sup>-ó ndàa ingá xio yuhu làgúná — càchí-gá xáha<sup>n</sup>-gã xii-güedé.

Te cuáhá<sup>n</sup>-güedé ndìhi-gá. <sup>23</sup> Te nini ñùhu barcú ichi cuáhá<sup>n</sup>-xi núú ndute ní xídí Jèsús. Te ní ngüíta-xi níhi vìhi quene táchí te ta nàdachitú-xi ndute xití bàrcú-á<sup>n</sup> cuáhá<sup>n</sup>, te sa cuíní-nã-xi quée naa bàrcú-á<sup>n</sup> xití ndute ni cùu. <sup>24</sup> Te ní sáhá<sup>n</sup>-güedé núú cáá Jèsús xídí-gá, te ní xáha<sup>n</sup>-güedé xii-gá:

—¡Mèstrú, ndiquíú ìní chi tà quée naa-o cuáhá<sup>n</sup>!  
—càchí-güedé xähä<sup>n</sup>-güedé xii-gá.

Te Jèsús ní ndiquíú ìní-gá te ní ndacóo-gá te ní tenáá-gá táchí-á<sup>n</sup> ndìhi ndute làgúná-á<sup>n</sup>, te ní ngüíñi-ni táchí-á<sup>n</sup> te ní nucúndecu nahi-nã ndute làgúná-á<sup>n</sup>. <sup>25</sup> Te ní xáha<sup>n</sup>-gã xii-güedé:

—¿Náa ñá túú sàndáá ìní ñàhá ndìsa-ndo xii-í á<sup>n</sup>?  
—càchí-gá xáha<sup>n</sup>-gã xii-güedé.

Te ní cuñúhu-güedé sá dúcá<sup>n</sup> ñí quide-gá ní xiní-güedé, te ní yühú-güedé, te ní xitnàha-güedé:

—¿Te ná téé cùu téé-a núu ní cáhá<sup>n</sup>-ni-dé te ní ngüíñí táchí te ní nucúndecu nahi-ni ndùte lagúná-a-i? —càchí-güedé xitnàha-güedé.

*Téé yìhi ñaha cue espíritú cùndìhi yucu ñávãha*  
(Mt. 8:28-34; Mr. 5:1-20)

<sup>26</sup> Te ní sáá-gã ndihi-güedé yucu cue téé ñuú Gàdará, te yìhi ndáá-ni ndàa ingá xio làgúná-án cáá dìstrítú Galileá. <sup>27</sup> Te òré ní quene Jèsús xítí bàrcú te ní dáyátní ñàha ì<sup>n</sup> téé ñuú-án xii-gá, te yìhi ñaha titní espíritú cùndìhi yucu ñávãha xii-dé. Te ní cunaha ñà túú-gã sácũhnu-dé dóó-dě, te ni ñà túú-gã sácũndecu-dé vehe-dé, chi da nchaa núú yíndũxi ndíyí quide vehe-dé. <sup>28</sup> Te òré ní xiní-dé Jèsús te ní ngüíñí xítí-dě núú-gã, te cue espíritú yíhí ñàha xii-dé-án ñí quide-xi níhi ní cáhá<sup>n</sup>-dé, te xãha<sup>n</sup>-dě xii-gá:

—¿Ná cuëndá véxi-õ Jèsús Déhe Dútú Ndiõxí sàdí-n ìchi-í-i? Te càhá<sup>n</sup> ndàhú-í núú-n sã và dándòho ñaha-n xii-í —càchí-dé xãha<sup>n</sup>-dě xii-gá.

<sup>29</sup> Te duca<sup>n</sup> ñí cáhá<sup>n</sup>-dé cuëndá sá Jèsús ní xáha<sup>n</sup>-gã xii nchaa espíritú cùndìhi yucu ñávãha yìhi ñaha sá ná quèe ñaha-xi xii-dé. Te nchaa xíã<sup>n</sup> ní xóo dacàhá<sup>n</sup>-xi iní-dé nándí sá ñí xóo cada-dé ñuu ní xóo dacùtu ñaha-güedé cadèná xii-dé cuëndá sá ñà túú-gã ná cada-dé, te ní xóo cundéé ñáhá-güedé, dico cuèi duca<sup>n</sup> dico ní xóo dandáva-ni-dé cadèná, te cue espíritú cùndìhi yucu ñávãha-án ñí xóo dacùnu ñaha-xi xii-dé ní xóo quíhí<sup>n</sup>-dé xítí yucu.

<sup>30</sup> Te Jèsús ní xícá<sup>n</sup> tnúhú-gã núú-dě, te xáha<sup>n</sup>-gã:

—¿Nása nàni-n-i? —cachí-gá xáha<sup>n</sup>-gã.

Te ní xáha<sup>n</sup>-dě:

—Vài Sandadú nánì-í —càchí-dé xǎha<sup>n</sup>-dě xii-gá.

Te duca<sup>n</sup> nǐ xáha<sup>n</sup>-dě xii-gá cuèndá sá ïo cuéhé espíritú cúndìhì yucu ñávǎha yìhì ñaha xii-dé. <sup>31</sup> Te nchaa espíritú-á<sup>n</sup> nǐ cáhá<sup>n</sup> ndàhú-xi núú Jèsús sá vǎ téndàha ñaha-gá xii-xi quíhí<sup>n</sup>-xi núú ùhú núú ndàhú. <sup>32</sup> Te ðiu-ni yatni yucu núú ndécú Jèsús-á<sup>n</sup> yíhí vài cuchí xǐxexi-güedi, te nchaa espíritú-á<sup>n</sup> nǐ cáhá<sup>n</sup> ndàhú-xi núú-gǎ sá ná dàña-gá quíhu-xi yiqui cùñú nchaa cùchí-á<sup>n</sup>, te Jèsús ní xáha<sup>n</sup>-gǎ sá cúu quíhu-xi yiqui cùñú-güedi. <sup>33</sup> Te ní quee ñaha nchaa espíritú-á<sup>n</sup> xii téé-á<sup>n</sup>, te ní quíhu-xi nchaa cùchí-á<sup>n</sup>, te cùchí-á<sup>n</sup> nǐ xinu-güedi ðuha ní quee-güedi ndàa núú dèhvá yuhu làgúná-á<sup>n</sup>, te ní ngaunihnu-güedi xití ndute te ní ndìhì-güedi ní cáhá.

<sup>34</sup> Te òré ní xiní cue téé xìto cuchí-á<sup>n</sup> nàcuáa ní cuu te ní yùhú-güedé ní xinu-güedé, te ní sáhá<sup>n</sup>-güedé ní cani-güedé cuèndú núú cuè ñáyiu ndècu xití ñuú, ndìhì núú cuè ñáyiu ndècu xití yucu. <sup>35</sup> Te nchaa ñáyiu ní níhí tnùhu ní queé-yu cuáhá<sup>n</sup> ndéhè-yu nàcuáa ní cuu. Te òré ní quexìó-yu núú ndécú Jèsús, te ní xiní-yu téé ní xíhì ñaha cuè espíritú cúndìhì yucu ñávǎha-á<sup>n</sup> núcõo-dé núú sàhá Jèsús, te nìhnu-ná-dé dóó-dě, te nùcõo-dé dàtná ì<sup>n</sup> ñáyiu váha, te ní yùhú-yu òré ní xiní ñáhǎ-yu xii-dé. <sup>36</sup> Te nchaa ñáyiu ní xiní nàcuáa ní cuu ní ndúha téé yìhì ñaha cue espíritú cúndìhì yucu ñávǎha-á<sup>n</sup> ní cùu ní caní-yu cuèndú núú nchaa ñáyiu ní quexìó-á<sup>n</sup> nàcuáa ní cuu ní ndúha téé-á<sup>n</sup> ndìhì nàcuáa ní cuu cuèndá nchaa cùchí-á<sup>n</sup>. <sup>37</sup> Te sá dúcá<sup>n</sup> nǐ níhì-yu tnúhu nàcuáa ní cuu, núu nchaa ñáyiu ñuú Gàdará

ío ní yùhú-yu te ní ngüíta-yu càhá<sup>n</sup> ndàhú-yu núú Jèsús sá ná nùhú-gá nùu ndèè ichi véxi-gá. Te sá dúcá<sup>n</sup> ñí cáhá<sup>n</sup>-yu núu cuáhá<sup>n</sup>-gá núú ndécú bàrcú. Te òré ndée-gá bàrcú-á<sup>n</sup> nùhú-gá <sup>38</sup> ní ngüíta téé ní xíhi ñaha cuè espíritú cùndèhi yucu ñávãha càhá<sup>n</sup> ndàhú-dé núú-gã nùu vá cùndèe iní-gá quíhí<sup>n</sup> ndihí ñaha-gã xii-dé, dico Jèsús ní quide ndee ìní ñáhá-ni-gã xii-dé, te ní xáha<sup>n</sup>-gã:

<sup>39</sup> —Cuanùhú vehe-n, te cani-n cuèndú núú nchàa ñáyiu sá ïo càhnu cuu nchaa sá vãha ní quide ñaha Yã Ndiõxí xii-n —càchí-gá xáha<sup>n</sup>-gã xii-dé.

Te téé-á<sup>n</sup> ñí xica-dé cuánuhú-dé te ní ngüíta-dé ní cani-dé cuèndú núú nchàa ñáyiu xĩndecu ñihí ñúú sá ïo càhnu cuu nchaa sá vãha ní quide ñaha Jèsús xii-dé.

*Cuèndá déhe yoco tẽ Jàirú, ndihí cuèndá ì<sup>n</sup> ñadìhí ní tnándeé dóó Jèsús*

*(Mt. 9:18-26; Mr. 5:21-43)*

<sup>40</sup> Te òré ní ndexìo Jèsús ndàa ingá xio yuhu làgúná, te ñáyiu xĩndecu xíá<sup>n</sup> sa ndètu cahnu ñaha-ná-yu, te ïo váha ní cáhá<sup>n</sup> ndihí ñáhá-yu xii-gá òré ní nasáá-gá. <sup>41</sup> Te ì<sup>n</sup> téé tàxi tnuní veñúhu ní quexìo-dé núú ndécú Jèsús, te téé-á<sup>n</sup> nání-dě Jàirú, te ní ngüíñí xítí-dě núú-gã càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núú-n nùu vá cùndèe iní-n quíhí<sup>n</sup>-ó vèhe-í cada tátna-n dèhe yoco-í —càchí-dé xáha<sup>n</sup>-dě xii-gá.

<sup>42</sup> Te duca<sup>n</sup> ñí xáha<sup>n</sup>-dě chì ndècu ì<sup>n</sup> dii-ni déhe yoco-dě, te ndècu-xi datná úxúú cuíá-xi, te càhú víhí tnàhá-xi cùhú-xi te cuìní-xi cuú-xi. Te Jèsús ní xica-gá cuáhá<sup>n</sup>-gá ndihí téé-á<sup>n</sup>, te ïo vãi ñáyiu



nchìcú<sup>n</sup> ñáhá xii-gá cuáhá<sup>n</sup>, te dàdehnde ñaha-ná-yu xii-gá ní cùu.

43 Te tnuú nchaa ñáyi-u-á<sup>n</sup> ñútnàhá ì<sup>n</sup> ñaha cùhú, te ñaha-á<sup>n</sup> sà ní cuu úxúú cuíá sã cùhú-a<sup>n</sup> ngòyo ñaha níñí xii-a<sup>n</sup>, te ío cuéhé dǐhú<sup>n</sup> nǐ cuu dǎndoñuhu-a<sup>n</sup> chi ní nadico-a<sup>n</sup> nchàa sá ndécú ndìhi-a<sup>n</sup> cuendá ní níhí-a<sup>n</sup> dǐhú<sup>n</sup> nǐ quehe<sup>n</sup> nchaa ñáyi-u ní quide tátna ñaha xii-a<sup>n</sup>, dico ní ì<sup>n</sup>-yu ñá túú ní ndàcú-yu ndúha-a<sup>n</sup>. 44 Te ní sáhá<sup>n</sup> ndehe yatni-a<sup>n</sup> ndàa sátá Jèsús, te ní tnándeé-a<sup>n</sup> luha yuhu dǒó-gǎ te òré-ni-á<sup>n</sup> nǐ ndúha-a<sup>n</sup>.

45 Te Jèsús ní xicá<sup>n</sup> tnúhú-gǎ núŭ-yu, te xáha<sup>n</sup>-gǎ:

—¿Ndédacàa-ndo ní tnándeé ñáhá xii-í? —  
càchí-gǎ xáha<sup>n</sup>-gǎ xií-yu.

Te nchaa-yu ní xáhǎ<sup>n</sup>-yu sá nǐ ì<sup>n</sup>-yu ñá túú ní tnándeé ñáhá xii-gá. Te té Pèlú ndìhi cue té cùndìhi-dé ní xáha<sup>n</sup>-güedě xii-gá:

—Mèstrú, ndèhe-n sá vái ñáyi-u nchìcú<sup>n</sup> ñáhá xii-n, te xio xio dàdehnde ñahá-yu, te xicá<sup>n</sup> tnúhú-gǎ-n yòo ní tnándeé ñáhá xii-n —  
cachí-güedé xáha<sup>n</sup>-güedě xii-gá.

46 Dico Jèsús ní xáha<sup>n</sup>-gǎ xií-yu:

—Dico dǐu ì<sup>n</sup>-ndo nǐ tnándeé ñáhá xii-í, chi ní cutnùní iní-í sá ì<sup>n</sup> ñáyi-u cùhú ní tnándeé ñáhá xii-í te ní ndúha-yu —càchí-gǎ xáha<sup>n</sup>-gǎ xií-yu.

47 Te sátá nǐ xiní ñaha-á<sup>n</sup> sã nǐ cutnùní iní Jèsús sá nǐ tnándeé ñáhá-á<sup>n</sup> xii-gá, te yùhú yùhú-a<sup>n</sup> ní sáhá-a<sup>n</sup> ní ngüíñí xítí-á<sup>n</sup> nùú-gǎ, te ní náhmá-a<sup>n</sup> núú-gǎ, ndìhi núú nchàa ñáyi-u ná cuendá duca<sup>n</sup> nǐ quide-a<sup>n</sup> ní tnándeé-a<sup>n</sup>-gǎ, ndìhi cuendá sá òré-ni-á<sup>n</sup> nǐ ndúha-a<sup>n</sup>. 48 Te Jèsús ní xáha<sup>n</sup>-gǎ xii-a<sup>n</sup>:

—Yòhó ñaha cùhú, ní sándáá iní ñáhá-n xii-í nũu ní ndúha-n, te cuanùhú vitna te ñá túú-gă ná cani iní-n —càchí-gă xáha<sup>n</sup>-gă xii-a<sup>n</sup>.

49 Te càhá<sup>n</sup> dúcá<sup>n</sup>-ní Jèsús ní sáá ì<sup>n</sup> tée xìnu cuechi vehe té Jàirú tée tàxi tnuní veñúhu, te xáha<sup>n</sup> tée xìnu cuechi-á<sup>n</sup> xii-dé:

—Sa ní xíhí déhe-n, vá chíchiù<sup>n</sup>-gá-n Mèstrú —càchí-dé xáha<sup>n</sup>-dě.

50 Te sá dúcá<sup>n</sup> xáha<sup>n</sup> tée xìnu cuechi-á<sup>n</sup> xii té Jàirú ní tecú dóho Jèsús, núu ní xáha<sup>n</sup>-gă xii-dé:

—Vá ndìhú iní-n, quindáá iní ñáhá-ní-n xii-í te ndúha déhe-n —càchí-gă xáha<sup>n</sup>-gă xii-dé.

51 Te òré ní sáá-gă vehe té Jàirú te ñá ní dàña-gă quíhu ñáyíu cùtexínu, núu té Pèlú-ni ndìhí té Jàcobó-ni, ndìhí té Juàá-ni, ndìhí tātá ndìhí náná-ni xíchí ñí xíhí-á<sup>n</sup> cuãnguìhu ndìhí-gă xití vehe. 52 Te nchaa ñáyíu sa xíndecu vehe-dé-á<sup>n</sup> xíndáhyú-yu sá ndìhú iní-yu cuendá sá ñí xíhí-xi. Te Jèsús ní xáha<sup>n</sup>-gă xii-yu:

—Vá ndàhyú-ndó, chi dícó-ni xidí-xi ñá túú ní xíhí-xi —càchí-gă xáha<sup>n</sup>-gă xii-yu.

53 Te ní sácú ndeé ñáhă-yu xii-gă, chi sá cúú-xí mèé-yu chi ní xíhí ndisa xíchí-á<sup>n</sup>. 54 Te Jèsús ní tnì-gă ndaha xíchí ñí xíhí-á<sup>n</sup>, te níhi ní cáhá<sup>n</sup>-gă, te xáha<sup>n</sup>-gă:

—Xíchí cuéchí, ndacóo —càchí-gă xáha<sup>n</sup>-gă.

55 Te xíchí-á<sup>n</sup> ñí ndoto-xi, te òré-ni ní ndacóo-xi, te Jèsús ní xáha<sup>n</sup>-gă sá ná cuãñàhá-yu sá cáxí-xí.

56 Te tātá-xi ndìhí náná-xi súúní ñí cuñúhu-yu sá dúcá<sup>n</sup> ñí dándótó ñaha Jesús xii-xi, te ní xáha<sup>n</sup>-gă xii-yu sá vǎ yõo ì<sup>n</sup> cúñàhá-yu sá dúcá<sup>n</sup> ñí quide-gă.

## 9

*Jèsús téndàha-gá ndi ùxúú cue téé xìca cuu ndihi-gá  
quihí<sup>n</sup>-güedé cáhá<sup>n</sup>-güedé tnúhu-gá  
(Mt. 10:5-15; Mr. 6:7-13)*

<sup>1</sup> Te Jèsús ní cana-gá ndi ùxúú cue téé xìca cuu ndihi-gá, te ní sáñaha-gã xii-güedé tnúhu ndee ìní cundecu ndihi-güedé cuendá queñuhu-güedé nchaa espíritú cúndihi yucu ñávàha yìhi ñaha xii ñáyiú, ndihi cuendá sá cádá tátna-güedé nchaa ñáyiú cùhú. <sup>2</sup> Te ní xáha<sup>n</sup>-gã xii-güedé sá quihí<sup>n</sup>-güedé danèhé-güedé ñáyiú nàcuáa cada Yá Ndiöxí ndíhu ndaha ñàha-gá xií-yu, te duca<sup>n</sup> càda tátna-güedé cue ñáyiú cùhú. <sup>3</sup> Te cùmání-gã caca-güedé quihí<sup>n</sup>-güedé, te ní xáha<sup>n</sup>-gã xii-güedé:

—Ñá túú tnàhí ná canehe-ndo cùu ichi-ndo, ni tátnu, ni ñùnu, ni sã cáxí-ndó, ni díhú<sup>n</sup>. Te ni vã cánèhe-ndo ingá ichi dóó-ndó, chi diu-ni dóó níhnú-ndó-ã<sup>n</sup> xiá<sup>n</sup> tnàhí-ni. <sup>4</sup> Te ndédani càa vehe na saá-ndó, te xiá<sup>n</sup> cundecu-ndo ndée ná sàá nduu ndèe-ndo. <sup>5</sup> Te núu ñá túú cuìní-yu quehe<sup>n</sup> cuendá ñáhã-yu xii-ndo, te ndee-ndo ñùú-á<sup>n</sup>, te naquidi-ndo ticá chúhmá ñí tníi sáhá-ndó cuendá sá ná cùtnuní iní-yu sá ñà túú quide váha-yu — càchí-gá xáha<sup>n</sup>-gã xii-güedé.

<sup>6</sup> Te sátá dúcá<sup>n</sup> ñí xáha<sup>n</sup> Jèsús xii-güedé, te ní quee-güedé cuáhá<sup>n</sup>-güedé nchaa ñúú dácuàha-güedé ñáyiú tnúhu Yá Ndiöxí, tnúhu sá càhá<sup>n</sup> nàcuáa naníhí tàhú-yu, te duca<sup>n</sup> ta quide tátna-güedé nchaa ñáyiú cùhú cuáhá<sup>n</sup>.

*Nàcuáa ní cuu ní xíhí té Juàá téé dàcuandute ñaha xii ñáyiu*

*(Mt. 14:1-12; Mr. 6:14-29)*

<sup>7</sup> Te té Hèrodés téé cùu gobiernú ní níhí-dě tnúhu nchaa nàcuáa quide Jesús, te quìyuhú iní-dé te sàni iní-dé yoo cùu-gá. Te duca<sup>n</sup> ní sani iní-dé chi dava ñáyiu càchí-yu sá tẽ Juàá téé ní xóo dacuandute ñaha xii ñáyiu ní ndoto cùu-gá. <sup>8</sup> Te davá-yu càchí-yu sá tẽ Èliás cúú-gă, te davá-yu càchí-yu sá ì<sup>n</sup> téé ní xóo cáhá<sup>n</sup> tnúhu Yá Ndiõxí ndéé sanaha vìhi ní ndoto cùu-gá, càchí-yu. <sup>9</sup> Dico té Hèrodés ní cachí-dé:

—Yúhú ní táuchíù<sup>n</sup>-í ní xehndé-güedé díquí tẽ Juàá. ¿Te yoo cùu téé dii cuëndú-xi nihí-a sá sùúni cuèhé nùú sã quidé-dě vái<sup>n</sup>? —duha ní cachí-dé.

Te té Hèrodés ndúcú-dě nàcuáa cada-dé cuendá quiní-dé Jèsús.

*Jèsús dácàxi-gá úhú<sup>n</sup> mĩ cue téé te d̃h̃<sup>n</sup> ñáyiu d̃h̃<sup>i</sup> nd̃h̃<sup>i</sup> landú*

*(Mt. 14:13-21; Mr. 6:30-44; Jn. 6:1-14)*

<sup>10</sup> Te nchaa cue téé ní táuchíú<sup>n</sup> Jèsús cuáhá<sup>n</sup> cáhá<sup>n</sup> tnúhu Yá Ndiõxí núú ñáyiu ní ndexìo-güedé núú-gă te ní ngüíta-güedé nácàni tnúhu-güedé nchaa nàcuáa ní quide-güedé. Te dătnùnì ní xica-gá medii-ni-gá ndécá ñaha-gá xii-güedé cuáhá<sup>n</sup> ì<sup>n</sup> xichi núú ñà túú ñáyiu ndècu, yatni núú cáá ñúú Bètsaidá. <sup>11</sup> Dico òré ní níhí ñáyiu tnúhu sá cuáhá<sup>n</sup> Jèsús, te nchìcú<sup>n</sup>-yu-gá cuáhá<sup>n</sup>, te òré ní quexìo-yu núú-gă, te ní quehe<sup>n</sup> cuendá ñáhá-gă xií-yu, te ní dánèhé ñáhá-gă xií-yu nàcuáa ndíhu ndaha ñaha Yá Ndiõxí xií-yu, te ní quide tátna-gá nchaa ñáyiu cùhú.

12 Te òré sa ní cuaa te ní natacá ndi ùxúú cue téé xìca cuu ndihì-gá núú-gǎ, te ní xáha<sup>n</sup>-güedě xii-gá:

—Sa ní cuu dandàca-n nchaa ñáyi-u-a, chi sa ní cuaa, te na quihí<sup>n</sup>-yu nchaa vehe càa yatni iha, ndihì nchaa xití ñúú cáá yatni iha cuaá<sup>n</sup>-yu sá cáxí-yu, te diu-ni yàcá<sup>n</sup> ndetatú-yu, chi núú ndécú-ó iha ñá túú tnàhí ná ió —càchì-güedé xǎha<sup>n</sup>-güedě xii-gá.

13 Te Jèsús ní xáha<sup>n</sup>-gǎ xii-güedé:

—Mee-ndo chǐ cuǎñaha sǎ ná càxí-yu —càchì-gá xáha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Ñá túú nǎgá ndécú ndihì-ndí, chi úhú<sup>n</sup> duha-ná pàá, ndihì úú-nǎ chácá ndécú ndihì-ndí, te diu-ni núú quihí<sup>n</sup>-ndí cuaa<sup>n</sup>-ndí sá cáxí-yu —càchì-güedé xǎha<sup>n</sup>-güedě xii-gá.

14 Te xǐnu dàtná úhú<sup>n</sup> mǐ mee-ni cuè téé, te dǐn ñáyi-u dǐhí ndihì landú. Te Jèsús ní xáha<sup>n</sup>-gǎ xii cue téé xìca cuu ndihì-gá:

—Chí cǔñaha na ngǒo ndi údico úxí ndi údico úxí-yu ì<sup>n</sup> ì<sup>n</sup> xichi —càchì-gá xáha<sup>n</sup>-gǎ xii-güedé.

15 Te duca<sup>n</sup> ñǐ quide-güedé, te ní ngóo-yu nchaá-yu. 16 Te dàtnùní ní quehe<sup>n</sup>-gá ndi ùhú<sup>n</sup> pàá-án, ndihì ndi ndùú chácá-ǎ<sup>n</sup>. Te ní ndacoto-gá andiu, te ní ndacá<sup>n</sup> táhú-gǎ núú Yǎ Ndiǒxí, te dàtnùní ní táhú cuèchi-gá pàá-án ndihì chácá-ǎ<sup>n</sup>, te ní sáha-gá nchaa cue téé xìca cuu ndihì-gá ní dácǎhñu ñaha-güedě xii-yu. 17 Te nchaá-yu ní xexí-yu ní ndahá xití-yu. Te sátá ñǐ túhú cóhǒ-yu te ní nadatàcá-güedé nchaa sá ñǐ quendóo, te ní chítú ùxúú tnàhá tídihi mee-ni sǎ ñǐ quendóo.

*Té Pèlú xǎha<sup>n</sup>-dě xii Jèsús sá díú-gǎ cúú-gǎ Crìstú  
(Mt. 16:13-19; Mr. 8:27-29)*

18 Te ì<sup>n</sup> nduu ndècu mee Jèsús ndìhì cue téé xìca cuu ndìhì-gá, te càhá<sup>n</sup> ndìhì-gá Yǎ Ndiǒxí, te sátá nǐ yáha ní cáhá<sup>n</sup> ndìhì-gá Yǎ Ndiǒxí, te ní xícá<sup>n</sup> tnúhú-gǎ núú-güedě, te xáha<sup>n</sup>-gǎ xii-güedě:

—¿Yoo cùu yúhú càchí ñáyìu-va? —càchí-gá xáha<sup>n</sup>-gǎ xii-güedě.

19 Te ní xáha<sup>n</sup>-güedě xii-gá:

—Davá-yu càchí-yu sá cúú-n ndìi Juàá téé ní xóo dacuàndute ñaha xii ñáyìu, te davá-yu càchí-yu sá cúú-n tǎ Èliás, te davá-yu càchí-yu sá ì<sup>n</sup> téé ní xóo cáhá<sup>n</sup> tnúhu Yá Ndiǒxí ndéé sanaha nǐ ndoto cùu-n, duha càchí-yu —càchí-güedě xǎha<sup>n</sup>-güedě xii-gá.

20 Te ní xícá<sup>n</sup> tnúhú tùcu-gá núú-güedě, te xáha<sup>n</sup>-gǎ xii-güedě:

—Te nchòhó, ¿yoo sàni iní-ndó cùu-í-i? —càchí-gá xáha<sup>n</sup>-gǎ xii-güedě.

Te té Pèlú ní xáha<sup>n</sup>-dě xii-gá:

—Yòhó cúú-n Crìstú Déhe Dútú Ndiǒxí —càchí-dé xáha<sup>n</sup>-dě xii-gá.

*Jèsús càhá<sup>n</sup>-gá sá cáhni ñàha-güedě xii-gá  
(Mt. 16:20-28; Mr. 8:30-9:1)*

21 Te ní xáha<sup>n</sup>-gǎ xii-güedě sá vǎ yǒo ì<sup>n</sup> cúñaha-güedě yoo cùu-gá. 22 Te ní xáha<sup>n</sup>-gǎ xii-güedě:

—Yúhú Téé cùu ñanì tnáhá-ndó nchàa-ndo ío cuéhé sǎ ndóhò-í, chi daquèe tìhú ñáhá cuè téé cùu sacuéhé nùú ñáyìu isràél, ndìhì cue dútú cùnùu, ndìhì cue téé dàcuaha ñaha xii ñáyìu nchaa tnúhu ní chídó tnùnì ndìi Moisés, te sáá nduu te cahni

ñaha-güedě xii-í, dico nduu úní sá cùú-í te ndoto-í  
—càchí-gá xáha<sup>n</sup>-gă xii-güedé.

<sup>23</sup> Te dătnùní ní xáha<sup>n</sup>-gă xii nchaa ñáyiú:

—Nchaa ñáyiú cuìní chitnahá ñáhá xii-í, te xìni ñuhu-xi vá cádá-gă-yu sá sání iní méě-yu, te ì<sup>n</sup> nduu ì<sup>n</sup> nduu cada ndee iní-yu cundecu túha-yu ndohó-yu cuendá-í, te cuěi na ndòhó-yu dătná ndoho-í. <sup>24</sup> Te nchaa ñáyiú cuìní sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyiú ñà túú yùhú cuěi nándi sá ná yăha-yu cundecú-yu ñuyíú-a sá cuendá-í, te ñáyiú-á<sup>n</sup> naníhí tãhú-yu. <sup>25</sup> Te cuěi nchaandi túhú sá ió ñuyíú-a na nihí ñáyiú cundecu ndihí-yu, dico núu dïu nchaa xíã<sup>n</sup> ná càda cuíta nihnú-yu te ñà túú vėdana nàndíhi-xi sá dúcá<sup>n</sup> ndècu ndihí-yu nchaa xíã<sup>n</sup>. <sup>26</sup> Te nchaa ñáyiú na cùcaha<sup>n</sup> núú-xi cáhá<sup>n</sup> váha cuendá-í ndihí cuendá nchaa tnúhu-í, te tnàhá yùhú Tée cùu ñaní tnàhá-ndó nchàa-ndo cucaha<sup>n</sup> núù-í núú-yu òré quixi tucu-í ndihí cue espíritú xínú cuèchi núú Tătà-í Dútú Ndiõxí, te mee-gă cada cutnùní iní nchaa ñáyiú sá ìo càhnu cuu-í. <sup>27</sup> Te na càchí tnúhu ndáá-í xii-ndo sã ió dava nchòhó ñáyiú ndècu iha vitna vá cùú-ni-ndo, chi cundecu-ni-ndo ndéé quiní-ndó sãá nduu ndíhu ndaha ñàha Yá Ndiõxí xii ñáyiú —càchí-gá xáha<sup>n</sup>-gă xii-yu.

*Ní nadáma dóó Jèsús ndihí núú-gă*

*(Mt. 17:1-8; Mr. 9:2-8)*

<sup>28</sup> Te ní cuu dătná úná nduu sá dúcá<sup>n</sup> ñí cáhá<sup>n</sup> Jèsús, te cuásaá-gă ì<sup>n</sup> yucu cáhá<sup>n</sup> ndihí-gă Yă Ndiõxí, te ndèca-gă té Pèlú, ndihí té Jàcobó, ndihí té Juáa cuásaá. <sup>29</sup> Te nini càhá<sup>n</sup> ndihí-gă Yă Ndiõxí ní nadáma núú-gă ndihí dóó-gă, te dóó-gă-á<sup>n</sup> sùúní ñí

nduu cuixí<sup>n</sup> víhí, te súúní dātása<sup>n</sup>-xi. <sup>30</sup> Te òré-ni-án nĩ xini-güedé úú tñhá cue tée càhá<sup>n</sup> ndihi-gá, te ì<sup>n</sup>-dé cúú-dě té Moisés, te ingá-dé cúú-dě té Èliás, <sup>31</sup> te súúní dātása<sup>n</sup>-xi ni càndéé núú ndécú cue tée úú-á<sup>n</sup> ndihi-gá, te xĩdatnúhu-güedé nàcuáa ndoho Jèsús cuú-gá ñúú Jerusàlén dàtná ní cachí méé-gă. <sup>32</sup> Te té Pèlú ndihi úú-gá-güedé cuìní víhí-güedě cúdú-güedé, dico ní sahní iní-güedé ñá túú ní xídí-güedé, te ní dánèhé núú ñáhá-xí xii-güedé sá súúní vâha càa núú ndécú Jèsús, ndihi úú cue tée càhá<sup>n</sup> ndihi-gá-án. <sup>33</sup> Te òré sa ndùcu ndee cue tée úú-á<sup>n</sup> caca-güedé núhú-güedé, te ní xáha<sup>n</sup> tẽ Pèlú xii-gá:

—Mèstrú, jvâha ní cuu sá ndécú-ó ìha vitna! Te na dàcaa-ndí úní tñhá vehe tnuvixi<sup>n</sup>, ì<sup>n</sup> cuu cuendá-n, te ì<sup>n</sup> cuu cuendá té Moisés, te ì<sup>n</sup> cuu cuendá té Èliás —càchí-dé xâha<sup>n</sup>-dě xii-gá.

Dico té Pèlú chi ni mèe-dé ñá túú ní cùtnuní iní-dé nása ndùu tñúhu ní cáhá<sup>n</sup>-dé. <sup>34</sup> Te nini càhá<sup>n</sup>-dé ní quexìo ì<sup>n</sup> vícò núú ndécú-güedě-án nĩ dádăhu ñaha-xi xii-güedé, te ní yùhú-güedé sá dúcá<sup>n</sup> nĩ quexìo vícò-ă<sup>n</sup> nĩ dádăhu ñaha-xi. <sup>35</sup> Te xití vícò-ă<sup>n</sup> nĩ tecú ní cáhá<sup>n</sup> Yă Ndiöxí, te xáha<sup>n</sup>-gă xii-güedé:

—Tée-a cùu-dé Déhe-í, téé ío cùu iní-í, te tñi-ndo nchâa tñúhu càhá<sup>n</sup>-dé —duha ní xáha<sup>n</sup>-gă xii-güedé.

<sup>36</sup> Te sátá dúcá<sup>n</sup> nĩ cáhá<sup>n</sup> Yă Ndiöxí, te ní quide cuendá-güedé sá mèdii-ná Jèsús ndécú-gă xiá<sup>n</sup>. Te vá yõo ì<sup>n</sup> nĩ xáha<sup>n</sup>-güedě nàcuáa ndùu nchaa sá nĩ xini-güedé-án.

*Jèsús quidé tătna-gá ì<sup>n</sup> tée cuechi yìhi ñaha espíritu cùndìhi yucu ñávâha  
(Mt. 17:14-21; Mr. 9:14-29)*



37 Te ingá nduu-ǎ<sup>n</sup> cuǎnuu-gá yucu-á<sup>n</sup> ndihí-güedé, te ío cuéhé ñǎyiu cuáhá<sup>n</sup> tnahá ñáhá xii-gá. 38 Te ñ<sup>n</sup> tée ñùhu tnahá tnuú-yu-á<sup>n</sup> ñí cáhá<sup>n</sup> níhi-dé, te xǎha<sup>n</sup>-dě xii-gá:

—Mèstrú, ío càhá<sup>n</sup> ndàhú-í núú-n nùu vá cündèe iní-n càda tátna-n dèhe-í, chí ñ<sup>n</sup>dì duha-dé ndécú, 39 te yìhi ñaha espíritú cündìhi yucu ñávǎha xii-dé, te òré ná nàtni ñaha-xi xii-dé, te dàcana saa ñaha-xi, te ndàda ruú<sup>n</sup> ñáhá-xí xii-dé, te tàva-xi tíñú yuhu-dé. Te ío dàndoho ñaha-xi xii-dé, chí ndéé núú ñà cúú-gǎ, te dàña ñaha tnaa-xi xii-dé. 40 Te sa ní cáhá<sup>n</sup> ndàhú-í núú cuè tée xica cuu ndihí-n queñuhu-güedé-xi, dico ñà túú ní ndàcu-güedé —càchí-dé xǎha<sup>n</sup>-dě xii-gá.

41 Te Jèsús ní xáha<sup>n</sup>-gǎ xii nchaa ñáyiu:

—¡Nchaa nchòhó ñáyiu ndècu ñuyíú-a ío sàá iní-ndó, chí ñà túú cuení-ndó quìndáá iní-ndó Yǎ Ndiǒxí! Te ní cuu vài nduu quide ndee iní-í nchaa sá quídé-ndó, ¿te ná ndéé ama vá dúcá<sup>n</sup>-gǎ cada-ndo-í? —càchí-gá xáha<sup>n</sup>-gǎ xii-yu.

Te ní xáha<sup>n</sup>-gǎ xii tée cùhú déhe-xi-á<sup>n</sup>:

—Taxi déhe-n iha —cachí-gá xáha<sup>n</sup>-gǎ xii-dé.

42 Te òré cuáhá<sup>n</sup> tée cuechi-ǎ<sup>n</sup> nùú-gǎ, te espíritú cündìhi yucu ñávǎha-á<sup>n</sup> ñí dándúa ñáhá-xí xii-dé, te sàhni yìhí ñáhá tùcu-xi xii-dé ní cùu, dico Jèsús níhi ní cáhá<sup>n</sup>-gá ní tenàá-gá espíritú-á<sup>n</sup>, te ní quee ñaha-xi xii-dé, te ní nacuáha cuendá ñáhá-gǎ xii-dé tátá-dě. 43 Te ncháá-yu ní cuñúhu-yu sá dúcá<sup>n</sup> ñí cuu, te ní cachí-yu sá ío càhnu cuu Yá Ndiǒxí.

*Jèsús càhá<sup>n</sup> tucu-gá sá cùú-gá  
(Mt. 17:22-23; Mr. 9:30-32)*

Te nini xĩcuñúhu-yu nàcuáa ní quide Jèsús, te ní xáha<sup>n</sup>-gã xii cue tée xica cuu ndihi-gá:

44 —Nchòhó cundedóho váha-ndo tnũhu na càhá<sup>n</sup>-í-a, te vá ná cuànaa-ndo, chi yúhú Tée cùu ñaní tnáhá-ndó nchàa-ndo sáá ì<sup>n</sup> nduu te cuáha cuendá ñáhá-güedé xii-í núú cue tée cùu úhú iní ñáhá —càchí-gá xáha<sup>n</sup>-gã xii-güedé.

45 Dico cue tée-á<sup>n</sup> ñà túú ní tècú tnùní-güedé nàcuáa ndùu tnúhu ní xáha<sup>n</sup>-gã xii-güedé, te duca<sup>n</sup> nĩ yáha-güedé, chi duca<sup>n</sup> tnàhí ní cachí-gá sá vã tècú tnùní-güedé, te ní yùhú-güedé cáca<sup>n</sup> tnúhú-güedé núú-gã nása ndùu tnúhu ní xáha<sup>n</sup>-gã xii-güedé.

*Cue tée ndùcu tnúhu núú tnáhá nũu ndédacàa-güedé ío-gá cúnùu*

*(Mt. 18:1-5; Mr. 9:33-37)*

46 Te cue tée xica cuu ndihi-gá ní ngüíta-güedé ndátnũhu-güedé nũu ndédacàa-güedé ío-gá cúnùu, 47 dico Jèsús ní cutnùní iní-gá nàcuáa sàni iní-güedé nũu ní cana-gá ì<sup>n</sup> té líhli, te ní sanu tníi ñaha-gã ì<sup>n</sup> xio diñi-gá. 48 Te ní xáha<sup>n</sup>-gã xii-güedé:

—Nchaa ñáyiu na quèhe<sup>n</sup> cuendá ì<sup>n</sup> té líhli dàtná té líhli-a cuendá sá ñúhú ìni ñáhã-yu xii-í ñá, te cada iní-yu sá yúhú ní quehe<sup>n</sup> cuendá-yu, te nchaa ñáyiu na quèhe<sup>n</sup> cuendá ñáhá xii yúhú, te cada iní-yu sá tnáhá Tãtà-í Dútú Ndiöxí Yaá ní tendaha ñàha xii-í véxi-í ñuyíú-a ní quehe<sup>n</sup> cuendá-yu. Te nchaa ñáyiu ío ndàhú iní-xi mee-ni xìnu cuechí-yu, ñáyiu-á<sup>n</sup> ío-gá cúnùu-yu —càchí-gá xáha<sup>n</sup>-gã xii-güedé.

*Ñáyiu ñá túú cùu úhú iní ñáhá cùndihi ñahá-yu xii-o*

*(Mr. 9:38-40)*

49 Te té Juàá diu-ni ì<sup>n</sup> téé xìca cuu ndìhi-gá ní xáha<sup>n</sup>-dě xii-gá:

—Mèstrú, ní xiní-ndí ì<sup>n</sup> téé càcunehe ñaha-dé xii-n, te ndèñuhu-dé espíritú cùndìhi yucu ñávãha yìhi ñaha xii ñáyiu, te nchúhú ñá túú ní dàña-gá-ndí duca<sup>n</sup> càda-dé, chi ñá túú xìca cuu ndìhi ñaha-dé xii-o —càchí-dé xáha<sup>n</sup>-dě xii-gá.

50 Te Jèsús ní xáha<sup>n</sup>-gã xii-dé:

—Daña-ndo na càda nahi-dé ní cùu, chi ñáyiu ñá túú cùu úhú iní ñáhá xii-o te cùndìhi ñahá-yu —càchí-gá xáha<sup>n</sup>-gã xii-dé.

*Jèsús càhá<sup>n</sup>-gá dóho té Jàcobó ndìhi té Juàá*

51 Te òré sa ta cùyatni ndaa Jesús andiu, te ní xica-gá cuáhá<sup>n</sup>-gá ñúú Jerusalén, chi duu<sup>n</sup> duu<sup>n</sup> ní sani iní-gá sá quíhí<sup>n</sup>-gá. 52 Te ní tendaha-gã cue téé yòdo nuu cuáhá<sup>n</sup>, te ní quexìo-güedé ì<sup>n</sup> ñúú, te ñúú-á<sup>n</sup> yíndèhu-xi distritú Sàmariá, te ndùcu-güedé ì<sup>n</sup> vehe cada túha-güedé òré quexìo-gá. 53 Dico ñáyiu Sàmariá ñá túú ní cuìní-yu cuáñaha nùú-yu vehe, chi cuèndá sá ñí cutnùní iní-yu sá ìchi yáha-ni-gá quíhí<sup>n</sup>-gá ñúú Jerusalén. 54 Te sá dúcá<sup>n</sup> ñí quidé-yu ñá túú ní cuìní-yu cuáñaha nùú-yu vehe ndetatú-gá, núu ní xáha<sup>n</sup> tẽ Jàcobó ndìhi té Juàá cue téé xìca cuu ndìhi-gá xii-gá:

—Mèstrú, ¿cuìní-n càcá<sup>n</sup> táhú-ó nùú Yã Ndiõxí cuèndá dangáva-gá ñuhú danàa-gá ñáyiu ñúú-a dàtná ní quide té Èlías téé ní xóo cáhá<sup>n</sup> tnúhu Yá Ndiõxí ndéé sanaha-ã<sup>n</sup>? —càchí-güedé xáha<sup>n</sup>-güedé xii-gá.

55 Te Jèsús ní nchócótó-gã núú-güedě, te níhi ní cáhá<sup>n</sup>-gá dóho-güedé, te xáha<sup>n</sup>-gã:

—Nchòhó, chi ñá túú vǎha iní-ndó te núu duca<sup>n</sup> càhá<sup>n</sup>-ndó. <sup>56</sup> Chi yúhú Tée cùu ñaní tnáhá-ndó nchàa-ndo véxi-í sá dácăcu nihnu-í ñáyiú, te ñá díú vĕxi-í sá dăcuĭta nihnu-í-yu —càchí-gá xáha<sup>n</sup>-gǎ xii-güedé.

Te sátá dúcá<sup>n</sup> ñí xáha<sup>n</sup>-gǎ, te ní xica-gá cuáhá<sup>n</sup>-gá ndĭhi-güedé ingá ñuú.

*Ñáyiú cuíní chitnahá ñáhá xì Jesús ní cùu  
(Mt. 8:19-22)*

<sup>57</sup> Te ñùhu Jesús ichi ndĭhi-güedé, te ĩ<sup>n</sup> tée ní xáha<sup>n</sup>-dě xii-gá:

—Mèstrú, cuíní-í canchicú<sup>n</sup> ñáhà-í xii-n ndĕni ní cuu na quĭhí<sup>n</sup>-n —càchí-dé xǎha<sup>n</sup>-dě xii-gá.

<sup>58</sup> Te Jèsús ní xáha<sup>n</sup>-gǎ xii-dé:

—Nchaa ñúcuii chi ndĕcu yaú cúú vĕhe-güedi saquĭhi-güedi, te nchaa quĭti ndàva caa tacá-güedi díquí yutnu, dico yúhú Tée cùu ñaní tnáhá-ndó nchàa-ndo chi ñá túú ndĕé cáá vĕhe-í ñuyíú-a ndetátú-í —càchí-gá xáha<sup>n</sup>-gǎ xii-dé.

<sup>59</sup> Te dătnùní ní xáha<sup>n</sup> tùcu-gá xii ingá-dé:

—Yòhó taquĭxi chitnahá ñáhá-n xì-í —càchí-gá xáha<sup>n</sup>-gǎ xii-dé.

Dico tée-á<sup>n</sup> ñí xáha<sup>n</sup>-dě xii-gá:

—Mèstrú, daña na nùhú-í cundetú-í cuú tătà-í te chindúxi-í-dé, te dătnùní quixi-í chitnahá ñáhá dùca<sup>n</sup>-ná-í xii-n —càchí-dé xǎha<sup>n</sup>-dě xii-gá.

<sup>60</sup> Te Jèsús ní xáha<sup>n</sup>-gǎ xii-dé:

—Daña ñăyiú ñá túú sàndáá iní ñáhá xì-í ná chindŭxi tnàha meé-yu, chi ñăyiú-á<sup>n</sup> cúŭ-yu dătná ñăyiú ní xĭhí cuĕi ndĕcu-ní-yu núú ñuyíú-a. Te yòhó taquĭxi, chi quĭhí<sup>n</sup>-n dănehé-n ñăyiú năcuáa cada

Yá Ndiöxí ndíhu ndaha ñàha-gá xii-yu —càchí-gá xáha<sup>n</sup>-gã xii-dé.

<sup>61</sup> Te ní xáha<sup>n</sup> tùcu ingá-dé xii-gá:

—Mèstrú, cuìní-í chitnahá ñáhà-í xii-n, dico díhna-gá dañá na nùhú-í cada ndee ìní-í nchaa ñáyiu ndècu vehe-í, te dàtnùní quixi-í —càchí-dé xáha<sup>n</sup>-dè xii-gá.

<sup>62</sup> Te Jèsús ní xáha<sup>n</sup>-gã:

—Nchaa ñáyiu ní sándáá ìní ñáhá xii-í, te núu vá cànchícú<sup>n</sup> nihnu ñáhá-yu ni yùhu ni ìní-yu, te cùú-yu dàtná ì<sup>n</sup> téé ní tñ<sup>ñ</sup> ndaha làtú cutu-dé, chi téé-á<sup>n</sup> núu na ndàcoto-dé ndàa sátá-dè òré xítú-dè, te vá quíhí<sup>n</sup> ndáá làtú-dé duca<sup>n</sup> sàtnahá-xi cùú-yu. Te cue ñáyiu chi vá cúú ndáá-yu nàcuáa ndíhu ndaha-gá dava-gá ñáyiu— càchí-gá xáha<sup>n</sup>-gã xii-dé.

## 10

*Jèsús téndàha-gá únídico úxí cue téé quíhí<sup>n</sup> cáhán<sup>n</sup> tnúhu-gá núú ñáyiu*

<sup>1</sup> Te sátá dúcá<sup>n</sup> ñí cuu, te ní cáxi tucu Xítohó Jesucristú únídico úxí cue téé codonù-güedé quíhí<sup>n</sup>-güedé cáhán<sup>n</sup>-güedé tnúhu-gá nchaa ñúú, ndíhi nchaa dava-gá xichi núú quíhí<sup>n</sup>-gá, te ndi ndúú ndi ndúú-güedé tendaha ñàha-gá xii-güedé quíhí<sup>n</sup>-güedé. <sup>2</sup> Te cùmání-gã caca-güedé, te ní xáha<sup>n</sup>-gã xii-güedé:

—Nchòhó xìní-ndó sã òré ná sàá yóó cuu nchaa sá xítú ñáyiu, te ío vài cuu. Te na càchí tnúhu ndáá-í xii-ndo sã dàtná vài sá xítú ñáyiu cùu, duca<sup>n</sup> ìo vài ñáyiu cùmání cundedóho tnúhu Yá Ndiöxí te ío sacú ñáyiu dàcuaha ñaha xii-yu tnúhu-gá, núu xíã<sup>n</sup> xíní ñùhu-xi cáca<sup>n</sup>-ndó núú Yá Ndiöxí cuendá

sá ná dàcáhá<sup>n</sup>-gá iní ñáyiú cáhá<sup>n</sup>-yu tnúhu-gá núú ñáyiú cùmání cundedóho tnúhu-gá. <sup>3</sup> Te nchòhó cúú-ndó dàtná cue mbéé cue quitì cuáhá<sup>n</sup> núú yíhí cuè quitì déé<sup>n</sup>. Chi tendaha ñaha-ĩ xii-ndo quĩhí<sup>n</sup>-ndó núú xĩndecu nchaa ñáyiú cuihna iní-xi. <sup>4</sup> Te vá cánèhe-ndo ñunu cuhu<sup>n</sup> ndachiu<sup>n</sup>-ndo, ni núú cúhú<sup>n</sup> dǐhú<sup>n</sup>-ndó, te ni vǎ cádá tǔha-gá-ndó chàú-ndó chi ñi-ndi chàú yíhí-ndó-ǎ<sup>n</sup> xǐǎ<sup>n</sup>-ni quĩhi-ndo, te vá ïo cuyaa-ndo cáhá<sup>n</sup> ndihí-ndo ñáyiú ñùhu ichi. <sup>5</sup> Te òré ná quèxio-ndo ì<sup>n</sup> vehe, te duha cúñaha-ndo xì ñáyiú dìi vèhe-xi-á<sup>n</sup>: “Yá Ndiòxí chindee ñàha-gá xii-ndo ïo váha cuu iní-ndó cùndecu-ndo”, duha cúñaha-ndo xì-yu. <sup>6</sup> Te núú ñáyiú-á<sup>n</sup> ñí nduu táhǔ-yu sá cùndecu váha iní-yu núú Yá Ndiòxí, te cuu-xi sá vǎha sá cúú-xǐ-yu tnúhu cúñaha-ndo-ǎ<sup>n</sup>, dico núú ñá túú ní cáhá<sup>n</sup> váha ndihí ñàhá-yu xii-ndo, te cúñaha-ndo sǎ vǎ cúú-xí sǎ vǎha sá cúú-xǐ-yu. Dico núú ní cáhá<sup>n</sup> váha ndihí ñàhá-yu xii-ndo, <sup>7</sup> te ñi-ndi vehe-á<sup>n</sup> cada vehe tnaa-ndo, te ñá túú-gǎ ndéé nducu-ndo vèhe cundecu-ndo, te caxi-ndo nchaa sá ná tàxí-yu, chi nchaa cue téé quide chiu<sup>n</sup> dacuítí táu-güedé sá ñihí-güedé sá cáxí-güedé cuendá nchaa chiú<sup>n</sup> quide-güedé. <sup>8</sup> Te núú ní sáá-ndó ì<sup>n</sup> ñuú núú ñí quehe<sup>n</sup> cuendá ñáhǎ-yu xii-ndo, te caxi-ndo nchaa sá ná tàxí-yu. <sup>9</sup> Te cada tátna-ndo cuè ñáyiú cùhú xĩndecu ñuú-á<sup>n</sup>, te cúñaha-ndo xì-yu sá sà ní sáá nduu ndíhu ndaha ñàha Yá Ndiòxí xì-yu. <sup>10</sup> Dico núú ní sáá-ndó ì<sup>n</sup> ñuú núú ñà túú ní quehe<sup>n</sup> cuendá ñáhǎ-yu xii-ndo, te tñi-ndo ìchi cuita cáhá<sup>n</sup>-ndó cuáhá<sup>n</sup>, te cúñaha-ndo xì-yu: <sup>11</sup> “Ndéé

tíca chúhmá nǐ tñi sáhá-ndǐ ñuú-ndó nàquidi-ndí, te duha quide-ndí cuendá cutnùní iní-ndó sǎ ñà túú quide váha-ndo ndècu-ndo. Dico cunaha-ndo sǎ sà ní sáá nduu ndíhu ndaha ñaha Yá Ndiöxí xii-ndo ni cùu”, duha cúñaha-ndo xii-yu. <sup>12</sup> Te na càchí tnúhu-í xii-ndo sǎ ná sáá nduu càda ndáá Yá Ndiöxí cuéchi nchaa ñáyi, te ñáyi ñuú-á<sup>n</sup> ïo-gá ndohó-yu dàv-á<sup>n</sup> dàcúúxí ñáyi ñuú Sòdomá —càchí-gá xáha<sup>n</sup>-gǎ xii-güedé.

*Cuendá ñáyi dava ñuú ñà túú sàndáá iní tnúhu Xítoho Jesucristú*

*(Mt. 11:20-24)*

<sup>13</sup> Te Jèsús xáha<sup>n</sup>-gǎ xii ñáyi dava ñuú ñà túú sàndáá iní tnúhu-gá:

—Ndàhú nchòhó cue ñáyi ñuú Coràzín! ¡Te ndàhú nchòhó cue ñáyi ñuú Bètsaidá! Chi núu dicó ñuú Tìrú, ndíhi ñuú Sìdón ní quide-í nchaa sá vǎ yõ tñàhi ndàcu cada datná ní quide-í ñuú-ndó-á<sup>n</sup> nǐ xiní-ndó ñà, te sá ndéé ama-gá cuihnú-yu dóo ndàhú, te cunucóo-yu núu yàa cuendá sá ndíxí cuéchi iní-yu sá ñà túú quide váha-yu ni cùu. <sup>14</sup> Dico sáá nduu te ío-gá dandòho ñaha Yá Ndiöxí xii-ndo dàcúúxí ñáyi ñuú Tìrú, ndíhi ñáyi ñuú Sìdón. <sup>15</sup> Te nchòhó ñáyi ñuú Capèrnaúm quide iní-ndó sǎ sà cuándaa-ndo àndíu, dico ñáhá chi núu ùhú núu ndàhú cundecu-ndo —duha ní xáha<sup>n</sup>-gǎ xii nchaa ñáyi ñuú-á<sup>n</sup>.

<sup>16</sup> Te xáha<sup>n</sup> tùcu-gá xii cue téé tendaha-gǎ quíhí<sup>n</sup> cáhá<sup>n</sup> tnúhu-gá-á<sup>n</sup>:

—Nchaa ñáyi na cùndedóho nchaa tnúhu cáhá<sup>n</sup>-ndó, te cada iní-yu sá yǔhú càhá<sup>n</sup>-í ndèdóho-yu, te nchaa ñáyi na dàquee tihú ñáhá

xì-ndo, te tnàhá yúhú daquee tíhǔ-yu, te nchaa ñáyiu duca<sup>n</sup> na dàquee tíhú ñáhá xì-í, te tnàhá Tătà-í Dútú Ndiǒxí Yaá ní tendaha ñàha xii-í véxi-í ñuyíú-a dàquee tíhǔ-yu —càchí-gá xáha<sup>n</sup>-gǎ xii-güedé.

Te duca<sup>n</sup> te ní xica-güedé cuáhá<sup>n</sup>-güedé.

*Ní nasáá cue téé únídico úxí ní tendaha Jèsús ní sáhá<sup>n</sup> ní cáhá<sup>n</sup> tnúhu-gá núú ñáyiu*

<sup>17</sup> Te cue téé únídico úxí-á<sup>n</sup> ñí nasáá-güedé te súúni cùdíí ìní-güedé, te xáha<sup>n</sup>-güedé xii Jèsús:

—Mèstrú, ndéé espíritú cùndìhi yucu ñávàha sàndáá ìní ñáhá-xí xì-ndí òré cǎcú nèhe ñaha-ndí xii-n —càchí-güedé xáha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gǎ:

—Ndáá càhá<sup>n</sup>-ndó chi yúhú ní xiní-í cútnàhá ní xíta nihnu yucu ñávàha, chi dàtná ní ngava ì<sup>n</sup> tasa<sup>n</sup> ñí ngava-xi ñuyíú-a. <sup>19</sup> Te dàtná quidé-ndó òré xènihnu-ndo ì<sup>n</sup> cóó, àdi ì<sup>n</sup> nchacua duca<sup>n</sup> cada-ndo daquee tíhú-ndó yùcu ñávàha, te ñá túú nǎ cada ñaha-xi xì-ndo, chi ní taxi-í tnúhu ndee ìní ndécú ndìhi-ndo. <sup>20</sup> Dico vá cùdíí ìní-ndó cuendá sá sàndáá ìní ñáhá cué espíritú cùndìhi yucu ñávàha xii-ndo, chi cudíí ìní-ndó cuendá sá sà yodo tnuní-ndó núú tütú Yǎ Ndiǒxí Yaá ndécú àndiù —cachí-gá xáha<sup>n</sup>-gǎ xii-güedé.

*Jèsús cùdíí ìní-gá*

*(Mt. 11:25-27; 13:16-17)*

<sup>21</sup> Te òré-á<sup>n</sup> sùúni ñí quide díí ìní ñáhá Espíritú Yǎ Ndiǒxí xii Jèsús, te ní xáha<sup>n</sup>-gǎ xii Yá Ndiǒxí:

—Yòhó Tătà-í Dútú Ndiǒxí, ío chĩñuhu ñaha-í xii-n chi ñiù-n tàxi tnuní-n àndiù ndìhi ñuyíú-a, te



dànehé-n cuè ñáyiú nchaa tnúhu váha, te diu-ni ñáyiú-á<sup>n</sup> cúŷ-yu ñáyiú ñá túú cùnuni iní-xi nchaa tnúhu càhá<sup>n</sup> cue téé túha, te nchaa tnúhu càhá<sup>n</sup>-n-á<sup>n</sup> ñà túú ní dàtúu-n núú ñáyiú cächí sá ïo túha, te ío váha sàá díquí-xi. Te duca<sup>n</sup> quíde-n, chi duca<sup>n</sup> cuíní-n cunduú —cachí-gá xáha<sup>n</sup>-gã xii Yá Ndiöxí.

<sup>22</sup> Te xáha<sup>n</sup> tùcu-gá xii cue téé ní nasáá-á<sup>n</sup>:

—Mee Tătà-í Dútú Ndiöxí ní cachí-gá sá cùnùu-í núú nchàa-ndi túhú sá ïó. Te vá yõo ì<sup>n</sup> xìní nàcuáa sàni iní yúhú Déhe Dútú Ndiöxí, chi ì<sup>n</sup>dii díí-ni mee-gã xìní-gá nàcuáa sàni iní-í. Te duca<sup>n</sup> ì<sup>n</sup>dii-ni yúhú xìní-í nàcuáa sàni iní mée-gã, te nchaa ñáyiú cächí iní-í sá quíní-yu nàcuáa sàni iní Tătà-í Dútú Ndiöxí te xĩtnúhu-í-yu, te vá yõo ì<sup>n</sup>-gá xìní nàcuáa sàni iní-gá chi diu-ni ñáyiú duca<sup>n</sup> xĩtnúhu-í-á<sup>n</sup> xìní-yu —cächí-gá xáha<sup>n</sup>-gã xii-güedé.

<sup>23</sup> Te ní nchócótó-gã núú xĩndecu mee-ni cuè téé xica cuu ndihi-gá, te ní xáha<sup>n</sup>-gã xii-güedé:

—Váha táhú nchòhó ndihi nchaa ñáyiú ndèhe nchaa nacuáa quíde-í vitna. <sup>24</sup> Chi ío cuéhé cue téé ní xóo cáhá<sup>n</sup> tnúhu Yá Ndiöxí ndéé sanaha, ndihi cue téé ní xĩndaha ñàha xii ñáyiú ní cuíní-güedé cundehe-güedé nchaa sá ndéhé-ndó quíde-í vitna, te ñá túú ní xìní-güedé, te ní cuíní-güedé cund-edóho-güedé nchaa tnúhu càhá<sup>n</sup>-í ndèdóho-ndo vitna, te ñá túú ní xĩndedóho-güedé —cächí-gá xáha<sup>n</sup>-gã xii-güedé.

### *Nàcuáa ní quíde ì<sup>n</sup> téé distritú Sàmaría*

<sup>25</sup> Te ì<sup>n</sup> téé dàcuaha ñàha xii ñáyiú nchaa tnúhu ní chídó tnùní ndíi Moisés ní ndacuíñí-dé xító ndéé-dé Jèsús núú nása cunduú tnúhu cáhá<sup>n</sup>-gá, te xáha<sup>n</sup>-dẽ xii-gá:

—Mèstrú, ¿ná cúu sǎ cáda-í cuèndá nduu táhú-í cundecu-í ndihí Yá Ndiöxí ní caa ní quíhí<sup>n</sup>-i? —càchí-dé xǎha<sup>n</sup>-dě xii-gá.

<sup>26</sup> Te Jèsús ní xáha<sup>n</sup>-gǎ xii-dé:

—Cuìní-í cachí tnúhu-n nǎsa càhá<sup>n</sup>-xi núú tütú ndíi Moisés —càchí-gá xáha<sup>n</sup>-gǎ xii-dé.

<sup>27</sup> Te xǎha<sup>n</sup>-dě xii-gá:

—Ndíi Moisés càchí ndíi núú tütú ndíi: “Cuu iní-ndó Dütú Ndiöxí Yaá cúu Ndiöxí-ndó ní yuhu ní iní-ndó, te cani iní-ndó càda-ndo datná cuìní mée-gǎ, te mee-ni tnúhu váha cani iní-ndó nàcuáa cuu vii cuu váha-ndo núú-gǎ, te coo iní-ndó cùu iní-ndó-gǎ. Te cuu iní-ndó tnàha ñáyiú-ndo dàtná cúu iní-ndó mèe-ndo”, duha càchí ndíi núú tütú ndíi —càchí-dé xǎha<sup>n</sup>-dě xii-gá.

<sup>28</sup> Te Jèsús ní xáha<sup>n</sup>-gǎ:

—Váha-ni càhá<sup>n</sup>-n, te núu cada-n nàcuáa càhá<sup>n</sup>-n ǎ<sup>n</sup>, te nduu táhú-n cundecu-n ndihí Yá Ndiöxí ní caa ní quíhí<sup>n</sup> —càchí-gá xáha<sup>n</sup>-gǎ xii-dé.

<sup>29</sup> Te sá dúcá<sup>n</sup> ní xáha<sup>n</sup> Jèsús xii-dé núu ndùcu-dé nàcuáa cada-dé cácu nihnu-dé núú tnúhu ní cáhá<sup>n</sup>-dé, te ní xícá<sup>n</sup> tnúhú-dé núú-gǎ, te xǎha<sup>n</sup>-dě:

—¿Yoo cùu tnaha ñáyiú-í-i? —càchí-dé xǎha<sup>n</sup>-dě xii-gá.

<sup>30</sup> Te Jèsús ní cani-gá ñ<sup>n</sup> cuèndú núú-dě nàcuáa tecú tnùní-dé tnúhu-gá, te xáha<sup>n</sup>-gǎ:

—Ñ<sup>n</sup> téé ní ndee-dé ñúú Jerusalén ñúhú-dě ichi cuánuu-dé cuáhá<sup>n</sup>-dé ñúú Jericó, te ní quee ñadúhú ichi-dé ní dúhú-güedě dóó níhnú-dě, ndihí nchaa sá néhé-dě, te ní caniha vìhi-güedé, te nchito ñu-ná-dé ní dáñá ñàha-güedé te cuáhá<sup>n</sup>-güedé.

<sup>31</sup> Te mei òré cátùu-dé-á<sup>n</sup> ñúhú ñ<sup>n</sup> dútú ichi-á<sup>n</sup>, te òré ní xiní ñáhá dütú-ǎ<sup>n</sup> xii-dé, te ñ<sup>n</sup> xio-ní

ní xócõo ndee-dé ní yáha-dé. <sup>32</sup> Te ñùhu tucu ì<sup>n</sup> téé cùu levítá ichi-á<sup>n</sup>, te òré ní xiní-dé téé-á<sup>n</sup> cátùu-dé, te ñi-u-ni duca<sup>n</sup> ñí quide-dé ì<sup>n</sup> xio-ni ní xócõo ndee-dé ní yáha-dé. <sup>33</sup> Dico ì<sup>n</sup> téé distritú Sàmariá ñùhú tùcu-dé ichi-á<sup>n</sup> te òré ní xiní-dé téé-á<sup>n</sup> cátùu-dé, te ní cundàhú iní ñáhá-dé. <sup>34</sup> Te ní sáhá<sup>n</sup>-dé núú cátùu téé-á<sup>n</sup>, te ní quide tátna-dé nchaa núú ñí nícuèhé xii téé-á<sup>n</sup> ñí chihi-dé yúcu, te ní dácútú-dé. Te dàtnùní ní dácáá ñàha-dé sáta quìti-dé, te ndèca ñàha-dé cuáhá<sup>n</sup> ì<sup>n</sup> vehe núú sácõo cue ñáyiu sàcúhu<sup>n</sup> ichi, te yàcá<sup>n</sup> ní xito ñaha-dé. <sup>35</sup> Te ingá nduu òré ní nucúhu<sup>n</sup> téé Samaritànú-á<sup>n</sup> ichi, te ní tava-dé úú díhú<sup>n</sup> denàriú, te ní sáha-dé téé cùu xítóhó vehe-á<sup>n</sup>, te ní xáha<sup>n</sup>-dè: “Coto saú-n tée-a, te núu ñá ní tnahá díhú<sup>n</sup> sã ñí taxi-í, te cuèi na dàndoñuhu-gá-n díhú<sup>n</sup>-n cuendá-dé, te òré ná quìxi tucu-í te nacháhu-í”, duha ní xáha<sup>n</sup> tée Samaritànú-á<sup>n</sup> xii téé dii vèhe xía<sup>n</sup>. <sup>36</sup> Te vitna cáhá<sup>n</sup>, te núu ndèdacàa cue téé úní-á<sup>n</sup> cúú-güedé téé váha cùu iní-güedé tnahà ñáyiu-güedé —càchí-gá xáha<sup>n</sup>-gã xii téé dàcuaha ñaha xii-í ñáyiu-á<sup>n</sup> nchaa tnúhu ní chídó tnùní ndíi Moisés.

<sup>37</sup> Te téé-á<sup>n</sup> ñí xáha<sup>n</sup>-dè xii-gá:

—Tée ní cundàhú iní ñáhá xii téé ní dánícuèhé ñáhá cuè ñadúhú-á<sup>n</sup>, téé-á<sup>n</sup> cúú-dé téé cùu iní tnahà ñáyiu-xi —càchí-dé xàha<sup>n</sup>-dè xii-gá.

Te Jèsús ní xáha<sup>n</sup>-gã:

—Cuáhá<sup>n</sup> te ñi-u-ni duca<sup>n</sup> càda-n tnahá-n —càchí-gá xáha<sup>n</sup>-gã xii-dé.

### *Jèsús ndécú-gã vehe tá Mārta ndihì tá Màriá*

<sup>38</sup> Te Jèsús ñùhú-ni-gã ichi cuáhá<sup>n</sup>-gã ndihì cue téé xica cuu ndihì-gá, te ní sáá-gá ì<sup>n</sup> ñuú líhli, te xía<sup>n</sup> ñí quee ì<sup>n</sup> xíchí nání Mārta ní cáhá<sup>n</sup> ñáhá-xi xii-gá

vehe-xi. <sup>39</sup> Te tá Mǎrta ndècu ì<sup>n</sup> cùhú-xi nàni-xi Mariá, te xíchí-ǎ<sup>n</sup> nǐ ngóo-xi núú Jèsús ndédóho-xi nchaa tnúhu càhá<sup>n</sup>-gá. <sup>40</sup> Te tá Mǎrta-á<sup>n</sup> ndìhi vihi-ni iní-xi quide-xi chiu<sup>n</sup>-xi, te ní sáhá<sup>n</sup>-xi núú Jèsús, te ní xáha<sup>n</sup>-xi:

—Mèstrú, ¿náa ñá túú tnàhí sàni iní-n sǎ nǐ dándõ ndaha ñàha cùhù-í nchaa chiù<sup>n</sup>-án? Cúñaha sàú ná quìxi-xi chindee ñaha-xi —cachí-xi xǎha<sup>n</sup>-xi xì-gá.

<sup>41</sup> Dico Jèsús ní xáha<sup>n</sup>-gǎ:

—Yòhó Mǎrta, ñùhu tneñu vihi-n, te ndìhú iní-n sǎ ìo vǎi chiu<sup>n</sup>-n ñuhu, <sup>42</sup> dico xìni ñuhu vihi-gá-xi cundedóho-n tnúhu càhá<sup>n</sup>-í, chi tá Mǎriá-a sa ndédóho-xi tnúhu-í, te vá yõo ì<sup>n</sup> ndacu xocàni tnúhu-í sá nǐ ngúndecu ndìhi-xi —càchí-gá xáha<sup>n</sup>-gǎ xii-xi.

## 11

*Jèsús dánèhé-gá cue téé xìca cuu ndìhi-gá nàcuáa càhá<sup>n</sup> ndìhi-güedé Yǎ Ndiõxí*

*(Mt. 6:9-15, 7:7-11)*

<sup>1</sup> Te ì<sup>n</sup> nduu càhá<sup>n</sup> ndìhi Jèsús Yǎ Ndiõxí ì<sup>n</sup> xichi, te sátá nǐ yáha ní càhá<sup>n</sup> ndìhi-gá Yǎ Ndiõxí, te ní xáha<sup>n</sup> ì<sup>n</sup> téé xìca cuu ndìhi-gá xii-gá:

—Mèstrú, danèhé ñáhá xì-ndí nása càhá<sup>n</sup> ndìhi-ndí Yǎ Ndiõxí dàtná ní quide ndí Juàá ní dánèhé ndí cue téé ní xìca cuu ndìhi ndí —càchí-dé xǎha<sup>n</sup>-dé xii-gá.

<sup>2</sup> Te Jèsús ní xáha<sup>n</sup>-gǎ:

—Òré càhá<sup>n</sup> ndìhi-ndo Yǎ Ndiõxí, te cachí-ndó: Yòhó tǎtá-ndí Dútú Ndiõxí Yaá ndécú àndiù, nchaa ñáyiu na càhá<sup>n</sup>-yu sá cúú-n Yàá ío yíñùhu.

Te xicá<sup>n</sup> táhú-ndǐ núú-n sǎ ná sàá nduu ndíhu ndàhá-n-yu.

Te cada-n dàtná cǎchí iní-n ñùyíú-a dàtná quidé-n àndiu.

<sup>3</sup> Te xicá<sup>n</sup> táhú-ndǐ núú-n sǎ táxí-n sǎ cándèca iní-ndǐ ñ<sup>n</sup> nduu ñ<sup>n</sup> nduu.

<sup>4</sup> Te cada cǎhnu iní-n nchàa yícá cuěchi-ndǐ, chi tnàhá nchúhú quidé cǎhnu iní-ndǐ nchaa sá quidé ñàha tnaha ñáyíu-ndǐ.

Te vá dáñá-n dàcahá<sup>n</sup> ñáhá yùcu ñávǎha xii-ndǐ cada-ndǐ sá ñà túú vǎha, chi coto ñaha-n xii-ndǐ cuèndá sá vǎ dúcá<sup>n</sup> càda ñaha-xi,

duha cǎhá<sup>n</sup>-ndó

—cǎchí-gá xáha<sup>n</sup>-gǎ xii-güedé.

<sup>5</sup> Te Jèsús ní xáha<sup>n</sup> tùcu-gá:

—Te núu ndédacàa nchohó ndécú ñ<sup>n</sup> tée tnàha tnúhu ndíhi-ndo, te dava niú cuáhá<sup>n</sup>-ndó vehe-dé, te òré ní quexìo-ndo, te xáha<sup>n</sup>-ndo xii-dé: “Véxi-í nùu vá cùndèe iní-n tàxi nuu-n úní tnàhá pàá,

<sup>6</sup> chi ñ<sup>n</sup> tée xìní tnàhá ndíhi-í ñúhú-dě ichi ní quexìo-dé vehe-í, te ñá túú tnàhí ná cuñaha-í caxi-dé”, quesaha-ndo cùñaha-ndo. <sup>7</sup> Te tée-á<sup>n</sup>

cǎhá<sup>n</sup>-dé ndéé xití vehe-dé, te cùñaha-dě xii-ndo: “Vá dásàtú nihá-n chi ndèdí yuyèhe-í, te cǎa-í ndíhi cue landú-í, te vá cúú ndácóo-í taxi-í sá cuìní-n”, quesaha-dě cùñaha-dě xii-ndo. <sup>8</sup> Te na

cǎchí tnúhu-í xii-ndo sǎ cuěi cùu-dé tée tnàha tnúhu ndíhi-ndo, dico duca<sup>n</sup> cùñaha-dě xii-ndo, dico dacuítí sǎ ndácóo-dé taxi-dé sá cuìní-ndó cuèndá sá vǎ dásàtú-gá-ndó ìní-dé. <sup>9</sup> Te yúhú cǎchí-í xii-ndo sǎ cǎcá<sup>n</sup>-ndó nùu ná cuìní-ndó nùú Yǎ Ndiòxí te taxi-gá. Te vá dáñá ndéé-ndó cǎcá<sup>n</sup>-ndó nùú-gǎ nùu ná cuìní-ndó, te duca<sup>n</sup> te níhí-ndó.

Te cada iní-ndó sǎ ñǎ quexìo-ndo vehe ì<sup>n</sup> tñaha ñáyiu-ndo te ní cáhá<sup>n</sup>-ndó, te ñáyiu-á<sup>n</sup> ñǎ tedóho ñàhá-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yá Ndiöxí tedóho ñaha-gǎ xii-ndo, te taxi-gá sá ná càcá<sup>n</sup>-ndó nǔú-gǎ. <sup>10</sup> Chi nchaa ñáyiu duca<sup>n</sup> xǐquide te Yá Ndiöxí tédóho ñaha-gǎ xii-yu ñihí-yu sá cuìní-yu. Te ðiu-ni duca<sup>n</sup> tùcu nchaa ñáyiu na càcá<sup>n</sup> núú-gǎ ì<sup>n</sup> sá cuìní-yu, chi sǎñaha-gǎ sá xìcá<sup>n</sup>-yu núú-gǎ. Te ðiu-ni duca<sup>n</sup> tùcu ñihí nchaa ñáyiu ñá túú ðaña ndeé xìcá<sup>n</sup> núú Yǎ Ndiöxí sá cuìní-yu, chi ñihí-yu.

<sup>11</sup> 'Te nchòhó cue téé cùu tátá ñá túú cùndee iní-ndó cuǎha-ndo cuè déhe-ndo ì<sup>n</sup> yúu caxi-güexi òré xìcá<sup>n</sup>-güexi ì<sup>n</sup> pàá núú-ndó càxi-güexi, te ni ñà túú cùndee iní-ndó cuǎñaha-ndo ì<sup>n</sup> cóo caxi-güexi òré xìcá<sup>n</sup>-güexi ì<sup>n</sup> chácá nǔú-ndó càxi-güexi. <sup>12</sup> Te ni ñà túú cùndee iní-ndó cuǎñaha-ndo ì<sup>n</sup> nchacua caxi-güexi oré xìcá<sup>n</sup>-güexi ì<sup>n</sup> ndíú nǔú-ndó càxi-güexi. <sup>13</sup> Te nchòhó cuèi ndeé dau sàá iní-ndó, dico sǎha-ndo cuè déhe-ndo sǎ vǎha xèxi-güexi oré xìcá<sup>n</sup>-güexi núú-ndó. Te núu nchòhó duca<sup>n</sup> quide-ndo, ðte uu<sup>n</sup>-gá duca<sup>n</sup> quide Tátá-ndó Dǔtú Ndiöxí Yaá ndécú àndiu, chi taxi-gá Espiritú-gá cundecu ndìhi-ndo te núu na càcá<sup>n</sup>-ndó nǔú-gǎ! —càchí-gá xáha<sup>n</sup>-gǎ xii-güedé.

*Càchí-güedé sá ndécú ndìhi Jesús yucu ñávǎha  
(Mt. 12:22-30; Mr. 3:20-27)*

<sup>14</sup> Te Jesús ndeñùhu-gá espíritú cùndìhi yucu ñávǎha yìhi ñaha xii ì<sup>n</sup> téé ní quide ñihí-xi, te òré ní ndee ñaha espíritú-á<sup>n</sup> xii téé-á<sup>n</sup>, te ní nacáhá<sup>n</sup>-dé.

Te ío ní cuñúhu ñáyíu sá dúcá<sup>n</sup> ñí quide-gá. <sup>15</sup> Te davá-yu ní xítñàhá-yu:

—Tée-a ndèñuhu-dé nchaa espíritú cúndìhi sácuíhná yíhí ñàha xii ñáyíu, chi ñíu-ni sácuíhná-ã<sup>n</sup> chíndèè ñaha-xi xii-dé, te ñíu-ni-xi tàxi tnuní-xi nchaa espíritú-á<sup>n</sup> —càchí-yu xítñàhá-yu.

<sup>16</sup> Te davá-yu xito ndeé ñàhá-yu xii-gá, te xǎhǎ<sup>n</sup>-yu sá ná cádá-gǎ ñ<sup>n</sup> sá vǎ yòo tnàhí ndàcu cada ñuyíú-a cundèhé-yu nàcuáa cutnùní iní-yu núu ndáá sá Yǎ Ndiǒxí ní tendaha ñàha-gá xii-gá véxi-gá ñuyíú-a. <sup>17</sup> Dico mee-gǎ sa ní cutnùní iní-gá nchaa nàcuáa sàni iní-yu, núu ní xáha<sup>n</sup>-gǎ xií-yu:

—Te nchòhó xìní-ndó sǎ nǔu ñ<sup>n</sup> tée yíndaha ñ<sup>n</sup> nació<sup>n</sup> vá cúú ñ<sup>n</sup>nuu-dé ndìhi cue tée cùndìhi-dé, te vá cúdǐ-dé cunuu-dě. Te ñíu-ni duca<sup>n</sup> sǎtnahá tucu-xi cùu cue ñáyíu xíndecu ñ<sup>n</sup>-ni vèhe, chi núu vá cúú ñ<sup>n</sup>nuú-yu cundecú-yu, te vá cúdǐ-yu cundecu càhnú-yu. <sup>18</sup> Te duca<sup>n</sup> sǎtnahá-xi cùu sácuíhná, chi núu vá cúú ñ<sup>n</sup>nuu-xi ndìhi nchaa espíritú cùndìhi-xi te vá cúdǐ-xi cundecu-xi taxi tnùní-xi. Te duha càhá<sup>n</sup>-í chi nchòhó càchí-ndó sǎ sàcuíhná chíndèè ñaha-xi xii-í queñùhu-í nchaa espíritú cùndìhi-xi yíhi ñaha xii ñáyíu. <sup>19</sup> Te núu yúhú quidé cuendá-ndó sǎ sàcuíhná chíndèè ñaha-xi xii-í, te xìni ñíuhu-xi cada cuendá-ndó yòo chindee ñaha xii cue tée xìca cuu ndìhi-ndo queñùhu-güedé nchaa espíritú cùndìhi-xi yíhi ñaha xii ñáyíu. Te mee-güedé càchí-güedé sá nchòhó ñǎ túú càhá<sup>n</sup> ndáá-ndó sǎ dúcá<sup>n</sup> càhá<sup>n</sup>-ndó. <sup>20</sup> Te ndáá sá Yǎ Ndiǒxí chíndèè ñaha-gá xii-í queñùhu-í nchaa espíritú cùndìhi sácuíhná yíhí ñàha xii ñáyíu, te xǎ<sup>n</sup>

cutnùní iní-ndó sǎ sà ní sáá nduu ndíhu ndaha ñàha Yá Ndiõxí xii-ndo.

21 'Te núu ì<sup>n</sup> téé ío ndee, te súúní ñíí cáá-dě, te ndèé-dé vehe-dé cuèndá sá vǎ cuíta, te ní quide túha-dé titní sá dǎé<sup>n</sup>, te ío váha nèhe váha-dé nchaa ndachìu<sup>n</sup>-dé. 22 Dico núu quexìo ìngá téé ío-gá ñíí cáá te ndee-gǎ-dé, te ngüíta-dé nàá-dé ndìhi téé ndèé vehe-xi-á<sup>n</sup>, te cada cànarí ñáhá tǎe-á<sup>n</sup> xii téé ndèé vehe-xi-á<sup>n</sup>, te quendeé-dé nchaa sá dǎé<sup>n</sup> cùndèe iní-dé, te taxi tnùní-na-dé nchaa xǎá<sup>n</sup>, ndìhi nchaa sá ndécú ndìhi-dé, te dàcáhñu-dé nchaa cue téé cùndìhi-dé nchaa sá ná ñìhí-dé.

23 'Te nchaa ñáyìu ñá túú cùndìhi ñàha xii-í, te cùu úhú iní ñáhǎ-yu, te nchaa ñáyìu ñá túú chìndee ñàha xii-í, te dàquee tíhǔ-yu chìu<sup>n</sup> quide-í.

*Espiritú cùndìhi yucu ñávǎha sá nánchòcáva xito cùu úú*  
(Mt. 12:43-45)

24 'Te òré ná quèe ñàha ì<sup>n</sup> espíritú cùndìhi yucu ñávǎha xii ì<sup>n</sup> ñáyìu, te cuáhá<sup>n</sup>-xi ndùcu-xi ì<sup>n</sup> xi-chi núú cùndècu-xi te ñá ñìhí-xi, te ní sani iní-xi: “Váha-gá núhú tucu-í núú ñǎ xìndecu-í”, duha ní sani iní-xi. 25 Te cuánuhú-xi, te òré ní nasáá-xi, te ní xiní-xi sá cáá ìní ñáyìu-á<sup>n</sup> dàtná cáá-ñǎ ì<sup>n</sup> vehe ní natíhú, chi ní nduu vii-ná, vá yǎo-gá ndécú. 26 Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xí ùsá tnàhá espíritú cùndìhi-xi sá nèhé víhí-gǎ xǐquide, te òré ní ñìhí-xi cue espíritú-á<sup>n</sup> te ndèca ñàha-xi cuáhá<sup>n</sup> cuèndá ngúndecu ndìhi-xi ñáyìu-á<sup>n</sup>, te ñáyìu-á<sup>n</sup> uu<sup>n</sup>-gá nándi yáha-yu dàcúúxí ndèé díhna —càchí-gá xáha<sup>n</sup>-gǎ xíi-yu.

*Cuèndá ñáyìu cùu váha ndisa iní-xi*



27 Te nini càhá<sup>n</sup> Jèsús tnúhu-á<sup>n</sup> nűú ñáyiú ní cáhá<sup>n</sup> níhi ì<sup>n</sup> ñadihí tnuú-yu, te xăha<sup>n</sup>-a<sup>n</sup> xii Jèsús:

—¡Sá văha táhú ñadihí ní dácácú ñàha xii-n, te ní dácúéhnú ñàha-a<sup>n</sup>! —cachí-a<sup>n</sup> xăha<sup>n</sup>-a<sup>n</sup> xii-gá.

28 Te Jèsús ní xáha<sup>n</sup>-gă:

—¡Văha-gá táhú nchàa ñáyiú sàcúndedóho nchaa tnúhu càhá<sup>n</sup> Yă Ndiöxí te sàndáá iní-yu! —càchí-gá xáha<sup>n</sup>-gă xii-a<sup>n</sup>.

*Ñáyiú ñá túú sàndáá iní ñáhá xii Jèsús cuiní-yu cada-gá ì<sup>n</sup> sá vă yôo tnàhí ndàcu cada*

*(Mt. 12:38-42; Mr. 8:12)*

29 Te ta tàcá vâi ñáyiú te dàdehnde tnaha-ná-yu, te ní ngüta Jèsús xáha<sup>n</sup>-gă xii-yu:

—Nchòhó ñáyiú ndècu ñuyíú vitna, chi ío sáá iní-ndó, te cuiní-ndó càda-í ì<sup>n</sup> sá vă yôo tnàhí ndàcu cada cuendá cuiní-ndó cùtnuní iní-ndó nűú ndisa sá Yă Ndiöxí ní tendaha ñàha-gá xii-í véxi-í. Dico ñá túú năgá cada-í quiní-ndó, chi sa nihí-ndó tnűhu nàcuáa ní yáha ndíi Jònás téé ní xóo cáhá<sup>n</sup> tnúhu Yă Ndiöxí ndéé sanaha, te diu-ni duca<sup>n</sup> yăha yúhú tucu. 30 Chi nchaa ñáyiú ñuú Nñivé ní cutnùní iní-yu sá Yă Ndiöxí ní tendaha ñàha-gá xii ndíi Jònás ní sáhá<sup>n</sup> ndíi ñuú-yu. Te duca<sup>n</sup> sàtnahá-xi cùu yúhú Téé cùu ñaní tnáhá-ndó nchàa-ndo, chi sáá nduu te cutnùní iní-ndó sá Yă Ndiöxí ní tendaha ñàha-gá xii-í véxi-í ñuyíú-a. 31 Te na sáá nduu càda ndáá Yă Ndiöxí cuéchi nchaa nchòhó ñáyiú ndècu ñuyíú-a, te dàvá-á<sup>n</sup> quiní-ndó ì<sup>n</sup> ñadihí ñaha ní xíndaha ì<sup>n</sup> nació<sup>n</sup> cáá ndàa xio cuha núú quéné nchăcanchii. Te ñaha-á<sup>n</sup> ío xica ñí xíndecu-a<sup>n</sup>, te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní cáhá<sup>n</sup> ndíi Salòmón, chi ndíi-á<sup>n</sup> ío ní sáá sá xini tnùní ndíi.

Te ñaha-á<sup>n</sup> cǎhá<sup>n</sup>-a<sup>n</sup> dàvá-á<sup>n</sup> sǎ nchòhó ñáyiú ndècu vitna ñá túú ní quide ndáá-ndó. Dico vitna iha ndècu ndìhi ñaha-ndo xii yúhú, te ñiú-í ío-gá cúnùu-í dǎcúúxí ndìi Salòmón. <sup>32</sup> Te ñiú-ni nduu càda ndáá Yǎ Ndiǒxí cuéchi nchaa nchòhó ñáyiú ndècu ñuyíú-a vitna, dàvá-á<sup>n</sup> tnàhá cue ñáyiú ní xíndecu ñúú Nínivé cundecú-yu núú Yǎ Ndiǒxí, te tnàhá-yu cachí-yu sá ñà túú ní quide ndáá-ndó. Chi ñáyiú ñúú Nínivé-á<sup>n</sup> nǐ ndixi túu iní-yu sá ñà túú quide váha-yu ndècú-yu te ní natuhá-yu ichi Yá Ndiǒxí cútñàhá ní cǎhá<sup>n</sup> ndìhi ñaha ndíi Jònás tnúhu-gá xii-yu. Dico vitna iha ndècu ndìhi ñaha-ndo xii yúhú téè cǎhá<sup>n</sup> tucu tnúhu Yá Ndiǒxí, te ñiú-í ío-gá cúnùu-í dǎcúúxí ndíi Jònás.

*Núú-ó cùu-xi datná ñ<sup>n</sup> ñuhú*  
(Mt. 5:15; 6:22-23)

<sup>33</sup> Te ñá túú nì ñ<sup>n</sup> ñáyiú tènùhú ñ<sup>n</sup> lintérná, te taxi ndecú-yu ñ<sup>n</sup> núú yídǎhu, àdi chiváha-yu xití ñ<sup>n</sup> tídihi, chi tàxi ndecú-yu ñ<sup>n</sup> núú ñnu cuendá nchaa ñáyiú quíhu vehe cutnùní núú-yu. <sup>34</sup> Te núú-ndó cùu-xi datná ñ<sup>n</sup> ñuhú, chi ñ<sup>n</sup> sá ná quíní-ndó te ndìxi túu iní-ndó nǎ cúú xǎ<sup>n</sup>, te núu cǎváha núú-ndó, te duca<sup>n</sup> cùtnuní iní-ndó nǎ cúú sǎ ndécú núú-ndó, á<sup>n</sup> te núu cùhú, te vá cùtnuní iní-ndó nǎ cúú sǎ ndécú núú-ndó. Te sá dúcá<sup>n</sup> cùhú núú-ndó te cada iní-ndó sǎ ndécú-ndó dàtná ñ<sup>n</sup> núú néé. <sup>35</sup> Te ío cada cuendá-ndó vǎ cǎní cuèhé iní-ndó cuendá tnúhu Yá Ndiǒxí cuendá cutnùní iní-ndó nǎcuáa cundecu-ndo, chi núu na cǎní cuèhé iní-ndó cuendá tnúhu-gá, te cùu-ndo datná ñ<sup>n</sup> ñáyiú ñá túú cùtnuní núú-xí. <sup>36</sup> Te núu cǎndoo canine iní-ndó, te mee-ni sǎ vǎha ñùhu iní-ndó, te cùtnuní váha iní-ndó tnúhu ndáá dàtná cùtnuní

váha núú-ndó òré càyú ñuhú, duca<sup>n</sup> cùtnuní iní-ndó  
—càchí-gá xáha<sup>n</sup>-gă xii-yu.

*Jèsús càhá<sup>n</sup>-gá cuèndá cue téé cùu fariséú ndìhi  
cue téé dàcuaha ñaha xii-í ñáiyu*

*(Mt. 23:1-36; Mr. 12:38-40; Lc. 20:45-47)*

<sup>37</sup> Te òré ní ndìhi tnúhu ní càhá<sup>n</sup> Jèsús, te ì<sup>n</sup> téé cùu fariséú ní càhá<sup>n</sup> ñáhá-dě xii-gá vehe-dé caxi-gá, te cuánguihu-gá vehe-dé, te ní ngóo-gá mèsá. <sup>38</sup> Te téé cùu fariséú-á<sup>n</sup> ìo ní cuñúhu-dé, chi Jèsús ñá túú ní ndàha-gá nàcuáa sàni iní-güedé nduu vétú iní Yă Ndiöxí òré ní ngóo-gá caxi-gá dàtná quidé mèe-güedé. <sup>39</sup> Te Jèsús ní xáha<sup>n</sup>-gă xii-dé:

—Nchòhó cue téé cùu fariséú xini-ndó sã ìo ñáiyu nàquete sátá-ni tàsá<sup>n</sup> ndìhi sátá-ni còhó, te xití-xi càndehe caduha-ni. Te duca<sup>n</sup> sãtnahá-xi cùu nchòhó, chi ndaha-ni-ndo nàquete-ndo, te iní-ndó ñà túú nduu ndoo, te nándi dándahú-ndó tnàha ñáiyu-ndo, te quèhe<sup>n</sup>-ndo sá ndécú ndìhí-yu, te nándi-gá nchaa sá cuèhé sá dúhá ñùhu iní-ndó quide-ndo. <sup>40</sup> ;Te nchòhó cúú-ndó cuè téé ìo ñí iní-xi! ;Te náa ñá túú cùtnuní iní-ndó sã Yă Ndiöxí Yaá ní cadúha yiqui cùñú-ó ḍu-ni-gá ní chihi-gá iní-ó-ã<sup>n</sup>? <sup>41</sup> Te nchaa sá vâha ndècu ndìhi-ndo cuáha-ndo nchàa ñáiyu xini ñuhu na cundecu ndìhí-yu, te núu duca<sup>n</sup> na càda-ndo, te cuu-ndo ñáiyu sa ní nduu ndoo ní nduu nine iní-xi.

<sup>42</sup> ;Te ndàhú ní cuu nchaa nchòhó cue téé cùu fariséú! Chi sãha-ndo Yă Ndiöxí núú ùxí xichi yúcu nání mენტá, ndìhi yúcu rùdá, ndìhi nchaa dava-gá núú yúcu quèe comidá, dico ñá túú quide ndáá-ndó, te ni ñà túú ñùhu iní-ndó Yă Ndiöxí.

Dico tnúhu cãhá<sup>n</sup>-í-a tàú-ndó càda-ndo, te ni vã dáñã ndèe-ndó càda-ndo nchaa dava-gá sá vãha.

43 '¡Te ndàhú ní cuu nchòhó cue téé cùu fariséú! Chi cuiní-ndó cùnucóo-ndo nũú sácõo cue téé ío cùnuu xití veñúhu, te cuiní-ndó mèe-ni ndihí tnúhu yĩñùhu cáhá<sup>n</sup> ndihí ñaha ñãyiu xii-ndo nchaa núú xicá cùu-ndo.

44 '¡Te ndàhú ní cuu nchòhó cue téé dàcuaha ñaha xii ñãyiu nchaa tnúhu ní chídó tnùní ndíi Moisés, ndihí nchòhó cue téé cùu fariséú chi ío dándahú-ndó mèe-ndo sá quidé ndãá-ndó te ñã ndàá sá quidé ndãá-ndó! Chi cùu-ndo datná ì<sup>n</sup> ñãyiu ní xihí te ní nguindũxi, te ñã túú cùtnuní-gá ndèe yĩndũxi-yu, te cuèi nà yáha ñãyiu dico ñã túú cùtnuní sá yĩndũxi ndíyi. Te duca<sup>n</sup> sãtnahá-xi cùu nchohó, chi nchaa ñãyiu ndèhe ñaha xii-ndo ñã túú cùtnuní iní-yu nchaa sá cuèhé sá dúhá sàni iní-ndó —càchí-gá xáha<sup>n</sup>-gã xii-güedé.

45 Te ní xáha<sup>n</sup> ì<sup>n</sup> téé dàcuaha ñaha xii-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcá<sup>n</sup> cãhá<sup>n</sup>-n te tnàhá nchúhú xicuehé-n ã<sup>n</sup> —càchí-dé xáha<sup>n</sup>-dẽ xii-gá.

46 Te Jèsús ní xáha<sup>n</sup>-gã:

—¡Ndàhú ní cuu tnàhá nchaa nchòhó cue téé dàcuaha ñaha xii ñãyiu nchaa tnúhu ní chídó tnùní ndíi Moisés! Chi quide-ndo datná quidé ñãyiu dàcuído ì<sup>n</sup> tnaha ñãyiu-xi ì<sup>n</sup> sá ïo vée, te mèe-yu ni lùha ñã túú cuiní-yu cuidó-yu. Te duca<sup>n</sup> sãtnahá-xi quide nchohó chi dãnehé-ndó ñãyiu nàcuáa cadá-yu, dico mee-ndo chi ni lùha ñã túú cuiní-ndó càda-ndo nacuáa dãnehé-ndõ-yu.

47 'iTe ndàhú ní cuu tucu-ndo! Chi càdúha-ndo nùú nǐ nguíndǔxi cue téé ní xóo cáhá<sup>n</sup> tnúhu Yá Ndiöxí ndéé sanaha cuèndá sá cúnàha-ndo núú yíndǔxi cue ndíi, te ðiu-ni cue ñaní tnáhá-ndó nǐ sahani-güedé cue ndíi. 48 Te nchòhó sa nàha-ndo nacuáa ní quide cue ñaní tnáhá-ndó, te càchí-ndó sǎ nǐ quide váha-güedé sá dúcá<sup>n</sup> nǐ sahani-güedé cue ndíi-á<sup>n</sup>, te vitna càdúha-ndo nùú nǐ nguíndǔxi cue ndíi.

49 'Te Yá Ndiöxí ío sàá nchaa sá xìní tnùnì-gá, te ní cachí-gá sá dácàhá<sup>n</sup>-gá iní cue téé cuèndá cáhá<sup>n</sup>-güedé tnúhu-gá núú ñǎyiu, te cada-güedé nchaa nàcuáa cuìnì-gá, te dava-güedé cahni ñàhá-yu xii-güedé, te dava-güedé ío dandòho ñàhá-yu xii-güedé duha ní cachí-gá. 50 Te nchaa ñǎyiu ñuyíú vitna tnáhá-yu nacháhu-yu núú Yá Ndiöxí cuèndá sá nǐ sahani-güedé cue téé ní cáhá<sup>n</sup> tnúhu-gá ndéé cútnàhá ní ngáva ñuyíú. 51 Te ndéé ndíi Àbél téé ní sahani-güedé ndéé díhna nuu, ndihí ndéé ndíi Zacàriá téé ní sahani-güedé ndéé núú nǐ ndihí-ná ndácá<sup>n</sup> cuèndá ñàhá Yá Ndiöxí núú ñǎyiu ndècu ñuyíú vitna, te ðiu ndíi-á<sup>n</sup> nǐ sahani-güedé mei tnúú veñúhu càhnu sá ío cùnuu, ndihí xító núú sácódó sǎ ndúú tǎhú Yá Ndiöxí.

52 'iTe ndàhú ní cuu tucu nchaa nchòhó cue téé dàcuaha ñaha xii ñǎyiu nchaa tnúhu ní chídó tnùnì ndíi Moisés! Chi quide-ndo datná quidé ì<sup>n</sup> téé tàxi tnunì ì<sup>n</sup> vehe, chi nacadí-dé te ñá dáñá-dě quíhu ñáyiu te ni mèe-dé ñá túú quíhu-dé. Te ðuca<sup>n</sup> sǎtnahá-xi quide-ndo, chi dàcuaha-ndo tnúhu Yá Ndiöxí te ñá túú cuìnì-ndó quìndáá iní-ndó te ni ñà túú dànehé-ndó ñǎyiu cuìnì tn<sup>ii</sup> tnúhu-gá nàcuáa

tàú-xi cunduu cuendá naníhí tàhú-yu —càhí-gá xáha<sup>n</sup>-gǎ xii-dé.

<sup>53</sup> Te òré ní ndee Jèsús vehe téé cùu fariséú-án, te cue téé dàcuaha ñaha xii ñáyiú nchaa tnúhu ní chídó tnùnì ndii Moisés, ndihi cue téé cùu fariséú ní cudéé<sup>n</sup>-güedě núú-gǎ, te ní ngüíta-güedé nándi sá xìcá<sup>n</sup> tnúhú-güedě núú-gǎ cuendá cuení-güedé nñu vá cuíta-gá ì<sup>n</sup> tnúhu càhá<sup>n</sup>-gá <sup>54</sup> cuendá duca<sup>n</sup> ñihí-güedě nàcuáa cada-güedé cacá<sup>n</sup> cuéchi-güedé cuendá-gá.

## 12

### *Jèsús càhá<sup>n</sup>-gá cuendá cue téé dándahú méé-xí*

<sup>1</sup> Te òré-án ñi tacá titní mǐ ñáyiú núú ndécú Jèsús, te súúnì dícó ngõnchihi tnàha-ná-yu. Te ndèdóho-yu ní xáha<sup>n</sup> Jèsús xii cue téé xìca cuu ndihi-gá:

—Cada cuendá-ndó vǎ cǎnchícú<sup>n</sup> nihnu-ndo nàcuáa quide cue téé cùu fariséú, chi cue téé-án ò dándahú-güedé méé-güedě sá quidé ndǎá-güedé dico ñá ndǎá sá quidé ndǎá-güedé. <sup>2</sup> Te nchaa tnúhu sá cúú yùhu ni cuu vá cúú yùhu-gá, chi nchaa dacuítí sǎ quée túu-xi núú ñáyiú. <sup>3</sup> Chi nchaa tnúhu càhá<sup>n</sup> dayuhu-ndo quèe túu-xi núú chítú nñú tàcá, te nchaa tnúhu càhá<sup>n</sup> méé-ndó vèhe-ndo dacuítí sǎ ñihí ñáyiú tnúhu.

### *Yá Ndiõxí xínì ñùhu-xi yuhú-ó-gǎ (Mt. 10:26-31)*

<sup>4</sup> Te nchòhó cue téé ò váha tnàhá tnúhu ndihi-í ná càhí tnúhu-í xii-ndo sǎ vǎ yùhú-ndó cuè ñáyiú cuèi na càhni ñahá-yu xii-ndo, chi ñu-ni yiqui cùñú-ndó ndacú-yu cahní-yu, te ñá túú nǎgá ndacú-yu cada ñahá-yu xii-ndo. <sup>5</sup> Te na càhí

tnúhu-í xii-ndo sã Yã Ndiõxí tàú-ndó yùhú-ndó-gã, chi mee-gã ío cùnuu-gá, te ñiu-gá quidé-gã sá vã cúndècu-gá ñáyiu ñuyíú, te daquihí<sup>n</sup> ñáhá-gã xií-yu núú ùhú núú ndàhú, núú xíã<sup>n</sup> càchí tnúhu-í xii-ndo sã Yàá-á<sup>n</sup> tàú-ndó yùhú-ndó-gã.

<sup>6</sup> Te nchòhó xìní-ndó sã ndéé úhú<sup>n</sup> tnàhá tìlaá cùyáhu-ði núú ùú díhú<sup>n</sup>, dico Yã Ndiõxí ñá túú cùnaa-gá ni ì<sup>n</sup>-güedi, chi nèhe cuendá ñáhá-gã xii-güedi. <sup>7</sup> Te nchòhó ndéé ì<sup>n</sup> ì<sup>n</sup> idi díquí-ndó yìndehu, núú xíã<sup>n</sup> càchí-í sá vã yùhú-ndó, chi cùnuu-gá-ndó dàcúúxí tìlaá cuèi vãi vihi-güedi.

*Ñáyiu na dàtúu núú dàva-gá ñáyiu sá ndécú ndihí-yu Xítóhó Jesucristú*

*(Mt. 10:32-33; 12:32; 10:19-20)*

<sup>8</sup> Te na càchí tnúhu-í xii-ndo sã ñúu na dàtúu-ndo ñúú dàva-gá ñáyiu sá ndécú ndihí ñaha-í xii-ndo. Te duca<sup>n</sup> te tnàhá yúhú Tée cùu ñaní tnáhá-ndó nchàa-ndo datúu-í núú nchàa cue espíritú xínú cuèchi núú Yã Ndiõxí sá nchòhó ndécú ndihí ñaha-ndo xii-í. <sup>9</sup> Dico núu na cùñaha-ndo xii ñáyiu sá ñà túú ndècu ndihí ñaha-ndo xii-í, te ñiu-ni duca<sup>n</sup> càda yúhú Tée cùu ñaní tnáhá-ndó nchàa-ndo, chi cúñaha-í xii cue espíritú xínú cuèchi núú Yã Ndiõxí sá ñà túú ndècu ndihí ñaha-í xii-ndo.

<sup>10</sup> Te ndédani càa ñáyiu na càhá<sup>n</sup> cuèhé cuendá yúhú Tée cùu ñaní tnáhá-ndó nchàa-ndo, te cada càhnu iní ñáhá Yã Ndiõxí xií-yu. Dico ñáyiu na càhá<sup>n</sup> cuèhé cuendá Espíritú Yã Ndiõxí, te ñáyiu-á<sup>n</sup> vã cádá càhnu iní ñáhá-gã xií-yu.

<sup>11</sup> Te òré ná càndeca ñaha-güedé xii-ndo quihí<sup>n</sup> veñúhu, àdi núú cuè téé cùchiu<sup>n</sup>, te ni vã cání ìní-ndó ñúu nása cunduu tnúhu cúñaha-ndo

xì-güedé, te ni vǎ cání ìní-ndó nǔu ná tnúhu nadànchocáva-ndo nǔu ná tnúhu na cǔñaha-güedé xii-ndo, <sup>12</sup> chi òré-nǎ te mee Espíritú Yǎ Ndiǒxí dacàhu ìní ñáhá-xí xii-ndo tnúhu cǔñaha-ndo xii-güedé —càchí-gá xáha<sup>n</sup>-gǎ xii-güedé.

*Cuendá ì<sup>n</sup> téé cuica*

<sup>13</sup> Te ì<sup>n</sup> téé ñùhu tnahá tnuú ñáyiu-á<sup>n</sup> ñí xáha<sup>n</sup>-dě xii Jèsús:

—Mèstrú, cǔñaha xii ñaní-í sá ná chídava-dé sá ñí dándǒo tǎtá-ndǐ cuu cuendá-ndǐ —càchí-dé xáha<sup>n</sup>-dě xii-gá.

<sup>14</sup> Te Jèsús ní xáha<sup>n</sup>-gǎ xii-dé:

—¿Te ná cuendá duca<sup>n</sup> càhá<sup>n</sup>-n? Te ñá díú chiu<sup>n</sup>-á<sup>n</sup> vǎxi-í cada-í, chi ñá díú tǎe cùchiu<sup>n</sup> cuu-í —càchí-gá xáha<sup>n</sup>-gǎ xii-dé.

<sup>15</sup> Te xáha<sup>n</sup>-gǎ xii nchaa ñáyiu xǐndecu-á<sup>n</sup>:

—Nchaa nchòhó ñáyiu ndèdóho nchaa tnúhu càhá<sup>n</sup>-í ío váha cada cuendá-ndó, te vǎ cání ìní-ndó nǎndǐ nducuu-ndo cùndecu ndìhi-ndo, chi cuèi vǎi vihi na nihí-ndó cùndecu ndìhi-ndo, dico vǎ chǐndèe ñaha-xi cudíi-ndo cùndecu-ndo ñuyíú-a —càchí-gá xáha<sup>n</sup>-gǎ xii-yu.

<sup>16</sup> Te dǎtnùní ní ngüíta-gǎ cání-gǎ ì<sup>n</sup> cuendú núú-yu cuendá tecú tnùní-yu tnúhu-gǎ, te xáha<sup>n</sup>-gǎ:

—Ì<sup>n</sup> téé cuica sǔnǐ ñí cuu nchaa tatá ní xitu-dé núú ñúhú-dě. <sup>17</sup> Te ní ngüíta-dé sání ìní-dé: “¿Te nása cada-í? Te ñá túú ndèe nataxúha-í nchaa sá ñí xitu-í”, duha ní sani ìní-dé. <sup>18</sup> Te dǎtnùní ní sáha váha tucu-dé cuendá nàcuáa cada-dé, te ní cachí-dé: “Duha na cùnduu, dangòyo-í yacá-í, te ndada càhnu-gǎ-í, te xití-xi nataxúha-í nchaandi túhú sá ñí xitu-í, ndìhi nchaa dava-gǎ sá ndécú ndìhi-í. <sup>19</sup> Te sátá dúcá<sup>n</sup>, te cachí-í: Ío vǎi sá ndécú



ndìhi-í, te cudí-xi cuéhé cuía, te vitna ndetatú-í, te coho-í te caxi-í cada-í, te nándi-gá cada-í cuendá cudíí ìní-í cundecu-í, duha quesaha-ĩ”, cächí-dé. <sup>20</sup> Dico Yá Ndiöxí ní xáha<sup>n</sup>-gã xii-dé: “Yòhó, ñá túú nàndíhi sá sání ìní-n, chi yúhú cächí-í sá niú vitna cuú-n, te nchaa sá ndécú ndìhi-n ¿yoo cuu sá vâha xii-a<sup>n</sup>-i?”, cächí-gá xáha<sup>n</sup>-gã xii-dé. <sup>21</sup> Duha yáha nchaa ñáyiú nándi sàni ìní-xi cundecu ndìhí-xi ñuyíú-a, dico ñáyiú-á<sup>n</sup> ïo ndàhú-yu chi ñá túú ñá nduu táhü-yu núú Yá Ndiöxí cundecu ndìhí-yu — cächí Jèsús xáha<sup>n</sup>-gã xií-yu.

*Yá Ndiöxí xító-gã nchaa ñáyiú sàndáá ìní ñáhá xì-gá*

*(Mt. 6:25-34)*

<sup>22</sup> Te ní xáha<sup>n</sup> Jèsús xii cue téé xìca cuu ndìhi-gá:

—Te na cächí tnúhu-í xii-ndo sã vã ïo canì ìní-ndó ñúu nása cundecu-ndo, àdi nása ñíhí-ndó sã caxí-ndó, àdi nása ñíhí-ndó dǒo cuihnu-ndo. <sup>23</sup> Chi cùnuu-gá méé-ndó dàcúúxí sã nchító-ndó, te duca<sup>n</sup> yìqui cuñú-ndó cùnuu-gá-xi dàcúúxí dǒo sácuihnu-ndo. <sup>24</sup> Te chí cuãha cuendá nàcuáa quide cue tícácá, chi ni ñá túú chìhi-güedi tatá cuu itú natahu-güedi te ni ñá túú ndèé nútnǎ yacá-güedi, te ñíhí-güedi xèxi-güedi, chi Yá Ndiöxí xító ñàha-gá xii-güedi. ¿Te nchòhó cùnùu-gá-ndó dàcúúxí nchàa cue qui<sup>n</sup> ndava! <sup>25</sup> Te cuèi nándi sá sání vîhi ìní-ndó ndècu-ndo, dico ñá ndácú-ndó càda-ndo nacuéa cuehnu-ndo cuèdicó ì<sup>n</sup> yìqui-gã. <sup>26</sup> Te núu ni sã lúhá xǎ<sup>n</sup> ñá ndácú-ndó càda-ndo, ¿te ná cuendá ïo sàni ìní-ndó cuendá nchaa sá cuini-ndó ñíhí-ndó cùndecu ndìhi-ndo?

27 'Te chí cádá cuèndá nàcuáa sàhnu #<sup>n</sup> tnu itá, chi ni ñà túú quède chiu<sup>n</sup>-xi, te ni ñà túú quèhe<sup>n</sup>-xi idi. Te na càhí tnúhu-í xii-ndo sã ndïi Salòmón ío vii ní cáa nchaa sá ñí xíndecu ndihí ndíi, dico vií-gá tucu càa nchaa itá dàcúúxí nchàa sá ñí xíndecu ndihí ndíi. 28 Te cùhú sã ío vitna tnaa-ni cùdíi-xi te sàhmí-yu, te cuèi duca<sup>n</sup> dico ío vii càdúha Yá Ndiöxí nchaa cùhú-ã<sup>n</sup>. ¡Te nchòhó ío cùnunu-ndo dacúúxí nchàa cùhú-ã<sup>n</sup>, núu xíã<sup>n</sup> ío xìto ñaha-gá xii-ndo, te dicó yica cùu iní-ndó sàndáá iní-ndó-gã! 29 Te vá ío canchicú<sup>n</sup> nihnu-ndo sã cóhó sã cáxí-ndó, te ni vã dándihú-ndó iní-ndó nũu nása cada-ndo ñihí-ndó. 30 Chi nchaa ñáyiu ñã túú sàndáá iní ñáhá xii Yá Ndiöxí duca<sup>n</sup> mée-ni sá cóhó sã cáxí-yu xica nchicú<sup>n</sup> nihnú-yu. Dico mee Tãtá-ó Dütú Ndiöxí sa naha-gá nándi cùu sá xíní ñùhu-ndo, te taxi-gá. 31 Te cada-ndo nchàa nacuáa càhá<sup>n</sup> Yá Ndiöxí Yaá yíndàha ñaha xii-ndo, te duca<sup>n</sup> te taxi-gá nchaa sá xíní ñùhu-ndo.

*Cuèndá sá vãha nduu táhú-ó nũu Yá Ndiöxí  
(Mt. 6:19-21)*

32 'Te vá yùhú nchòhó cue tée ndècu ndihí-í cuèi ío sacú-ndó, chi Tãtá-ó Dütú Ndiöxí ní cachí-gá sá ndúú táhú-ndó cùndecu-ndo núú ndécú-gã taxi tnùní-ndó tnàhá-ndó. 33 Te chí dicó nchàa sá ndécú ndihí-ndo, te chí cuãha nchaa ñáyiu ndàhú díhú<sup>n</sup>-ndó ñáyiu xini ñuhu, te cada váha-ndo cùndecu-ndo, te duca<sup>n</sup> te nduu táhú-ndó sã ío-gá váha núú Yá Ndiöxí cundecu ndihí-ndo, te xíã<sup>n</sup> vá cúú tùhú tnàhí-gá-xi, te ni vã ndíhí nihnu-gá-xi, te ni ñàdúhú vã ndácú-güedë duhu-güedë, te ni tĩquidi vá quée-dí. 34 Te núu xíã<sup>n</sup> cúú cuèndá-ndó ñã, te ñu-ni xíã<sup>n</sup> ñúhú iní-ndó, á<sup>n</sup> te núu mee-ni

să ndécú ñùyúú-a ndècu ndihì-ndo, te diu-ni nchaa xíã<sup>n</sup> ñúhú ìní-ndó.

*Xini ñuhu-xi quihì iní-ó cùndecu-o*

<sup>35-36</sup> 'Te ío quihì iní-ndó cùndecu-ndo, te cada-ndo dàtná quidé dàva cue téé xínu cuechi sacúndecu túha-güedé cuèi nání òré-á<sup>n</sup> ndétú-güedě pàtróó<sup>n</sup>-güedě ná òré nasáá-dé sá cuáhá<sup>n</sup>-dé vico tnãndaha. Te núu niú te sa cúu cáyú-ni ñuhú-güedé sá cùndetu ñaha-güedé, chi òré ná nàsáá-dé dacàsa<sup>n</sup>-dé yuyèhe, te ndihì-ni nacaá<sup>n</sup>-güedé ndíhu-dé. <sup>37</sup> Te váha táhú nchaa cue téé xínu cuechi-á<sup>n</sup>, chi ndècu túha-ni-güedé ndétú-güedě ndéé òré ní nasáá pàtróó<sup>n</sup>-güedě, te na càchí tnúhu ndáá-í xii-ndo sã òré ná nàsáá pàtróó<sup>n</sup>-güedě-á<sup>n</sup> te chihi ñaha-dě mèsá xii-güedé, te ndacá<sup>n</sup> ndee-dé dóó níhnú-dě núu yíquí-dě, te ngúíta-dé cani-dé cóhó-güedě cuëndá caxi-güedé. <sup>38</sup> Te diu-ni duca<sup>n</sup> càda-dé cuèi dava niú, àdi tacuíhndá-gá, te núu ñá túú xidí-güedé òré nasáá-dé, te cue téé xínu cuechi-á<sup>n</sup> ïo váha tnahá-güedé. <sup>39</sup> Te núu dìcò ï<sup>n</sup> téé cùu xítohó ï<sup>n</sup> vehe xíní-dé ná òré quíhu ñadúhú vehe-dé ñá, te quihì iní-dé te vá cùdú-dé, te vá dáñá-dě nacaá<sup>n</sup>-güedé yuyèhe-dé quíhu-güedé duhu-güedě. <sup>40</sup> Te nchòhó tucu nchaa-ni nduu quihì iní-ndó cùndecu túha-ndo, chi na cuáhá<sup>n</sup> nduu ñã túú yìhì iní-ndó, te quixi tucu yúhú Téé cùu ñaní tnáhá-ndó nchàa-ndo —cachí-gá xáha<sup>n</sup>-gã xii-güedé.

*Cue téé quide ndáá ndihì cue téé ñá túú quide ndáá (Mt. 24:45-51)*

41 Te té Pèlú ní xicá<sup>n</sup> tnúhú-dě núú Jèsús, te xǎha<sup>n</sup>-dě:

—Mèstrú, ¿te tnúhu ní cáhá<sup>n</sup>-n-ǎ<sup>n</sup> cùu-xi mee-ni cuendá nchúhú ǎ<sup>n</sup> cuendá nchaa ñáyiu? —càchí-dé xǎha<sup>n</sup>-dě xii-gá.

42 Te Jèsús ní xáha<sup>n</sup>-gǎ:

—Càhá<sup>n</sup>-í cuendá ñáyiu quide váha dàtná quidé ì<sup>n</sup> téé tàxi tnuní ñáhá xii cue ñáyiu xìnu cuechi ndecu vehe patróó<sup>n</sup>-xi, chi téé-á<sup>n</sup> ìo váha tècú tnùnì-dé, te quide-dé nchaa nàcuáa càhá<sup>n</sup> patróó<sup>n</sup>-dě, te dàcaxi-dé cue ñáyiu xìnu cuechi oré tàú-xi caxí-yu.

43 Te núu duca<sup>n</sup> quide váha téé tàxi tnuní ñáhá xii cue ñáyiu xìnu cuechi-á<sup>n</sup> ñá, te ìo váha tnàhá-dé òré násáá patróó<sup>n</sup>-dě nùu ndéé cuáhá<sup>n</sup>-dé. 44 Te na càchí tnúhu ndáá-í xii-ndo sǎ tée quide ndáá táxí tnùnì ñáhá xii cue ñáyiu xìnu cuechi-á<sup>n</sup> cǔñaha-ñǎ patróó<sup>n</sup>-dě xii-dé sá ncháándì túhú-ñǎ sá ndécú ndìhì-dé quindaha-dě. 45 Dico núu téé tàxi tnuní ñáhá xii cue ñáyiu xìnu cuechi-á<sup>n</sup> ná càni iní-dé sá cùyàa patróó<sup>n</sup>-dě vá násáá ndìhì-ni-dé ñá, te ngüíta-dé cani-dé nchaa ñáyiu xìnu cuechi, cuèi téé cuèi ñadihí, te ngüíta-dé caxi-dé coho-dé, te dàxìni-dé méé-dě, 46 te nduu ñà túú yìhì iní-dé te nasáá patróó<sup>n</sup>-dě, te dandòho ñaha patróó<sup>n</sup>-dě-á<sup>n</sup> xii-dé, te daquìhì<sup>n</sup> ñáhá-dě xii-dé núú ndécú ñáyiu ñá túú ní quide ndáá.

47 'Te dava cue téé xìnu cuechi xiní-güedé nàcuáa cuiní patróó<sup>n</sup>-güedě cada-güedé te ñá túú quide-güedé, te ni ñà túú cuiní-güedé cundecu túha-güedé cundetu-güedé patróó<sup>n</sup>-güedě, te nchaa cue téé duca<sup>n</sup> xìquide dandòho ñaha patróó<sup>n</sup>-güedě, chi ñáni vìhì-güedé. 48 Te dava cue téé xìnu cuechi

ñá túú xìní-güedé nàcuáa cuìní pàtróó<sup>n</sup>-güedě cada-güedé, te ní quide-güedé sá néñùú-güedé ì<sup>n</sup> sá ñà túú tàú-güedé cada-güedé ñá, te cue téé-á<sup>n</sup> sacú-gá dandòho ñaha patróó<sup>n</sup>-güedě, chi sacú-gá ñáni-güedé. Te ñáyiú cùtnuní iní-xi nàcuáa cuìní Yă Ndiõxí cadá-yu, te ñiu-ni duca<sup>n</sup> tàú-yu cadá-yu nàcuáa cuìní-gá. Te ñáyiú vâi-gá tècú tnùní nàcuáa càhá<sup>n</sup>-gá, te ñiu-ni duca<sup>n</sup> vâi nchaa sá càhá<sup>n</sup>-gá tàú-yu cadá-yu.

*Ñá túú cùu ì<sup>n</sup>nuu ñáyiú  
(Mt. 10:34-36)*

49 Te yúhú véxi-í ñuyíú-a cuendá cutnùní iní ñáyiú nàcuáa cada ñaha Yă Ndiõxí xií-yu, ÿte cuìní-í sá ndìhi-ni cada-gá nàcuáa sàni iní-gá! 50 Te yúhú ío vâi tnúhu sàni iní-í, ÿchi sáá nduu te ío ndoho-í, te ñiu-ni xíá<sup>n</sup> cuhu<sup>n</sup> iní-í ndéé ná sáá nduu dùca<sup>n</sup> yáha-í! 51 Te nchòhó vá cání ìní-ndó sã yúhú véxi-í ñuyíú-a te cundecu ndìhi tnàha váha-ni ñáyiú, te ñáhá chi da ngúíta-yu vá cúú ì<sup>n</sup>nuú-yu cundecú-yu. 52 Te ndéé není vitna ngúíta ñáyiú vá cúú ì<sup>n</sup>nuú-yu cundecú-yu, te na càda-o cuendá te núu úhú<sup>n</sup> ñáyiú xĩndecu ì<sup>n</sup>-ni vèhe, te vá cúú ì<sup>n</sup>nuu-gá-yu, chi úní-yu ndatnúhu-yu te nàá-yu ndìhi úú-gá-yu, àdi ñáyiú úú-á<sup>n</sup> ndatnúhu-yu te nàá-yu ndìhi ñáyiú úní-á<sup>n</sup>. 53 Te dava cue téé cùu tátá vá cúú ì<sup>n</sup>nuu-gá-güedé ndìhi déhe ducu<sup>n</sup>-güedé, te ni dàva cue ñáyiú cùu náná vá cúú ì<sup>n</sup>nuu-gá-yu ndìhi déhe yòcò-yu, te ni sãnu-yu vá cúú ì<sup>n</sup>nuu ndìhi-gá-yu. Te duca<sup>n</sup> càdá-yu chi davá-yu quĩndáá iní ñáhã-yu xii-í,

te davá-yu vá quìndáá iní ñáhă-yu —càchí-gá xáha<sup>n</sup>-gă xii-güedé.

*Ñáyiu cùtnuní iní-xi nàcuáa quìde-xi ñuyúú ndihí andiu*

*(Mt. 16:1-4; Mr. 8:11-13)*

<sup>54</sup> Te Jèsús ní xáha<sup>n</sup>-gă xii nchaa ñáyiu xĩndecu-á<sup>n</sup>:

—Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sã cúú<sup>n</sup> dăú, te diu duca<sup>n</sup> ndisa quide-xi. <sup>55</sup> Te òré ná quène táchí ndàa xio datni nacuáa quène nchíanchii, te càchí-ndó sã ïo cada ihni-xi, te diu duca<sup>n</sup> ndisa quide-xi. <sup>56</sup> Te nchòhó ïo váha cùtnuní iní-ndó nàcuáa quide-xi andiu ndihí ñuyúú, ¿te ná cuendá quidé-ní-ndó sã ñă tècú tnùní-ndó nàcuáa quide Yá Ndiöxí vitna? Te sá dúcá<sup>n</sup> quide-ndo-á<sup>n</sup> ïo dândahú-ndó mée-ndo sá ïo váha cùtnuní iní-ndó, chi ñă ndàá sá cùtnuní iní-ndó.

*Nducu-o nàcuáa nucúndecu ndihí váha-o ñáyiu cùu úhú iní ñáhá*

*(Mt. 5:25-26)*

<sup>57</sup> Te nchòhó, ¿ná cuendá ñă túú dândixi túu-ndo iní-ndó càda-ndo mee-ni sá văhă sá tàú-ndó càda-ndo-í? <sup>58</sup> Te núu ïó ï<sup>n</sup>-ndo ñi sacá<sup>n</sup> cuéchi ñáyiu cuendá-ndó cuendá ï<sup>n</sup> sá ñi quide-ndo, te cuáhá<sup>n</sup>-ndó ndihí-yu núu tée cùchiu<sup>n</sup>, te ñini ñùhu-ndo ndihí-yu ichi, te nducu-ndo nàcuáa cada-ndo nàcáhá<sup>n</sup> cáhnú iní tnáhá-ndó ndihí-yu cuendá sá vă cándèca ñaha-gá-yu quíhí<sup>n</sup> núu tée cùchiu<sup>n</sup>, chi núu duca<sup>n</sup> na càdá-yu te tée cùchiu<sup>n</sup>-á<sup>n</sup> nachihí ñaha-dě ndaha cue tée cùu poleciá, te cue tée-á<sup>n</sup> chihí ñaha-güedě vecaá xii-ndo. <sup>59</sup> Te na càchí tnúhu-í xii-ndo sã nùu na ngàva-ndo vecaá,

te vá cǎcu-ndo te núu vá náchǎhu-ndo nchàa sá  
táu-ndó —càchí-gá xáha<sup>n</sup>-gǎ xii-yu.

## 13

### *Xìni ñuhu-xi natuha-o ichi Yá Ndiöxí*

<sup>1</sup> Te diu-ni òré-á<sup>n</sup> ñi ngúnutñi ñi<sup>n</sup> úú ñáyiú núú  
Jèsús cáni-yu cuèndú núú-gǎ nàcuáa ní quide ñaha  
té Pilatú xii cue téé distritú Galileá cue téé ní  
sahni quiti nduu táhú Yá Ndiöxí, te mei òré ní  
sahni-güedé cue quiti-á<sup>n</sup> ñi táuchíú<sup>n</sup> tǎ Pilatú cue  
sandádú-dé ní sahani-güedé cue téé Galileá-á<sup>n</sup>, te ní  
xica níñi-güedé núú ñúhú ndiñi níñi cue quiti-á<sup>n</sup>, te  
ní nadácánuu-xi. <sup>2</sup> Te Jèsús ní xáha<sup>n</sup>-gǎ xii-yu:

—Te núu nchòhó sání iní-ndó sǎ sà dúcá<sup>n</sup> ñi  
yáha cue téé distritú Galileá-á<sup>n</sup> te cùu-güedé cue téé  
ndècu vihi-gá cuèchi-xi dàcúxí cuè téé ñúú-güedé  
ñá. <sup>3</sup> Te na càchí tnúhu-í xii-ndo sǎ ñǎhá. Te  
núu nchòhó vá ndíxí cuèchi iní-ndó cuèndá nchaa  
sá cuèhé sá dúhá quide-ndo ndecu-ndo ña, te  
tnàhá nchaa nchòhó cuíta nihnu-ndo te núu vá  
nátñi-ndo ichi Yá Ndiöxí. <sup>4</sup> Te núu nchòhó sání  
iní-ndó sǎ ñáyiú sáhú<sup>n</sup> úní ní xihí ní táú ñáhá vèhe  
ducú<sup>n</sup> Silòé ío-gá ndécú cuèchi-yu dàcúxí nchaa  
ñáyiú xíndecu ñúú Jerusalén ñá, <sup>5</sup> te na càchí tnúhu  
tucu-í xii-ndo sǎ ñǎhá. Te núu nchòhó vá ndíxí  
cuèchi iní-ndó cuèndá nchaa sá cuèhé sá dúhá  
quide-ndo ndecu-ndo ña, te tnàhá nchaa nchòhó  
cuíta nihnu-ndo te núu vá nátñi-ndo ichi Yá Ndiöxí  
—càchí-gá xáha<sup>n</sup>-gǎ xii-yu.

### *Yutnu ngüxí ñá túú cùu<sup>n</sup> sávidí-xi*

<sup>6</sup> Te Jèsús ní cani tucu-gá ñi<sup>n</sup> cuèndú núú-yu  
nàcuáa tecú tnùní-yu tnúhu-gá, te xáha<sup>n</sup>-gǎ:

—Ï<sup>n</sup> tée nùtníi ï<sup>n</sup> yutnu ngǔxí núú ñúhú-dě, te cuáhá<sup>n</sup> ndéhé-dě nǔu ní cuu<sup>n</sup> sávidí-xi ni cùu, te ni ï<sup>n</sup> ñá túú ní cùu<sup>n</sup>. <sup>7</sup> Te ní xáha<sup>n</sup> tée-á<sup>n</sup> xii tée ndèè ñuhu-dé: “Nàha-n sá vitna ní cuu úní cuíá quíxí còto-í yutnu ngǔxí-a te ñá túú xìní-í ni ï<sup>n</sup> sávidí-xi. Te quehdé-n vitna, chi àú<sup>n</sup> nǎ cuu nùtníi-xi quide tneñu-xi núú ñuhu-á<sup>n</sup>”, cǎchí-dé xǎha<sup>n</sup>-dě xii tée ndèè ñuhu-dé-á<sup>n</sup>. <sup>8</sup> Te tée ndèè ñuhu-á<sup>n</sup> ní xáha<sup>n</sup>-dè: “Pàtróó<sup>n</sup>, daña na cuihnu-xi cuíá vitna-ná, te na nàdatayá-í ñuhu núú sàhá-xi, te chihi-í sahá<sup>n</sup>. <sup>9</sup> Te duca<sup>n</sup> te cudana cuu<sup>n</sup> sávidí-xi, àdi núu ñá túú ní cùu<sup>n</sup> sávidí-xi ña te téhndé-nǎ-xi”, cǎchí-dé xǎha<sup>n</sup>-dě xii pàtróó<sup>n</sup>-dè —cǎchí-gá xáha<sup>n</sup>-gǎ xii-yu.

*Jèsús quidé tǎtna-gá ï<sup>n</sup> ñadìhí ní nduu cueyi sǎtá-xi nduu ndètatú ñáyiu*

<sup>10</sup> Te ï<sup>n</sup> xito cùu-xi nduu ndetatú ñáyiu, te yìhí Jesús ï<sup>n</sup> veñúhu dǎnehé-gá ñáyiu. <sup>11</sup> Te xíá<sup>n</sup> ndécú ï<sup>n</sup> ñadìhí ní cuu sáhú<sup>n</sup> úní cuíá sǎ cùhú-a<sup>n</sup> yìhí ñaha espíritú cùndìhí yucu ñávǎha xii-a<sup>n</sup>, te xíá<sup>n</sup> ní ndada cueyi-xi sǎtá-a<sup>n</sup>, te ñá dáñá-gǎ-xi nucúnutníi ndáá-a<sup>n</sup>. <sup>12</sup> Te òré ní xiní ñáhá Jèsús xii-a<sup>n</sup> te ní cana ñaha-gǎ, te xáha<sup>n</sup>-gǎ:

—Yòhó ñaha cùhú, ndúha-n cuèhé tnàhá-n —cǎchí-gá xáha<sup>n</sup>-gǎ xii-a<sup>n</sup>.

<sup>13</sup> Te ní dǎcàá-gá ndaha-gá ní tendaha ñàha-gá xii-a<sup>n</sup>, te òré-ni-á<sup>n</sup> ní ndúha-a<sup>n</sup> te ní nucúnutníi ndáá-a<sup>n</sup>, te ní ngúíta-a<sup>n</sup> ní cachí-a<sup>n</sup> sá ïo cǎhnu cuu Yá Ndiǒxí. <sup>14</sup> Dico tée tàxi tnuní veñúhu ní cudéé<sup>n</sup>-dè sá dúcá<sup>n</sup> ní quide Jèsús ní quide tǎtna-gá ñaha cùhú-á<sup>n</sup> nduu ndètatú-yu, te ní xáha<sup>n</sup>-dè xii-yu:



—Ío ínú nduu tàú-ó càda chiu<sup>n</sup>-o, te ndědani càa nduu-á<sup>n</sup> quixi-ndo cùtátna-ndo, dico ñá díú ndùu cuu-xi nduu ndetatú-ó —càchí-dé xáha<sup>n</sup>-dě xií-yu.

<sup>15</sup> Te ní xáha<sup>n</sup> Jèsús:

—Nchòhó chi ío dándahú-ndó mềe-ndo sá quidé ndää-ndó dico ñá ndää sá quidé ndää-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetatú-ó ă<sup>n</sup>? <sup>16</sup> Te ñadìhí-a cùu-a<sup>n</sup> ñaní tnáhá ndi Abrahám, te dícó-ni sá yùcu ñávãha quide duha cuhú-a<sup>n</sup> ní cuu sáhú<sup>n</sup> úní cuíá, ¿te náa ñá túú xìni ñuhu-xi cutátna-a<sup>n</sup> cuěi cùu-xi nduu ndetatú-ó ă<sup>n</sup>? —càchí-gá xáha<sup>n</sup>-gã xii-dé.

<sup>17</sup> Te sá dúcá<sup>n</sup> nĩ cáhá<sup>n</sup> Jèsús, núu nchaa cue tée cùu úhú iní ñáhá xì-gá ní cucaha<sup>n</sup> núú-güedě, dico nchaa dava-gá ñáyiu chi xícudí iní-yu xĩndéhě-yu nchaa sá vã yõ tnáhí ndàcu cada quide-gá.

*Cuèndá ndíquí<sup>n</sup> yutnu nàni mostázá*

*(Mt. 13:31-32; Mr. 4:30-32)*

<sup>18</sup> Te ní xáha<sup>n</sup>-gã xií-yu:

—Na càni-í ì<sup>n</sup> cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiõxí xii-ndo. <sup>19</sup> Ì<sup>n</sup> tée ní quehe<sup>n</sup>-dé ndíquí<sup>n</sup> yutnu nàni mostázá te nèhe-dé cuáhá<sup>n</sup> ní sacá<sup>n</sup>-dé núú ñúhú-dě te ní xínu-xi, te ní sahnu-xi ní cuu dùcú<sup>n</sup>-xi, te cue quiti ndàva núú tàchí cádũha-güedi tacá-güedi núú díté-xi —càchí-gá xáha<sup>n</sup>-gã xií-yu.

*Nàcuáa quide levadurá*

*(Mt. 13:33)*

<sup>20</sup> Te ní xáha<sup>n</sup> tucu Jèsús xií-yu:

—Te na càchí tnúhu tucu-í xii-ndo nàcuáa cada tucu Yá Ndiõxí òré ndíhu ndaha ñàha-gá xii-ndo.

21 Ìn ñadìhí ní quehe<sup>n</sup>-a<sup>n</sup> levadùrá ní chihi-a<sup>n</sup> úní arròbá yuchi trùú, te levadùrá-á<sup>n</sup> ñí quide-xi ní ndaa ñihí yusa<sup>n</sup>-á<sup>n</sup> —càchí-gá xáha<sup>n</sup>-gã xií-yu.

*Yuyèhe cuiñi*  
(Mt. 7:13-14, 21-23)

22 Te ichi ñùhu Jesús cuáhá<sup>n</sup>-gá ñuú Jerusalén, te nchaa ñuú náhnú, ndìhi nchaa ñuú lĩhli ta yãha-gá duca<sup>n</sup> ta dànehé-gá ñáyiu tnúhu-gá cuáhá<sup>n</sup>. 23 Te ìn ñuú-á<sup>n</sup> ñí xáha<sup>n</sup> ìn téé xii-gá:

—Mèstrú, cuíní-í cǎcǎ<sup>n</sup> tnúhu-í ìn tnúhu núú-n, ¿ndáá sá ïo sacú ñáyiu nánihí tàhú-ǎ<sup>n</sup>? —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gã xii-dé ndìhi nchaa ñáyiu:

24 —Cada-ndo sǎ nánihí tàhú-ndó, te tñi-ndo ìchi Yá Ndióxi, te ichi-gá-á<sup>n</sup> cúú-xí dàtná ìn yuyèhe cuiñi, te càchí tnúhu-í xii-ndo sǎ ïo cuéhé ñáyiu cachí iní-yu quíhu-yu yuyèhe cuiñí-á<sup>n</sup> dico vá ndácũ-yu. 25 Te na càni tucu-í ingá cuèndú núú-ndó nàcuáa tecú tnùní-ndó tnũhu càhá<sup>n</sup>-í. Te òré ná ndàcuiñí téé cùu xítóhó vehe, te nacadí-dé yuyèhe, te nchaa nchòhó ñáyiu na quèndóo quehé dacàsa<sup>n</sup>-ndo yuyèhe, te quesaha-ndo cũñaha-ndo xii-dé: “Tǎtá, nacaá<sup>n</sup> yuyèhe na quíhu-ndí”, quesaha-ndo cũñaha-ndo xii-dé. Dico téé cùu xítóhó vehe-á<sup>n</sup> cũñaha-dě xii-ndo: “Ñá túú xìní-í nchòhó ndéé ñáyiu cùu-ndo”, duha cúñaha-dě xii-ndo.

26 Te dàtnùní ngúita nchòhó cúñaha-ndo xii-dé: “Nchúhú ní xexi ndìhi ñaha-ndí, te ní xihi ndìhi ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cũñaha-ndo xii-dé.

27 Dico cachí tucu téé cùu xítóhó vehe-á<sup>n</sup> cũñaha-dě xii-ndo: “Sa ní cachí-í sá ñà túú xìní-í ndéé

ñáyiú cùu-ndo. Te chí xócuìñí nchòhó ñáyiú ndècu ichi cuehé ichi duha núú ndècu-í”, quesaha-dě cúñaha-dě xii-ndo. <sup>28</sup> Te na sàá nduu dùca<sup>n</sup> cada-xi te quini-ndó tē Abrahám, ndihí té Isàác, ndihí té Jàcób, ndihí nchaa cue téé ní xóo cáhá<sup>n</sup> tnúhu Yá Ndiöxí, te nchaa cue téé-á<sup>n</sup> ndécú-güedě núú ndécú-gă táxí tnùnigá, te nchòhó quee tihú-ndó nũú-gă sá tnúhu ñá túú ní cuini cada ndáá, te dàvá-á<sup>n</sup> ndăhyú-ndó te cuu rúhñú-nă núhu-ndo sã sätú iní-ndó cuendá sá ndóhó-ndó. <sup>29</sup> Te dàvá-á<sup>n</sup> quihu nchaa ñáyiú ndi cù mí xio ñuyú núú ndécú Yá Ndiöxí táxí tnùnigá caxí-yu ndihigá, te cundecú-yu ndihigá. <sup>30</sup> Te dava ñáyiú nchicú<sup>n</sup> ñá túú cunu ndecu ichi Yá Ndiöxí vitna, ñáyiú-á<sup>n</sup> sãá nduu te ío cunú-yu. Te dava ñáyiú cunu ndecu ichigá vitna, ñáyiú-á<sup>n</sup> sãá nduu te vá ïogá cunú-yu —càchí-gá xáha<sup>n</sup>-gă xii-yu.

*Jèsús ndăhyú-gá cuendá ñáyiú ñuu Jerusàlén  
(Mt. 23:37-39)*

<sup>31</sup> Te diu-ni nduu-ă<sup>n</sup> ñi quexìo ï<sup>n</sup> úú cue téé cùu farisèú núú ndécú-gă, te xáha<sup>n</sup>-güedě xii-gá:

—Quee-n ìha quíhí<sup>n</sup>-n nũu ndèé quíhí<sup>n</sup>-n, chi téé cùu Herodés cuini-dé cahni ñaha-dě xii-n —càchí-güedě xáha<sup>n</sup>-güedě xii-gá.

<sup>32</sup> Te Jèsús ní xáha<sup>n</sup>-gă:

—Chí cuáhá<sup>n</sup> te cúñaha-ndo xìi téé nèhe mañá-á<sup>n</sup> sã càchí-í sá ná cùndedóho váha-dé ï<sup>n</sup> tnúhu càhá<sup>n</sup>-í, chí cùmání ï<sup>n</sup> úú-gá nduu cundecu-í xocàni-í nchaa espíritú cùndihí yucu ñávãha yihí ñaha xii ñáyiú, te cada tátna-í nchaa dava-gá ñáyiú cùhú, te duca<sup>n</sup> te ndihí chiú<sup>n</sup>-í, duha cúñaha-ndo xìi-dé. <sup>33</sup> Dico dacuití sã cùhù<sup>n</sup>-í ichi ï<sup>n</sup> úú-gá nduu, te duca<sup>n</sup> te

sáa-í núú quíhí<sup>n</sup>-í, chi vá cúú tnàhí cuú ì<sup>n</sup> téé càhá<sup>n</sup> tnúhu Yá Ndiöxí ingá ñúú, chi mei ñùú Jerusalén cuú-güedé —càchí-gá xáha<sup>n</sup>-gã xii-güedé.

<sup>34</sup> Te ní xáha<sup>n</sup>-gã xii ñáyiú ñúú Jerusalén:

—Nchòhó chi sàhni-ndo nchaa cue téé càhá<sup>n</sup> tnúhu Yá Ndiöxí, cue téé ní tendaha-gã véxi, te mee-ni ndíhi yúú sáhní-ndó-güedé. ¡Te titní xito ní cuiní-í nadatàcá ñáhà-í xii-ndo dàtná nádàtácá ì<sup>n</sup> nchuxi cuè déhe-di sàquíhi-güedi xití ndíxí<sup>n</sup>-di, dico ñá ní cuiní-ndó, te duca<sup>n</sup>-ni sàni iní-í ndéé vitna! <sup>35</sup> Te chí cündedóho tucu ingá tnúhu na càhá<sup>n</sup>-í-a: Yá Ndiöxí dañá ñàha-gá xii-ndo. Te na càchí tnúhu tucu-í xii-ndo sã vã quini ñáhá-gã-ndó xii-í, dico sáá nduu te quini ñáhá tucu-ndo, te nduu-ã<sup>n</sup> cachí-ndó sã ïo càhnu cuu yúhú Yáá ní tendaha Dütú Ndiöxí véxi ñuyíú-a —càchí-gá xáha<sup>n</sup>-gã xii-yu.

## 14

### *Jèsús quidé tãtna-gá ì<sup>n</sup> téé ñùhu cuiñu*

<sup>1</sup> Te duha ní cuu ì<sup>n</sup> nduu, nduu ndètátú ñáyiú chi ì<sup>n</sup> téé cùu fariséú cùnùu ní cáhá<sup>n</sup>-dé Jèsús vehe-dé caxi-gá, te cue téé ndècu vehe-dé ndéhé-güedé ñùu nása cada-gá. <sup>2</sup> Te xía<sup>n</sup> ndécú tnàhá ì<sup>n</sup> téé cùhú ñúhú-dé cuiñu. <sup>3</sup> Te Jèsús ní xicá<sup>n</sup> tnúhú-gã núú cuè téé dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi núú cuè téé cùu fariséú, te xáha<sup>n</sup>-gã:

—¿Cuu cada tátna-o ì<sup>n</sup> ñáyiú cùhú nduu ndètátú-ó ã<sup>n</sup> ñáhá? —càchí-gá xáha<sup>n</sup>-gã xii-güedé.

<sup>4</sup> Dico cue téé-án ñà túú tnàhí ni cãhá<sup>n</sup>-güedé. Te ní dácaá-gá ndaha-gá ní tendaha-gã téé cùhú-án

nĩ quide tátna ñaha-gă xii-dé, te ní xáha<sup>n</sup>-gă sá ná nùhú-dé vehe-dé. <sup>5</sup> Te ní xícá<sup>n</sup> tnùhú-gă núú nchàa cue téé-á<sup>n</sup>, te xáha<sup>n</sup>-gă:

—¿Te núu nchòhó ná ngáúnhnu ì<sup>n</sup> búrru-ndo àdi ì<sup>n</sup> ndicutu-ndo déhvá, te vá ná tàva ndíhi-ni-ndo-di cuèi cùu-xi nduu ndetatú-ndó-ă<sup>n</sup>? —càchí-gá xáha<sup>n</sup>-gă xii-güedé.

<sup>6</sup> Te ñá túú ní ñhí-güedě tnúhu na dànhocáva-güedé.

### *Ñáyiu càhá<sup>n</sup>-yu quíhí<sup>n</sup> vico tnándaha*

<sup>7</sup> Te ndèhe Jesús nàcuáa xíquide nchaa ñáyiu ndècu vico sá sũúni nĩ nacáxi-yu xilé sácõo nchihi cue téé cùnuu-gá conchihí-yu òré cuánguìhú-yu mèsá caxí-yu, núu ní xáha<sup>n</sup>-gă xii-yu:

<sup>8</sup> —Òré ná càhá<sup>n</sup> ñáhá ì<sup>n</sup> ñáyiu xii-ndo ì<sup>n</sup> vico tnándaha, te vá cóó-ndó núú xilé sácõo cue téé cùnuu-gá, chi núu duca<sup>n</sup> na càda-ndo, te cudana quexìo dava-gá ñáyiu cùnuu-gá dàcúúxí nchòhó. <sup>9</sup> Te ñáyiu ní càhá<sup>n</sup> ñáhá xii-ndo-á<sup>n</sup> quixí-yu te cúñàhá-yu xii-ndo: “Chí cuãñaha xilé núcõo nchihi-ndo-ă<sup>n</sup> ná cònchihi ñáyiu ní quexìo-a”, quesàhá-yu cúñàhá-yu xii-ndo. Te cuìní-ndó ñáhá cuèi cùcaha<sup>n</sup> núú-ndó ndàcuíñí-ndó quíhí<sup>n</sup>-ndó ngõo-ndo núú xilé xĩnutnì ndéé núú nĩ ndíhi-ná ndàa sátá-xi. <sup>10</sup> Te yúhú càchí-í sá òré ná càhá<sup>n</sup> ñáhã-yu xii-ndo, te ngõo-ndo núú xilé xĩnutnì ndéé núú nĩ ndíhi-ná ndàa sátá-xi chí cuendá òré ná quèxio ñáyiu ní càhá<sup>n</sup> ñáhá xii-ndo, te cúñàhá-yu xii-ndo: “Nchòhó cue ñáyiu càhá<sup>n</sup> ndíhi-í, chí yãha núú xilé sácõo cue téé cùnuu-gá coo-ndo”, duha cúñàhá-yu xii-ndo. Te

duca<sup>n</sup> te cada nínu ñaha nchàa ñáyiú yìhi ndihì-ndo mesá. <sup>11</sup> Te nchaa ñáyiú na càda nínu mee-xi, te ñáyiú-á<sup>n</sup> ñà túú cùu nínu-yu, te nchaa ñáyiú ñá túú quìde nínu mee-xi, ñáyiú-á<sup>n</sup> cúú ññu-yu —càchí-gá xáha<sup>n</sup>-gã xií-yu.

<sup>12</sup> Te dàtnùní ní xáha<sup>n</sup>-gã xii téé ní cáhá<sup>n</sup> ñáhá xii-gá:

—Te yòhó òré cuiní-n càda-n ì<sup>n</sup> vico, te vá càhá<sup>n</sup>-n mèe-ni cue téé càhá<sup>n</sup> ndihì-n, ni cuè ñaní-n, ni cuè ñáyiú cùu ñaní tnáhá-n, ni cuè ñáyiú cuica ndècu yatni ndihì-n, chi ñáyiú-á<sup>n</sup> duca<sup>n</sup> càdá-yu ì<sup>n</sup> nduu cáhá<sup>n</sup> ñáhã-yu xii-n te ndéyãhu-ni sá ñí quidè-n-yu.

<sup>13</sup> Te ñáhá chi òré ná càda-n ì<sup>n</sup> vico, te cáhá<sup>n</sup>-n ñáyiú ndàhú, ndihì ñáyiú ñá cúú càca, ndihì ñáyiú yacua, ndihì ñáyiú cuàá. <sup>14</sup> Te núu duca<sup>n</sup> na càda-n, te cuu-xi ì<sup>n</sup> sá vãha xii-n, chi ñáyiú-á<sup>n</sup> vã ñihí-yu nacoto ñáhã-yu xii-n, dico na cùú-n te sáá nduu ndòto-n ndihì nchaa ñáyiú ní quide ndáá ní xíndecu ichi Yá Ndiõxí, te dàvá-á<sup>n</sup> taxi-gá sá ndúú tàhú-n —càchí-gá xáha<sup>n</sup>-gã xii-dé.

*Nàcuáa xíquide ñáyiú òré càhá<sup>n</sup> ñáhá ì<sup>n</sup> téé cada vico*

*(Mt. 22:1-10)*

<sup>15</sup> Te sá dúcá<sup>n</sup> ñí cáhá<sup>n</sup> Jèsús ní tecú dóho cue téé yìhi mesá-á<sup>n</sup>, núu ní xáha<sup>n</sup> ì<sup>n</sup>-dé xii-gá:

—Ío váha táhú nchaa ñáyiú na càxi nchaa sá cuãha ñaha Yã Ndiõxí nduu na sàá-yu cundecú-yu núu ndécú-gã táxi tnùnì-gá —càchí-dé xáha<sup>n</sup>-dẽ xii-gá.

<sup>16</sup> Te Jèsús ní xáha<sup>n</sup>-gã xii-dé:

—Ì<sup>n</sup> téé quide-dé vico, te ní dátècú tnúhu-dé cuéhé víhí ñáyiú quíhí<sup>n</sup>-yu caxí-yu. <sup>17</sup> Te òré sa

ní cuu-ná sá cáxī-yu, te ní xáha<sup>n</sup>-dě xii téé xīnu cuechi núú-dě sá quíhí<sup>n</sup>-dé cúñaha-dě quíhí<sup>n</sup>-yu caxí-yu, chi sa ndècu túha nchaá sá cáxī-yu. <sup>18</sup> Dico nchaá-yu ní xáhă<sup>n</sup>-yu xii-dé sá ná cádá càhnu iní téé càhá<sup>n</sup> ñáhá-ă<sup>n</sup>, chi ñá túú cùyáchí-yu quíhí<sup>n</sup>-yu vico-á<sup>n</sup>. Te téé ní cáhá<sup>n</sup> ndihí téé xīnu cuechi-á<sup>n</sup> dīhna ní xáha<sup>n</sup>-dě: “Íchí ñí saa<sup>n</sup>-í ĩ<sup>n</sup> pedàsú ñuhu, te quíhí<sup>n</sup> ndéhé-í tnavíí, núu xǎ<sup>n</sup> càhá<sup>n</sup> ndàhú-í núú-n sǎ cúñaha-n xì téé càhá<sup>n</sup> ñáhá-ă<sup>n</sup> xii-í sá ná cádá càhnu iní-dé chi ñá túú cùyáchí-í”, càchí-dé xǎha<sup>n</sup>-dě. <sup>19</sup> Te ingá-dé ní xáha<sup>n</sup>-dě: “Ní saa<sup>n</sup>-í úhú<sup>n</sup> yùndá ndicutu sa xītu, te cue quiti-á<sup>n</sup> quíhí<sup>n</sup>-í coto ndeé-í-güedi vitna, núu xǎ<sup>n</sup> càhá<sup>n</sup> ndàhú-í núú-n sǎ cúñaha-n xì téé càhá<sup>n</sup> ñáhá-ă<sup>n</sup> xii-í sá ná cádá càhnu iní-dé chi ñá túú cùyáchí-í”, càchí-dé xǎha<sup>n</sup>-dě. <sup>20</sup> Te ingá tucu-dé ní xáha<sup>n</sup>-dě: “Íchí ñí tnándaha-í ñuu xǎ<sup>n</sup> vá cùyáchí-í quíhí<sup>n</sup>-í”, càchí-dé xǎha<sup>n</sup>-dě. <sup>21</sup> Te òré ní nasáá téé xīnu cuechi-á<sup>n</sup>, te ní nacani tnúhu-dé núú patróó<sup>n</sup>-dě nchaá nàcuáa ní xáhă<sup>n</sup>-yu. Te ní cudéé<sup>n</sup> tēe cùu patróó<sup>n</sup>-ă<sup>n</sup>, te ní xáha<sup>n</sup>-dě xii téé xīnu cuechi núú-dě-á<sup>n</sup>: “Yáchí cuàhá<sup>n</sup> nanducu-n nchàa ñáyiú ndàhú, ndihí nchaá ñáyiú ñá cúú càca, ndihí nchaá ñáyiú yacua, ndihí nchaá ñáyiú cuàá, te nděni ní cuu na nàníhí-n-yu te candècá-n-yu quixi”, càchí-dé xǎha<sup>n</sup>-dě. <sup>22</sup> Te sátá ñí nasáá téé xīnu cuechi-á<sup>n</sup>, te ní xáha<sup>n</sup>-dě xii patróó<sup>n</sup>-dě: “Patróó<sup>n</sup>, sa ní guide-í chīu<sup>n</sup> ní táhú-n, dico ndècu-gá núú cóo-yu”, càchí-dé xǎha<sup>n</sup>-dě. <sup>23</sup> Te téé cùu patróó<sup>n</sup>-dě-á<sup>n</sup> ñí xáha<sup>n</sup>-dě: “Cuàhá<sup>n</sup> tucu nděni ní cuu te cada yica-n na quixí-yu quíhu-yu cuèndá ná chítú vehe-í. <sup>24</sup> Te na càchí tnúhu-í xii-n sǎ ñí ĩ<sup>n</sup> ñáyiú ní cáhá<sup>n</sup>-í dīhna vá cúú-gǎ caxí-yu

sá sà ní quide túha-í caxí-yu ni cùu”, cachí téé-án xáha<sup>n</sup>-dě xii téé xínu cuechi núú-dě —càchí-gá xáha<sup>n</sup>-gă xii téé-án.

*Ndoho-o cùndecu-o ichi Xítóhó Jesucristú*  
(Mt. 10:37-38)

<sup>25</sup> Te ío cuéhé ñăyiu nchìcú<sup>n</sup>-yu Jèsús, te ní xáha<sup>n</sup>-gă xií-yu:

<sup>26</sup> —Te núu dava nchòhó cuíní-ndó chìtnahá ñáhá-ndó xii-í, te cuu iní ñáhá ndisa-ndo. Te cuéi na dándoo-ndo tătă-ndó, ndìhi náná-ndó, ndìhi ñadihí-ndó, ndìhi déhe-ndo, ndìhi ñaní-ndó, ndìhi cúha-ndo, te cani iní-ndó sá cuéi na cùú-ndó sá cuèndá-í, te duca<sup>n</sup> te cuu ndisa-ndo cuè ñăyiu tnahá tnúhu ndìhi-í. <sup>27</sup> Te nchaa ñăyiu vá cànchícú<sup>n</sup> ni-hnu ñaha xii-í cuèndá sá yùhú-yu ndohó-yu dàtná ndoho-í, ñăyiu-án vă cúŭ-yu ñăyiu tnahá tnúhu ndìhi-í. <sup>28</sup> Te núu ì<sup>n</sup> nchòhó ná càni iní-ndó dàcaa-ndo ì<sup>n</sup> vehe ducú<sup>n</sup>, ¿te náa ñá díú díhna-gá cada cuèndá-ndó nŭu ndědau díhú<sup>n</sup> cuu, duca<sup>n</sup> te cutnùní iní-ndó nŭu tnahá díhú<sup>n</sup>-ndó càa vehe-án àdi ñáhá? <sup>29</sup> Chi núu vá dúcá<sup>n</sup> càda-ndo, te na ngüíta-ndo tàusaha-ndo te vá xínu cada-ndo, te nchaa ñăyiu na cùndehe ñaha xii-ndo, te cáhá<sup>n</sup> cuéhé-yu cuèndá-ndó. <sup>30</sup> Te cachí-yu: “Tée-án ní ngüíta-dé dácàa-dé ì<sup>n</sup> vehe te ñá ní ndàcu-dé xínu”, cachí-yu. <sup>31</sup> Àdi te núu ì<sup>n</sup> téé yìndaha ñaha xii ñăyiu cuíní-dé nàá-dé ndìhi ingá tucu téé yìndaha ñaha xii ñăyiu, ¿te náa ñá díú díhna-gá cada cuèndá-dé te núu ndacu-dé ndìhi úxí mĭl cue sandàdú-dé nàá-güedé, ndìhi ócò mĭl cue sandàdú ingá tucu téé yìndaha ñaha xii ñăyiu cùu úhú iní tnahá ndìhi-dé-ă<sup>n</sup>? <sup>32</sup> Àdi te núu xító-dé sá vă



ndácú-dě ñá, te òré vátá cùyàtni ñaha-gá téé cùu úhú iní tnáhá ndìhi-dé-á<sup>n</sup>, te tendaha-dě ì<sup>n</sup> téé quíhí<sup>n</sup>-dé quíhu-dé tnúhu ndàhú núú tǎe-á<sup>n</sup> cuendá sá vǎ nàá-güedé. <sup>33</sup> Te duha càhá<sup>n</sup>-í chi núu nchòhó vá cádá ndèe iní-ndó dàña-ndo nchaa sá ndécú ndìhi-ndo cuendá chitnahá ñáhá-ndó xii-í, te vá cúú-ndó cuè ñáyiú tnáhá tnúhu ndìhi-í.

*Ñí ñí nduu víxi<sup>n</sup>*  
(Mt. 5:13; Mr. 9:50)

<sup>34</sup> Te ñí<sup>n</sup> chi ío váha, dico núu na ndùu víxi<sup>n</sup>-xi, ¿te nása-gá cada-o nàndíhi-o te núu duca<sup>n</sup>-i? <sup>35</sup> Chi ñá túú-gǎ nándíhi-xi nì sá dàcá ñuhu, te nì sá dàcá sahá<sup>n</sup>, chi cuendá-nǎ dǎngoyo-o. Te nchaa nchòhó ñáyiú ní xíndedóho tnúhu ní cáhá<sup>n</sup>-í-a xini ñuhu-xi ío váha cuáha-ndo cuendá —càchí-gá xáha<sup>n</sup>-gǎ xii-yu.

## 15

*Cuendá ì<sup>n</sup> mběé qui<sup>n</sup> ní xíta*  
(Mt. 18:10-14)

<sup>1</sup> Te cue téé cuihna ìní-xi quide cobrá ñáhá xii ñáyiú cuendá impuèstú ndìhi cue dava-gá ñáyiú ndècu ichi cuehé ichi duha ní quexió-yu núu ndécú Jèsús cuendá cundedóho-yu tnúhu càhá<sup>n</sup>-gá.

<sup>2</sup> Te ní ngúíta cue téé cùu fariséú, ndìhi cue téé dàcuaha ñaha xii ñáyiú nchaa tnúhu ní chídó tnùnì ndíi Moisés xícáhá<sup>n</sup> cuèhé-güedé cuendá-gá, te càchí-güedé:

—Tée-a quèhe<sup>n</sup> cuendá-dé ñáyiú ndècu ichi cuehé ichi duha, te xèxi ndìhi ñaha-dé xii-yu —càchí-güedé xitnàha-güedé.

<sup>3</sup> Te Jèsús ní cani-gá ì<sup>n</sup> cuendú nàcuáa tecú tnùnì-güedé tnúhu-gá, te xáha<sup>n</sup>-gǎ xii-güedé:

4 —H<sup>n</sup> tée ndècu ì<sup>n</sup> ciendú mběé-dě, te ní xíta ì<sup>n</sup>-dì, te nchòhó sa cùtnuní iní-ndó nàcuáa cada téé-á<sup>n</sup>, chi dándóo-dé cúmídícó sǎhú<sup>n</sup> cúmí-dì ì<sup>n</sup> yucu, te cúnúndúcú-dě qui<sup>ti</sup> ní xíta xǎ<sup>n</sup> ndéé ndéé naníhí-dě-dì. 5 Te òré ní naníhí-dě-dì te ní dácáá-dě-dì chíó-dě ní docó-dé-dì sá cúdǐ<sup>í</sup> ìní-dé. 6 Te òré ní nasáá-dé vehe-dé, te ní dátàcá-dé nchaa cue téé càhá<sup>n</sup> ndìhì-dé, ndìhì nchaa ñáyiú ndècu yatni ndìhì-dé, te ní xáha<sup>n</sup>-dě: “Chí ná cúdǐ<sup>í</sup> ìní-ó vìtna, chi ní naníhì-í mběé-í qui<sup>ti</sup> ní xíta nì cùu”, cachí-dé xǎha<sup>n</sup>-dě xií-yu. 7 Te yúhú càchì-í sá ìo-gá cúdǐ<sup>í</sup> ìní Yǎ Ndiǒxí ndìhì cue espíritú xínú cuèchi núú-gǎ nùu ì<sup>n</sup> ñáyiú ndècu ichi cuehé ichi duha na ndìxi cuéchi iní-yu cuèndá nchaa sá ñà túú vǎha quidé-yu ndècú-yu te tnií-yu ichi-gá, dàcúúxí cùmídícó sǎhú<sup>n</sup> cúmí ñáyiú sa ní tuha ichi-gá, chi ñà túú-gǎ xíní ñùhu-xi ndìxi cuéchi iní-yu chi sa ndècú-yu ichi-gá —càchì-gá xáha<sup>n</sup>-gǎ xii-güedé.

### *Cuèndá díhú<sup>n</sup> nǐ xíta*

8 Te ní cani Jèsús ìngá cuèndú núú-güedě, te xáha<sup>n</sup>-gǎ:

—H<sup>n</sup> ñadìhì ndécú ndìhì-a<sup>n</sup> úxí díhú<sup>n</sup> cuèxí<sup>n</sup>, te ní dácúíta-a<sup>n</sup> ì<sup>n</sup> te ní teñuhú-a<sup>n</sup> iti, te ní ngüíta-a<sup>n</sup> nàtihu-a<sup>n</sup> vehe, te súúní vǎha vǎha ní nanducu-a<sup>n</sup> ndéé ní naníhì-a<sup>n</sup>. 9 Te òré ní naníhì-a<sup>n</sup>, te ní dátàcá-a<sup>n</sup> nchaa ñáyiú dǐhì càhá<sup>n</sup> ndìhì-a<sup>n</sup> ndìhì nchaa ñáyiú ndècu yatni ndìhì-a<sup>n</sup>, te ní xáha<sup>n</sup>-a<sup>n</sup>: “Chí ná cúdǐ<sup>í</sup> ìní-ó vìtna chi ní naníhì-í díhú<sup>n</sup>-í sá nǐ xíta nì cùu”, cachí-a<sup>n</sup> xǎha<sup>n</sup>-a<sup>n</sup> xií-yu. 10 Te yúhú càchì-í sá dúcá<sup>n</sup> ìo cúdǐ<sup>í</sup> ìní nchaa espíritú xínú cuèchi núú Yǎ Ndiǒxí, núu ì<sup>n</sup> ñáyiú ndècu ichi cuehé ichi duha na ndìxi cuéchi iní-yu cuèndá

nchaa sá ñà túú vǎha quidé-yu, te tñí-yu ichi-gá —  
càchí-gá xáha<sup>n</sup>-gǎ xii-güedé.

*Cuëndá ì<sup>n</sup> téé ñá túú ní quide váha*

<sup>11</sup> Te ní cani tucu Jèsús ingá cuëndú núú-güedé, te  
xáha<sup>n</sup>-gǎ:

—Ì<sup>n</sup> téé ndècu úú déhe ducu<sup>n</sup>-dé, <sup>12</sup> te téé lǐhli-gá  
ní xáha<sup>n</sup>-dǎ xii tǎtá-dǎ: “Táu, taxi-n tǎhú sǎ cúú  
cuëndá-í”, càchí-dé xáha<sup>n</sup>-dǎ. Te tǎtá-dǎ-á<sup>n</sup> ñí  
sǎñaha-dǎ ndí dǐí<sup>n</sup> núú-güedé sá cúú cuëndá-güedé.  
<sup>13</sup> Te núú sàcú-ni nduu, te déhe-dé téé lǐhli-gá-á<sup>n</sup>  
ñí nadico-dǎ nchaa sá ñí sǎñaha tǎtá-dǎ, te ní  
xica-dé cuáhá<sup>n</sup>-dé ì<sup>n</sup> ñuú xicá, te yàcá<sup>n</sup> ní tñi-dé  
ì<sup>n</sup> ichi cuèhé ichi duha, te ní ndihí dǐhú<sup>n</sup>-dǎ ní  
dándóñùhu-dé ndihí cue téé càhá<sup>n</sup> ndihí-dé, ndihí  
nchaa ñáyíu dǐhí xǐndecu ichi dǐí ìní. <sup>14</sup> Te ní ndihí  
ndoo dǐhú<sup>n</sup>-dǎ ní dándóñùhu-dé, te núú sàcú-ni  
nduu ní sáá tnamá ñuú núú ndécú-dǎ-á<sup>n</sup>, te ñá  
nihí-gá-dé sá cǎxí-dǎ, te xihí-dé docó. <sup>15</sup> Núú ní  
xica-dé cuáhá<sup>n</sup> ndúcú chiu<sup>n</sup>-dé núú ì<sup>n</sup> téé dǐu-ni  
ñuú xiá<sup>n</sup>, te téé-á<sup>n</sup> ñí sáha chiu<sup>n</sup> ñaha-dé ì<sup>n</sup> xichi núú  
ñúhú-dǎ coto-dé cùchí. <sup>16</sup> Te súúní xihí-dé docó te  
cuñí-dé caxi-dé nchaa sá sǎha-yu cùchí-á<sup>n</sup> ní cùu,  
dico ñá túú ní sǎñahá-yu xii-dé. <sup>17</sup> Te uu<sup>n</sup>i ní  
sani váha iní-dé, te ní cachí-dé: “Ío cuéhé cue téé  
xìnu cuechi vehe tǎtá-í te ío cuéhé sǎ xéxí-güedé  
ndécú, te yúhú duha ndòho-í docó iha! <sup>18</sup> Te  
ndacuñí-í te núhú-í vehe tǎtá-í, te cúñaha-í xii-dé:  
Táu, ñá túú ní quide váha-í núú Yǎ Ndióxí te ñí  
ñà túú ní quide váha-í núú-n, <sup>19</sup> te ñá túú-gǎ tàú-í  
sá cúú-í déhe-n vǐtna, te cada ñaha-nǎ-n xì-í dàtná  
ì<sup>n</sup> téé xìnu cuechi núú-n”, duha ní sani iní-dé  
cúñaha-dǎ xii tǎtá-dǎ. <sup>20</sup> Te sǎtá dúcá<sup>n</sup> ñí sani  
iní-dé, te ní natñi-dé ichi cuánuhú-dé vehe tǎtá-dǎ,

te xica-gă cuánuhú-dé ní xiní ñáhá tătá-dě xii-dé te ní cundáhú iní ñáhá-dě. Te xìnu tătá-dě-án ñí sáhán núnahá ñáhá-dě, te ní numi ñaha-dě, te ío váha ní cáhán ndihí ñaha-dě. <sup>21</sup> Te ní xáha<sup>n</sup> dēhe-dé-án xii-dé: “Táu, ñá túú ní quide váha-í núú Yá Ndiõxí te ni ñà túú ní quide váha-í núú-n, te ñá túú-gă tàù-í sá cùù-í déhe-n vītna”, cachí-dé xăha<sup>n</sup>-dě.

<sup>22</sup> 'Dico tătá-dě-án ñí xáha<sup>n</sup>-dě xii cue tée xìnu cuechi núú-dě: “Chí queñùhu ndihí-ni dóó vâha-gá cuáha-ndo dēhe-í-a na cuìhnu-dé, ndihí ì<sup>n</sup> dehé ná quìhí díquí ndáhá-dě, ndihí chàù váha na quìhí-dé.

<sup>23</sup> Te quíhí<sup>n</sup> nguehe<sup>n</sup>-ndo ì<sup>n</sup> ndicutu numa quiti caváha-gá, te cahni-ndo-di, te na càda-o vico, te na càxi-o-di. <sup>24</sup> Chi déhe-í-a ní saní iní-í sá ñí xihí-dé ní cùu, te ñáhá chí ndècu vívú-dě, te ní saní tucu iní-í sá ñí xíta-dé ní cùu te ní nasáá méé-dě”, cachí-dé xăha<sup>n</sup>-dě xii cue tée xìnu cuechi núú-dě-án. Te ní ngüita-güedé ní quide-güedé vico.

<sup>25</sup> 'Te déhe-dé tée sàcuéhé-gă cuáhá<sup>n</sup>-dé yucu, te òré cuándixi-dé tá ndùu yatni-dé vehe, te ní tecú dóho-dé ío yaá cùú vico. <sup>26</sup> Te ní cana-dé ì<sup>n</sup> tée xìnu cuechi, te ní xicá<sup>n</sup> tnúhú-dě núú-dě ná cuendá duca<sup>n</sup> ío yaá. <sup>27</sup> Te tée xìnu cuechi-án ñí xáha<sup>n</sup>-dě: “Ñaní-n tēe cuáhá<sup>n</sup> ní cùu ní nasáá-dé, te tătá-n ñí táúchíú<sup>n</sup>-dě ní xihí ì<sup>n</sup> ndicutu nùma quiti caváha-gá cuendá sá ñí nasáá váha-dé”, cachí-dé xăha<sup>n</sup>-dě.

<sup>28</sup> 'Dico ñaní-dé tée sàcuéhé-ă<sup>n</sup> ñí cudéé<sup>n</sup>-dě, te ní cachí-dé sá vâ ndíhu-dé vehe cundecu-dé vico-án ní cùu, dico ní quee tătá-güedé ní cáhán ndáhú-dé núú-dě cuendá ndíhu-dé. <sup>29</sup> Te ní xáha<sup>n</sup>-dě xii tătá-dě: “Táu, cundedóho váha saú-n tnúhu na càhá<sup>n</sup>-í-a, yúhú ío cuéhé cuíá ñí cuu xìnu cuechi-í núú-n, te ni ì<sup>n</sup> xito ñá túú quide sáá iní-í núú-n, te

ni ìn<sup>n</sup> chivá lihli ñá túú tàxi-n-di caxi díí ìní-í-di ndihì cue tée càhá<sup>n</sup> ndihì-í. <sup>30</sup> Te vitna ní nasáá déhe-n tée ní sáhá<sup>n</sup> ní dándòñuhu díhú<sup>n</sup>-n ndihì nchaa ñáyiú xĩndecu ichi díí ìní. Te ní sahani-n ìn<sup>n</sup> ndicutu numa quitì caváha-gá sá cuendá-dé”, càhí-dé xáha<sup>n</sup>-dě xii tătá-dě. <sup>31</sup> Te ní xáha<sup>n</sup> tătá-dě xii-dé: “Yòhó déhe-í duca<sup>n</sup>-ni ndècu ndihì ñaha-n xii-í, te nchaa sá ndécú ndihì-í cúú-xí cuendá-n. <sup>32</sup> Te vitna dacuití tátu-xi sá cádá-ó víco, te cudíí ìní-ó, chi ñani-n-á<sup>n</sup> ñi quide-í cuendá sá ñi xihí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, càhí-dé xáha<sup>n</sup>-dě xii déhe-dé tée sàcuéhé-gá-á<sup>n</sup> — duha cuáhá<sup>n</sup> cuendú ní canì Jèsús núú-güedě.

## 16

*Nàcuáa ní quide ìn<sup>n</sup> tée tàxi tnuní ñáhá xii cue tée xĩnu cuechi*

<sup>1</sup> Te Jèsús xáha<sup>n</sup>-gá xii cue tée xica cuu ndihì-gá:

—Ní xĩndecu ìn<sup>n</sup> tée cuica, te duca<sup>n</sup> ñi xĩndecu ìn<sup>n</sup> tée ní taxi tnuní ñáhá xii cue tée ní xĩnu cuechi núú-dě. Te tée-á<sup>n</sup> ñi xini ñáhá ñáyiú dùhu-dé díhú<sup>n</sup> tée cùu patróó<sup>n</sup>-dě, te cuáhá<sup>n</sup>-dé dándòñuhu-dé, te ní xáhá<sup>n</sup>-yu xii tée cùu patróó<sup>n</sup>-dě sá dúcá<sup>n</sup> quide-dé. <sup>2</sup> Te tée cùu patróó<sup>n</sup>-dě-á<sup>n</sup> ñi cana ñaha-dě xii-dé, te ní xáha<sup>n</sup>-dě: “¿Ná cuendá duha càhá<sup>n</sup> ñáyiú cuendá-n? Yáchí chí na tàxi cuendá-n nchaa chiú<sup>n</sup> ní quide-n, chí vitna te vá táxí tnuní-gá-n cuè tée xĩnu cuechi núú-í”, càhí-dé xáha<sup>n</sup>-dě. <sup>3</sup> Te tée tàxi tnuní ñáhá xii cue tée xĩnu cuechi-á<sup>n</sup> ñi sani ìní-dé: “¿Te nása cada-í vitna na quèhndé pàtróó<sup>n</sup>-í chiú<sup>n</sup>-í? Chí ñá cùndèe-gá-í cada-í chiú<sup>n</sup> véé, te cùcaha<sup>n</sup> núú-í cáca<sup>n</sup> ndàhú-í. <sup>4</sup> Dico duha cada-í cuendá quehe<sup>n</sup> cuendá ñáhá ñáyiú vehé-yu òré ná quèhndé duu<sup>n</sup>-ná pàtróó<sup>n</sup>-í chiú<sup>n</sup>-í”, duha

ní sani iní-dé. <sup>5</sup> Te sátá dúcá<sup>n</sup> te ní cana-dé ì<sup>n</sup> ì<sup>n</sup> cue téé tàú núú pàtróó<sup>n</sup>-güedě. Te téé díhna ní xícá<sup>n</sup> tnúhú-dě núú-dě, te xăha<sup>n</sup>-dě: “¿Ndèé dau tàú-n núú pàtróó<sup>n</sup>-i?”, cächí-dé xăha<sup>n</sup>-dě. <sup>6</sup> Te téé-á<sup>n</sup> nǐ xáha<sup>n</sup>-dě: “Tàú-í ì<sup>n</sup> ciëndú bàrríl acítí”, cächí-dé xăha<sup>n</sup>-dě. Te téé tàxi tnuní ñáhá xii cue téé xínu cuechi-á<sup>n</sup> nǐ xáha<sup>n</sup>-dě: “Iha náú reciú-n-á, te ndadúha ingá sá ũdico úxí taxi-n”, cächí-dé xăha<sup>n</sup>-dě. <sup>7</sup> Te dătnùní ní xícá<sup>n</sup> tnúhú tùcu-dé núú ingá-dé, te xăha<sup>n</sup>-dě: “Te yòhó, ¿ndèé dau tàú-n-í?”, cächí-dé xăha<sup>n</sup>-dě. Te téé tàú-á<sup>n</sup> nǐ xáha<sup>n</sup>-dě: “Í<sup>n</sup> ciëndú ngohnchí triú tàú-í”, cächí-dé xăha<sup>n</sup>-dě. Te téé tàxi tnuní ñáhá xii cue téé xínu cuechi-á<sup>n</sup> nǐ xáha<sup>n</sup>-dě: “Iha náú reciú-n-á, te cadúha ingá sá cùmídícó-nă taxi-n”, cächí-dé xăha<sup>n</sup>-dě. <sup>8</sup> Te téé cùu patróó<sup>n</sup>-á<sup>n</sup> nǐ cachí-dé sá ïo váha ñùhu díquí tée dùhu-á<sup>n</sup> nàcuáa cada-dé cundecu váha-dé. Te nchaa ñáyiu xĩndecu ichi cuèhé ichi duha, ío-gá váha ñùhu díquí-yu nàcuáa cadá-yu cundecu váha-yu ndihí nchaa ñáyiu cùndihí-yu dácúúxí ñáyiu ndècu ichi Yá Ndiõxí.

<sup>9</sup> Te yúhú cächí-í sá cadá-ndó sǎ vǎha ndihí nchaa sá ndécú ndihí-ndo ní cuáha ñuyíú yǐcá cuèchi-a, te duca<sup>n</sup> te coo cue téé ío váha tnahá tnúhu ndihí-ndo, te òré ná ndihí nchaa sá ìò ñuyíú-a, te Yá Ndiõxí quehe<sup>n</sup> cuèndá ñáhá-gǎ xii-ndo, te cundecu-ndo ndihí-gá ni caa ni quíhí<sup>n</sup>.

<sup>10</sup> Te núu ì<sup>n</sup> téé quide ndáá cuèi ì<sup>n</sup> chù<sup>n</sup> líhli na càda-dé, te ñu-ni duca<sup>n</sup> quide ndáá-dé cuèi ì<sup>n</sup> chù<sup>n</sup> cahnu na cada-dé. Dico téé ñǎ túú quide ndáá, chi cuèi chù<sup>n</sup> líhli àdi chiu<sup>n</sup> cahnu na cada-dé dico ì<sup>n</sup>-ni quide-dé. <sup>11</sup> Te núu nchòhó vá cadá-ndó sǎ vǎha ndihí nchaa sá nǐ cuáha ñuyíú yǐcá cuèchi-a

ña, te Yá Ndiöxí vá táxí-gă sá vâha ndècu ndihî-gă xii-ndo. <sup>12</sup> Te núu vá cádá ndăá-ndó còto-ndo nchaa sá táxí núu tnaha ñáyîu-ndo, te vá yôo taxi sá ndúú tàhú-ndó.

<sup>13</sup> Te ni ì<sup>n</sup> tée xînu cuechi vá ndácú-dě cunu cuechi-dě núú úú pàtróó<sup>n</sup>, chí tée-á<sup>n</sup> cuu váha iní-dé núú ì<sup>n</sup> pàtróó<sup>n</sup>-dě te tnî-dé nchaa tnúhu càhá<sup>n</sup> pàtróó<sup>n</sup> tée cùu váha iní-dé núú-xi-á<sup>n</sup>. Te núú ìngá tucu pàtróó<sup>n</sup>-dě vá cúú vâha iní-dé, te ni vâ tnî-dě tnúhu càhá<sup>n</sup> pàtróó<sup>n</sup>-dě-á<sup>n</sup>. Te duca<sup>n</sup> sâtnahá-xi cùu nchohó chí vá ndácú-ndó cunu cuechi-ndo núú Yá Ndiöxí te cuhu<sup>n</sup> iní-ndó nchaa sá ío ñuyíú-a —càchí-gă xáha<sup>n</sup>-gă xii-güedé.

<sup>14</sup> Te nchaa cue tée cùu fariséú ío ñùhu iní-güedé nchaa sá ío ñuyíú-a, te xîndedóho-güedé nchaa tnúhu càhá<sup>n</sup> Jèsús, te ní cáhá<sup>n</sup> yíchí-güedé cuendá-gă. <sup>15</sup> Te Jèsús ní xáha<sup>n</sup>-gă xii-güedé:

—Nchòhó cúú-ndó cuè tée ío váha càhá<sup>n</sup> núú ñáyîu cuendá-ni sá cuíní-ndó càhá<sup>n</sup> váha-yu cuendá-ndó, dico Yá Ndiöxí xîní ndăá-gă nàcuáa càa iní-ndó ì<sup>n</sup> ì<sup>n</sup>-ndo, te nchaa sá càchí cue ñáyîu ñuyíú-a sá ío nàndíhî, Yá Ndiöxí dáquèe tíhú-gă.

### *Cuendá nchaa tnúhu ní chídó tnùnî ndíi Moisés*

<sup>16</sup> Te nchaa tnúhu ní chídó tnùnî ndíi Moisés cúnù-xi ni cuu, ndihî nchaa tnúhu ní chídó tnùnî cue tée ní xóo cáhá<sup>n</sup> tnúhu Yá Ndiöxí ndéé sanaha. Dico cútnahá ní ngúita té Juáá tée ní xóo dacuàndute ñaha xii ñáyîu ní cáhá<sup>n</sup>-dé tnúhu-í, ndéé dàvá-á<sup>n</sup> ñà túú-gă ní cùnùu nchaa tnúhu ní chídó tnùnî ndíi Moisés ndihî nchaa tnúhu ní chídó tnùnî cue tée ní xóo cáhá<sup>n</sup> tnúhu Yá Ndiöxí ndéé sanaha. Te ñîu-ni ndéé dàvá-á<sup>n</sup> ni quesaha ta tècú tnùnî ñáyîu nàcuáa ndíhu ndaha ñàha Yá Ndiöxí xií-yu,

te vâi ñáyiu ío sàni iní-yu vitna nàcuáa cadá-yu ndíhu ndaha ñàha Yá Ndiõxí xii-yu. <sup>17</sup> Te nchaa tnúhu ní chídó tnùní ndíi Moisés ío ndáá càhá<sup>n</sup>-xi, te ndíhi-gá naa andíu ndíhi ñuyíú dàcúúxí sã ndíhi ì<sup>n</sup> ì<sup>n</sup> tnúhu-á<sup>n</sup> cada-xi nàcuáa càhá<sup>n</sup>-xi.

*Jèsús càhá<sup>n</sup>-gá cuèndá ñáyiu dàña tnaha*  
(Mt. 19:1-12; Mr. 10:1-12)

<sup>18</sup> 'Te núu ì<sup>n</sup> téé na dàña tnaha-dé, ndíhi ñadìhí-dé, te tnándaha tucu-dé ndíhi ingá-yu, te nèhé víhí quide-dé te núu duca<sup>n</sup> na càda-dé, te téé na tnãndaha ndíhi ñaha ní dáñá yì<sup>n</sup>-xi, te diu-ni duca<sup>n</sup> ñà túú cùu-xi sá vãha te núu duca<sup>n</sup> na càdá-yu —càchí-gá xãha<sup>n</sup>-gã xii-güedé.

*Cuèndá ì<sup>n</sup> téé nàni Lázaru ndíhi cuèndá ì<sup>n</sup> téé cuica*  
<sup>19</sup> Te xãha<sup>n</sup> tucu-gã xii-güedé:

—Ní xíndecu ì<sup>n</sup> téé cuica, te ní xóo cuihnu-dé mee-ni dõó vãha dóó vii càa, te nchaa nduu súúni vãha ní xóo cada-dé viço vehe-dé. <sup>20</sup> Te ní xíndecu tucu ì<sup>n</sup> téé ndàhú ní xínani-dé Lázaru, te téé-á<sup>n</sup> ní cuhú-dé ní xíndeé-dé nitùhú-dé ndíhiyi, te ì<sup>n</sup> nduu ì<sup>n</sup> nduu ní xóo taxinucóo ñaha-güedé xii-dé yuyèhe téé cuica-ã<sup>n</sup>. <sup>21</sup> Te téé ndàhú-á<sup>n</sup> ñí xóo cuú-dé docó, te ní xóo cuini-dé caxi-dé nchaa sá ñà túú-gã ní xõo yãha caxi téé cuica-ã<sup>n</sup>, te ñá túú ní xõo níhí-dé. Te cuèi iná ní xóo quíhí<sup>n</sup>-di ní xóo nayuu-di nchaa núú ndíhiyi ndèé-dé-á<sup>n</sup>. <sup>22</sup> Te ní sáá ì<sup>n</sup> nduu te ní xíhí téé ndàhú-á<sup>n</sup>, te cue espíritú xínú cuèchi núú Yá Ndiõxí ndéca ñàha-xi xii-dé cuándaa núú ndécú tẽ Abrahám cundecu-dé. Te ní sáá nduu ñí xíhí téé cuica-ã<sup>n</sup> tnàhá-dé, te ní chindúxi ñaha-güedé xii-dé. <sup>23</sup> Te ní sáá-dé núú xíndecu nchaa ñáyiu ní xíhí ñá túú ní quide ndáá núú Yá Ndiõxí te xía<sup>n</sup> ío ndòho-dé



ndécú-dě, te ní ndonehe núú-dě te xica nĩ xíní-dé té Àbrahám ndìhi té Lăzarú-á<sup>n</sup> xĩndecu-güedé. <sup>24</sup> Te níhi ní cáhá<sup>n</sup>-dě, te xăha<sup>n</sup>-dě: “Yòhó tătá Àbrahám, cundàhú iní ñáhá xìi-í, te cúñaha xìi té Lăzarú ná dândaxi<sup>n</sup>-dé díquí ndáhá-dě, te na quixi-dé dandàxi<sup>n</sup>-dé yàa-í, chí ío ndòho-í ñùhù-í núú ñùhú núú càyú-a”, cächí-dé xăha<sup>n</sup>-dě xii té Àbrahám. <sup>25</sup> Dico té Àbrahám ní xáha<sup>n</sup>-dě: “Ndàhú yòhó ñaní tnáhà-í, dandàcu iní sá ío váha ní xĩndecu-n ñùyíú, te té Lăzarú ío ndàhú ní ndoho-dé ní xĩndecu-dé. Te vitna ní nucúndecu váha-dé iha, te yòhó ndóhó-n vitna. <sup>26</sup> Te ñá díú-ní să xǎ<sup>n</sup> tucu, chí cuádava ndècu ì<sup>n</sup> déhvá cùnú ñùhú nèhu-xi núú ndécú-ó, te cuèi nchaa ñáyiú xĩndecu iha na cächí iní-yu quixí-yu núú ndécú-ndó dico vá ndácũ-yu, te ni nchòhó vá ndácú-ndó quixi-ndo núú ndécú-ndí”, cächí-dé xăha<sup>n</sup>-dě. <sup>27</sup> Te ní xáha<sup>n</sup> tõe cuica-ǎ<sup>n</sup>: “Te núu duca<sup>n</sup> te càhá<sup>n</sup> ndàhú-í núú yòhó tătá Àbrahám vitna sá téndàha-n té Lăzarú ná quíhí<sup>n</sup>-dé vehe tătà-í, <sup>28</sup> chí ndècu úhú<sup>n</sup>-gá ñaní-í, te na cũñaha-dě xii-güedé sá vă cádá-güedě dàtná ní quide-í cuendá sá vă quíxí-güedě tnàhá-güedé núú ndécù-í ndóhò-í-a”, cächí-dé xăha<sup>n</sup>-dě. <sup>29</sup> Te té Àbrahám ní xáha<sup>n</sup>-dě: “Mee-güedě ndécú ndìhi-güedé nchaa tnúhu ní chídó tnùní ndíi Moisés, ndìhi nchaa tnúhu ní chídó tnùní cue tée ní xóo cáhá<sup>n</sup> tnúhu Yá Ndiǒxí ndée sanaha, te nchaa tnúhu-á<sup>n</sup> ná tnì-güedé nàcuáa càhá<sup>n</sup>-xi”, cächí-dé xăha<sup>n</sup>-dě xii-dé. <sup>30</sup> Te ní xáha<sup>n</sup> tùcu tée cuica-ǎ<sup>n</sup>: “Tătá Àbrahám, dico vá cádá cuendá-güedé nchaa tnúhu-á<sup>n</sup>, dico núu ì<sup>n</sup> ñáyiú ñá túú-gă ndécú ñùyíú ì<sup>n</sup> ñáyiú ndècu ndìhi-n quíhí<sup>n</sup>-yu cáhá<sup>n</sup> ndìhi ñàhá-yu xii-güedé nàcuáa

ndùu tnúhu váha, te ndixi cuéchi iní-güedé nchaa sá ñà túú quide váha-güedé ndécú-güedě, te cada váha-güedé”, cächí-dé xáha<sup>n</sup>-dě xii-dé. <sup>31</sup> Dico té Àbrahám ní xáha<sup>n</sup>-dě: “Te núu ñá túú cuení-güedé tñi-güedé tnúhu ní cáhá<sup>n</sup> ndíi Moisés, ndíhi tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiöxí ndéé sanaha ña, te diu-ni duca<sup>n</sup> càda-güedé cuéi ñ<sup>n</sup> ñáyiú ní xíhí ná ndótó-yu cúñàhá-yu nàcuáa ndùu tnúhu váha, chi vá quindáá iní-güedé”, cächí té Àbrahám xáha<sup>n</sup>-dě xii téé cuica-ã<sup>n</sup> —cächí Jèsús xáha<sup>n</sup>-gã xii cue téé cùu fariséú.

## 17

*Quihi iní-ó vǎ cündècu-o ichi cuehé ichi duha  
(Mt. 18:6-7, 21-22; Mr. 9:42)*

<sup>1</sup> Te Jèsús ní xáha<sup>n</sup>-gã xii cue téé xica cuu ndíhi-gá:

—Dacuitíí sǎ cóo cuè téé dacàhá<sup>n</sup>-güedé ñáyiú cadá-yu nándi sá cuèhé sá dúhá, j dico ndàhú ní cuu cue téé duca<sup>n</sup> na dàcahá<sup>n</sup> ñáhá xii-yu cadá-yu nándi sá cuèhé sá dúhá! <sup>2</sup> Chi váha-gá sá núu na dàcutu ndéé ñáyiú ñ<sup>n</sup> yúú yǒdó dǔcú<sup>n</sup>-güedě te dàquée ñàhá-yu xii-güedé xití ndute làmár, te ñá díú sǎ cündècu-güedé dacàhá<sup>n</sup>-güedé ñáyiú cadá-yu nándi sá cuèhé sá dúhá, cuéi ñáyiú ndàhú iní-xi dandàhú-güedé. <sup>3</sup> Te ío quihi iní-ndó cündècu-ndo.

’Te núu ñ<sup>n</sup> ñaní tnáhá-ndó quide-dé ñ<sup>n</sup> sá ñà túú tàú-dé cada-dé sá cúú-xí-ndó te cáhá<sup>n</sup>-ndó dǒho-dé, te núu ní ndixi cuéchi iní-dé sá ñà túú ní quide váha-dé, te cada càhnu iní-ndó sǎ ñ<sup>n</sup> quide-dé. <sup>4</sup> Te cuéi úsá xito na càda-dé nándi sá ñà túú tàú-dé cada-dé sá cúú-xí-ndó ñ<sup>n</sup> nduu, te núu na quixi-dé úsá xito núú-ndó, te cachí-dé sá

vă dúcá<sup>n</sup>-gă cada-dé, te xìni ñuhu-xi cada cahnu iní-ndó-dé —càchí-gá xáha<sup>n</sup>-gă xii-güedé.

*Ñáyiú sàndáá ndisa iní-xi*

<sup>5</sup> Te ní xáha<sup>n</sup> cuè téé xìca cuu ndìhi Jesús xii-gá:

—Chindee ñàha xii-ndí cuèndá duca<sup>n</sup> te quíndáá-gá iní-ndí sá Yă Ndiõxí ndácú-gă quídé-gă nchaa sá vâha —càchí-güedé xâha<sup>n</sup>-güedé xii-gá.

<sup>6</sup> Te ní xáha<sup>n</sup> Jèsús:

—Te núu nchòhó quíndáá ndisa iní-ndó sũúni cuèdicó luha líí dàtná cuíní-ndó càa ì<sup>n</sup> ndíquí<sup>n</sup> yutnu nàni mostázá, te duca<sup>n</sup> te cuu cúñaha-ndo xii ì<sup>n</sup> yutnu: “Quene-n ìha te quíhí<sup>n</sup>-n cuìhnu-n xití làmár”, duha cúñaha-ndo. Te duca<sup>n</sup> càda-xi te núu na quíndáá ndisa iní ñáhá-ndó xii-í —càchí-gá xáha<sup>n</sup>-gă xii-güedé.

*Nàcuáa tàú ì<sup>n</sup> téé xìnu cuechi cada-dé*

<sup>7</sup> Te xâha<sup>n</sup> tùcu-gá xii-güedé:

—Te núu ì<sup>n</sup> nchòhó ndécú ì<sup>n</sup> téé xìnu cuechi núú-ndó, te cuáhá<sup>n</sup>-dé yucu cuángada chiu<sup>n</sup>-dé, àdi cuáhá<sup>n</sup>-dé yucu coto-dé quiti, te òré ní nasáá-dé vehe sá ñí sáhá<sup>n</sup>-dé yucu, te vá cũñaha nchòhó cue téé cùu patróó<sup>n</sup>-dè xii-dé: “Yáchí nehé caxi-n dítá”, vá dúhá cũñaha-ndo. <sup>8</sup> Chi nchòhó cue téé cùu patróó<sup>n</sup>-dè cúñaha-ndo xii-dé: “Cundihí iní cada túha sá cùdini-í, te díhna-gá-í caxi-í dítá te dàtnúni caxi-n”, duha cúñaha nchòhó cue téé cùu patróó<sup>n</sup> xii-dé. <sup>9</sup> Te òré ná ndíhí chiu<sup>n</sup> ní táhú nchòhó cue téé cùu patróó<sup>n</sup> cada téé xìnu cuechi núú-ndó, te ñá túú tàú-ndó ndàcá<sup>n</sup> táhú-ndó nũú tée xìnu cuechi núú-ndó. <sup>10</sup> Te duha càhá<sup>n</sup>-í chi núu òré ná ndìhi nchaa chiu<sup>n</sup> ní táhú Yă Ndiõxí cada-ndo, te

cachí-ndó: “Nchúhú cúú-ndǐ cue téé xínu cuechi núú Yá Ndiǒxí, dico ñá túú tàú-gá ndacá<sup>n</sup> táhú-gǎ núú-ndǐ, chi mee-ni chù<sup>n</sup> ní táhú-gǎ ní quide-ndǐ”, duha cachí-ndó —càchí-gá xáha<sup>n</sup>-gǎ xii-güedé.

*Jèsús quidé tǎtna-gá úxí cue téé tnàhá cuéhé sǎ dátèhyú nihnu-xi yiqui cùñú ñáyiu*

<sup>11</sup> Te ñuhu Jèsús ichi cuáhá<sup>n</sup>-gá ñuú Jerusalén, te ní yáha-gá núú ràyá distrítú Sàmariá ndihì distrítú Galileá. <sup>12</sup> Te ta cùyatni-gá ì<sup>n</sup> ñuú lǐhli cuáhá<sup>n</sup>, te ní sátnahá ñáhá úxí tnàhá cue téé cùhú xii-gá, te tnàhá-güedé cuéhé sǎ dátèhyú nihnu-xi yiqui cùñú-ó dico xica lùha ní ngúnu tnǐ-güedé, <sup>13</sup> te níhi ní cáhá<sup>n</sup>-güedé, te xǎha<sup>n</sup>-güedé xii Jèsús:

—ìMèstrú, cundàhú iní ñáhá xii-ndǐ! —  
càchí-güedé xǎha<sup>n</sup>-güedé xii-gá.

<sup>14</sup> Te òré ní xiní ñáhá Jèsús xii-güedé, te ní xáha<sup>n</sup>-gǎ:

—Chí cuáhá<sup>n</sup> núú dütú ná cùndehe ñaha-dé xii-ndo —càchí-gá xáha<sup>n</sup>-gǎ xii-güedé.

Te ní xica-güedé cuáhá<sup>n</sup>-güedé, te ichi-ni ñuhu-güedé cuáhá<sup>n</sup>-güedé ní ndúha-güedé cuéhé tnàhá-güedé. <sup>15</sup> Te nchaa-güedé ní cutnùní iní-güedé sá ñǐ ndúha-güedé, dico ì<sup>n</sup>-ni-dé ní nacuico-dě, te ní ngüíta-dé níhi ní cáhá<sup>n</sup>-dé, te ní cachí-dé sá ìo càhnu cuu Yá Ndiǒxí. <sup>16</sup> Te ní ngüíñí xítí-dé núú Jèsús, te ní nuu núú-dě ndàa núú ñúhú ndàcá<sup>n</sup> táhú-dě núú-gǎ. Te téé-á<sup>n</sup> cúú-dě téé distrítú Sàmariá. <sup>17</sup> Te Jèsús ní cachí-gá:

—Úxí tnàhá-güedé ní ndúha cuéhé tnàhá-güedé. ¿Te ndèé ndécú dàva-gá-güedé-i? <sup>18</sup> ¿Te náa ì<sup>n</sup>dìi-ni téé ìngá ñuú-a ní nacuico-dě ndàcá<sup>n</sup> táhú-dě núú

Yă Ndiöxí, te cächí-dé sá ïo cànnu cuu-gá ñă? — cächí-gá.

<sup>19</sup> Te ní xáha<sup>n</sup>-gă xii téé-á<sup>n</sup>:

—Ndacuíñí te núhú-n, chi sa ní ndúha-n cuěhé tnàhá-n, chi ní sándáá iní-n Yă Ndiöxí —cächí-gá xáha<sup>n</sup>-gă xii-dé.

*Nàcuáa yìndaha ñaha Yá Ndiöxí*

*(Mt. 24:23-28, 36-41)*

<sup>20</sup> Te cue téé cùu fariséú ní xícá<sup>n</sup> tnúhú-güedě núú Jèsús nũu ná ama ngüíta Yá Ndiöxí ndíhu ndaha-gă ñáyiu. Te ní xáha<sup>n</sup>-gă:

—Ñá túú nă cada-xi ñuyíú quiní-ndó cuendá cutnùní iní-ndó sã ndíhu ndaha ñaha Yá Ndiöxí xii-ndo. <sup>21</sup> Te ni vă yõo cachí: “Iha ndècu-gá táxí tnùní-gá, àdi yacá<sup>n</sup> ndécú-gă táxí tnùní-gă”, chi tnuú-ndó sà ndecu-gá ndihì nchaa ñáyiu yìndaha-gá —cächí-gá xáha<sup>n</sup>-gă xii-güedě.

<sup>22</sup> Te ní xáha<sup>n</sup>-gă xii cue téé xìca cuu ndihì-gá:

—Te nchòhó chi sáá nduu, te cachí iní-ndó sã sũúní cuèdicó ì<sup>n</sup> nduu quiní ñáhá-ndó xii yúhú Téé cùu ñaní tnáhá-ndó nchàa-ndo, dico vá quèní ñáhá-gă-ndó xii-í. <sup>23</sup> Te coo ñáyiu cúñàhá-yu xii-ndo: “Iha ndècu-gá, á<sup>n</sup> yacá<sup>n</sup> ndécú-gă”, quesàhá-yu cúñàhá-yu xii-ndo. Dico vá quèndáá iní-ndó quìhí<sup>n</sup>-ndó ndìhí-yu núú cächí-yu, te ni vă cání iní-ndó quìhí<sup>n</sup> mée-ndó. <sup>24</sup> Chi dàtná cuìní-ndó quède-xi oré sàá ndúté àndiù, chi uu<sup>n</sup>i dàyehé-xi nihì ñuyíú, duca<sup>n</sup> càda-xi nduu na quixi tucu yúhú Téé cùu ñaní tnáhá-ndó nchàa-ndo, te dàvá-á<sup>n</sup> quiní ñáhá nchàa-ndi túhú ñáyiu xii-í.

<sup>25</sup> Dico díhna-gá ndoho vèhi-í, te daquèè tíhú ñáhá

ñáyiú ñuyíú-a xii-í. <sup>26</sup> Te cadá-yu dàtná ní quide ñáyiú ní xíndecu cútnàhá ní xíndecu té Nőé, te ñiú-ni duca<sup>n</sup> sãtnahá-xi cada nchaa ñáyiú ndècu vitna ndéé sáá nduu quìxi tucu yúhú Tée cùu ñaní tnáhá-ndó nchàa-ndo. <sup>27</sup> Chi caxi-ní-yu, coho-ní-yu, te caca cuu-ni cue téé xica ndáhú, te tnãndaha-ní-yu, chi duca<sup>n</sup> ñi quidé-yu dàvã-á<sup>n</sup> ndéé ní sáá nduu cuãnguee té Nőé xití bàrcú, te ní ngüíta-xi ní cuu<sup>n</sup> dáú ñi ndaa ndute ñuyíú, te nchaa-yu ní xihí ní cáhá-yu dàvã-á<sup>n</sup>. <sup>28</sup> Te ñiú-ni duca<sup>n</sup> ñi quide tucu ñáyiú cútnàhá ní xíndecu té Lőt, chi xèxí-yu xihí-yu, te sãá<sup>n</sup>-yu te nãdicó-yu, te xixitú-yu nãndi sã xixitú-yu, te nchaa cue téé xidacáá-güedě vehe. <sup>29</sup> Te òré ní quee té Lőt ñuú Sòdomá, te ní ngoyo ñuhú andiú, te dàcá yúú sũní ñicó ní nduu ñuhú-ñã-xi, te ní xihí nchaandí túhú ñáyiú ñuú-á<sup>n</sup>. <sup>30</sup> Te ñiú-ni duca<sup>n</sup> sãtnahá-xi cada ñáyiú na sáá nduu quìxi tucu yúhú Tée cùu ñaní tnáhá-ndó nchàa-ndo ñuyíú-a.

<sup>31</sup> 'Te núu ñi<sup>n</sup> ñáyiú càndodó-yu díquí véhě-yu nduu-ã<sup>n</sup>, te ñi vá ndiñu-gá-yu quehé<sup>n</sup>-yu ñi<sup>n</sup> ndachíú<sup>n</sup>-yu canehé-yu quíhí<sup>n</sup>, te ñáyiú cuáhá<sup>n</sup> yucu, te ñi vá ñuhú-gá-yu vehé-yu. <sup>32</sup> Te chí dándàcu iní nàcuáa ní yáha ñadìhí té Lőt. <sup>33</sup> Te nchaa ñáyiú cuìní dàcácu nihnu mee-xi ñuyíú-a ña, te cuíta nihnú-yu, te nchaa ñáyiú na cùú sã cuendá-í, te naníhí tàhú-yu.

<sup>34</sup> 'Te na càchí tnúhu tucu-í xii-ndo sã ndùu-á<sup>n</sup>, te núu úú-yu càa ñi<sup>n</sup> núu xito, te ñi<sup>n</sup>-yu ndanchitá-yu ndaá-yu andiú, te ñi<sup>n</sup>-yu quendóo. <sup>35</sup> Te núu úú ñáyiú ñihí nchícõ-yu ñi<sup>n</sup>-ni vèhe, te ñi<sup>n</sup>-yu

ndanchitá-yu ndaá-yu andiu, te ì<sup>n</sup>-yu quendóo.  
 36 Te núu úu cue tée yìhi-güedé yucu, te ì<sup>n</sup>-dé  
 ndanchita-dé ndaa-dé andiu, te ì<sup>n</sup>-dé quendóo —  
 cächí-gá xáha<sup>n</sup>-gǎ xii-güedé.

37 Te sá dúcá<sup>n</sup> ñí cáhá<sup>n</sup>-gá ñúu ní xícá<sup>n</sup>  
 tnúhú-güedě núú-gǎ, te xǎha<sup>n</sup>-güedě xii-gá:  
 —Mèstrú, ¿te ndéé duca<sup>n</sup> càda-xi-i? —  
 cachí-güedé xǎha<sup>n</sup>-güedě xii-gá.

Te ní xáha<sup>n</sup>-gǎ:

—Te nchòhó xìní-ndó sǎ ncháá ñúu yúcu yìqui  
 cuñú ní xihí, te yácá<sup>n</sup> tàcá cue ndixíí xéxí-güedi —  
 cachí-gá xáha<sup>n</sup>-gǎ xii-güedé.

## 18

*Jèsús càhá<sup>n</sup>-gá cuendá ì<sup>n</sup> juéxí ndìhi cuendá ì<sup>n</sup> ñaha  
 quée*

1 Te Jèsús ní cani-gá ì<sup>n</sup> cuendú núú-güedě cuendá  
 sá vǎ ná tǔhú iní-güedé cáhá<sup>n</sup> ndìhi-güedé Yǎ  
 Ndiöxí nchaa-ni òré. 2 Te xáha<sup>n</sup>-gǎ:

—Ì<sup>n</sup> ñuuú ndécú ì<sup>n</sup> juéxí, te ni ñà túú sàndáá  
 iní-dé Yǎ Ndiöxí, te ni ì<sup>n</sup> tnúhu xáha<sup>n</sup> ñáyiu ñá  
 túú cuiní-dé cada cuendá-dé. 3 Te diu-ni ñuuú-á<sup>n</sup>  
 ndécú tùcu ì<sup>n</sup> ñadihí ñaha quée, te ní sáhá<sup>n</sup>-a<sup>n</sup> càhá<sup>n</sup>  
 ndàhú-a<sup>n</sup> núú juéxí-á<sup>n</sup> cuendá cada ndáá-dé ì<sup>n</sup>  
 cuéchi. 4 Te titní xito ní cuu sàhá<sup>n</sup>-a<sup>n</sup> càhá<sup>n</sup> ndàhú-a<sup>n</sup>  
 núú-dě te ñá túú cuiní-dé cada cuendá-dé tnúhu  
 càhá<sup>n</sup>-a<sup>n</sup> ni cùu, te ndéé núú ñà cúú-gǎ te ní sani  
 iní-dé: “Te cuéi ñá túú sàndáá iní-í Yǎ Ndiöxí,  
 te ni ñà túú quide cuendá-í nchaa tnúhu càhá<sup>n</sup>  
 ñáyiu cada-í, 5 dico na càda ndáá-í cuendá ñaha  
 quée-a ndìhi ñáyiu cùu úhú iní tnáhá ndìhi-a<sup>n</sup>, chi  
 vá cùndèe-gá iní-í nuu núu quixi-a<sup>n</sup> dasàtú iní ñáhá

xì-í”, duha ní sani iní tée cùu juéxí-á<sup>n</sup> —càchí-gá xáha<sup>n</sup>-gǎ xii-güedé.

<sup>6</sup> Te ní xáha<sup>n</sup> tùcu-gá xii-güedé:

—Cada cuèndá-ndó nàcuáa ní sani iní juéxí tée cuihna ìní-xi-á<sup>n</sup>. <sup>7</sup> Te Yá Ndiöxí ío chìndee-gá nchaa ñáyiú ní cáhá<sup>n</sup>-gá cundecu ndìhi-gá, chi cuèi nduu cuèi niú càhá<sup>n</sup> ndìhi ñàhá-yu xii-gá, te vá cùyàa-gá nachinaa-gá nchaa sá quidé ñàha nchaa ñáyiú cùu úhú iní ñàhá xii-yu. <sup>8</sup> Te ío ndìhi duca<sup>n</sup> càda-gá. Te òré ná quèxi yúhú Téee cùu ñàní tnàhá-ndó nchàa-ndo, ¿te náa naníhí-gǎ-í ñáyiú sàndáá ndisa iní Yá Ndiöxí-ǎ<sup>n</sup>? —càchí-gá xáha<sup>n</sup>-gǎ xii-güedé.

*Nàcuáa quide ñ<sup>n</sup> téee cùu fariséú ndìhi ñ<sup>n</sup> téee cùu cobradór*

<sup>9</sup> Te Jèsús ní cáhá<sup>n</sup>-gá núú ñáyiú nàcuáa quide ñáyiú sàni iní sá ío quide ndáá te dàquee tíhũ-yu tnàha ñáyiú-yu, te xáha<sup>n</sup>-gǎ xii-yu:

<sup>10</sup> —Úú cue téee cuáhá<sup>n</sup>-güedé veñúhu càhnu sá ío cùnuu cáhá<sup>n</sup> ndìhi-güedé Yá Ndiöxí, te ñ<sup>n</sup>-dé cúú-dě téee cùu fariséú, te ñgá-dé cúú-dě téee cuihna ìní-xi quide cobra ñàhá xii ñáyiú cuèndá impuèstú.

<sup>11</sup> Te téee cùu fariséú-á<sup>n</sup> nútní-dé càhá<sup>n</sup> ndìhi-dé Yá Ndiöxí, te xáha<sup>n</sup>-dě xii-gá: “Yòhó Dútú Ndiöxí ndàcá<sup>n</sup> táhù-í núú-n, chi ñá túú quide-í dàtná quidé dàva-gá-güedé, chi dùhu-güedé, càhá<sup>n</sup> ndìhi-güedé ñàdìhi te ñá díú ñàdìhi-güedé cúú-yu, te nándi-gá nchaa sá cuèhé sá dúhá quide-güedé, te ni ñà túú quide-í dàtná quidé tée cuihna ìní-xi quide cobra ñàhá xii ñáyiú cuèndá impuèstú ndécú íha. <sup>12</sup> Chi yúhú ñá túú tnàhí ná xéxì-í úú nduu xití samàná cuèndá sá càhá<sup>n</sup> ndìhi ñàhá-í xii-n, te nchaa sá ñìhí-í te càhu-í úxí xichi, te ñ<sup>n</sup> xichi tàxi-í xii-n”, càchí-dé



xăha<sup>n</sup>-dě xii Yá Ndiöxí. <sup>13</sup> Dico tée cuihna ìní-xi quide cobrá ñáhá xii ñáyiu cuendá impuèstú-á<sup>n</sup> chi xica lùha nutnîi-dé, te ni lùha ñá túú cùyii-dé ndonehe núú-dě andiu cuendá sá ndíxí cuèchi iní-dé nchaa sá ñà túú vâha quide-dé, te ndèdí ndaha-dé pèchú-dé sá ndìhú iní-dé, te xăha<sup>n</sup>-dě xii Yá Ndiöxí: “ïYòhó Dútú Ndiöxí cundàhú iní ñáhá xii-í, chi ío cuéhé sã ñà túú vâha quide-í núú-n!”, càchí-dé xăha<sup>n</sup>-dě xii Yá Ndiöxí. <sup>14</sup> Te na càchí tnúhu-í xii-ndo sã tée cuihna ìní-xi quide cobrá ñáhá xii ñáyiu-á<sup>n</sup> nî tedóho Yá Ndiöxí nchaa tnúhu ní cáhá<sup>n</sup>-dé, te ní quide càhnu iní-gá nchaa sá ñà túú vâha ní quide-dé, te cuánuhú-dé vehe-dé. Te tée cùu fariséú-á<sup>n</sup> ñà túú ní tètóho ñaha Yá Ndiöxí xii-dé. Chi nchaa ñáyiu na càda cahnu mee-xi ñuyíú-a te vá cúú-yu ñáyiu cùnunu, te nchaa ñáyiu ñà túú quide cahnu mee-xi, ñáyiu-á<sup>n</sup> cunúú-yu —càchí Jèsús xáha<sup>n</sup>-gã xií-yu.

*Jèsús quidé ï-gã landú*

*(Mt. 19:13-15; Mr. 10:13-16)*

<sup>15</sup> Te ìñú ñáyiu ndècá-yu landú lîhli cuáhá<sup>n</sup> núú Jèsús chi cuíní-yu sá téndàha ñaha-gá xii-güexi, te òré ní xiní cue tée xica cuu ndîhi-gá sá ndécã-yu landú-á<sup>n</sup> cuáhá<sup>n</sup> núú-gã, te ní ngüíta-güedé ténàá ñáhá-güedé xií-yu, te xăha<sup>n</sup>-güedé sá vã dúcá<sup>n</sup> càdá-yu. <sup>16</sup> Dico Jèsús ní cana ñaha-gã xii-güedé, te ní xáha<sup>n</sup>-gã:

—Chí dáñá ná quixi nahi landú lîhli-á<sup>n</sup> nùú-í-a, te vá càdí-ndó ìchi-güexi, chi dàtná cúú vâha iní cue landú lîhli-á<sup>n</sup> duca<sup>n</sup> cùu vâha iní cue ñáyiu yîndaha ñaha Yá Ndiöxí. <sup>17</sup> Te na càchí tnúhu ndáá-í xii-ndo sã nùu vá quìndáá iní ñáhá-ndó dàtná

quidé dàva landú lihli sàndáá iní ñáhá xii-í, te vá ndihu ndaha ñàha Yá Ndiöxí xii-ndo, te vá ndúú tǎhú-ndó cùndecu-ndo ndihi-gá ni caa ni quíhí<sup>n</sup> — cǎchí-gá xáha<sup>n</sup>-gǎ xii-güedé.

*I<sup>n</sup> tée cuica cǎhá<sup>n</sup> ndihi-dé Jèsús  
(Mt. 19:16-30; Mr. 10:17-31)*

18 Te i<sup>n</sup> tée cùnunu ní xicá<sup>n</sup> tnúhú-dě núú Jèsús, te xǎha<sup>n</sup>-dě xii-gá:

—Yòhó Mèstrú, cùu-n téé ío váha iní-xi, te cuení-í nǔu vá cùndèe iní-n cǎchí tnúhu-n nǎ cúú sǎ váha cada-í cuendá nduú tǎhú-í cundecu-í ndihi Yá Ndiöxí ni caa ni quíhí<sup>n</sup> — cǎchí-dé xǎha<sup>n</sup>-dě xii-gá.

19 Te Jèsús ní xáha<sup>n</sup>-gǎ xii-dé:

—¿Te cùtnuní iní-n nǎcuáa ndùu tnúhu cǎhá<sup>n</sup>-n sǎ yúhú váha iní-ǎ<sup>n</sup>? Chi i<sup>n</sup>dii díi-ni Yá Ndiöxí váha iní-gá. 20 Te yòhó xini-n nǎcuáa ní cachí Yǎ Ndiöxí cada ñáyiu, te duha ní cachí-gá: “Nchòhó cue téé vá cǎhá<sup>n</sup> ndihi-ndo ñàdihí te núu ñá díú ñàdihí-ndó cùú-yu, te duca<sup>n</sup>-ni nchòhó cue ñáyiu dìhí tucu vá cǎhá<sup>n</sup> ndihi-ndo tǎe te núu ñá díú yì-ndo cuu-güedé, te vá cǎhni-ndó tnàha ñáyiu-ndo, te ni vǎ dúhú-ndó sǎ ndécú ndihí-yu, te ni vǎ dǎcǎcu-ndo cuéchi neñuú sá cúú-xí tnàha ñáyiu-ndo, te canehe-ndo sǎ yíñuhu núú tǎtá-ndó ndihi núu nǎná-ndó”, duha ní cachí Yǎ Ndiöxí cada ñáyiu — cǎchí Jèsús xáha<sup>n</sup>-gǎ xii-dé.

21 Te téé-á<sup>n</sup> ñí xáha<sup>n</sup>-dě xii-gá:

—Nchaa xiǎ<sup>n</sup> ní ngüíta-í quidè-í ndéé cùtnàhá cúú làndú-í — cǎchí-dé xǎha<sup>n</sup>-dě xii-gá.

22 Te Jèsús ní xáha<sup>n</sup>-gǎ xii-dé:

—Dico cùmání ìngá núú sǎ cádá-n, vitna te quíhí<sup>n</sup>-n te dico-n nchàa sá ndécú ndìhi-n, te díhú<sup>n</sup>-n cuǎha táhú-n cuè ñáyiú ndàhú, te duca<sup>n</sup> te nduu táhú-n cùndecu váha-n núú ndécú Yǎ Ndiǒxí táxí tnùnì-gá, te na yǎha duca<sup>n</sup> càda-n te quixi-n chìtnahá ñáhá-n xii-í —càchí-gá xáha<sup>n</sup>-gǎ xii-dé.

<sup>23</sup> Te sá dúcá<sup>n</sup> ñí xáha<sup>n</sup> Jèsús xii-dé, te ío ní cundìyí-dé, chi ío cuica-dě. <sup>24</sup> Te sá ñí xiní ñáhá Jèsús xii-dé cundìyí-dé, núu ní cachí-gá:

—Íó úhú quíndáá iní ñáyiú cuica Yǎ Ndiǒxí cuèndá ndíhu ndaha ñàha-gá xií-yu! <sup>25</sup> Te yáchí-gá yáha ì<sup>n</sup> càméyu yaú ì<sup>n</sup> yìqui tìcú dàcúxí sǎ quíndáá iní ì<sup>n</sup> ñáyiú cuica Yǎ Ndiǒxí cuèndá ndíhu ndaha ñàha-gá xií-yu —duha ní cachí-gá.

<sup>26</sup> Te nchaa ñáyiú ní tecú dóho-xi tnúhu ní cáhá<sup>n</sup>-gá ní xáhǎ<sup>n</sup>-yu xii-gá:

—¿Te yoo naníhí tǎhú te núu duca<sup>n</sup> vǎi<sup>n</sup>? —càchí-yu xǎhǎ<sup>n</sup>-yu xii-gá.

<sup>27</sup> Te Jèsús ní xáha<sup>n</sup>-gǎ xií-yu:

—Cue ñáyiú ñuyíú-a chi vá ndácǔ-yu ná cadá-yu nàcuáa ndíhu ndaha ñàha Yá Ndiǒxí xií-yu, dico mee-gǎ chi ndacu-gá ndíhu ndaha ñàha-gá xií-yu chi nchaa sá vǎha ndàcu-gá quídé-gǎ —càchí-gá xáha<sup>n</sup>-gǎ xií-yu.

<sup>28</sup> Te té Pèlú ní xáha<sup>n</sup>-dě xii-gá:

—Nchúhú ní dándǒo-ndí nchaa sá ndécú ndìhi-ndí, te ní tuha ñaha-ndǐ xii-n —càchí-dé xǎha<sup>n</sup>-dě xii-gá.

<sup>29</sup> Te ní xáha<sup>n</sup>-gǎ xii ñáyiú:

—Na càchí tnúhu ndáá-í xii-ndo sǎ ncháá ñǎyiú na dándóo vehe-xi, àdi tátá-xi, nǎná-xi, ñaná-xi,

cúha-xi, ñadìhí-xi, déhe-xi cuèndá sá cuení-yu ndíhu ndaha ñàha Yá Ndiöxí xií-yu, <sup>30</sup> te ío-gá cuéhé sã cuãñaha-gã xií-yu cundecu ndihí-yu, te ñá díú-ní xǎ<sup>n</sup>, chi tnàhá nduu táhũ-yu cundecu ndihí ñàhá-yu xii-í nì caa nì quíhí<sup>n</sup> ná sàá nduu — càchí-gá xáha<sup>n</sup>-gã xií-yu.

*Jèsús càhá<sup>n</sup> tucu-gá sá cáhni ñàha-güedé xii-gá  
(Mt. 20:17-19; Mr. 10:32-34)*

<sup>31</sup> Te Jèsús ní taudì<sup>n</sup>-gá ndi ùxúú cue téé xìca cuu ndihí-gá tnuú ñáyiu, te ní xáha<sup>n</sup>-gã xii-güedé:

—Vitna te quíhí<sup>n</sup>-ó ñúú Jerusàlén, chi yàcá<sup>n</sup> cada-xi nchaa nàcuáa sa ní chídó tnùnì cue téé ní xóo cáhá<sup>n</sup> tnúhu Yá Ndiöxí ndéé sanaha nàcuáa yáha yúhú Téé cùu ñanì tnàhá-ndó nchàa-ndo.

<sup>32</sup> Chi cuáha cuèndá ñàhá-güedé xii-í núú cuè téé ñá túú cùu cue téé isràél, te cudíquí ndeé ñàhá-güedé xii-í, te cúcuèhé ñàhá-güedé, te túú díí ñàhá-güedé xii-í. <sup>33</sup> Te caniha-güedé ndihí ñì, te dàtnùnì cahni ñàha-güedé xii-í, dico nduu únì sá cùú-í te ndoto-í —càchí-gá xáha<sup>n</sup>-gã xii-güedé.

<sup>34</sup> Dico ni ñì<sup>n</sup> tnúhu ní cáhá<sup>n</sup>-gá ñá túú ní tècú tnùnì-güedé, chi ío yídáhu tnúhu ní cáhá<sup>n</sup>-gá ñuu xǎ<sup>n</sup> ni ñì<sup>n</sup> ñá túú ní tècú tnùnì-güedé.

*Jèsús quidé tǎtna-gá núú ñì<sup>n</sup> téé cuáá ñúú Jerìcò  
(Mt. 20:29-34; Mr. 10:46-52)*

<sup>35</sup> Te òré tá cùyatni Jèsús ñúú Jerìcò cuáhá<sup>n</sup>, te yuhu ìchi cuáhá<sup>n</sup>-gá-á<sup>n</sup> núcõo ñì<sup>n</sup> téé cuáá xìcá<sup>n</sup> ndàhú-dé. <sup>36</sup> Te òré ní tecú dóho-dé xìcáhá<sup>n</sup> vài ñáyiu xiyáha-yu, te ní xìcá<sup>n</sup> tnúhú-dé núú ñáyiu ndècu ndihí-dé ná cuèndá duca<sup>n</sup> vài-yu yáha. <sup>37</sup> Te

ní xáhã<sup>n</sup>-yu sá Jèsús téé ñuú Nazàrét ñúhú-dě ichi.

<sup>38</sup> Te níhi ní cáhá<sup>n</sup>-dé, te xáha<sup>n</sup>-dě xii-gá:

—Jèsús ñaní tnáhá ndïi Dàvií, cundàhú iní ñáhá xii-í! —càchí-dé xáha<sup>n</sup>-dě xii-gá.

<sup>39</sup> Te ñáyiu xĩxódó núú nũú Jèsús ní tenàá ñáhã-yu xii-dé, te xáhã<sup>n</sup>-yu sá ná càdí-dé yuhu-dé dico uu<sup>n</sup>-gá níhi ní cáhá<sup>n</sup>-dé xáha<sup>n</sup>-dě xii-gá:

—Yòhó téé cùu ñaní tnáhá ndïi Dàvií, cundàhú iní ñáhá xii-í! —càchí-dé xáha<sup>n</sup>-dě xii-gá.

<sup>40</sup> Te Jèsús ní ngüíñí-gá, te ní táúchíú<sup>n</sup>-gã ní sángxuehe<sup>n</sup> ñaha cuè téé ndihí-gá. Te òré ní quexìo-dé núú-gã, te ní xícá<sup>n</sup> tnúhú-gã núú-dě, te xáha<sup>n</sup>-gã:

<sup>41</sup> —¿Ná cuìní-n càda ñaha-í xii-n-i? —càchí-gá xáha<sup>n</sup>-gã xii-dé.

Te téé cuàá-á<sup>n</sup> ñí xáha<sup>n</sup>-dě:

—Mèstrú, cuìní-í cada tátna-n nũ-í cuèndá cundehe-í —càchí-dé xáha<sup>n</sup>-dě xii-gá.

<sup>42</sup> Te Jèsús ní xáha<sup>n</sup>-gã:

—Sa ní ndúha núú-n chi ní sándáá iní-n Yá Ndiõxí —càchí-gá xáha<sup>n</sup>-gã xii-dé.

<sup>43</sup> Te òré-ni-á<sup>n</sup> ñí ndúha núú-dě, te ní chinchícú<sup>n</sup>-dé Jèsús, te ní cachí-dé sá ïo càhnu cuu Yá Ndiõxí. Te nchaa ñáyiu ní xiní nàcuáa ní cuu ní ndúha núú-dě tnáhá-yu ní cachí-yu sá ïo càhnu cuu Yá Ndiõxí.

## 19

### *Jèsús ndihí ñí téé nàni Zaquéú*

<sup>1</sup> Te Jèsús ní sáá-gá ñuú Jericó, te ta yãha-gá xití ñuú-á<sup>n</sup> cuáhá<sup>n</sup>. <sup>2</sup> Te ñuú-á<sup>n</sup> ndécú ñí téé cuica nàni-dé Zàquéú, te cùnuu-dé táxí tnùnì-dé cue téé cùndihí-dé, cue téé cuihna iní-xi quìde cobrá ñáhá xii ñáyiu cuèndá impuèstú. <sup>3</sup> Te téé-á<sup>n</sup> cuìní-dé

quiní-dé Jèsús òré-á<sup>n</sup> ní cùu te ñá ní ndàcu-dé, chi ío cuéhé ñǎyiu, te ñá túú dùcú<sup>n</sup>-dé. <sup>4</sup> Te xìnu-dé ní ngódó núú-dě te ní sáá-dé díquí ñ<sup>n</sup> yutnu sìcómorú nùtní yatni yuhu ìchi núú yǎha Jèsús cuèndá cuìní-dé quiní ñáhá-dě xii-gá. <sup>5</sup> Te òré tá yǎha Jèsús xía<sup>n</sup>, te ní ndonehe núú-gǎ díquí yutnu núú cándòdo-dé-á<sup>n</sup>, te ní xáha<sup>n</sup>-gǎ xii-dé:

—Zàqueú, tanùu ndíhi díquí yutnu-á<sup>n</sup>, chi tnaví quexìo-í vehe-n ndètátú-í —càchí-gá xáha<sup>n</sup>-gǎ xii-dé.

<sup>6</sup> Te té Zàqueú-á<sup>n</sup> ñí nuu ndíhi-dé díquí yutnu-á<sup>n</sup>, te ío ní cudíí ìní-dé ní quehe<sup>n</sup> cuèndá-dé Jèsús vehe-dé. <sup>7</sup> Te sá ñí xíní ñáyiu ní quexìo Jesús vehe-dé, te ncháá-yu ní ngúíta-yu càhá<sup>n</sup> cuéhé-yu cuèndá-gá, te xítnàhá-yu:

—Tée-a cuánguìhu-dé vehe ñ<sup>n</sup> té ndècu ichi cuehé ichi duha —càchí-yu xítnàhá-yu.

<sup>8</sup> Te té Zàqueú-á<sup>n</sup> ñí ndacuíñí-dé tnuú-yu, te xáha<sup>n</sup>-dě xii Jèsús:

—Yòhó Mèstrú, na cuǎha-í ñáyiu ndàhú cuádava nchaa sá ndécú ndíhi-í. Te núu yoo ní dándàhú-í ní dúhù-í, te codo ùní-gá tnàhá sá ñí dúhù-í-yu nacuáñaha-í xii-yu —càchí-dé xáha<sup>n</sup>-dě xii-gá.

<sup>9</sup> Te Jèsús ní xáha<sup>n</sup>-gǎ xii té Zàqueú:

—Vitna ní naníhí tàhú-n ndíhi nchaa ñáyiu xíndecu vehe-n, chi tnàhá-n cùu-n ñaní tnàhá ndíi Àbrahám. <sup>10</sup> Te yúhú Tée cùu ñaní tnàhá-ndó nchàa-ndo véxi-í nándùcu-í ñáyiu ní xíta nihnu cuèndá dàcácu nihnu-í-yu núú ùhú núú ndàhú —càchí-gá xáha<sup>n</sup>-gǎ xii-dé.

*Nàcuáa ní quide-güedé ndihi díhú<sup>n</sup> cuàá<sup>n</sup>  
(Mt. 25:14-30)*

<sup>11</sup> Te nchaa ñáyi<sup>n</sup>-á<sup>n</sup> nǐ sani iní-yu sá ndíhi-ni ndíhu ndaha ñàha Yá Ndiǒxí xii-yu cuèndá sá nǐ cuyatni Jèsús ñuú Jerusàlén, te xǎ<sup>n</sup> nǔu ní ngüíta Jèsús ní cani-gá ì<sup>n</sup> cuèndú núu-yu cuèndá tecú tnùnǐ váha-yu tnúhu-gá. <sup>12</sup> Te xáha<sup>n</sup>-gǎ xií-yu:

—Ní xíndecu ì<sup>n</sup> téé cùu ñanǐ tnáhá ñáyi<sup>n</sup> cùnuu, te cuáhá<sup>n</sup>-dé ingá ñuú xícá cuèndá yácá<sup>n</sup> cuáha ñaha-güedě chiu<sup>n</sup> coo-dé, te dǎtnùnǐ ndixi-dé quíndaha-dě titnǐ ñuú. <sup>13</sup> Te cùmání-gǎ quee-dé quíhí<sup>n</sup>-dé, te ní cana-dé úxí cue téé xínu cuechi núu-dě, te ní sáñaha-dě ndí díí<sup>n</sup> nǔú-güedě ì<sup>n</sup> caa ì<sup>n</sup> caa díhú<sup>n</sup> cuàá<sup>n</sup>, te ní xáha<sup>n</sup>-dě: “Chí cádá ndáhú ndihi díhú<sup>n</sup>-ǎ<sup>n</sup> ndéé ná sàá nduu nàsáá-í”, cǎchí-dé xǎha<sup>n</sup>-dě xii-güedé. <sup>14</sup> Dico nchaa ñáyi<sup>n</sup> ñuú quíndaha-dě-á<sup>n</sup> ñà túú tnáhá iní-yu sá quíndaha ñaha-dé, núu ní tendàhá-yu cue téé nèhe tnúhu cuáhá<sup>n</sup> núu cuè téé cuáñaha chiu<sup>n</sup> coo-dé-á<sup>n</sup>, te ní xáhǎ<sup>n</sup>-yu sá cǔñaha-güedě sá ñà túú tnáhá iní-yu sá tǎe-á<sup>n</sup> quíndaha ñaha-dé xií-yu.

<sup>15</sup> Dico dacuítí sǎ nǐ sáha-güedé téé-á<sup>n</sup> chiu<sup>n</sup> coo-dé sá díú-dě quíndaha-dě ñáyi<sup>n</sup> nchaa ñuú-á<sup>n</sup>, te ní nacuico-dě cuánuhú-dé ñuú-dé. Te òré ní nasáá-dé vehe-dé, te ní tendaha-dě ì<sup>n</sup> téé ní sánúcana ñaha xì cue téé xínu cuechi núu-dě, cue téé ní dándǒ ndaha-dě díhú<sup>n</sup> cuèndá cǎcá<sup>n</sup> tnúhú-dě núu-güedě ì<sup>n</sup> ì<sup>n</sup>-güedé nǔu ndéé dau ní chídó-xí díquí díhú<sup>n</sup> sǎ nǐ dándǒ ndaha ñaha-dé-á<sup>n</sup>. <sup>16</sup> Te téé ní ndèxio díhna xǎha<sup>n</sup>-dě: “Pàtróó<sup>n</sup>, ní quide-í ndáhú ndihi díhú<sup>n</sup>-n sǎ nǐ dándǒ ndaha ñaha-n xii-í, te sá ì<sup>n</sup> nǐ taxi-n te ní chídó-xí ùxí-gá tnáhá te náu-a

naquehe<sup>n</sup> cuendá-n”, cächí-dé xăha<sup>n</sup>-dě. 17 Te tée cùu patróó<sup>n</sup>-dě-á<sup>n</sup> nǐ xáha<sup>n</sup>-dě: “Ío váha tée xínu cuechi cuu-n chi ío váha ní quide-n, te sá nǐ quide váha-n ndihí sacú díhú<sup>n</sup> sǎ nǐ dándõ ndaha ñaha-ĩ xii-n, te xiá<sup>n</sup> nõu yúhú cächí-í sá táxí tnùní-n ùxí ñuú vitna”, cächí-dé xăha<sup>n</sup>-dě. 18 Te ní ndexìo ingá-dé, te ní xáha<sup>n</sup>-dě: “Pàtróó<sup>n</sup>, ní quide-í ndáhú ndihí díhú<sup>n</sup>-n sǎ nǐ dándõ ndaha ñaha-n xii-í, te sá ñ<sup>n</sup> nǐ taxi-n te ní chídó-xí ùhú<sup>n</sup>-gá tnàhá te náu-a naquehe<sup>n</sup> cuendá-n”, cächí-dé xăha<sup>n</sup>-dě. 19 Te ní xáha<sup>n</sup> tée cùu patróó<sup>n</sup>-dě-á<sup>n</sup> xii-dé: “Te yòhó taxi tnùní-n ùhú<sup>n</sup> ñuú”, cächí-dé xăha<sup>n</sup>-dě xii tée xínu cuechi-á<sup>n</sup>. 20 Te dătnùní ní ndexìo tucu ingá-dé, te xăha<sup>n</sup>-dě: “Pàtróó<sup>n</sup>, náu díhú<sup>n</sup>-n-á, te naquehe<sup>n</sup> cuendá-n chi ní taxúha-í ní chidúcú<sup>n</sup>nuu-í ñ<sup>n</sup> pàñú te ñá túú ní quide-í ndáhú ndihí díhú<sup>n</sup>-n, 21 chi ní yùhú ñáhà-í xii-n, chi cùu-n ñ<sup>n</sup> tée díí, te nàquehe<sup>n</sup>-n ñ<sup>n</sup> sá ñà túú ní tàxi ndecu-n, te nàtahu-n ñ<sup>n</sup> xichi núú ñà túú ní chihi-n tatá”, cächí-dé xăha<sup>n</sup>-dě xii pàtróó<sup>n</sup>-dě. 22 Te ní xáha<sup>n</sup> pàtróó<sup>n</sup>-dě xii-dé: “Yòhó cúu-n ñ<sup>n</sup> tée cuihna ìní-xi xínu cuechi núù-í, te dıu-ni nchaa tnúhu cáhá<sup>n</sup>-n-ă<sup>n</sup> cächí tnùní-xi nàcuáa cuu ndáá cuéchi-n. Te núu sàni ìní-n sǎ cúu-í ñ<sup>n</sup> tée díí, te nàquehe<sup>n</sup>-í ñ<sup>n</sup> sá ñà túú ní tàxi ndecu-í, te nàtahu-í ñ<sup>n</sup> xichi núú ñà túú nǐ chihi-í tatá, 23 te núu duca<sup>n</sup> ña, ¿te ná cuendá ñá túú ní càhu ìní-n dása<sup>n</sup> nuu-n díhú<sup>n</sup> nǐ taxi-í, te cúñaha-n chăhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naquehe<sup>n</sup> cuendá-í ní cùu-í?”, cächí-dé xăha<sup>n</sup>-dě xii tée xínu cuechi-á<sup>n</sup>. 24 Te ní xáha<sup>n</sup> tée cùu patróó<sup>n</sup>-á<sup>n</sup> xii cue tée xındecu xiá<sup>n</sup>: “Chí quèndèè díhú<sup>n</sup> cuàá<sup>n</sup> néhé tée-a, te cuáha-ndo tée nèhe úxí tucu díhú<sup>n</sup>



cuàá<sup>n</sup>-á<sup>n</sup>”, càchí-dé xăha<sup>n</sup>-dě xii-güedé. <sup>25</sup> Te ní xáha<sup>n</sup>-güedé: “Pàtróó<sup>n</sup>, dico sa nêhe-dé úxí díhú<sup>n</sup> cuàá<sup>n</sup>”, càchí-güedé xăha<sup>n</sup>-güedé. <sup>26</sup> Te ní xáha<sup>n</sup> tée cùu patróó<sup>n</sup>-á<sup>n</sup>: “Na càchí tnúhu-í xii-ndo sã cuè ñáyiú ió xii-xi te níhí-gă-yu cundecu ndihí-yu, te cue ñáyiú sacú ndécú ndihí cuita ndihí nihnu nchaa sá ndécú ndihí-yu”, càchí tée cùu patróó<sup>n</sup>-á<sup>n</sup> xăha<sup>n</sup>-dě xii-güedé. <sup>27</sup> Te xăha<sup>n</sup> tùcu-dé xii-güedé: “Nchaa ñáyiú cùu úhú iní ñáhá xii-í ñã tnàhá iní-yu quindaha-í-yu, te chí cándecá-yu taquixi iha, te cahni-ndõ-yu núù-í-a”, càchí tée cùu patróó<sup>n</sup>-á<sup>n</sup> xăha<sup>n</sup>-dě xii-güedé —duha cuáhá<sup>n</sup> cuèndú ní cani Jèsús núú ñáyiú.

*Jèsús cuánguïhu-gá ñuú Jerusàlén*

*(Mt. 21:1-11; Mr. 11:1-11; Jn. 12:12-19)*

<sup>28</sup> Te sátá dúcá<sup>n</sup> ñí cáhá<sup>n</sup>-gá, te ní nucúhu<sup>n</sup> ichi-gá cuáhá<sup>n</sup>-gá ñuú Jerusàlén. <sup>29</sup> Te òré sa ní cuyatni-gá ñuú Bètfaqé, ndihí ñuú Bètaniá te xía<sup>n</sup> cáá yùcu nani Olívú, te ní xáha<sup>n</sup>-gă xii úú cue tée xica cuu ndihí-gá:

<sup>30</sup> —Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup>, te naníhí-ndó ì<sup>n</sup> búrru ndètníi-di, te vátá yõ ì<sup>n</sup>-gá codo ñàha xii-di, te nandaxi-ndo-di te candeca-ndo-di quixi. <sup>31</sup> Te núu yoo na càcá<sup>n</sup> tnúhu núú-ndó ñã cuèndá nándaxi-ndo-di, te cúñaha-ndo xii-yu sá yũhú Yaá xicá cùu ndihí-ndo xini ñuhu-í-di —càchí-gá xáha<sup>n</sup>-gă xii-güedé.

<sup>32</sup> Te cue tée-á<sup>n</sup> ñí xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús duca<sup>n</sup> ñí cuu, <sup>33</sup> chí mei òré nándaxi-güedé búrru-á<sup>n</sup> ñí quexìo cue

ñáyiú cùu xítóhó-di xìcá<sup>n</sup> tnúhu-yu núú-güedě, te xǎhǎ<sup>n</sup>-yu:

—¿Ná cuendá nándàxi-ndo búrru-ndí-i? —  
càchí-yu xǎhǎ<sup>n</sup>-yu.

<sup>34</sup> Te ní xáha<sup>n</sup>-güedě xií-yu:

—Nà ndaxi-ndí-di chí Yaá xícá cùu ndihí-ndí xíní ñùhu ñaha-gá xii-di —càchí-güedé xǎha<sup>n</sup>-güedé xií-yu.

<sup>35</sup> Te ndèca-güedé-di cuáhá<sup>n</sup> núú ndécú Jèsús, te òré ní quexìo-güedé ndihí-di núú ndécú-gǎ te ní sacá<sup>n</sup> ndodo-güedé dóo-güedě sátá-di, te ní ngódó ñáhá-gǎ xii-di. <sup>36</sup> Te ío cuéhé ñáyiú ta sàcá<sup>n</sup>-yu dóo-yu ichi cuáhá<sup>n</sup>-gá cuendá núú dǒo-yu-á<sup>n</sup> yǎha-gá ndihí quití yòdo-gá. <sup>37</sup> Te ní nucuíta nuu-gá ichi tindúú yucu Òlívú tá cùyatni-gá ñúú Jerusàlén cuáhá<sup>n</sup>, te nchaa ñáyiú sàndáá iní ñáhá xii-gá nchìcú<sup>n</sup> ñáhǎ-yu te ní ngúíta-yu níhi càhá<sup>n</sup>-yu sá cúdǐí iní-yu, te càchí-yu sá ío càhnu cuu Yá Ndiǒxí cuendá sá ñí xíní-yu nchaa sá vǎ yǒo tnàhí ndàcu cada ní quide-gá. <sup>38</sup> Te càchí-yu:

—Ío càhnu cuu Yaá véxi quíndaha ñàha xii-o, te dǐu-gá cúú-gǎ Yaá ní tendaha Yǎ Ndiǒxí véxi quide núú-gǎ! ;Te ío càhnu cuu mee-gá! ;Te andíu ñǎ túú tnàhí ná cúú! —duha càchí-yu.

<sup>39</sup> Te ñ<sup>n</sup> úú cue téé cùu fariséú ñúhú tnàhá tnuú ñáyiú-á<sup>n</sup> ñí xáha<sup>n</sup>-güedě xii Jèsús:

—Mèstrú, cúñaha nchaa ñáyiú ndihí-n na càdí-yu yuhú-yu —càchí-güedé xǎha<sup>n</sup>-güedé xii-gá.

<sup>40</sup> Dico Jèsús ní xáha<sup>n</sup>-gǎ xii-güedé:

—Te na càchí tnúhu-í xii-ndo sǎ ñúu ñáyiú-a na càdí-yu yuhú-yu ña, te nchaa yúú cǎhá<sup>n</sup> níhi-xi dàtná ñ<sup>n</sup> ñáyiú —càchí-gá xáha<sup>n</sup>-gǎ xii-güedé.

41 Te òré ní cuyatni-gá ñuú Jerusàlén te ní xiní-gá, te ní ndáhyú-gá cuèndá nchaa ñáyiú dii ñùú-xi-á<sup>n</sup> sã ndìhú iní-gá. 42 Te ní xáha<sup>n</sup>-gã xii cue ñáyiú-á<sup>n</sup>:

—Ío cuu váha iní-í te núu dícó nchòhó tecú tnùní-ndó vìtna ì<sup>n</sup> tnúhu sá cádá vãha ñaha xìi-ndo, chi ñá túú-gã ná cuu cundecu-ndo, te núu na tècú tnùní-ndó. Dico ñá tècú tnùní-ndó, chi ío yìdáhu tnúhu-a. 43 Te sáá nduu tnündòho tnúhu ndàhú sá cúú-xi-ndó, te nchaa cue téé dava-gá ñuú cúú ùhú iní tnáhá ndìhi-ndo quixi-güedé chidoco ñaha-güedé xii-ndo, te ñi càndéé núú ndécú-ndó-ã<sup>n</sup> dacàa-güedé ndóho cuèndá xíá<sup>n</sup> quihì váha-güedé nàá ndìhi ñaha-güedě xii-ndo, te vá dáñá-güedě cunu-ndo. 44 Te cahni ñaha-güedě xii-ndo, te ndìhi nchaa vehe-ndo dàngoyo-güedé ndéé cimièntú-xi, chi ñá túú ní cuiní-ndó nàcuáha-ndo cuèndá òré ní quixi coto ñaha Yã Ndiòxí xii-ndo —duha ní xáha<sup>n</sup>-gã xii ñáyiú ñuú-á<sup>n</sup>.

*Jèsús ñá túú tnáhá iní-gá nàcuáa quidé-yu veñúhu (Mt. 21:12-17; Mr. 11:15-19; Jn. 2:13-22)*

45 Te Jèsús cuánguihu-gá xití veñúhu càhnu sá ío cùnunu, te xití veñúhu-á<sup>n</sup> xĩndecu cue ñáyiú quide ndáhú ndìhi cue ñáyiú xĩsaa<sup>n</sup>. Te ní queñuhu ñaha Jèsús xií-yu quehé. 46 Te ní xáha<sup>n</sup>-gã xií-yu:

—Núú tütú Yã Ndiòxí càhá<sup>n</sup>-xi nàcuáa ní càhá<sup>n</sup>-gá, te duha ní cachí-gá: “Vehe-í cúú-xi núú càhá<sup>n</sup> ndìhi ñaha ñáyiú xii-í”, duha ní càhá<sup>n</sup>-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáha<sup>n</sup>-gã xií-yu.

47 Te Jèsús nchaa nduu dànehé-gá ñáyiú xití veñúhu, dico cue téé cùu dútú cùnunu, ndìhi cue téé dàcuaha ñaha xii ñáyiú nchaa tnúhu ní chídó

tnùní ndíi Moisés, ndìhi cue tée cùnuu ñúú-án ndúcú-güedě nàcuáa cada-güedé cahni ñaha-güedě xii-gá. <sup>48</sup> Dico ñá nìhí-güedé nàcuáa cada-güedé, chi cuèndá nchaa ñáyiú ío cùdíí ìní-yu ndèdóho-yu nchaa tnúhu càhá<sup>n</sup>-gá.

## 20

*Jèsús ndécú ndìhi-gá tnúhu ndee ìní  
(Mt. 21:23-27; Mr. 11:27-33)*

<sup>1</sup> Te ñ<sup>n</sup> nduu yìhi Jèsús xití veñúhu càhnu sá ïo cùnuu danehé-gá ñáyiú tnúhu sá càhá<sup>n</sup> nàcuáa naníhí tàhú-yu. Te ní quexìo cue tée cùu dútú cùnùu ndìhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndìhi cue tée cùu sacuéhé nùú ñáyiú isràél, <sup>2</sup> te ní xáha<sup>n</sup>-güedě xii-gá:

—Cuìní-ndí cachí tnúhu-n xii-ndí nása ndùu tnúhu ndee ìní ndécú ndìhi-n núu quide-n nándi sá quidé-n. ¿Te yoo duca<sup>n</sup> ñí taxi tnúhu ndee ìní-án xii-n? —càchí-güedé xáha<sup>n</sup>-güedě xii-gá.

<sup>3</sup> Te Jèsús ní xáha<sup>n</sup>-gá:

—Yúhú tnàhá-í cuìní-í cáca<sup>n</sup> tnúhu-í ñ<sup>n</sup> sá càca<sup>n</sup> tnúhu-í núú-ndó, te cachí tnúhu-ndo. <sup>4</sup> Te chí càchí tnúhu xii-í yoo ní táuchíú<sup>n</sup> ñí dácúándùte ndíi Juáá ñáyiú. ¿Yá Ndiöxí ã<sup>n</sup> cuè tée ñuyíú-a ní táuchíú<sup>n</sup> dùca<sup>n</sup> ní quide ndíi? —càchí-gá xáha<sup>n</sup>-gá xii-güedé.

<sup>5</sup> Te ní ngüíta-güedé xítnàha-güedé:

—¿Nása cúñaha-o? Chi núu nà cúñaha-o sã Yã Ndiöxí ní táuchíú<sup>n</sup> dùca<sup>n</sup> ní quide ndíi Juáá ñá, te quesaha-dě: “¿Ná cuèndá ñá túú ní sàndáá ìní-ndó tnúhu ní cáhá<sup>n</sup> ndíi vèí<sup>n</sup>?”, quesaha-dě. <sup>6</sup> Àdi te núu nà cúñaha-o sã cuè ñáyiú ñuyíú-a ní táuchíú<sup>n</sup> dùca<sup>n</sup> ní quide ndíi ña, te nchaa ñáyiú cuáha ñàhá-yu yúú

xii-o, te cahni ñàhá-yu, chi càchí-yu sá ndàá sá Yá Ndiõxí ní táuchíú<sup>n</sup>-gă ní cáhá<sup>n</sup> ndíi Juàá tnúhu-gá núú ñăyiu —càchí-güedé xitnàha-güedé.

<sup>7</sup> Te ní xáha<sup>n</sup>-güedě xii-gá sá ñà túú xìní-güedé yoo ní táuchíú<sup>n</sup> ðuca<sup>n</sup> ní dácua<sup>n</sup>ndüte ndíi Juàá ñăyiu.

<sup>8</sup> Te ní xáha<sup>n</sup> Jèsús xii-güedé:

—Te núu duca<sup>n</sup> te ni yùhú vá càchí tnúhu-í xii-ndo yòo ní taxi tnúhu ndee ìní duha quide-í —càchí-gá xáha<sup>n</sup>-gă xii-güedé.

*Cuèndá cue tée cuihna ìní-xi  
(Mt. 21:33-44; Mr. 12:1-11)*

<sup>9</sup> Te sátá dúcá<sup>n</sup> te ní ngüíta Jèsús ní cani-gá ì<sup>n</sup> cuèndú núú ñăyiu nàcuáa tecú tnùní-yu tnúhu-gá, te xáha<sup>n</sup>-gă xií-yu:

—Ì<sup>n</sup> tée ní xitu-dé mee-ni yòho yaha stilé núú ñúhú-dě. Te ní sáá ì<sup>n</sup> nduu quǐngaca cuu xica-dě vài nduu te ní dándõo ndaha-dě sá ñí xitu-dé-á<sup>n</sup> xii ì<sup>n</sup> úú cue tée cáhá<sup>n</sup> ndíhi-dé cuèndá cada chiú<sup>n</sup>-güedé, te ní ndatnúhu-güedé sá òré ná cùu te cuu cuèndá dava-güedé te duca<sup>n</sup> te ní quee-dé cuáhá<sup>n</sup>-dé. <sup>10</sup> Te sátá ñí sáá nduu ñí cuu nchaa ndéhé yoho yàha stilé sá ñí xitu-dé-á<sup>n</sup>,

te ní xáha<sup>n</sup>-dě xii ì<sup>n</sup> tée xìnu cuechi núú-dě: “Cuàhá<sup>n</sup> cácá<sup>n</sup>-n sã cúú cuèndá-í núú cuè tée ní dándõo ndàha-í nchaa yoho yàha stilé sá ñí xitu-í”, càchí-dé xăha<sup>n</sup>-dě. Te tée xìnu cuechi-á<sup>n</sup> ñí xica-dé cuáhá<sup>n</sup>-dé, dico cue tée ndéè nchaa yoho yàha stilé-á<sup>n</sup> ñí tñi-güedé tée xìnu cuechi-á<sup>n</sup> te ní caniha-güedě, te ní nacuícú<sup>n</sup> ñáhá-güedě xii-dé, te ñã túú tnàhí ná ní sãñaha-güedě. <sup>11</sup> Te dătnùní tée cùu xítóhó nchaa yoho yàha stilé-á<sup>n</sup> ñí tendaha tùcu-dé ingá tée xìnu cuechi núú-dě cuáhá<sup>n</sup>-dé, dico ðiu-ni duca<sup>n</sup> ñí quide ñaha-güedě xii-dé,

chi ní xícuèhé ñáhá-güedě, te ní caniha-güedě te ní nacuícú<sup>n</sup> ñáhá-güedě, te ñá túú tnahí ná ní sãñaha-güedě. <sup>12</sup> Te téé cùu xítóhó nchaa yoho yàha stilé-á<sup>n</sup> ñí tendaha tùcu-dé ingá-dé cuáhá<sup>n</sup>-dé, te diu-ni duca<sup>n</sup> ñí quide ñaha tùcu-güedé, chi ní dánícuèhé ñáhá-güedě, te ní nacuícú<sup>n</sup> ñáhá-güedě.

<sup>13</sup> Te téé cùu xítóhó nchaa yoho yàha stilé-á<sup>n</sup> ñí sani iní-dé: “¿Nása cada-í vitna? Váha-gá tendaha-í déhe-í téé ío cùu iní-a núhú-dé, chi cudana te òré quini ñáhá-güedě xii-dé, te canehe-güedé sá yíñùhu núú-dě”, duha ní sani iní-dé. <sup>14</sup> Dico òré ní xiní cue téé quide chiu<sup>n</sup>-á<sup>n</sup> dēhe xítóhó nchaa yoho yàha stilé-á<sup>n</sup>, te ní xítñaha-güedé: “Téé-ã<sup>n</sup> téé véxi nduu táhú ñuhu-a ndíhi nchaa sá cáá núú-xi, dico cahni-o-dě te mee-o ndùu tahú-ó sã ndúú táhú-dě”, càchí-güedé xítñaha-güedé. <sup>15</sup> Te ní queñuhu ñaha-güedé ì<sup>n</sup> xio yuhu ñùhu-á<sup>n</sup>, te ní sahani ñaha-güedě xii-dé —duha cuáhá<sup>n</sup> cuëndú ní cani Jèsús núú-yu.

Te dàtnùní ní xáha<sup>n</sup> tùcu-gá xií-yu:

—¿Te nchòhó sa cùtnuní iní-ndó nàcuáa cada ñaha xítóhó ñuhu-á<sup>n</sup> xii cue téé-á<sup>n</sup> ñã? <sup>16</sup> Chi núhú-dé te cahni-dé cue téé-á<sup>n</sup>, te dándóo ndaha-dě ñuhu-dé xii cue téé cùtnuní iní-dé cada ndáá —càchí-gá xáha<sup>n</sup>-gã xií-yu.

Te sá dúcá<sup>n</sup> ñí cáhá<sup>n</sup>-gá, núu ní cachí-yu:

—¡Sá vã càchí Ndiõxí sá dúcá<sup>n</sup> yàha-o! —càchí-yu.

<sup>17</sup> Te Jèsús ní ndacoto-gá núú-yu, te ní xáha<sup>n</sup>-gã:

—Chí càchí tñúhu nása quèe-xi nacuáa càhá<sup>n</sup>-xi núú tütú Yã Ndiõxí, núú càchí-xi:

Yúú sã ñí dáquéé tñú cue téé dàcaa vehe ní saa-xi cùu-xi yúú cúnùu vitna.

Duha càchí-xi núú tütú-gá. <sup>18</sup> Te nchaa ñáyiú ñá túú cuíní tñi tñúhu-í, te ndohó-yu dàtná ñi ñáyiú tñàhnú duu<sup>n</sup> òré ndùá-yu núú yúú, àdi núu na tàú ñáhá-xí te dàcachi duu<sup>n</sup> ñaha-xi —cachí-gá xáha<sup>n</sup>-gá xii-yu.

*Cuèndá impuèstú*

(Mt. 21:45-46; 22:15-22; Mr. 12:12-17)

<sup>19</sup> Te cue téé cùu dútú cúnùu, ndihi cue téé dàcuaha ñaha xii ñáyiú nchaa tñúhu ní chídó tñuní ndíi Moisés ní cuíní-güedé tñi-güedé Jèsús òré-ni-á ní cùu, chi ní cutnùní iní-güedé sá cuèndá-güedé ní cáhá<sup>n</sup>-gá, dico ní yùhú-güedé cuèndá sá ío vài ñáyiú. <sup>20</sup> Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue téé cuáhá<sup>n</sup> ngoto dayuhu ñàha xii-gá, te cuáhá<sup>n</sup>-güedé dàtná cue téé váha iní-xi, te ndùcu-güedé nàcuáa cada-güedé nùu cáhá<sup>n</sup>-gá ñi tñúhu sá ñà túú tàú-gá cáhá<sup>n</sup>-gá cuèndá duca<sup>n</sup> te candeca ñaha-güedé xii-gá quíhí<sup>n</sup> cuáha cuèndá ñáhá-güedé núú tée cùnùu. <sup>21</sup> Te ní xáha<sup>n</sup>-güedé xii Jèsús:

—Mèstrú, ñihí-ndí tñúhu sá dánèhé-n ñáyiú mee-ni tñúhu váha, te cuéi ndédani càa ñáyiú ñi-ni càhá<sup>n</sup>-n ndíhí-yu, te càhá<sup>n</sup> ndáá-n nàcuáa càhá<sup>n</sup> Yá Ndiõxí cundecu-o ñùyíú-a. <sup>22</sup> Te cachí tñúhu xii-ndí nùu váha-ni cháhu-ndí té Cèsár téé ío cùnùu cuèndá impuèstú ñi ñáhá —càchí-güedé xáha<sup>n</sup>-güedé xii-gá.

<sup>23</sup> Dico Jèsús ní cutnùní iní-gá sá xító ndéé ñáhá-güedé xii-gá, núu ní xáha<sup>n</sup>-gá xii-güedé:

<sup>24</sup> —Chí dánèhé ñáhá xii-í ñi díhú<sup>n</sup> cuixí<sup>n</sup> te cachí tñúhu-ndo nùu yoo núú-xi ndéé, ndihi yoo diu-xi ndéé —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núú tǎ Cèsár ndèé ndìhi dǐu-dé —càchí-güedé xǎha<sup>n</sup>-güedě xii-gá.

<sup>25</sup> Te ní xáha<sup>n</sup> tùcu-gá xii-güedé:

—Te núu duca<sup>n</sup> te chí nácuǎha té Cèsár sá cúu cuendá-dé, te sá cúu cuendá méé Yǎ Ndiǒxí, te xǎ<sup>n</sup> nacuáha-ndo-gǎ —càchí-gá xáha<sup>n</sup>-gǎ xii-güedé.

<sup>26</sup> Te ñá ní ndàcu tnahí-güedé datìcánuu ñaha-güedě xii-gá núú tnǎhu càhá<sup>n</sup>-gá, chi òré ní cáhá<sup>n</sup>-gá, te da ní cuñúhu-güedé nchaa tnúhu ní cáhá<sup>n</sup>-gá, te váha-gá ní sadí-güedé yuhu-güedé.

*Cuendá nchaa ñáyiú ndoto*

*(Mt. 22:23-33; Mr. 12:18-27)*

<sup>27</sup> Te sátá dúcá<sup>n</sup> te ní sáá ì<sup>n</sup> úú cue téé cùu saducéú núú ndécú Jèsús. Te cue téé-á<sup>n</sup> ñà túú sàndáá iní-güedé sá ndótó cue ñáyiú ní xíhí, te ní xáha<sup>n</sup>-güedě xii-gá:

<sup>28</sup> —Mèstrú, ndíi Moisés càchí ndíi núú tùtú ndècu vitna sá nǔu ì<sup>n</sup> téé na cùú, te quendóo ñadìhí-dé te ñá túú dǎhe-dé ní xǒo ndìhi-a<sup>n</sup>, te téé cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuendá coo déhe-dé ndìhi-a<sup>n</sup> cuendá ñaní-dé téé ní xíhí-á<sup>n</sup>. <sup>29</sup> Te ní xíndecu úsá tnahá cue téé mee-ní ndì ñaní-güedé. Te téé díhna ní níhí ñadìhí-dé, dico ñá túú ní cùdíi-dé cundecu-dé chi ní xíhí-dé, te ni ì<sup>n</sup> déhe-dé ñá túú ní xǒo ndìhi ñadìhí-dé-á<sup>n</sup>.

<sup>30</sup> Te téé cùu uú ní naquehe<sup>n</sup>-dé ñaha ní quendóo quèé-á<sup>n</sup> dico ní xíhí tucu-dé, te ni ì<sup>n</sup> tucu déhe-dé ñá túú ní xǒo ndìhi ñaha-á<sup>n</sup>. <sup>31</sup> Te téé cùu uní ní naquehe<sup>n</sup> tucu-dé ñaha ní quendóo quèé-á<sup>n</sup>, te dǐu-ní duca<sup>n</sup> ñí xíhí-dé, te ní xínu ndì úsá-güedé ní cándeca ñaha-güedě xii ñaha-á<sup>n</sup>, dico ni ì<sup>n</sup>-güedé ñá túú ní xǒo déhe-güedé ndìhi-a<sup>n</sup>, te ní ndìhi-güedé



ní xíhí. <sup>32</sup> Te ndéé núú nǐ ndihí-ná ní xíhí tnàhá ñadìhí-án. <sup>33</sup> Te na sàá nduu ndòto-güedé ndihí ñaha-án ¿Te ndèdacàa-güedé ñadìhí-güedé cuu-a<sup>n</sup>-i? Chi ndi ùsá-güedé ní cándeca ñaha-güedě xii-a<sup>n</sup> — càchí-güedé xǎha<sup>n</sup>-güedě xii-gá.

<sup>34</sup> Te Jèsús ní xáha<sup>n</sup>-gǎ xii-güedé:

—Nchaa ñáyiú ñuyíú-a tnǎndahá-yu. <sup>35</sup> Dico nchaa ñáyiú ní nduu táhú ndoto díhna nuu ñáyiú-án cundecú-yu ndihí Yá Ndiöxí nǐ caa nǐ quíhí<sup>n</sup>, te yàcá<sup>n</sup> ñá túú-gǎ sá cándèca tnahá-yu. <sup>36</sup> Te nǐ ñà túú-gǎ tnúhu xíhí, chi cuu-ná-yu dàtná cue espíritú xínú cuèchi núú Yǎ Ndiöxí cuendá sá nǐ ndotó-yu, chi cùú-yu déhe-gá. <sup>37</sup> Te ndéé ndíi Moisés ní chídó tnùní ndíi núú tütú ndíi sá ncháá ñǎyiú ní xíhí ndotó-yu, te ðiu-ni xía<sup>n</sup> càhá<sup>n</sup>-xi cuendá tnutàú nchìcú<sup>n</sup> ñuhú, te ðiu-ni xía<sup>n</sup> càchí tucu-xi sá Yǎ Ndiöxí cúú-gǎ Ndiöxí ndíi Àbrahám, ndíi Isàác, ndihí ndíi Jàcób. <sup>38</sup> Te cue téé-án chi cuèi ní xíhí-güedé sá cúú-xí nchòhó, dico sá cúú-xí Yǎ Ndiöxí chi ndècu vívú-ni-güedě. Chi cùtnuní iní-ó sǎ Yǎ Ndiöxí cúú-gǎ Ndiöxí mee-ni cuè ñáyiú xǐndecu vívú, te ñá túú cùu-gá Ndiöxí cue ñáyiú ñá túú ndècu vívú. Te sá cúú-xí mèe-gá chi nchaa ñáyiú ndècu ndihí-gá ndécú vívù-yu cuèi sa ní xíhí-yu núú ñùyiú-a —càchí-gá xáha<sup>n</sup>-gǎ xii-güedé.

<sup>39</sup> Te ì<sup>n</sup> téé dàcuaha ñaha xii ñáyiú nchaa tnúhu ní chídó tnùní ndíi Moisés ní xáha<sup>n</sup>-dě xii Jèsús:

—Mèstrú, váha-ni càhá<sup>n</sup>-n —càchí-dé xǎha<sup>n</sup>-dě xii-gá. <sup>40</sup> Te ñá túú-gǎ ní cùyì-güedé cǎcá<sup>n</sup> tnúhú-güedě ni ì<sup>n</sup> tnúhu núú-gǎ.

*Yoo déhe-xi cùu Cristú  
(Mt. 22:41-46; Mr. 12:35-37)*

41 Te Jèsús ní xáha<sup>n</sup>-gǎ xii-güedé:

—¿Te nása càchí-tu-yu sá Crìstú Yaa tendaha Yǎ Ndiǒxí quixi ñuyíú-a cùu-gá déhe ndí Dàvíí? 42 Te mee ndí Dàvíí-á<sup>n</sup> ñí cachí ndí núú librú Sǎlmú: Dútú Ndiǒxí ní xáha<sup>n</sup>-gǎ xii Yaa cúú Xítohó-í:

“Ngóo xio cùha-í,

43 te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.”

Duha ní xáha<sup>n</sup> Dútú Ndiǒxí xii Yaa cúú Xítohó-í càchí ndí núú librú Sǎlmú. 44 ¿Te nása cùu Crìstú déhe ndí Dàvíí, te mee ndí ní cachí ndí sá cúú-gǎ Xítohó ndí-i? —càchí Jèsús xáha<sup>n</sup>-gǎ xii-güedé.

*Jèsús càhá<sup>n</sup>-gá cuendá cue tée dàcuaha ñaha xii ñáyiu nchaa tnúhu ní chídó tnùní ndí Moisés*

*(Mt. 23:1-36; Mr. 12:38-40; Lc. 11:37-54)*

45 Te òré ndátnùhu Jèsús ndíhi cue tée xica cuu ndíhi-gá xǐndedóho ñaha ñáyiu, te xáha<sup>n</sup>-gǎ xii-güedé:

46 —Cada cuendá-ndó vǎ cáda-ndó nàcuáa quide cue tée dàcuaha ñaha xii ñáyiu nchaa tnúhu ní chídó tnùní ndí Moisés, chi tnàhá iní-güedé cuihnu-güedé dóo nání sǎ sácuihnu cue tée cùnuu. Te nchaa núú tàcá ñáyiu cuení-güedé sá ndíhi tnúhu yíñùhu cáhá<sup>n</sup> ndíhi ñàhá-yu xii-güedé, te nàcáxi-güedé xilé sácõ nchihi cue tée cùnuu-gá xití veñúhu conchihi-güedé, te duca<sup>n</sup>-ni quide-güedé cuèi òré quíhu-güedé mèsá caxi-güedé òré ndécú-güedé ñ<sup>n</sup> vico, chi mee-ni núú sácõ cue tée cùnuu-gá cuení-güedé coo-güedé. 47 Te quèndeé-güedé vehe nchaa ñáyiu dǐhí ñáyiu quèé, te ío naha càhá<sup>n</sup> ndíhi-güedé Yǎ Ndiǒxí cuendá cuení-güedé cáhá<sup>n</sup> váha-yu cuendá-güedé.

Te sá dúcá<sup>n</sup> quèide-güedé te sáá nduu te ío-gá ndoho-güedé núú ùhú núú ndàhú dàcúúxí dàva-gá ñáyiú —càchí-gá xáha<sup>n</sup>-gă xii-güedé.

## 21

*Díhú<sup>n</sup> nduu táhú Yă Ndiöxí ní dáquěe ì<sup>n</sup> ñaha ndàhú ñaha quèé*

*(Mr. 12:41-44)*

<sup>1</sup> Te Jèsús ní xiní-gá xití veñúhu xídáquěe cue tée cuica díhú<sup>n</sup> nduu táhú Yă Ndiöxí xití alcanciá,

<sup>2</sup> Te ní xiní-gá tnàhá ì<sup>n</sup> ñaha ndàhú ñaha quèé ní dáquěe-a<sup>n</sup> úú díhú<sup>n</sup> còbrí, <sup>3</sup> te ní xáha<sup>n</sup> Jèsús xii cue ñáyiú xĩndecu-á<sup>n</sup>:

—Na càchí tnúhu ndáá-í xii-ndo sã ñàha ndahú ñaha quèé-a ío-gá nándìhì díhú<sup>n</sup> nĩ dáquěe-a<sup>n</sup> xití alcanciá nduu táhú Yă Ndiöxí dàcúúxí díhú<sup>n</sup> nĩ dáquěe dava-gá-yu. <sup>4</sup> Chi nchaa ñáyiú-á<sup>n</sup> nĩ dáquěe-yu mee-nă sá nĩ ndóo-ná, dico ñaha quèé-a cuéi ndàhú-a<sup>n</sup> dico ní dáquěe-a<sup>n</sup> nihì díhú<sup>n</sup> sã cuáá<sup>n</sup>-á<sup>n</sup> sã cáxí-á<sup>n</sup> ní cùu —cachí-gá xáha<sup>n</sup>-gă xii-yu.

*Jèsús càchí-gá sá ngóyó vèñúhu*

*(Mt. 24:1-2; Mr. 13:1-2)*

<sup>5</sup> Te ì<sup>n</sup> úú ñáyiú xĩcáhá<sup>n</sup>-yu cuendá veñúhu càhnu sá ìo cùnuu sá ìo vii càa nchaa yúú yíhì, ndihì cuendá nchaa sá nĩ sáñaha táhú ñáyiú yìhì xití-xi. Te Jèsús ní xáha<sup>n</sup>-gă xií-yu:

<sup>6</sup> —Sáá nduu te nchaa sá cúñúhu-ndo-a vă cùndùu-gá-xi dàtná cáá-xí vitna, chi ní ì<sup>n</sup>-gá yúú vă códó nchìhì tnaha-gá-xi chi ndihì ngoyo —càchí-gá xáha<sup>n</sup>-gă xií-yu.

*Nàcuáa cada-xi nduu ta cùyatni naa ñuyíú  
(Mt. 24:3-28; Mr. 13:3-23)*

<sup>7</sup> Te cue tée xĩndecu-á<sup>n</sup> ñi xícá<sup>n</sup> tnúhú-güedě núú Jèsús, te xáha<sup>n</sup>-güedě xii-gá:

—Mèstrú, ¿te ná nduu dùca<sup>n</sup> cada-xi ngoyo veñúhu, àdi nándi cùu sá cáda-xí cuendá cutnùní iní-ndí sá sà ta cuyatni nduu duca<sup>n</sup> cada-xi-i? —cachí-güedé xáha<sup>n</sup>-güedě xii-gá.

<sup>8</sup> Te Jèsús ní xáha<sup>n</sup>-gã xii-güedé:

—Ío quíhi iní-ndó cùndecu-ndo, te vá dáñá-ndó mèe-ndo dandahú ñáhá ñáyiú xii-ndo. Chi ío cuéhé cue tée coo ñuyíú-a, te danàni-güedé méé-güedě dàtná nàni-í te cachí-güedé: “Yúhú cùu-í Crìstú Yaá ní tendaha Yá Ndiõxí véxi ñuyíú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacúáa ní cáhá<sup>n</sup>-í”, duha cachí-güedé. Dico vá quíndáá iní-ndó, te ñi vá túhá-ndó-güedě. <sup>9</sup> Te òré ná ñihí-ndó tnúhu sá títñí nàció<sup>n</sup> xĩnàá-güedé te dava ñuú xĩnàá-güedé ndi mèe-güedé, te vá yùhú-ndó chi dacuití sã dúcá<sup>n</sup> càda-xi, dico vátá sàá-gá nduu nàa ñuyíú òré duca<sup>n</sup> càda-xi —cachí-gá xáha<sup>n</sup>-gã xii-güedé.

<sup>10</sup> Te xáha<sup>n</sup> tucu-gá xii-güedé:

—Nchaa cue tée ñ<sup>n</sup> nàció<sup>n</sup> nàá-güedé ndihi cue téé ingá nàció<sup>n</sup>, te títñí ñuú ngüíta-güedé nàá-güedé.

<sup>11</sup> Te títñí xichi ñuyíú ñihi vìhi tnáa, te títñí tucu xichi ñuyíú coo tnamá, te títñí tucu xichi ñuyíú quixi cuéhé, te títñí núú sã cáda-xí àndiú, te yùhú ñáyiú.

<sup>12</sup> 'Te òré cúmání-gã cada-xi nchaa nàcuáa cáhá<sup>n</sup>-í-a, te cue téé cùu úhú iní ñáhá xii-ndo tñi

ñaha-güedé, te candeca ñaha-güedě xii-ndo quíhí<sup>n</sup> xití veñúhu-güedé cada ndáá-güedé cuéchi-ndo, te chihi ñaha-güedě vecaá xii-ndo, te candeca ñaha-güedě quíhí<sup>n</sup> núú cuè téé cùnuu yindaha nació<sup>n</sup> àdi núú dàva-gá cue téé cùnuu sá cuendá-í. <sup>13</sup> Te òré duca<sup>n</sup> na càda ñaha-güedé xii-ndo, te òré-á<sup>n</sup> tàú-xi cáhá<sup>n</sup> váha-ndo cuendá-í núú-güedě. <sup>14</sup> Te vá cání ìní-ndó nùu nása cunduu tnúhu cúñaha-ndo xii-güedé cuendá cácu nihnu-ndo. <sup>15</sup> Chi yúhú dacàhu iní ñáhà-í xii-ndo tnúhu cúñaha-ndo xii-güedé, te taxi-í sá vátá quìní tnùnì-gá-ndó, te ni ì<sup>n</sup> ñáyiu cùu úhú iní ñáhá xii-ndo vá nihí-gá-yu tnúhu cúñáhá-yu xii-ndo. <sup>16</sup> Te ndéé tātá-ndó, ndìhì ñanì-ndó, ndìhì cue ñáyiu cùu ñanì tnáhá-ndó, ndìhì cue ñáyiu càhá<sup>n</sup> ndìhì váha-ndo cuàha cuendá ñáhã-yu xii-ndo nùú cuè téé cùchiu<sup>n</sup>, te dava-ndo càhni ñaha-güedé xii-ndo. <sup>17</sup> Te ío cuéhé ñăyiu cuu úhú iní ñáhã-yu xii-ndo sã cuendá-í. <sup>18</sup> Dico Yá Ndiõxí ío coto ñaha-gã xii-ndo chi ndéé idi díquí-ndó còto-gá. <sup>19</sup> Te núu na càda ndee iní-ndó càncicú<sup>n</sup> nihnu ñaha-ndo xii-í, te nduu táhú-ndó cùndecu-ndo ndìhì Yá Ndiõxí ni caa ni quíhí<sup>n</sup>.

<sup>20</sup> Te nduu na quìní-ndó ñùhu doco sandadú ni càndéé yuhu ñùú Jerusalén, te sa cutnùnì iní-ndó sã sà ní cuyatni nduu dànaa-güedé ñuú-á<sup>n</sup>. <sup>21</sup> Te dàvá-á<sup>n</sup> nchaa ñáyiu xĩndecu distritú Jùdeá xínì ñùhu-xi cunú-yu quíhí<sup>n</sup>-yu xití yucu, te nchaa ñáyiu xĩndecu ñuú Jerusalén queé-yu xití ñuú-á<sup>n</sup>, te ñáyiu ñá túú xĩndecu ñuú-á<sup>n</sup> vã ndìhu-gá-yu. <sup>22</sup> Chi dàvá-á<sup>n</sup> cuu-xi nduu tnũndòho tnúhu ndàhú, te duca<sup>n</sup> càda-xi chi duca<sup>n</sup> ndéé tnunì núú tütú Yá Ndiõxí nàcuáa dandòho ñaha-gá xií-yu. <sup>23</sup> Te ndàhú

ní cuu nchaa ñáyi dîhî ñúhú dēhe-xi, ndîhî nchaa ñáyi ndèca déhe vitna sàdi na sáá nduu dùca<sup>n</sup> cada-xi! Chi ío cuéhé tnündòho tnúhu ndàhú coo núú ndécũ-yu dàvá-á<sup>n</sup>, te xíá<sup>n</sup> cuu-xi ì<sup>n</sup> tnündòho tendaha Yá Ndiõxí quixi sá cúú-xí-yu. <sup>24</sup> Te dava cue tée cuú-güedé cahni ñaha-güedé, te dava-güedé tñî ñaha-güedé candeca ñaha-güedé quíhî<sup>n</sup> nchaa ñúú xíca, te cue tée dava-gá ñúú cunuu-güedé ñúú Jerusálén, te mee Yá Ndiõxí cachí-gá te núu ná daha nduu cunuu-güedé ñúú-á<sup>n</sup>.

*Nàcuáa cada-xi òré quixi tucu Tée cùu ñaní tnáhá cuè ñáyi*

*(Mt. 24:29-35, 42-44; Mr. 13:24-37)*

<sup>25</sup> Te cada-xi ì<sup>n</sup> sá vātá quíní-gá ñáyi núú nchĩcanchii, ndîhî núú yóó, ndîhî núú nchàa chódíní, te ñuyíú-a coo tnúhu ndîhú iní-xi te vá cútnùní iní-yu nása cada-yu cuendá sá ío dusa<sup>n</sup> càda ndute lamár òré candaundéé tnáhá-xí. <sup>26</sup> Te nchaa ñáyi cuneé-yu sá yùhú-yu, ndîhî sá ndîhú iní-yu cuendá nchaa sá cádá-xí ñuyíú-a, te quídi-xi andîu. <sup>27</sup> Te sátá dúcá<sup>n</sup> te quíní-ndó yùhú Tée cùu ñaní tnáhá-ndó nchàa-ndo quee-í andîu quíxi-í ichi xítí vícó, te dàvá-á<sup>n</sup> quíní ñáhá nchàa ñáyi sá ío cùnui-í te ndàcu-í quíde-í nchaa sá vāha. <sup>28</sup> Te òré ná ngüita-xi duca<sup>n</sup> càda-xi, te cuita cundee-gă iní-ndó quíhî<sup>n</sup>, te quíhî iní-ndó chi sa ní cuyatni víí-nă nduu căcu nihnu-ndo vă cündècu-gá-ndó núú ñuyíú yíca cuèchi-a —càhí-gá xáha<sup>n</sup>-gă xii-güedé.

<sup>29</sup> Te ní cani-gá ì<sup>n</sup> cuèndú núú-güedé nàcuáa tecú tnùní váha-güedé tnúhu-gá, te xáha<sup>n</sup>-gă xii-güedé:

—Chí cùndèhe yutnu ngúxí ndìhì nchaa dava-gá yutnu. <sup>30</sup> Chi nàtahú ndaha-xi, te òré duca<sup>n</sup> quìde-xi te càchí-ndó sǎ sà ní cuyatni nuu cahni. <sup>31</sup> Te ðiu-ni duca<sup>n</sup> sǎtnahá-xi cùu oré ná quìní-ndó càda-xi nchaa nacuáa càhá<sup>n</sup>-í, te sá dúcá<sup>n</sup> te cutnùní iní-ndó sǎ sà ní cuyatni nduu ndíhu ndaha ñàha Yá Ndiǒxí xii-ndo.

<sup>32</sup> Te na càchí tnúhu ndáá-í xii-ndo sǎ òré vátá cùú-gá cue ñáyiú xǐndecu ñuyíú-a vitna, te cada-xi nchaa nàcuáa ní cáhá<sup>n</sup>-í. <sup>33</sup> Te andiú ndìhì ñuyíú-a chí ndìhì nihnu-xi, dico tnúhu-í chí vá ndíhì nihnu-xi, chí cùu-xi tnúhu ndáá.

<sup>34</sup> Te quihì iní-ndó vǎ cùndècu-ndo ichi cuehé ichi duha, te vá cùú-ndó ñáyiú quihu, te vá cúhú<sup>n</sup> iní-ndó mèe-ni nchaa sá lò ñuyíú-a, chí núu duca<sup>n</sup> na càda-ndo te nacuanaa-ndo sǎ sáá nduu càda-xi nacuáa ní cáhá<sup>n</sup>-í. Te uu<sup>n</sup>ni sáá nduu-ǎ<sup>n</sup>, <sup>35</sup> te cada-xi dàtná cuìní-ndó quìde ì<sup>n</sup> trampá chí uu<sup>n</sup>ni ngàva-xi, te duca<sup>n</sup> càda-xi nchaa ñáyiú xǐndecu ñuyíú-a, chí uu<sup>n</sup>ni sáá nduu-ǎ<sup>n</sup>. <sup>36</sup> Te nchòhó cundecu túha-ndo te ío cáhá<sup>n</sup> ndìhì-ndo Yǎ Ndiǒxí cuèndá ndacu-ndo yǎha-ndo nchaa tnúndòho quixi ñuyíú-a, te duca<sup>n</sup> te nasáá-ndó cùndecu-ndo núú ndécú yǎhú Tée cùu ñaní tnáhá-ndó nchàa-ndo — cachí-gá xáha<sup>n</sup>-gǎ xii-güedé.

<sup>37</sup> Te nduu ndùu ní xóo danèhé Jèsús ñáyiú tnúhu-gá xití veñúhu càhnu sá ïo cùnuu, te niú niú ní xóo quíhì<sup>n</sup> ngúdú-gá xití yucu Òlívú. <sup>38</sup> Te nehé nehé ní xóo quíhì<sup>n</sup> nchaa ñáyiú veñúhu-á<sup>n</sup> ñí xóo cundedóho-yu nchaa tnúhu càhá<sup>n</sup>-gá.

*Ndùcu-güedé nàcuáa cada-güedé cahni-güedé Jèsús*

*(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Te sa ní cuyatni nduu tnàhá vico pàscuá, te vico-á<sup>n</sup> xéxí ñǎyiu pàá sá ñà túú yìhi levadurá. <sup>2</sup> Te cue tée cùu dútú cúnùu, ndìhi cue tée dàcuaha ñaha xii ñáyiu nchaa tnúhu ní chídó tnùnì ndíi Moisés ndúcú-güedě nàcuáa cada-güedé cahni-güedé Jèsús, te dícó-ni sá xǐyùhú-güedé ñáyiu.

<sup>3</sup> Te yucu ñávàha ní dácáhú ìní ñáhá-xí xìi té Jùdás déhe té Iscàrioté, te núú tnàhá té-á<sup>n</sup> cúu ùxúú tnàhá cue tée xìca cuu ndìhi-gá ní cùu. <sup>4</sup> Te té Jùdás-á<sup>n</sup> ñǎ sáhá<sup>n</sup>-dé ní ndatnúhu-dé ndìhi cue tée cùu dútú cúnùu, ndìhi cue tée tàxi tnunì ñáhá xii cue tée quìde cuendá veñúhu nàcuáa cada-dé cuáha cuendá-dé Jèsús núú-güedě. <sup>5</sup> Te ío ní cudíí ìní-güedé, te ní xáha<sup>n</sup>-güedě xii-dé sá cuañaha-güedě díhú<sup>n</sup>, <sup>6</sup> te ní xáha<sup>n</sup>-dě sá cúu quèhe<sup>n</sup>-dé díhú<sup>n</sup>-ǎ<sup>n</sup>, te ní ngüíta-dé ndúcú-dě nàcuáa cada-dé cuáha cuendá-dé Jèsús núú-güedě òré ñà túú ñáyiu.

*Cùdini Jèsús ndìhi cue tée xìca cuu ndìhi-gá*

*(Mt. 26:17-29; Mr. 14:12-25; Jn. 13:21-30; 1 Co. 11:23-26)*

<sup>7</sup> Te ní sáá nduu ñǎ quesaha vico xexí-yu pàá sá ñà túú yìhi levadurá, te ñu-ni nduu-ǎ<sup>n</sup> sáhní-güedě ñǎ mbéé lìhli xèxí-yu. <sup>8</sup> Te Jèsús ní xáha<sup>n</sup>-gǎ xii té Pèlú ndìhi té Juáá:

—Chí cuàhá<sup>n</sup> chi cada túha-ndo núú cùdini-o sacuaa nduu vico pascuá —càchí-gá xáha<sup>n</sup>-gǎ xii-güedé.



<sup>9</sup> Te ní xicá<sup>n</sup> tnúhú-güedě núú-gă, te xăha<sup>n</sup>-güedě xii-gá:

—¿Te ndèé cáá vèhe cuiní-n càda túha-ndí-i? —  
càchí-güedé xăha<sup>n</sup>-güedě xii-gá.

<sup>10</sup> Te ní xáha<sup>n</sup> Jèsús xii-güedé:

—Chí cündedóho na càchí tnúhu-í xii-ndo nàcuáa cada-ndo. Òré quíhu-ndo xití ñuú núú quíhí<sup>n</sup>-ndó, te naníhí-ndó ì<sup>n</sup> tée tànehe ì<sup>n</sup> yoó ndute, te tée-án candéndaha-ndo-dě quíhí<sup>n</sup>, te núú ndédacàa vehe na ndíhu-dé te xía<sup>n</sup> quíhu-ndo. <sup>11</sup> Te cúñaha-ndo xii xítóhó vehe-án: “Yaá cúú Mèstrú càchí-gá nùu ndédacàa xichi xití vehe-n cuññaha nùu-n xii-gá cudìni-gá ndíhi cue tée xica cuu ndíhi-gá sacuaa nduu vico pascuá”, duha cúñaha-ndo. <sup>12</sup> Te dătnúni danèhé ñáhá-dě xii-ndo ì<sup>n</sup> quartú cáhnú càa núú ñinu, chí vehe yòdo tñaha cuu-xi, te sa ní quide túha-dé nchaa sá ná ndíhi, te nchòhó dicó-nă sá cudìni-o cada túha-ndo —càchí-gá xáha<sup>n</sup>-gă xii-güedé.

<sup>13</sup> Te ní xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús xii-güedé ní cuu, chí nchaa sa ndècu túha, te ní quide túha-güedé sá cudìni-güedé ndíhi-gá sacuaa nduu vico pascuá-án.

<sup>14</sup> Te sátá ñi tñahá òré cudìni Jesús ndíhi cue tée ní táuchíú<sup>n</sup>-gă cáhá<sup>n</sup> tnúhu-gă núú ñăyiu, te cuánguihu ndíhi ñaha-gă xii-güedé mèsá. <sup>15</sup> Te xáha<sup>n</sup>-gă xii-güedé:

—¿Duca<sup>n</sup>-ni ìo sàni iní-í sá cudìni ndíhi ñaha-í xii-ndo sàcuua nduu vico pascuá òré cúmăní-gă sáa nduu ndòho-í te cúú-í! <sup>16</sup> Te na càchí tnúhu-í xii-ndo să vă dúhá-gă caxi ndíhi ñaha-í xii-ndo ndùu vico pascuá, chí ndéé òré ná sàa nduu nàsáá-ndó nùú

táxí tnùní Yă Ndiöxí cundecu-o, te dāvá-á<sup>n</sup> cada iní-ndó sã dàtná sá cáxí tucu-o chi ío váha cuu iní-ó cundecu-o —cachí-gá xáha<sup>n</sup>-gã xii-güedé.

17 Te ní quehe<sup>n</sup>-gá ñ<sup>n</sup> vàsú ñúhú ndùdí ndéhé yoho yàha stilé, te ní ndacá<sup>n</sup> táhú-gã núú Yă Ndiöxí, te dàtnùní ní xáha<sup>n</sup>-gã xii-güedé:

—Chí quehé<sup>n</sup> vàsú ñúhú ndùdí ndéhé yoho yàha stilé-a, te coho-ndo lùha luha nchaa-ndo. 18 Te na càchí tnúhu tucu-í xii-ndo sã vítná-nã duha xìhi ndìhi ñaha-í xii-ndo ndùdí ndéhé yoho yàha stilé-a te vá cóhó ndìhi ñaha-gá-í, dico na sàá nduu nàníhí tnáhá-ó núú ndécú Tātà-í Dútú Ndiöxí táxí tnùní-gá, te dāvá-á<sup>n</sup> cada iní-ó sã dàtná sá cóhó ndìhi ñaha tucu-í xii-ndo, chi ío cudíí iní-ó —càchí-gá xáha<sup>n</sup>-gã xii-güedé.

19 Te sátá nǐ túhú cóhó-güedě ní cudìni-güedé, te ní quehe<sup>n</sup>-gá pàá te ní ndacá<sup>n</sup> táhú tucu-gá núú Yă Ndiöxí, te dàtnùní ní táhú cuèchi-gá, te ní dácãhñu ñaha-gã xii-güedé, te xáha<sup>n</sup>-gã:

—Pàá-a cùu-xi datná yiqui cùnú-í, chi cahni ñaha-güedě xii-í sá cuendá-ndó, te duca<sup>n</sup>-ni càxi-ndo paá-a cuendá ndacu iní ñáhá-ndó xii-í —càchí-gá xáha<sup>n</sup>-gã xii-güedé.

20 Te ñu-ni duca<sup>n</sup> nǐ quide-gá ndìhi vàsú ñúhú ndùdí ndéhé yoho yàha stilé, chi ní quehe<sup>n</sup>-gá te òré sãñaha-gã xii-güedé coho-güedé, te ní xáha<sup>n</sup>-gã:

—Ndudí ñúhú vàsú-a cada iní-ndó sã cúú-xí dàtná níñi-í sá catí òré cahni ñaha-güedě xii-í. Te sá dúcá<sup>n</sup> càtì níñi-í xíã<sup>n</sup> cutnùní ndáá sá Yă Ndiöxí cada-gá ingá núú sã váha sá cúú-xí-ndó.

21 'Dico vitna chi iha tnáhá téé cuáha cuendá ñáhá xii-í núú cuè téé cùu úhú iní ñáhá yìhi-dé mèsá. 22 Te yúhú Téé cùu ñaní tnáhá-ndó nchàa-ndo

ñuhu ichi-í cuáhá<sup>n</sup>-í cuú-í dàtná ní cachí Yă Ndiõxí. ¡Dico ndàhú ní cuu tée duca<sup>n</sup> na cuăha cuendá ñáhá xì-í núú cuè tée cùu úhú iní ñáhá! —càchí-gá xáha<sup>n</sup>-gă xii-güedé.

<sup>23</sup> Te ní ngüíta-güedé ndúcú tnùhu núú tnáhá-güedě nùu nděda càa-güedé duca<sup>n</sup> càda cuáha cuendá ñáhá xì-gá núú cuè tée cùu úhú iní ñáhá.

*Xĩndatnúhu-güedé ndědacàa-güedé cunuu-gă*

<sup>24</sup> Te sátá dúcá<sup>n</sup> te ní ngüíta-güedé xĩndatnúhu-güedé nùu ndědacàa-güedé tàú-güedé cunuu-güedě. <sup>25</sup> Dico Jèsús ní xáha<sup>n</sup>-gă xii-güedé:

—Nchaa cue tée yĩndaha ñaha xii ñáyiu ío tàxi tnuní-güedé, te mee-güedě cuiní-güedé sá càhá<sup>n</sup> váha ñáyiu cuendá-güedé. <sup>26</sup> Dico nchòhó vá dúcá<sup>n</sup> càda-ndo, chi núú ì<sup>n</sup>-ndo cùnuu te cada-ni-ndo sã ñà túú cùnuu-ndo, àdi cuu-ndo ì<sup>n</sup> tée tàxi tnuní ñáhá xì cue tée xĩnu cuechi, te cada-ni-ndo sã cúú-ndó ì<sup>n</sup> tée xĩnu cuechi-á<sup>n</sup>. <sup>27</sup> Te vá càchí-ó sã tée xĩnu cuechi cunuu-gá-dé, chi tée quíhu mèsá cúnùu-gá-dé. Dico yúhú ndécú ndìhi ñaha-í xii-ndo dàtná ì<sup>n</sup> tée xĩnu cuechi.

<sup>28</sup> Te nchòhó duca<sup>n</sup>-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaa sá tàyáha-í véxi. <sup>29</sup> Te Tătà-í Dútú Ndiõxí ní cachí-gá sá táxi tnùn-í, te yúhú càchí-í xii-ndo sã sàá nduu te tnáhá-ndó tàxi tnuní-ndó. <sup>30</sup> Te dàvá-án caxi-o coho-o càda-o núú táxi tnùn-í, te yàcá<sup>n</sup> ngüíta-ndo càda ndáá-ndó cuèchi ndì ùxúú xichi ñáyiu isràél —càchí-gá xáha<sup>n</sup>-gă xii-güedé.

*Jèsús càhá<sup>n</sup>-gá sá tẽ Pèlú cúñaha-dě xii ñáyiu sá ñà túú xìní ñáhá-dě xii-gá*

*(Mt. 26:31-35; Mr. 14:27-31; Jn. 13:36-38)*

31 Te Xítohá Jesucrístú ní xáha<sup>n</sup>-gă xii té Xímú:

—Yòhó Xímú, cundedóho váha ì<sup>n</sup> tnúhu na càhá<sup>n</sup>-í-a, chi dàtná cuíní-n quide táchí triù sàcá<sup>n</sup>-xi duha sàcá<sup>n</sup>-xi dàcá<sup>n</sup>, duca<sup>n</sup> quèsaha yucu ñávâha cada ñaha-xi xii-ndo. Chi coto ndeé ñáhá-xí xii-ndo te núu ndisa sàndáá iní ñáhá-ndó xii-í. 32 Dico yúhú xicá<sup>n</sup> táhù-í núú Yá Ndiõxí cuendá-n, cuendá sá vâ dáñá ndeé-n quìndáá iní ñáhá-n xii-í. Te òré ndixi túu iní-n sã ñà túú ní quide váha-n, te quíhí<sup>n</sup>-n cuãha-n cuè téé cùndihí-n tnúhu ndee iní cuendá canchicú<sup>n</sup> nihnu-ni-güedé ichi Yá Ndiõxí —càchí-gá xáha<sup>n</sup>-gă xii-dé.

33 Te ní xáha<sup>n</sup>-dě xii-gá:

—Mèstrú, sa ndècu túha-í sá quíhí<sup>n</sup> ndihí ñaha-í xii-n vècaá, àdi cuéi na cùú ndihí ñaha-í xii-n —càchí-dé xãha<sup>n</sup>-dě xii-gá.

34 Te Jèsús ní xáha<sup>n</sup>-gă:

—Pèlú, na càchí tnúhu-í xii-n sã cùmání-gă cana ì<sup>n</sup> líhi te úní xito cáhá<sup>n</sup>-n núú ñãyiu sá ñà túú xini ñáhá-n xii-í —càchí-gá xáha<sup>n</sup>-gă xii-dé.

### *Sa ní cuyatni ndoho Jèsús*

35 Te Jèsús ní xáha<sup>n</sup>-gă xii-güedé:

—Te cútnàhá ní tendaha ñaha-í xii-ndo ñí sáhá<sup>n</sup>-ndó chùu-í, chi ñá túú ní cãnehe-ndo ñí ì<sup>n</sup> sá cùhú<sup>n</sup> díhú<sup>n</sup>-ndó, te ñí ì<sup>n</sup> sá cùhú<sup>n</sup> ndàchiu<sup>n</sup>-ndo ñá túú ní cãnehe-ndo. Te chí càchí tnúhu núu lò ì<sup>n</sup> sá ñí cumání xii-ndo —càchí-gá xáha<sup>n</sup>-gă xii-güedé.

Te ní xáha<sup>n</sup>-güedé:

—Ñáhá, chi ñí ì<sup>n</sup> sá ñà túú ní cùmání xii-ndí —càchí-güedé xãha<sup>n</sup>-güedé xii-gá.

36 Te ní xáha<sup>n</sup>-gă:

—Te vitna núu ndècu ndihí-ndo sá sácũhu<sup>n</sup> díhú<sup>n</sup>-ndó, àdi sá sácũhu<sup>n</sup> ndachìu<sup>n</sup>-ndo te

canehe-ndo. Te núu ñá túú ndècu ndìhi-ndo machití, te nadico-ndo dǒó tìcachi nìhnu-ndo te cuaa<sup>n</sup>-ndo. <sup>37</sup> Te na cǎchí tnúhu-í xii-ndo sǎ dàcuítíí sǎ yáha-í nàcuáa cǎhá<sup>n</sup>-xi núú tútú Yǎ Ndiǒxí núú cǎchí-xi: “Í<sup>n</sup>-ni nǐ quide ñaha-güedě xii-gá, ndìhi cue téé ndècu cuéchi-xi”, duha cǎchí-xi núú tútú-gá. Te ñá díú-ní xǎ<sup>n</sup> yáha-í chi nchaandi túhú nàcuáa cǎhá<sup>n</sup>-xi núú tútú-gá yáha-í —cǎchí-gá xáha<sup>n</sup>-gǎ xii-güedé.

<sup>38</sup> Te xǎha<sup>n</sup>-güedě:

—Mèstrú, iha ndècu úú machití —cǎchí-güedé xǎha<sup>n</sup>-güedě xii-gá.

Te ní xáha<sup>n</sup>-gǎ:

—Chí návii-ñǎ yuhu-ndo, vá cǎhá<sup>n</sup>-gá-ndó —cǎchí-gá xáha<sup>n</sup>-gǎ xii-güedé.

*Jèsús cǎhá<sup>n</sup> ndìhi-gá Yǎ Ndiǒxí yucu Òlívú*  
(Mt. 26:36-46; Mr. 14:32-42)

<sup>39</sup> Te Jèsús ní quee-gá cuáhá<sup>n</sup>-gá yucu Òlívú, chi duca<sup>n</sup> tnáhí quide-gá. Te cue téé xica cuu ndìhi-gá nchìcú<sup>n</sup> ñáhá-güedě xii-gá cuáhá<sup>n</sup>. <sup>40</sup> Te òré ní quexìo-gá xía<sup>n</sup>, te ní xáha<sup>n</sup>-gǎ xii-güedé:

—Chí cǎhá<sup>n</sup> ndìhi Yá Ndiǒxí cuèndá sǎ vǎ dǎcǎhá<sup>n</sup> ñáhá yùcu ñávǎha xii-ndo càda-ndo sǎ ñà túú tàú-ndó càda-ndo —cachí-gá xáha<sup>n</sup>-gǎ xii-güedé.

<sup>41</sup> Te sátá dúcá<sup>n</sup> te ní quee dǐ<sup>n</sup>-gá tnuú-güedé cuáhá<sup>n</sup>-gá ì<sup>n</sup> xio, te sa ñùnchíí luha ní xica ndehe-gá núú ndécú-güedě, te xía<sup>n</sup> nǐ ngúíñí xítí-gǎ cǎhá<sup>n</sup> ndìhi-gá Tǎtá-gǎ Dútú Ndiǒxí. <sup>42</sup> Te xáha<sup>n</sup>-gǎ:

—Táu, te núu dìcǒ cachí-n te taunihnu ñaha-n xì-í cuèndá sǎ vǎ ndóhò-í ná sàà òré, dico vá cǎdá-n nàcuáa cǎchí iní mée-í, chi cada-n nàcuáa cǎchí iní mée-n —cǎchí-gá xáha<sup>n</sup>-gǎ xii Tǎtá-gǎ Dútú Ndiǒxí.

<sup>43</sup> Te sátá dúcá<sup>n</sup> te ní quexìo ì<sup>n</sup> espíritú xínú cuèchi núú Yă Ndiöxí ní sãñaha-gă-xi tnúhu ndee iní xii-gá. <sup>44</sup> Te òré súúní ndihú iní-gá, te uu<sup>n</sup>-gá súúní nì yuhu nì iní-gá càhá<sup>n</sup> ndihi-gá Dútú Ndiöxí, te tnéé-gă cáá dàtná cáá ñíí te ngóyó núú ñúhú.

<sup>45</sup> Te sátá ñí yáha ní cáhá<sup>n</sup> ndihi-gá Tătá-gă Dútú Ndiöxí, te ní ndacuíñí-gá cuánuhú-gá núú ñí dándöo-gá cue téé-á<sup>n</sup>, te òré ní nasáá-gá te xixídí-güedé cuèndá sá ïo cuéhé tnúhu sàni iní-güedé cuèndá-gá. <sup>46</sup> Te xáha<sup>n</sup>-gă xii-güedé:

—¿Ná cuèndá xidí-ndó? Chí ndácöo, te cáhá<sup>n</sup> ndihi-ndo Yă Ndiöxí cuèndá sá vă dácàhá<sup>n</sup> ñáhá yùcu ñávãha xii-ndo càda-ndo sá ñà túú tàú-ndó càda-ndo —cachí-gá xáha<sup>n</sup>-gă xii-güedé.

*Ní tnì-güedé Jèsús ndécá ñàha-güedé cuáhá<sup>n</sup>  
(Mt. 26:47-56; Mr. 14:43-50; Jn. 18:2-11)*

<sup>47</sup> Te càhá<sup>n</sup> dúcá<sup>n</sup>-ní Jèsús ní quexìo vai cue téé, te ì<sup>n</sup> téé xìca cuu ndihi-gá nání Jùdás cúnùu-dé yódó nùu-dé núú-güedé ní quexìo ndéé núú-gă, te ní teyuhu ñàha-dé xii-gá, te núú tnàhá téé-á<sup>n</sup> cúú ùxúú cue téé xìca cuu ndihi-gá. <sup>48</sup> Te ní xáha<sup>n</sup> Jèsús xii-dé:

—Jùdás, ¿te yòhó cuáha cuèndá ñáhá-n xì yúhú Téé cùu ñaní tnàhá-ndó nchàa-ndo núú cuè téé cùu úhú iní ñáhá xii-í cáhá<sup>n</sup>-n núú duha tèyuhu ñàha-n-á<sup>n</sup>? —càchí-gá xáha<sup>n</sup>-gă xii-dé.

<sup>49</sup> Te sátá ñí xiní nchaa cue téé cùndihi Jesús nàcuáa cùu cue téé ní quexìo-á<sup>n</sup>, núú ní xicá<sup>n</sup> tnúhú-güedé núú-gă, te xãha<sup>n</sup>-güedé xii-gá:

—Mèstrú, ¿cuu nàá-ndí ndihi-güedé ndihi machití-a ñă? —càchí-güedé xãha<sup>n</sup>-güedé xii-gá.

50 Te ìn<sup>n</sup>-dé ní xehndé-ni-dé lóho xio cùha ìn<sup>n</sup> cue téé ní quexìo-á<sup>n</sup>, te téé-á<sup>n</sup> xínú cuèchi-dé núú dútú cúnùu-gá, te ní quendeé duu<sup>n</sup> lóho-dé. 51 Te Jèsús ní xáha<sup>n</sup>-gã xii-güedé:

—Chí dáñá-güedě, vá dúcá<sup>n</sup> càda-ndo —cachí-gá xáha<sup>n</sup>-gã xii-güedé.

Te ní dácàá-gá ndaha-gá ní tendaha-gã núú nǐ xíndeé lóho téé-á<sup>n</sup>, te ní nduu váha dàtná-ni càa. 52 Te nchaa cue téé cùu dútú cúnùu, ndihì cue téé tàxi tnuní nchaa cue téé quide cuendá veñúhu sá ìo cùnùu, ndihì cue téé cùu sacuéhé nǔú ñǎyiu isràél, nchaa cue téé-á<sup>n</sup> vèxi tñi ñaha-güedě xii-gá, te ní xáha<sup>n</sup>-gã xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo nǔú ndécù-í, dàtná quidé-ndó ìn<sup>n</sup> ñadúhú quidé ñaha-ndo xii-í. 53 Te duca<sup>n</sup>-ni nǐ xini-ndó nǐ xíndecu-í xití veñúhu càhnu sá ìo cùnùu ní xóo danèhé-í ñáyiu, te ní lùha ñá túú ní cùu tnándeé ñáhá-ndó xii-í òré-á<sup>n</sup>, te vitna ní sáá òré duca<sup>n</sup> càda-ndo, te cada sácúíhná nàcuáa cùu iní-xi —cachí-gá xáha<sup>n</sup>-gã xii-güedé.

*Té Pèlú càhá<sup>n</sup>-dé núú ñǎyiu sá ñà túú xini-dé Jèsús (Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

54 Te ní tñi-güedé Jèsús, te ndèca ñaha-güedé xii-gá cuáhá<sup>n</sup> vehe téé cùu dútú cúnùu-gá, te té Pèlú xica xica-ni nchicú<sup>n</sup> ñáhá-dě xii-gá cuáhá<sup>n</sup>. 55 Te òré ní quexìo-güedé xía<sup>n</sup> te ní dátñáhá-güedé ñuhú quehé vehe-á<sup>n</sup>, te ní càndéé yuhu nùhú-á<sup>n</sup> nǐ ngóo teté-güedé, chí quide víxi<sup>n</sup>-xi, te tnàhá té Pèlú ní ngóo teté ndihì ñaha-dě xii-güedé. 56 Te xía<sup>n</sup> ndécú ìn<sup>n</sup> xíchí xínú cuèchi vehe-á<sup>n</sup>, te òré ní xini-xi nùcòo

teté tnàhá té Pèlú, te ní ndacoto-xi núú-dě, te ní xáha<sup>n</sup>-xi xii-güedé:

—Tnàhá tée-a xica cuu ndihi-dé tée ndèca-güedé cuánguihu-ǎ<sup>n</sup> —càchí-xi xáha<sup>n</sup>-xi xii-güedé.

<sup>57</sup> Dico té Pèlú ñá túú ní nǎnuu-dé, te xáha<sup>n</sup>-dě xii-xi:

—Yúhú ñá túú xini-í tée-ǎ<sup>n</sup> —càchí-dé xáha<sup>n</sup>-dě xii-xi.

<sup>58</sup> Te tna tnaa-ni ní cuu, te ní xini ñáhá tucu ñ<sup>n</sup>-dé, te xáha<sup>n</sup>-dě:

—Yòhó tnàhá-n xica cuu ndihi-n tée ndèca-güedé cuánguihu-ǎ<sup>n</sup> —càchí-dé xáha<sup>n</sup>-dě xii-dé.

Dico té Pèlú ní xáha<sup>n</sup>-dě:

—Ñáhá, ñá díú yúhú xicá cùu ndihi-í-dé —càchí-dé xáha<sup>n</sup>-dě.

<sup>59</sup> Te sa ní cuu dàtná ñ<sup>n</sup> òré te càchí tucu ingá-dé:

—Ndáá sá tée-a xica cuu ndihi-dé tée ndèca-güedé cuánguihu-ǎ<sup>n</sup>, chi tnàhá-dé cúú-dé tée distritú Galileá —càchí-dé xáha<sup>n</sup>-dě xii-güedé.

<sup>60</sup> Te té Pèlú ní xáha<sup>n</sup>-dě xii tée-á<sup>n</sup>:

—Yúhú ñá túú cùtnuní iní-í nása ndùu tnúhu càhá<sup>n</sup>-n —càchí-dé xáha<sup>n</sup>-dě.

Te ni vátá xǐnu duca<sup>n</sup>-gǎ tnúhu càhá<sup>n</sup>-dé ní cana-ni ñ<sup>n</sup> líhi. <sup>61</sup> Te Xítóhó Jesucristú ní

nchócótó-gǎ núú-dě, te òré-ni-á<sup>n</sup> ñ<sup>n</sup> ndacu iní-dé tnúhu ní xáha<sup>n</sup>-gǎ xii-dé sá cùmání-gǎ cana ñ<sup>n</sup> líhi, te úní xito cáhá<sup>n</sup>-dé sá ñá túú xini ñáhá-dě xii-gá.

<sup>62</sup> Te té Pèlú ní quee-dé tnuú-güedé cuáhá<sup>n</sup>-dé ñ<sup>n</sup> xio, te ní ndáhyú víhí-dě ní ndixi cuéchi iní-dé.

*Cùdíquí ndeé-güedé Jèsús*

*(Mt. 26:67-68; Mr. 14:65)*

<sup>63-64</sup> Te cue tée ndèé ñáhá xii Jèsús ní cudíquí ndeé ñáhá-güedě xii-gá, te ní dádáhu-güedé núú-gǎ, te ní caniha-güedě xii-gá, te xáha<sup>n</sup>-güedě:



—¿Cáhá<sup>n</sup> ná cótó yòo ní caniha xii-n! —  
cachí-güedé xáha<sup>n</sup>-güedě xii-gá.

<sup>65</sup> Te cuéhé víhí-gă tnúhu cuèhé ní xáha<sup>n</sup>-güedě xii-gá.

*Jèsús ndécú-gă jùndá*

(Mt. 26:59-66; Mr. 14:55-64; Jn. 18:19-24)

<sup>66</sup> Te sátá nǐ túndaá, te ní tacá cue tée cùu sacuéhé núú ñăyiu isràèl, ndìhi cue tée cùu dútú cúnùu, ndìhi cue tée dàcuaha ñaha xií-yu nchaa tnúhu ní chídó tnùnì ndí Moisés, te ndèca-güedé Jèsús cuáhá<sup>n</sup> núú cádá-güedě jùndá, te òré ní quexìo-güedé ndìhi-gá núú cádá-güedě jùndá-á<sup>n</sup>, te ní xáha<sup>n</sup>-güedě xii-gá:

<sup>67</sup> —Cuìní-ndí cachí tnúhu-n xii-ndí nǔu dǐu-n cùu-n Cristú Yaa ní tendaha Yă Ndiǒxí véxi ñuyíú-a —càchí-güedé xáha<sup>n</sup>-güedě xii-gá.

Te ní xáha<sup>n</sup>-gă xii-güedé:

—Te núu na càchí-í sá díù-í cúu Cristú ñá, te nì vá quìndaá iní-ndó, <sup>68</sup> àdi te núu ì<sup>n</sup> sá ná càcá<sup>n</sup> tnúhu-í núú-ndó, te nì vá càchí tnúhu-ndo, te nì vǎ dáñá ñàha-ndo. <sup>69</sup> Dico vitna ní cuyatni nduu ngóo yúhú Téee cùu ñanì tnáhá-ndó nchàa-ndo xio cuha Dútú Ndiǒxí Yaa ío cùnùu —cachí-gá xáha<sup>n</sup>-gă xii-güedé.

<sup>70</sup> Te dǎtnùnì nchaa-güedé ní xícá<sup>n</sup> tnúhú-güedě núú-gă, te xáha<sup>n</sup>-güedě xii-gá:

—¿Te yòhó cúu-n Dèhe Yá Ndiǒxí te núu duca<sup>n</sup> vǎni? —càchí-güedé xáha<sup>n</sup>-güedě xii-gá.

Te ní xáha<sup>n</sup> Jèsús:

—Ndáá sá díú Dèhe-gá cúu-í dǎtná càchí méé-ndó-ǎ<sup>n</sup> —càchí-gá xáha<sup>n</sup>-gă xii-güedé.

<sup>71</sup> Te ní xítàha-güedé:

—Ñá túú-gă xíní ñùhu-xi cue téé cáhá<sup>n</sup> nùu ndáá sá ndècuéchi-dé àdi ñá túú ndècuéchi-dé chi yuhu mee-dě ní cáhá<sup>n</sup>-dé vitna ní xíndedóho-o —càchí-güedé xǐtnàha-güedé.

## 23

*Jèsús ndécú-gă núú tǐ Pilatú*

*(Mt. 27:1-2, 11-14; Mr. 15:1-5; Jn. 18:28-38)*

<sup>1</sup> Te nchaa-güedé ní ndacuíñí-güedé, te ndèca-güedé Jèsús cuáhá<sup>n</sup> núú tǐ Pilatú, <sup>2</sup> te núú tǐ-á<sup>n</sup> ñí ngüíta-güedé sàcá<sup>n</sup> cuéchi-güedé cuendá-gá, te xǎha<sup>n</sup>-güedé:

—Ní naníhí-ndǐ téé-a dándahú-dé ñáyíu ñúú-ó, chi xǎha<sup>n</sup>-dě xíi-yu sá vǎ chǎhu-gá-yu impuèstú xii té Cèsár téé ío cùnuu, te càchí-dé sá díú-dě cúú-dě Crístú Yaá ní tendaha Yǎ Ndiòxí véxi ñuyíú-a te yíndaha-dé ñáyíu càchí-dé —càchí-güedé xǎha<sup>n</sup>-güedé xii-dé.

<sup>3</sup> Te té Pilatú ní xícá<sup>n</sup> tnúhu-dé núú-gă, te xǎha<sup>n</sup>-dě xii-gá:

—¿Ndáá sá díú-n cùu-n téé yíndaha ñaha xii ñáyíu isràél-ǎ<sup>n</sup>? —càchí-dé xǎha<sup>n</sup>-dě xii-gá.

Te Jèsús ní xáha<sup>n</sup>-gă xii-dé:

—Díu-í yíndàha-í-yu —càchí-gá xáha<sup>n</sup>-gă xii-dé.

<sup>4</sup> Te té Pilatú ní xáha<sup>n</sup>-dě xii nchaa ñáyíu, ndíhi cue téé cùu dútú cùnùu:

—Yúhú cùtnùní iní-í sá ñà túú ñí ñ<sup>n</sup> cuéchi téé-a —càchí-dé xǎha<sup>n</sup>-dě xíi-yu.

<sup>5</sup> Dico níhi-gá ní cáhá<sup>n</sup>-güedé, te xǎha<sup>n</sup>-güedé:

—Càchí-ndí sá ïo dusa<sup>n</sup> xǐquide ñáyíu cuendá nchaa sá dánèhé ñáhá-dě xíi-yu, te ní quesaha-dě ndéé distrítú Galiléa, te ní yáha-dé ñihì

distritú Jùdeá dánèhé-dé ñáyi, te vitna ní sáá-ni-tu-dé ndéé ndíha dānehé-dé-yu — càchí-güedé xāha<sup>n</sup>-güedě xii té Pilatú.

*Jèsús ndécú-gǎ núú tě Hèrodés*

<sup>6</sup> Te sá dúcá<sup>n</sup> ñǐ tecú dóho té Pilatú ní cacu nehé-yu distritú Galileá, núu xiǎ<sup>n</sup> ní xícá<sup>n</sup> tnúhú-dě núu-yu núu tée Galileá cúú-gǎ. <sup>7</sup> Te ní xáhǎ<sup>n</sup>-yu sá díú tēe yàcá<sup>n</sup> cúú-gǎ, núu xiǎ<sup>n</sup> ní na dàyáha ñaha-dě xii-gá ndaha té Hèrodés tée cùu gobiernú distritú Galileá chi nduu-ǎ<sup>n</sup> ndécú-dě tnàhá-dé ñúú Jerusálén-á<sup>n</sup>. <sup>8</sup> Te òré ní xiní té Hèrodés-á<sup>n</sup> Jèsús te ío ní cudíí iní-dé, chi ní cunaha dùca<sup>n</sup>-ni cuiní-dé quini ñáhá-dě xii-gá te ñá túú tnàhí xiní ñáhá-dě xii-gá ní cùu, chi cuendá-ni tnúhu ñihí-dé cuendá-gá, te ndètu-dé sáá ì<sup>n</sup> nduu quini ñáhá-dě xii-gá, te cada-gá ì<sup>n</sup> sá vǎ yǒo tnàhí ndàcu cada cundehe-dé ní sani iní-dé. <sup>9</sup> Te vǎi sá ñǐ xícá<sup>n</sup> tnúhú-dě núú Jèsús, dico ni ì<sup>n</sup> tnúhu ñá túú ní cǎhá<sup>n</sup>-gá. <sup>10</sup> Te xiá<sup>n</sup> xǐndecu tnàhá cue tée cùu dútú cúnù, ndíhi cue tée dàcuaha ñaha xii ñáyi nchaa tnúhu ní chídó tnùní ndí Moisés, te cue tée-á<sup>n</sup> sùúní ò iní-güedé sàcá<sup>n</sup> cuéchi-güedé cuendá-gá. <sup>11</sup> Te té Hèrodés ndíhi cue tée cùu sandadú-dé ñá túú ní cùu vǎha iní-güedé núú Jèsús, te ní cudíquí ndéé ñáhá-güedé xii-gá, te ní dácuíhnú ñaha-güedé dóó vǎha xii-gá dàtná cáá dǒó sácuíhnu cue tée sàquíndaha ñaha xii ñáyi. Te dàtnùní té Hèrodés ní dánùhú ñáhá tucu-dé xii-gá ndaha té Pilatú. <sup>12</sup> Te nduu-ǎ<sup>n</sup> ñǐ tnàhá tnúhu té Pilatú ndíhi té Hèrodés, chi cùu úhú iní tnàhá-güedě ní cùu.

*Càchí-güedé sá cáhni-güedě Jèsús*

*(Mt. 27:15-26; Mr. 15:6-15; Jn. 18:39-19:16)*

13 Te té Pilatú ní nadatàcá-dé nchaa cue téé cùu dútú cùnùu ndìhi dava-gá cue téé cùnùu, ndìhi nchaa ñáyiú ñuú-án, 14 te ní xáha<sup>n</sup>-dě:

—Nchòhó ndécá-ndó tǽ-a véxi ní taxi cuèndá-ndó-dě iha, te cǎchí-ndó sǎ ìo dusa<sup>n</sup> quide ñáyiú cuèndá nchaa sá dánèhé ñáhá-dě xií-yu, te núú-ndó ndùcu tnúhu-í núú-dě nùu ná ní quide-dé. Dico yúhú cùtnùní iní-í sá ñà túú nì ì<sup>n</sup> cuèchi-dé dàtná cǎhá<sup>n</sup>-ndó-ǎ<sup>n</sup>. 15 Te cuèi té Hèrodés òu-ni duca<sup>n</sup> cǎhá<sup>n</sup>-dé sá ñà túú cuèchi-dé nùu ní techi<sup>n</sup> ñaha tucu-dé cuándixi-dé iha. Te vitna sa ní cutnùní iní-ó sǎ ñà túú tàú-xi cahni-o-dé chi ñà túú cuèchi ní quide-dé. 16 Te na dándoho-ni-í-dé te dàcácu-í-dé —cǎchí-dé xáha<sup>n</sup>-dě xií-yu.

17 Te ndì tnahá nduu vico pascuá te dacuítíi sǎ dàcácu té Pilatú-án ì<sup>n</sup> cue téé yìhi vecaá, chi duca<sup>n</sup> tnàhí quide-dé. 18 Dico nchaá-yu ní cuáá-yu, te xáhǎ<sup>n</sup>-yu xii-dé:

—¡Queñuhu téé nàni Jesús-án, te cahni-n-dě! ¡Te dàcácu-n tǽ Barrábás! —cǎchí-yu xáhǎ<sup>n</sup>-yu xii-dé.

19 Te té Barrábás-án ñǎ sanu ichi-dé ñáyiú ñuú ingá ichi, te ní ngúíta-yu ndìhi-dé ní cuu úhú iní-yu cue téé cùchiu<sup>n</sup>, te ní sahani-dé ndíyi núu xǎ<sup>n</sup> ní chihi ñaha-güedě vecaá xii-dé. 20 Te té Pilatú cuìní-dé dàcácu-dé Jèsús nùu xǎ<sup>n</sup> cǎhá<sup>n</sup> ndìhi ñaha tucu-dé xií-yu ni cùu, 21 dico uu<sup>n</sup>-gá níhi ní cuáá-yu, te ní xáhǎ<sup>n</sup>-yu xii-dé úú xito:

—¡Cata caá-dé núu cùrúxí! ¡Cata caá-dé núu cùrúxí! —cǎchí-yu xáhǎ<sup>n</sup>-yu xii-dé.

22 Te xito cuu úní ní xáha<sup>n</sup> tǽ Pilatú:

—¿Te ná cúú cuèchi ní quide-dé te núu duca<sup>n</sup> cuìní-ndó cǎda-í-dé-i? Te yúhú cùtnùní iní-í sá ñà túú cuèchi ni quide-dé nùu xǎ<sup>n</sup> ñà túú tàú-xi

cahni-o-dě, te na dàndoho-ni-í-dé te dàcácu-í-dé — cächí-dé xǎha<sup>n</sup>-dě xií-yu.

<sup>23</sup> Dico níhi-ni cǎhá<sup>n</sup>-yu xǎhǎ<sup>n</sup>-yu sá ná cǎta caa ñaha-dé xii-gǎ núú cùrúxí, te ñáyi-á<sup>n</sup> ndìhi nchaa cue tée cùu dútú cúnùu xícáhá<sup>n</sup> níhi-güedé ndìhí-yu ndéé ní xínu iní té Pilatú cada-dé nàcuáa cächí iní-yu. <sup>24</sup> Te ní xáha<sup>n</sup>-dě xií-yu sá cúu cǎda-dé nàcuáa xǎhǎ<sup>n</sup>-yu. <sup>25</sup> Te duca<sup>n</sup> te ní dácácu-dé té Barrábás tée ní sanu ichi ñáyi ñuú ingá ichi, te diu-ni-dé ní sahani-dé ndíyi núu xǎ<sup>n</sup> ní xíhi-dé vecaá, te dǎtnùní ní táuchíú<sup>n</sup>-dě cada-güedé Jèsús nàcuáa xǎhǎ<sup>n</sup>-yu.

*Sàta caa-güedé Jèsús núú cùrúxí*

*(Mt. 27:32-44; Mr. 15:21-32; Jn. 19:17-27)*

<sup>26</sup> Te ndéca-güedé Jèsús cuáhá<sup>n</sup> núú cǎtá cǎa ñaha-güedé xii-gǎ, te ichi cuáhá<sup>n</sup>-güedé ndìhi-gǎ ní tñi-güedé ñ<sup>n</sup> tée ñuú Cìrené nání-dě Xímú ñúhú-dě ichi duha cuándixi-dé ní sáhá<sup>n</sup>-dé yucu, te ní dácuídó ñàha-güedé xii-dé cùrúxí nchídó Jèsús, te ní ngüíta nchicú<sup>n</sup>-dé sátá-gǎ.

<sup>27</sup> Te ío cuéhé ñáyi nchícú<sup>n</sup> ñáhá xii-gǎ cuáhá<sup>n</sup>, te vǎi ñáyi dǎhí ío níhi ndàhí-yu sá ndìhú iní-yu cuendá Jèsús. <sup>28</sup> Te Jèsús ní nchócótó-gǎ núú-yu, te ní xáha<sup>n</sup>-gǎ:

—Nchòhó ñáyi dǎhí ñuú Jerusálén, vá ndàhyú-ndó cuendá-í chí ndàhyú cuendá méé-ndó ndìhi cuendá déhe-ndo. <sup>29</sup> Chi sáá nduu quèsaha ñáyi: “Sá vǎha táhú nchaa ñáyi ñá túú càcu déhe-xi, ndìhi nchaa ñáyi vátá quìní-gǎ cuhu<sup>n</sup> déhe-xi, chi ni ñà túú xìní-yu dacadí-yu”, duha quesàhá-yu. <sup>30</sup> Te dàvá-á<sup>n</sup> cǎñaha ñáyi xii

nchaa tɪndúú ndihɪ nchaa núú xìquí: “Chí tácu<sup>n</sup> ngónchihɪ ñaha-ndo xì-ndí”, duha cúñahá-yu. <sup>31</sup> Te núú yúhú téé quide ndáá duha quide ñaha-güedé xii-í vitna, te ndèé-gá cada-güedé nchaa ñáyiú ndècu ichi cuehé ichi duha —càchí-gá xáha<sup>n</sup>-gǎ xii-yu.

<sup>32</sup> Te ndèca tucu-güedé úú tnàhá cue téé ndècu ndisa cuéchi-xi cuáhá<sup>n</sup> cuendá cahni ñaha-güedě xii-güedé ndihɪ Jèsús. <sup>33</sup> Te òré ní quexìo-güedé ndihɪ-gá #<sup>n</sup> xichi núú nání Yìquí Díquí Ndǐyi, te xía<sup>n</sup> nǐ sata caa ñaha-güedě xii-gá núú cùrúxí, ndihɪ úú cue téé ndècu ndisa cuéchi-xi-á<sup>n</sup>, te #<sup>n</sup>-dé ní sata caa-güedé xio cùha-gá te ìngá-dé ní sata caa-güedé xio dàtni-gá ñu-ni núú cùrúxí tucu. <sup>34</sup> Te ní xáha<sup>n</sup>-gǎ xii Tátá-gǎ Dútú Ndiöxí:

—Táu, cada càhnu iní sá quidé-güedě, chi ñá túú cùtnuní iní-güedé ná cúú sǎ quidé-güedě —càchí-gá xáha<sup>n</sup>-gǎ.

Te cue téé cùu sandadú ní xito ndéé-güedé nǔu ndědacàa-güedé cuu cuendá-güedé dóó-gǎ. <sup>35</sup> Te nchaa ñáyiú xǐndecu-á<sup>n</sup> ndéhě-yu nàcuáa quide-güedé Jèsús, te nchaa cue téé cùnuu ní cudíquí ndeé ñáhá-güedě xii-gá, te ní xítnàha-güedé:

—Te dava ñáyiú ní ndacu-dé ní dácăcu nihnu-dé, te vitna na dácăcu nihnu-dé méé-dě, te núú ndisa sá Crístú Yaá ní tendaha Yǎ Ndiöxí véxi ñuyíú-a cùu-dé —càchí-güedé xítnàha-güedé.

<sup>36</sup> Te tnàhá cue téé cùu sandadú ní cudíquí ndeé ñáhá-güedě xii-gá, chi ní sándehe yatni-güedé núú tácàa-gá sǎñaha-güedě ndudí íá còho-gá ní cùu, <sup>37</sup> te ní xáha<sup>n</sup>-güedě xii-gá:

—Te núu yòhó cúú-n tée yìndaha ñaha xii ñáyiú isràél, te dàcácu nihnu mee-n —càchí-güedé xǎha<sup>n</sup>-güedé xii-gá.

<sup>38</sup> Te ní taxi ndecu-güedé ì<sup>n</sup> sá ndèé lètrá ndàa díquí-gǎ te ndèé úní núú tnùhu, tnúhu griégú, ndihi tnúhu làtín, ndihi tnúhu hèbreú, te duha quèe-xi ndi nuní núú tnùhu-á<sup>n</sup> “Tée-a cùu-dé tée yìndaha ñaha xii ñáyiú isràél”, duha quèe-xi.

<sup>39</sup> Te ì<sup>n</sup> tée ndècu ndisa cuèchi-xi, tée ní sata caa-güedé dǎñi-gá xǐcuèhé ñáhá-dě xii-gá, te xǎha<sup>n</sup>-dě:

—Te núu yòhó cúú-n Crístú Yaá ní tendaha Yǎ Ndiǒxí véxi ñuyíú-a, te dàcácu nihnu mee-n, te dàcácu nihnu ñaha xii nchúhú tnàhá-ndí tucu —càchí-dé xǎha<sup>n</sup>-dě xii-gá.

<sup>40</sup> Dico ingá tée cùndihi-dé tée tàcaa ingá xio dǎñi-gá ní tenáa ñáhá-dě xii-dé, te xǎha<sup>n</sup>-dě:

—¿Te náa ñá túú ndàcu iní-n Yǎ Ndiǒxí vitna duha càa-o ndoho-o ndihi tée nàni Jesús-a ñǎ? <sup>41</sup> Chi nchoo tàú ndisa-o sǎ dúhá ndòho-o nacháhu-o cuèchi-o, dico Jèsús-a chi ñá túú cuèchi-dé —càchí-dé xǎha<sup>n</sup>-dě xii tée tàcaa ndihi-dé-á<sup>n</sup>.

<sup>42</sup> Te dǎtnùní ní xáha<sup>n</sup>-dě xii-gá:

—Jèsús, ndacu iní ñáhá-n xii-í òré ná quèxi-n taxi tnuní-n ñuyíú-a —càchí-dé xǎha<sup>n</sup>-dě xii-gá.

<sup>43</sup> Te Jèsús ní xáha<sup>n</sup>-gǎ:

—Na càchí tnúhu ndáá-í xii-n sǎ méi ndùu vitna cundecu ndihi ñaha-í xii-ñ núú nǐ nduu táhù-í cundecu-í —càchí-gá xáha<sup>n</sup>-gǎ xii-dé.

*Ní xíhí Jèsús*

*(Mt. 27:45-56; Mr. 15:33-41; Jn. 19:28-30)*

<sup>44</sup> Te òré ní cuu cuádava nduu. Te ní cunee nihí ñuyíú, te duca<sup>n</sup>-ni càa ní cuu ndéé caá úní sacuaa.

45 Chi ñá túú-gă ní dàyehe nchíanchii te ní ndátá dđó cúú còrtiná veñúhu càhnu sá ïo cùnuu ní quée dava ndáá. 46 Te níhi ní cáhá<sup>n</sup> Jèsús, te xáha<sup>n</sup>-gă xii Tătá-gă Dútú Ndiöxí:

—Táu, naquehe<sup>n</sup> cuèndá-n espíritú-í —càchí-gă xáha<sup>n</sup>-gă xii Tătá-gă.

Te tnúhu-ná-á<sup>n</sup> ñ cáhá<sup>n</sup>-gă te ní xíhí-ni-gă.

47 Te òré ní xiní téé cùu capitá<sup>n</sup> sá dúcá<sup>n</sup> ñ cuu, te ní ndacu iní-dé Yă Ndiöxí, te ní cachí-dé:

—Sá ndáá ndisa sá tée-a cùu-dé ì<sup>n</sup> téé ío quide ndáá ndécú ñùyíú-a ni cùu —duha ní cachí-dé.

48 Te chitu ñăyiu ní tacá xía<sup>n</sup> chi cuení-yu cundèhé-yu nása cada-güedé Jèsús. Te sátá ñ yáha ní xiní-yu nàcuáa ní quide ñaha-güedë xii-gă, te ní ndihí-yu ní ndaca ta cání-yu pèchú-yu cuánuhú sá ndihú iní-yu. 49 Dico ndècu tnahá cue ñáyiu xini tnahá ndihi Jesús, ndihi ñáyiu dñí ní chinchícú<sup>n</sup> ñháa xii-gă ndéé distritú Galileá, te ñáyiu-á<sup>n</sup> xica-ni xixínutñi-yu xíndéhě-yu nchaa nàcuáa ní quide ñaha-güedë xii-gă.

### *Chindúxi-güedé Jèsús*

*(Mt. 27:57-61; Mr. 15:42-47; Jn. 19:38-42)*

50 Te ndècu ì<sup>n</sup> téé ñuú Arimàteá nání-dě Chèé, te ñuú-á<sup>n</sup> yíndèhu-xi distritú Jùdeá, te ío váha iní-dé te quide ndáá-dé núú Yă Ndiöxí, te tnahá-dé cúú-dě chiu<sup>n</sup> te ní xíndecu-dé jùndá cue téé israél. 51 Te ñá ní tnahá tnahí iní-dé nàcuáa ní cáhá<sup>n</sup>-güedé núú jùndá nàcuáa cada-güedé Jèsús. Te téé-á<sup>n</sup> ndétú-dě sáá nduu ndíhu ndaha ñaha Yă Ndiöxí xii-dé ndihi ñáyiu. 52 Te téé-á<sup>n</sup> ñ sáhá<sup>n</sup>-dé núú tē Pilatú te ní xáha<sup>n</sup>-dě sá ñuu vá cùndèe iní-dé dañá-dě chindúxi-dé yiqui cùnú Jèsús. Te té Pilatú-á<sup>n</sup> ñ



sáha-dé tnúhu. <sup>53</sup> Te ní nunehe-dé yiqui cùñú-gá núú cùrúxí, te ní chidúcú<sup>n</sup>nuu-dé ñ<sup>n</sup> dóó cuixí<sup>n</sup>, te ní chihi-dé ñ<sup>n</sup> yaú nchìi yiqui naha càva, te vátá yõo ñ<sup>n</sup>-gá nguíndǔxi yaú-á<sup>n</sup>. <sup>54</sup> Te cùu-xi nduu vispré nduu ndètatú ñáyiú, núu xǐquide túha-ná-yu sá cúú ìngá nduu.

<sup>55</sup> Te nchaa ñáyiú dìhí ní chinchícú<sup>n</sup> ñáhá xìi Jesús ndéé distrítú Galileá nděndàhá-yu té Chéé ní sáhá<sup>n</sup> núú nchìi yaú-á<sup>n</sup>, núu ní xiní-yu nàcuáa ní sacá<sup>n</sup>-dé yiqui cùñú-gá xití yaú-á<sup>n</sup>. <sup>56</sup> Te duca<sup>n</sup> te cuánuhú-yu vehé-yu, te ní quide túha-yu acití sàhá<sup>n</sup> tnámí, ndihì pomàdá, te ní ndetatú-yu ìngá nduu-ǎ<sup>n</sup> ñǐ quidé-yu nàcuáa càhá<sup>n</sup> tnúhu Yá Ndiõxí.

## 24

### *Ní ndoto Jèsús*

*(Mt. 28:1-10; Mr. 16:1-8; Jn. 20:1-10)*

<sup>1</sup> Te ndumìngú nehé víhí-ní cuǎhá<sup>n</sup> tucu ñáyiú dìhí núú nchìi yaú ní chihi-güedé yiqui cùñú Jèsús, te nèhé-yu nchaa sá sàhá<sup>n</sup> tnámí ñǐ quide túha-yu-á<sup>n</sup> cuǎhá<sup>n</sup>, te tnàhá tucu ñ<sup>n</sup> ùú-gá tnàha dìhí-yu nchìcú<sup>n</sup> ñáhá xìi-yu cuáhá<sup>n</sup>. <sup>2</sup> Te òré ní quexió-yu yuhu yàú-á<sup>n</sup> te ní xiní-yu sá yǔú ndèdí ñ<sup>n</sup> xio-ná ndécú, <sup>3</sup> te ní quíhu-yu xití yaú-á<sup>n</sup>, dico ñá túú-gǎ yiqui cùñú Jèsús yíhí. <sup>4</sup> Te ñá ní cùtnuní tnàhí iní-yu ndéé ichi cuáhá<sup>n</sup> yiqui cùñú-gá, te ní xiní-yu úú espíritú xínú cuèchi núú Yǎ Ndiõxí xǐnutñ<sup>n</sup>-xi dìñí-yu te xǐxíhnu-xi dóó chàhnchí. <sup>5</sup> Te ní yùhú-yu te ñá túú ní cùyí<sup>n</sup>-yu cundèhé-yu cue espíritú-á<sup>n</sup>, te cue espíritú-á<sup>n</sup> ñǐ xáha<sup>n</sup>-xi xìi-yu:

—¿Ná cuendá nándùcu-ndo Jesús Yaa ndécú vǐvú núú yǐndǔxi ñáyiú ní xǐhí-i? <sup>6</sup> Te ñá túú-gǎ yǐqui cùñú-gǎ ndécú ìha chi sa ní ndoto-gǎ, te chí dándàcu iní nàcuáa ní cáhá<sup>n</sup>-gǎ cútñàhá ní xǐndecu-ndo ndìhi-gǎ distritú Galileá, <sup>7</sup> chi ní cachí-gǎ sá méé-gǎ cúú-gǎ ñaní tnáhá-ndó nchàa-ndo, te dacuití cuǎha cuendá ñáhá-güedě xii-gǎ núú cuè téé ndècu ichi cuehé ichi duha, te cata caa ñaha-güedě xii-gǎ núú cùrúxí, te núú cùrúxí-á<sup>n</sup> cuú-gǎ dico nduu úní sá cùú-gǎ te ndoto-gǎ, duha ní cachí-gǎ xii-ndo.

<sup>8</sup> Te òré-á<sup>n</sup> ñí ndacu iní-yu tnúhu ní cáhá<sup>n</sup> Jèsús. <sup>9</sup> Te sátá dúcá<sup>n</sup> te ní naquehé<sup>n</sup>-yu ichi cuánuhú-yu, te ní caní-yu cuendú núú ndì úxí ì<sup>n</sup> cue téé ní táúchíú<sup>n</sup> Jèsús cáhá<sup>n</sup> tnúhu-gǎ, ndìhi núú dàva-gǎ ñáyiú. <sup>10</sup> Te ñáyiú duca<sup>n</sup> nàha tnúhu cuánuhú núú-güedě-á<sup>n</sup> cúú tǎ Màriá Magdalená, ndìhi tá Juáná, ndìhi tá Màriá nǎná tǎ Jàcobó, ndìhi dava-gǎ ñáyiú dǐhí. <sup>11</sup> Dico cue téé-á<sup>n</sup> ñí sani iní-güedé sá dícó cáhú ìní-yu tnúhu xǎhǎ<sup>n</sup>-yu xii-güedé ñuu ñá túú ní sàndáá iní-güedé nàcuáa ní xǎhǎ<sup>n</sup>-yu.

<sup>12</sup> Dico té Pèlú ní quee-dé xínú-dě cuáhá<sup>n</sup> cuándéhé-dě yaú núú ñí chihi-güedé yǐqui cùñú Jèsús, te ní sáá-dé te ní ngáundeyi-dé xító ñihni-dé xítí yaú-á<sup>n</sup> te ní xiní-dé sá méé-nǎ dóó ñí xǐducú<sup>n</sup> nuu-gǎ yúcu ì<sup>n</sup> xio, te ío ní cuñúhu-dé sá dúcá<sup>n</sup> ñí cuu, te ní natnì<sup>n</sup>-dé ichi cuánuhú-dé vehe núú xǐndecu-güedé.

*Ichí ñúú Emàús*  
(Mr. 16:12-13)

13 Te ñuú-ni nduu-ǎ<sup>n</sup> ñúhú úú cue téé ní xica cuu ndíhi Jèsús ichi cuáhá<sup>n</sup>-güedé ñ<sup>n</sup> ñuú nání Emàús, te sàcúhu<sup>n</sup>-güedé dàtná úú òré ichi ndéé ñuú Jerusàlén, te ndéé ñuú Emàús. 14 Te ta ndàtnúhu-güedé cuáhá<sup>n</sup> nchaa nàcuáa ní cuu, 15 te ñini dùca<sup>n</sup> xícáhá<sup>n</sup>-güedé, te Jèsús ní natnahá ñáhá-gǎ xii-güedé te ndèca tnahá-gá ndíhi-güedé cuáhá<sup>n</sup>. 16 Te cuéi ndèhe ñaha-güedé xii-gá dico dàtná ñ<sup>n</sup> sá ndèdí núú-güedě, chi ñá ná quíni ñáhá-güedě xii-gá ní cùu. 17 Te Jèsús ní xícá<sup>n</sup> tnúhú-gǎ núú-güedě, te xáha<sup>n</sup>-gǎ:

—¿Ná tnúhu xícáhá<sup>n</sup>-ndó ñùhu-ndo ichi núu duca<sup>n</sup> ño cùu ndiyí-ndó-í? —càchí-gá xáha<sup>n</sup>-gǎ xii-güedé.

18 Te ñ<sup>n</sup> téé nàni Cleofás ní xáha<sup>n</sup>-dě xii-gá:

—¿Te ná cuèndá nchaa ñáyiú íchí ñí sáá ñuú Jerusàlén xíní-yu nchaa nàcuáa ní cuu, te ñ<sup>n</sup> ñi-ná yòhó ñá túú xíní-n-í? —càchí-dé xáha<sup>n</sup>-dě xii-gá.

19 Te ní xáha<sup>n</sup>-gǎ xii-güedé:

—¿Te ná ní cuu-i? —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Cuèndá Jèsús téé ñuú Nazàrét càhá<sup>n</sup>-ndí, chi téé-á<sup>n</sup> cúú-dě ñ<sup>n</sup> téé càhá<sup>n</sup> tnúhu Yá Ndiöxí, te ío váha ndùu tnúhu càhá<sup>n</sup>-dé ní cùu, te quide-dé sá vǎ yòo tnàhí ndàcu cada nacuaa cudíí ñí Yá Ndiöxí ndíhi ñáyiú ní cùu. 20 Te cue téé cùu dútú cúnùu, ndíhi cue téé cùnuy taxi tnuní ñáhá xii-ndí ní sáha cuèndá ñáhá-güedě xii-dé núú tē Pilatú te ní sata caa ñaha-güedě te núú cùrúxí-á<sup>n</sup> ñí xíhí-dé. 21 Dico vitna sa ní cuu úní nduu sá ñí xíhí-dé, te nchúhú ní sani iní-ndí sá tē-á<sup>n</sup> dàcácu nihnu ñaha-dě xii nchúhú ñáyiú isràel núú nchàa tnúndòho tnúhu

ndàhú ndécú-ndí. <sup>22</sup> Dico ío cùñúhu-ndí cúú, chi ì<sup>n</sup> ùú ñáyiú dìhí ní tuha ñaha xii-dé ndécú ndìhi-ndí ní sáhá<sup>n</sup> ngotó-yu ndéxuehe tàcuíhndá-gá yaú núú nǐ chihi-güedé yìqui cùñú-dé, <sup>23</sup> te ní nasáá-yu càchí-yu xii-ndí sá ñà túú-gǎ yìqui cùñú-dé yíhí xítí yaú-á<sup>n</sup>. Te ní xiní-yu espíritú xínú cuèchi núú Yá Ndiöxí, te ní xáha<sup>n</sup>-xi xii-yu sá ndécú vǐvú-dě. <sup>24</sup> Te sátá dúcá<sup>n</sup> te ì<sup>n</sup> ùú cue téé cùndìhi-ndí ní sáhá<sup>n</sup> ndéhe-güedé yaú-á<sup>n</sup>, te ní xiní-güedé sá ndáá cúú-xí nchàa tnúhu ní cáhá<sup>n</sup> ñáyiú dìhí-á<sup>n</sup>, dico ñá túú ní xini-güedé téé-á<sup>n</sup> —càchí-güedé xǎha<sup>n</sup>-güedě xii-gá.

<sup>25</sup> Te Jèsús ní xáha<sup>n</sup>-gǎ xii-güedé:

—Ío cùmání sǎ xini tnùnín-dó, chi ío cuèé sàndáá iní-nó tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiöxí ndéé sanaha! <sup>26</sup> ¿Te náa ñá túú tàú-xi sá ndóhó Crìstú òré cùmání-gǎ sáá nduu ndàa-gá andiú núú ndécú Dütú Ndiöxí cundecu-gá-ǎ<sup>n</sup>? —càchí-gá xáha<sup>n</sup>-gǎ xii-güedé.

<sup>27</sup> Te ní ngüíta-gá xáha<sup>n</sup>-gǎ nàcuáa quèe-xi nchaa tnúhu càhá<sup>n</sup>-xi núú tütú Yá Ndiöxí cuendá-gá, te díhna-gá ní cáhá<sup>n</sup>-gá nàcuáa ndùu nchaa tnúhu yòdo tnuní núú tütú ndíi Moisés, te dǎtnùnín ní cáhá<sup>n</sup>-gá nàcuáa ndùu nchaa tnúhu yòdo tnuní núú tütú nchaa cue téé ní xóo cáhá<sup>n</sup> tnúhu Yá Ndiöxí ndéé sanaha.

<sup>28</sup> Te òré ní quexìo-güedé yuhu ñùú núú cuahá<sup>n</sup>-güedé-á<sup>n</sup>, te Jèsús ní quide-ni-gá sá yǎha-gá quíhí<sup>n</sup>-gá ingá xichi ni cùu. <sup>29</sup> Dico ní cáhá<sup>n</sup> ndàhú-güedé núú-gǎ sá quéndöo-gá xía<sup>n</sup> ndetatú-gá ndìhi-güedé, te xǎha<sup>n</sup>-güedě xii-gá:

—Quendóo ndihi ñaha xii-ndí iha ndetatú-n chi sa ní cuaa, te tnavíí cundiqui<sup>n</sup> —càchí-güedé xăha<sup>n</sup>-güedě xii-gá.

Te xía<sup>n</sup> cáá ì<sup>n</sup> vehe cuánguihu-güedé ndetatú-güedé ndihi-gá. <sup>30</sup> Te òré sa yìhi-güedé mèsá ndihi-gá cùdini ndihi ñaha-güedé, te ní quehe<sup>n</sup>-gá pàá te ní ndacá<sup>n</sup> táhú-gă núú Yă Ndiöxí, te ní táhú cuèchi-gá te dătnùní ní dácăhñu ñaha-gă xii-güedé. <sup>31</sup> Te òré-á<sup>n</sup> nǐ naquiní ñáhá-güedě xii-gá ní cùu, dico uu<sup>n</sup>ni ní ndónúhú-gă. <sup>32</sup> Te ní xítnàha-güedé:

—Te ndáá sá sǔúní cùdíí ìní-ó òré tá ndàtnúhu-o ndihi Jesús véxi ichi, te ta dānehé ñáhá-gă xii-o nchàa nacuáa quèe-xi tnúhu càhá<sup>n</sup>-xi núú tütú Yă Ndiöxí —càchí-güedé xítnàha-güedé.

<sup>33</sup> Te ñá túú-gă ní xǐndetu-güedé chi ndihi-ni ní natnii-güedé ichi cuánuhú-güedé ñúú Jerusálén, te ní nasáá-güedé núú xǐndecu ndi ùxí ì<sup>n</sup> cue téé ní táuchíú<sup>n</sup> Jèsús cáhá<sup>n</sup> tnúhu-gá, ndihi dava-gá ñáyiu. <sup>34</sup> Te cue téé xǐndecu-á<sup>n</sup> xăha<sup>n</sup>-güedě:

—Ndáá sá nǐ ndoto Yaá cúú Mèstrú, chi ní xini ñáhá tě Xímú —càchí-güedé xăha<sup>n</sup>-güedé.

<sup>35</sup> Te cue téé ní nasáá-á<sup>n</sup> nǐ cani-güedé cuendú nàcuáa ní cuu ichi, ndihi nàcuáa ní cuu ní naquiní-güedé Jèsús òré ní táhú-gă pàá ní dácăhñu ñaha-gă xii-güedé.

*Jèsús ní quexìo-gá núú xǐndecu cue téé ní xica cuu ndihi-gá*

*(Mt. 28:16-20; Mr. 16:14-18; Jn. 20:19-23)*

<sup>36</sup> Te càhá<sup>n</sup> dúcá<sup>n</sup>-ní-güedě nàcuáa ní cuu ní quexìo Jesús ní ngúnutnì-gá ndéé tnuú-güedé, te xáha<sup>n</sup>-gã xii-güedé:

—Yá Ndiöxí chíndèe ñaha-gá xii-ndo ïo váha cùu iní-ndó ndècu-ndo —cachí-gá xáha<sup>n</sup>-gã xii-güedé.

<sup>37</sup> Te da ní yùhú-güedé, te ní sani iní-güedé sá dicó ì<sup>n</sup> espíritú cúú sã ndéhé-güedé ní cùu. <sup>38</sup> Dico Jèsús ní xáha<sup>n</sup>-gã xii-güedé:

—¿Ná cuendá yùhú-ndó, te sàni ì<sup>n</sup> sani úú iní-ndó-í? <sup>39</sup> Chí cùndèhe ndaha-í ndìhì sáhà-í te quini-ndó nã òu-ni-í. Te chí téndàha ñaha xii-í te cundehe-ndo, te núu ì<sup>n</sup> espíritú ndécú yìquì cuñú-xi dàtná ndécú ndìhì yùhú —càchí-gá xáha<sup>n</sup>-gã xii-güedé.

<sup>40</sup> Te sátá dúcá<sup>n</sup> ñí xáha<sup>n</sup>-gã te ní dánèhé ñáhá-gã xii-güedé ndaha-gá ndìhì sáhá-gã. <sup>41</sup> Te ïo ní cuñúhu-güedé, te ní cudíí ìní-güedé sá ndécú-gã tnuú-güedé dico sàni ì<sup>n</sup> sani úú iní-güedé, te ní xáha<sup>n</sup> Jèsús xii-güedé:

—¿Ndècu ndìhì-ndo luha sá caxí-ó ìha ñá? —càchí-gá xáha<sup>n</sup>-gã xii-güedé.

<sup>42</sup> Te ní sáñaha-güedě xii-gá luha chácá ñí chíhó, ndìhì dítá ñũñú ñùhú ndùdí, <sup>43</sup> te ní quehe<sup>n</sup>-gá te ndèhe-güedé ní xexi-gá. <sup>44</sup> Te dàtnùnì ní xáha<sup>n</sup>-gã:

—Nchaa sá ñí yáha-í-a cùu-xi sá ñí cachí tnúhu-í xii-ndo cùtnáhá ndécú ndìhì ñaha-gá-í xii-ndo, chí ní cachí-í sá dàcuítí cãda-xi nchaa nacuaá càhá<sup>n</sup>-xi núú tütú ndíi Moisés, ndìhì núú tütú ndéé tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiöxí ndéé sanaha, ndìhì núú lìbrú Sãlmú —càchí-gá xáha<sup>n</sup>-gã xii-güedé.

<sup>45</sup> Te òrè-á<sup>n</sup> ñí sáñaha-gă sá xìní tnùnì-güedé, te ní tecú tnùnì-güedé nchaa tnúhu càhá<sup>n</sup>-xi núú tütú Yă Ndiöxí. <sup>46</sup> Te ní xáha<sup>n</sup>-gă xii-güedé:

—Duca<sup>n</sup> ndèé tnuní núú tütú Yă Ndiöxí sá dàcutíí să yǎhú Crìstú cuú-í, te nduu úní ndoto-í. <sup>47</sup> Te ñihí ñuyíú cùténuu tnúhu ní cáhá<sup>n</sup>-í, dico díhna nuu-gă ñuú Jerusàlén ngüíta-yu cacunehe ñàhá-yu xii-í, te cáhá<sup>n</sup>-yu nàcuáa ní dánhé-í-yu, te cúñàhá-yu xii cue ñáyiú sá ná dândixi túu-yu iní-yu sá ñà túú quide váha-yu, te dàñá-yu nchaa ichi cuèhé ichi duha ndècú-yu, te natñí-yu ichi Yá Ndiöxí, te duca<sup>n</sup> te cada càhnu iní-gá nchaa yíca cuèchi-yu. <sup>48</sup> Te vitna nchòhó cuu-ndo cuè téé cáhá<sup>n</sup> ndáá nchaa nàcuáa ní cuu chi ní xìní núú-ndó. <sup>49</sup> Te yúhú tendaha-í Espiritú Yă Ndiöxí quixi cundecu ndihí-ndo, chi duca<sup>n</sup> ñí cachí-gá. Dico chí cündècu-ni ñuú Jerusàlén-á<sup>n</sup> ndèé ná quèxio Espiritú Yă Ndiöxí ngündecu ndihí-ndo cuendá chindee ñàha-xi xii-ndo cada-ndo nchaa nacuáa ní cáhá<sup>n</sup>-í —càchí-gá xáha<sup>n</sup>-gă xii-güedé.

*Jèsús cuándaa-gá andïu*  
(Mr. 16:19-20)

<sup>50</sup> Te Jèsús ní queñuhu ñaha-gă xii-güedé ñuú Jerusàlén ndéca ñàha-gá cuáhá<sup>n</sup> ñuú Bètaniá, te xía<sup>n</sup> ñí ndonehe-gá ndaha-gá núú ññu, te ní xíca<sup>n</sup> táhú ñàha-gá xii-güedé núú Yă Ndiöxí. <sup>51</sup> Te sátá ñí xíca<sup>n</sup> táhú ñàha-gá xii-güedé núú Yă Ndiöxí, te ní quee-gá tnuú-güedé cuándaa-gá andïu. <sup>52</sup> Te ní ngüíta-güedé ní cachí-güedé sá ïo càhnu cuu Jesús, te ní natñí-güedé ichi cuánuhú-güedé ñuú Jerusàlén, te súúní cùdíí ìní-güedé ñúhú-güedé ichi. <sup>53</sup> Te nchaa nduu ní xíndecu-güedé veñúhu càhnu

sá ǎ cùnuu ní ndacá<sup>n</sup> táhú-güedě núú Yă Ndiǎxí,  
te ní cachí-güedé sá ǎ cǎhnu cuu-gá. Duha ní cuu  
dává-á<sup>n</sup>.



**Tnúhu ní cáhá<sup>n</sup> yǎ ndiǒxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

clxx

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

872f7754-0986-5ecd-a059-925a708a6939